

r. sup. 20. pl. 5.





SELECTÆ
DISSERTATIONES
POLEMICÆ
AD TRACTATUM
DE INCARNATIONE.
TOMUS TERTIUS.



ROMÆ. cId.Iccc.LxxI..

Præsidum: ad probatione ..

IMPRIMATUR,

Si videbitur Rmo Patri Mag. Sac. Pal. Apost.

D. Jordani Patr. Antioch. Vicesg.

IMPRIMATUR,

**Fr. Thomas Augustinus Ricchini Ord. Prædic.
Sac. Pal. Apost. Mag.**

DISSERTATIONES

T O M. III.

- I. DE EXISTENTIA MYSTERII INCARNATIONIS
ADVERSUS JUDÆOS ET PAGANOS.
- II. DE NESTORIO ET EJUS HÆRESI EXPOSITIO
HISTORICA, NECNON EJUSDEM HÆRESIS
REFUTATIO.
- III. DE HÆRESI EUTYCHIANA EXPOSITIO HISTO-
RICA, ET EIUDEM HÆRESIS REFUTATIO.
- IV. DE HÆRESI MONOTHELITARUM, ET DE
TESTIMONIIS, ET ARGUMENTIS QUIBUS
REFELLITUR.
- V. DE TERRENO, ET MILLENARIO CHRISTI
REGNO CONTRA CERINTHUM.

INDEX

SECTIONUM, ET ARTICULORUM

Quæstionis de Existentiâ Mysterii Incarnationis .

SECTIO PRIMA.

Quomodo Mysterium Incarnationis existere contra
Judeos comprobetur . Pag. 2

Artic. I. De Oraculo quod Judæ filio moriens Jacob edi-
dit . 3

Artic. II. De Septuaginta Danielis Hebdomadibus . 61

Artic. III. De Vaticiniis Aggai, & Malachie . 96

Artic. IV. De Prophetia Michæ de loco nativitatis Mes-
siae . 113

Artic. V. De Prophetia Isaie, & de Prophetarum & Evan-
gelistarum circa Messiae passionem & mortem
consensione . 118

De variis aliis momentis & indiciis, quibus Messiam
venisse, eumque esse Jesum Christum confir-
matur . 138

SECTIO SECUNDA.

Quomodo adversus Gentiles demonstretur Mysterium
Incarnationis esse peractum . 160

Artic. I. Ex factis Evangelicis, præsertim vero ex Mira-
culis Christi & Discipulorum ejus, hunc esse
a Deo missum astruitur . 161

Artic. II. Ex Resurrectione Christi speciale argumentum
eruitur . 191

Artic. III. De Miraculis, quæ ab Apostolis, eorumque Di-
scipulis, ac primis Fidelibus edita sunt. 200

Artic. IV. Christum esse a Deo missum, ejus Religionis pro-
pagatione ostenditur . 202

DIS-



DISSERTATIO
DE EXISTENTIA
MYSTERII INCARNATIONIS
ADVERSUS JUDÆOS ET PAGANOS .

*Incarnationis existentiam duplex hostium
genus impugnat .*



Primo: Judæi , qui plurium veteris Testamenti Librorum Divinitatem admittentes , atque olim Patribus suis a Deo promissum fuisse liberatorem , quem hebraice vocant... *Messiam* , profitentes , obfirmatis mentibus illum contendunt nondum advenisse .

Secundo : Gentiles , quibus adjungi possunt quotquot Scripturarum inspirationem rejiciunt .

Igitur Disputationem istam in duas partemur Sectiones , in quibus adversus Judæos , & Gentiles seorsim differemus .

A

Sz-

S E C T I O P R I M A .

*Quomodo Myſterium Incarnationis exiſtere
adverſus Judæos comprobetur .*

TOtius controverſiæ cardo adverſus Judæos in his duobus vertitur : 1. an Meſſias venerit ; 2. utrum is ſit Jeſus Chriſtus Religionis Chriſtianæ Auctor . Si enim Judæi eò adducerentur , ut Jeſum tamquam Meſſiam colerent , jam non poſſent ejus Religionem non amplecti , nec dogma Incarnationis reſpuere , quod Chriſtus ipſe docuit , dum ſe Dei Filium prædicavit .

Jam verò , quæ illa duo ſpectant , duobus poſſunt Argumentis abſolvi ; 1. ex Prophetis demonſtrabitur Meſſiam jam veniſſe , & ex iſſdem oraculis evincetur Meſſiam eſſe Chriſtum ; in 2. utrumque ſimul ex variis aliis momentis ſuadebitur ,

C A P U T P R I M U M .

*Meſſiam jamdudum adveniſſe contra Judæos
ex præclarioribus Prophetarum oraculis ,
omiſſis aliis , demonſtratur .*

Tempora adventus Meſſiæ olim Patriarchis promiſſi jam dudum eſſe præterita aſtruitur precipuè ; 1. ex inſigni Vatiçinio Jacobi , Geneſeos 49. 2. ex Prophetia Danielis cap. 9.

cap.9. 3. ex Prophetiis Aggæi, & Malachiæ,
4. ex Michææ & Isaïæ Vaticiniis, atque etiam
ex Testimonio Josephi Hebræi. Sex Articulis
de his omnibus differemus.

ARTICULUS I.

*De Oraculo quod Judæ filio moriens
Jacob edidit.*

Genesis XXXIX. 10.

ORaculum illud his verbis conceptum est:
*Judæ, te laudabunt fratres tui. Manus
tua in cervicibus inimicorum tuorum; adora-
bunt te filii Patris tui. Catulus leonis Judæ;
ad prædam, fili mi, ascendisti. Requiescens
accubisti ut leo, & quasi leona; quis suscitabit
eum? Non auferetur Sceptrum de Judæ, &
Dux de femore ejus; donec veniat Qui mit-
tendus est, & ipse erit Expectatio Gentium.
Ligans ad vineam pullum suum, & ad vitem,
o fili mi, asinam suam. Lavabit in vino stolam
suam, & in sanguine uvæ pallium suum. Pul-
chriores oculi ejus vino, & dentes ejus lacte can-
didiores. Quo de Oraculo multa ex ordine
quærenda sunt. Primum: Utrum hoc oracu-
lum ad Messiam pertineat, adventusque illius
in Mundum prædictionem contineat? Secun-
dum: Utrum hoc Oraculum in Jesu completum
sit? Tertium: Utrum ad solam Tribum Judæ,
vel ad totam Gentem Judaicam sit referendum?*

Dux priores Quæstiones contra Judæos : Posterior inter Christianos Interpretes disceptatur .

P R O P O S I T I O I.

*Hoc Oraculum , non auferetur Sceptum
de Juda &c. venturi Messie
prædictionem continet .*

Probatur primo ex communi Ecclesiæ consensu , cui Christus & Scripturas Sanctas , & earum intelligentiam , easque interpretandi auctoritatem concedidit . Ex Patribus , quorum etsi variæ sint ac discrepantes hujus Oraculi interpretationes , in eo tamen consentiunt , & venturi Messie prædictionem illud continere , & ad Christum Jesum referri , in eoque completum esse . Ita *Origenes* Homilia 17. in Genesim ; *Sanctus Justinus* in Dialogo cum Tryphone ; *Eusebius Cæsarensis* , *Demonstrationis Evangelicæ* Lib.8. Cap.1. & Lib.1. *Historiæ Ecclesiasticæ* Cap.6. *S. Athanasius* Lib. De Incarnatione Verbi ; *S. Ambrosius* Lib.3. in Evangelium *S. Lucae* , & in Libello De Benedictionibus Patriarcharum ; *S. Joannes Chrysostomus* Homilia 67. in Genesim , *S. Hieronymus* in Cap.1. Sophoniæ . *S. Augustinus* Lib.16. *De Civitate Dei* , Cap.41. & Lib.12. contra *Faustum* , Cap.42. *S. Cyrillus Alexandrinus* Lib.8. contra *Julianum* ; *Theodoretus Quæstione* 110. in Genesim , &c.

Probatur secundo ex Hebræo Textu , cu-
jus

MYSTERII INCARNAT.

5

jus hæc ad litteram versio est : „ Non recedet
 „ Sceptrum a Juda , & Legislatoꝝ de inter pe-
 „ des ejus , usque quo veniat Siloh ; & erit
 „ ei obedientia populorum . „ Vocem autem
Siloh Messiam significari , consentiunt Chaldaei
 Paraphrastæ , puta Thargum *Onkelosi* , Hiero-
 solymitanum , & *Jonathanis* . Thargum *Onke-*
losi sic habet : „ Non auferetur habens Princi-
 „ patum a domo Judæ ; neque Scriba a filiis
 „ filiorum ejus , donec veniat Messias , cujus
 „ est Regnum ; & ei obedient populi . „ Thal-
 mud Babylonicum , Tractatu *Sanhedrin* , Cap.2.
 „ Quodnam (inquit) nomen Messiae ? Qui de
 „ domo R. Schilæ dixerunt , Siloh nomen
 „ ejus , quia dicitur : donec venerit Siloh . „
 Ita etiam *Beresith Rabba* & *Ketanna* , R. *Da-*
vid Kimchi , R. *Abraham Aben Ezra* , R. *Sal-*
omon Jarchi , & R. *Joseph* in *Ikkarim* sive
Fundamentis Fidei . Eadem est persuasio eo-
 rum , qui Babylonicæ Captivitatis Principem ,
 quem *Æchmalotarcham* appellant , magnis Ju-
 dæorum copiis Bagdadi præfectum fabulantur ,
 & de Tribu *Juda* semper eligi asserunt , inde-
 que Oraculi veritatem peti censent ; quippe
 nondum ablatum esse Sceptrum de Tribu *Juda* ,
 nec proinde Christum venisse , pertinaciter con-
 tendentes . Qua de re pluribus disseruit *Be-*
niamin Tudelensis in *Itinere* , & R. *Abraham*
Zachutus in *Libro Juchasin* . Quidam vero
 Messiam geminum hoc Jacobi Oraculo promif-
 sum opinantur ; primum *Moysem* , alterum
 Messiam proprie dictum , quem Judæi expe-

stant . Ita R. Bechai in *Genesim* , & in Lib. quem *Mensam Quadratam* inscripsit .

Probatur tertio ex 70. Interpretibus , quos illud Oraculum *Jacobi* de Messia intellexisse , eorum Versio manifestum facit : *Non deficiet Princeps ex Juda , & Dux de femoribus ejus , donec veniant quæ reposita sunt ei . Et ipse est expectatio Gentium* . Id est , donec impleantur Dei promissiones , quibus futurum spopondidit , ut in *Abrahami* , *Isaaci* , & *Jacobi* semine benedicerentur omnes cognationes terræ , & *Reges de lumbis Jacob* egrederentur ; ut explicat *Eusebius* , *Lib.8. Demonstrationis Evangelicæ Cap.1.* Syrus quoque & Arabs Interpretes de Messia Regno Vaticinium istud intellexerunt . Syrus : „ Non deficiet Sceptum „ de Juda , & Expositor de inter pedes ejus , „ donec veniat is , cujus illud est , & ipsum „ expectabunt gentes . „ Arabs vero : „ Non „ præteribit virga de Juda & Legislator de sub „ Imperio ejus , donec veniat is cujus ipse est , „ & ad quem congregabuntur Populi . „ Sed manifestius adhuc Textus Samaritanus , ita redditus : „ Non auferetur Sceptum de Juda , & „ Dux de vexillis ejus , donec veniat Pacificus ; & ad ipsum congregabuntur Populi . „ Quam recte enim id Messia conveniat , constat ex *Davide* , qui de eo prædixit : *Orietur in diebus ejus justitia & abundantia pacis , donec auferatur Luna .* (*Psalmo 61.*) & ex *Isaia* , qui hæc de eo vaticinatus est : *Vocabitur nomen ejus Admirabilis , Consiliarius , Deus , Fortis , Pater*

MYSTERII INCARNAT. 7

*Pater futuri sæculi , Princeps pacis . Multipli-
cabitur ejus Imperium , & pacis non erit finis ,
(Isaïa 9.) De eo quoque prædicit Michæas :
Et erit iste pax , (Michææ 5.) & Zacharias :
Et loquetur pacem Gentibus .*

Confirmatur ex Latina Versione , quæ sic
habet : *Non auferetur Sceptrum de Juda , &
Dux de femore ejus donec veniat Qui mittendus
est .* Quæ Versio apprime respondet Hebræo
Textui , *Siloh* enim *Mittendum* significat , seu
Missum , quod ex nono Capite Evangelii *San-
cti Joannis* etiam probatur : *Vade , lava in
Natatoria Siloe (quod interpretatur Missus .)*
Hæc porro in Messiam quadrare manifestum
est . Accedunt ad hujus argumenti robur testi-
monia Scripturæ Sacræ , in quibus nomen *Ventu-
rus* , quod eandem vim habet ac *Mittendus* ,
Messiæ ceu proprium nomen tribuitur , *Mat-
thæi 2. 3. Tu es qui venturus es , an alium ex-
pectamus ? Joannis 4. 25. Scio quia Messias ve-
nit , (qui dicitur Christus .) Cum ergo venerit
ille , nobis annuntiabit omnia .* Ad Hebræos 10. 7.
*Adhuc enim modicum : Qui venturus est veniet ,
& non tardabit : Quod ex secundo Capite Ha-
bacuch depromptum est .*

Quarto , facile refelluntur Judæi recentio-
res , qui hoc Oraculum ad Messiam pertinere
negant . Vel enim id referunt ad Urbem *Siloh*
& ad *Davidem* , vel ad *Saulem* , vel ad *Jero-
boamum* , vel ad *Nabuchodonosorem* . At quod-
vis horum commentorum absurdissimum est .
Primi namque verba hæc , *Donec veniat Siloh* ,

interpretantur, *Donec desinat Siloh*: Ista autem, *Non auferetur Sceptrum de Juda*, idem significare volunt, ac *Præstantia Judæ in Regnum dominatum mutabitur*; atque hunc esse totius loci sensum: Dignitas Tribus *Juda* & *Præstantia* in Regnum mutabitur, cum *Siloh* Arcæ sedes esse desinet. Verum istud commentum & cum historiæ veritate, & cum manifesta ipsius Jacobæi Vaticinii sententia pugnat. Falsum enim est *Davidem* tunc Regem creatum fuisse, cum Arca de *Siloh* sublata est: Tunc enim *Saul Davidis* Decessor nondum Rex fuerat constitutus. Præterea, prædicit *Jacob*, Non ablatum iri Sceptrum de *Juda*, donec venerit *Siloh*, quod significat *Siloh* antea non venisse. Rabbinii vero tunc *Judam* capeßitutum Sceptrum ajunt, cum desinet *Siloh*, quod significat jam ante venisse *Siloh*.

Non minus hallucinantur, qui ad *Saulem* referunt, qui in Urbe *Siloh* Rex a *Samuele* consecratus sit, ut hæc sit loci sententia: Non auferetur Sceptrum de *Juda*, donec veniat tempus quo *Saul* in *Siloh* Rex inaugurabitur. Sed hæc explicatio cum historiæ veritate pariter pugnat. Non enim in *Siloh*, sed in *Ramathain Sophim* unctus est *Saul* a *Samuele*, in *Maspha* vero Rex ab eo renuntiatus est, ut constat ex 1. *Regum* cap. 9. & 10. Deinde, Sceptrum non obtinuit *Juda* usque ad id tempus; sed tunc demum cum *David* Rex creatus est. Inep- ta itaque est hæc expositio: Non auferetur Scep- trum de *Juda*, donec *Saul* in Regem ungatur. Cer-

MYSTERII INCARNAT. 9

Certe Imperium ex Tribu Juda translatum ad *Saulem*, & tunc Sceptrum *Juda* defecisse insaniunt qui affirmant; cum proxime ante *Saulem* Hebraici Populi Principatus fuerit penes *Samuelem*, & *Heli*, aliosque Judices, qui *Judæ* tribules non fuerunt, & post *Saulem* Imperium in Tribu Juda fundatum sit per *Davidem*, in ejusque posteris per annos ferme quingentos manserit. Tantum abest ut in *Saule* defecerit.

Æque absurda eorum expositio est; qui Jacobæum Vaticinium ad *Jeroboamum* referunt, quasi in Siloh Regem creatum; non enim in Siloh, sed in Sichem Rex creatus est, ut constat ex 3. *Regum* Cap. 12. Deinde nec *Sauli*, nec *Jeroboamo* convenit character ille, quo *Jacob* eum designat, qui Mittendus est: *Et ipse erit Expectatio Gentium*.

Longe etiam a veritate aberrant, qui *Nabuchodonosorem* hoc *Jacobi* Oraculo prænuntiatum volunt, quem Missum esse a Deo ad punienda scelera Judæorum *Jeremias* & *Ezechiel* Propheta testantur, & qui Judaicum Imperium Tribui Juda eripuit, capto *Sedecia* & Babylonem deportato. Qua enim ratione *Nabuchodonosorem* *Expectationem Gentium* dictum esse ostendent, qui potius execratio gentium dicendus sit secundum illud Is. 14. „ Su-
„ mes parabolam istam contra Regem Baby-
„ lonis, & dices: Quomodo cessavit exactor,
„ quievit tributum? Contrivit Dominus bacu-
„ lum impiorum, virga dominantium, cæ-

„ dentem Populos in indignatione , subjicien-
„ tem in furore Gentes , persequentem crude-
„ liter . Conquievit & filuit omnis terra , ga-
„ visa est & exultavit , & abietes quoque læ-
„ tatae sunt super te , & cedri Libani : Ex quo
„ dormisti, non ascendet qui succidat nos . Infer-
„ nus subter conturbatus est in occursum adven-
„ tus tui, suscitavit tibi gigantes . Omnes Prin-
„ cipes terræ surrexerunt de foliis suis , omnes
„ Principes Nationum . Universi respondebunt,
„ & dicent tibi . Et tu vulneratus es sicut & nos,
„ nostri similis effectus es . Detracta est ad in-
„ feros superbia tua , concidit cadaver tuum :
„ subter te sternetur tineae , & operimentum
„ tuum erunt vermes . Quomodo cecidisti de
„ cælo Lucifer qui mane oriebaris ? Corruisti
„ in terram , qui vulnerabas gentes ? Qui di-
„ cebas in corde tuo : In cælum conscendam ,
„ super Astra Dei exaltabo folium meum ,
„ sedebo in Monte testamenti , in lateribus
„ Aquilonis . Ascendam super altitudinem nu-
„ bium , similis ero Altissimo . Verumtamen
„ ad infernum detraheris in profundum lacu .
„ Qui te viderint , ad te inclinabuntur , teque
„ prospicient : Numquid iste est vir qui con-
„ turbavit terram , qui concussit Regna , qui
„ posuit orbem desertum , & Urbes ejus de-
„ struxit , victis ejus non aperuit carcerem ?
„ Omnes Reges Gentium universi dormierunt
„ in gloria , vir in domo sua . Tu autem pro-
„ jectus es de sepulcro tuo , quasi stirps inuti-
„ lis , pollutus , & obvolutus cum his qui in-
„ ter-

„ terfecti sunt gladio , & descenderunt ad fun-
 „ damenda laci , quasi cadaver putridum . Non
 „ habebis consortium , neque cum eis in se-
 „ pultura . Tu enim Terram tuam disperdidi-
 „ sti , tu populum tuum occidisti . Non voca-
 „ bitur in æternum semen pessimorum . Præ-
 „ parate filios ejus occisioni in iniquitate Pa-
 „ trum suorum . Non consurgent , nec here-
 „ ditabunt terram , neque implebunt faciem
 „ orbis civitatum .

Objicies : Si illud *Jacobi* Vaticinium ad
 Messiam pertineret , illud Christus , vel Apo-
 stoli & Evangelistæ ad fidem sibi conciliandam
 adduxissent . At illud in testimonium non pro-
 tulerunt : ad Messiam igitur non pertinere ju-
 dicarunt .

Respondetur : Falsam esse Majorem . Non
 enim omnia Prophetarum Vaticinia , quæ Mes-
 siam spectant , Christus protulit , nec eorum
 omnium auctoritatem Evangelistæ vel Apostoli
 in Libris Sacris usurparunt . Satis fuit Christo
 Judæos ad *Moysen* , & Prophetas remittere ,
 quorum Oracula ad ipsum pertinentia in Syna-
 gogis legebantur . *Habent* , inquit , *Moysen* ,
 & *Prophetas* , *audiant illos* (*Lucæ 16. 29.*)
Scrutamini Scripturas , *quia vos putatis in ipsis*
vitam æternam habere , *& illæ sunt quæ testi-*
monium perhibent de me (*Joan. 5.*) . . . *Nolite*
putare quia ego accusaturus sim vos apud Pa-
trē : Est qui accusat vos Moyses , *in quo vos*
speratis . *Si enim crederetis Moysi* , *crederetis*
forſitan & mihi ; de me enim ille scripsit (*Ibid.*)

PROPOSITIO II.

*Oraculum illud Jacobi morientis Judæ editum ,
in Domino Jesu completum est .*

P Robatur : Illud oraculum in Domino Jesu completum est , cujus partes omnes Domino Jesu conveniunt : Atqui Oraculi Jacobi partes omnes Domino Jesu conveniunt : Illud ergo in Domino Jesu completum est .

Probatur minor . Ista enim in primis ad Jesum spectant : *Juda , te laudabunt fratres tui ; manus tua in cervicibus inimicorum tuorum ; adorabunt te filii Patris tui .* Filium Judam , quatenus Messiae Pater est , *Jacobus* alloquitur ; vel potius Messiam in Patre *Juda* , ex cujus nimirum Tribu nasciturus erat (*Matthæi 1. 3. 16. Lucæ 3. 23. 24. Hebr. 7. 14. Apocalypsis , 5. 5.*) A fratribus suis laudatus & adoratus est Jesus , Christianis videlicet , quos fratrum loco habere se profitetur . *Psal. 21. 23. Narrabo nomen tuum fratribus meis . Matthæi 12. 50. Quicumque fecerit voluntatem Patris mei , qui in calis est , ipse meus frater , & soror , & mater est . Joan. 20. 17. Vade ad fratres meos , & dic eis : Ascendo ad Patrem meum & Patrem vestrum , Deum meum & Deum vestrum .* Ab iis autem primum laudatus est , cum miracula patrantem viderunt . Deinde cum a mortuis redivivum cognoverunt , tunc vere Deum esse professi sunt , ipsumque eo nomine ado-
ra-

rarunt . Et divinos ipsi exhibent honores , qui-
 cumque Christianam Religionem sunt amplexi .
 Psal. 71. 6. 9. „ Coram illo procident Æthio-
 „ pes , & inimici ejus terram lingent . . . Et
 „ adorabunt eum omnes Reges terræ , omnes
 „ gentes servient ei . *Matthæi* 28. 16. 17.
 „ Undecim Discipuli abierunt in Galilæam in
 „ Montem , ubi constituerat illis Jesus . Et vi-
 „ dentes eum adoraverunt . *Ad Philippen-*
 „ *ses* 2. 10. Ut in nomine Jesu omne genu fle-
 „ ctatur , cælestium , terrestrium & inferno-
 „ rum ; & omnis lingua confiteatur , quia Do-
 „ minus Jesus Christus in gloria est Dei Patris .
 „ *Apocalypsis* 5. 11. 12. 13. Et vidi , & au-
 „ divi vocem Angelorum multorum in circui-
 „ tu throni , & animalium , & seniorum ; &
 „ erat numerus eorum millia millium , dicen-
 „ tium voce magna : Dignus est Agnus qui
 „ occisus est , accipere virtutem , & divinita-
 „ tem , & sapientiam , & fortitudinem , &
 „ honorem , & gloriam , & benedictionem .
 „ Et omnem creaturam quæ in cælo est , &
 „ super terram , & sub terra , & quæ sunt in
 „ mari , & quæ in eo : omnes audiui dicentes :
 „ Sedit in throno , & agno , benedictio , &
 „ honor , & gloria , & potestas in sæcula sæ-
 „ culorum „ . Cervices vero inimicorum vel
 cædit , vel sub jugum mittit , prout de ipso
 vaticinatus est *Balaamus* , *Numerorum* 24. 17.
 „ & percutiet Duces Moab , vastabitque om-
 „ nes filios Seth . *Item David Psal.* 109. Di-
 „ xit Dominus Domino meo , Sede a dextris
 „ meis ,

„ meis , donec ponam inimicos tuos scabel-
 „ lum pedum tuorum . . . Confregit in die iræ
 „ suæ Reges . Judicabit in nationibus , imple-
 „ bit ruinas , conquassabit capita in terra mul-
 „ torum . *Joannis* 12. 13. Nunc Judicium est
 „ Mundi , nunc Princeps hujus Mundi ejicie-
 „ tur foras . *Ad Colossenses* 2. 15. Et expolians
 „ Principatus & Potestates traduxit confiden-
 „ ter , palam triumphans illos in semetipso .
 „ *Apocalypsis* 19. 13. 15. 16. Et vestitus
 „ erat veste aspersa sanguine , & vocatur no-
 „ men ejus , Verbum Dei . . . Et de ore ejus
 „ procedit gladius ex utraque parte acutus ;
 „ ut in ipso percutiat Gentes . Et ipse reget
 „ eas in virga ferrea . . . Et habet in vestimen-
 „ to , & in femore suo scriptum : Rex Re-
 „ gum , & Dominus dominantium .

Quæ de Christi Jesu potentia *Jacob* præ-
 dixerat, leonis comparatione illustrat . *Catulus* ,
 inquit, *leonis Juda* : *Ad prædam, fili mi, ascen-*
disti : Requiescens accubuisti ut leo , & quasi
leona ; quis suscitabit eum ? Christi fortitudi-
 nem & Regium genus hac metaphora signifi-
 cat . Ascendit ad prædam , cum ex orci fau-
 cibus , dæmonisque tyrannide humanum genus
 eripuit . Admirabilem ejus prædationem vati-
 cinatus est *Isaias* Cap. 8. : Et dixit Dominus
 „ ad me : Sume tibi librum grandem , & scri-
 „ be in eo stylo hominis , velociter spolia de-
 „ trahe , cito prædare . Et adhibui mihi testes
 „ fideles , Uriam Sacerdotem , & Zachariam
 „ filium Barachîæ , & accessi ad Prophetif-
 „ sam ,

„ sam , & concepit , & peperit filium . Et
„ dixit Dominus ad me : Voca nomen ejus ,
„ accelera spolia detrahare , festina prædari :
„ quia antequam sciat Puer vocare Patrem
„ suum & Matrem suam , auferetur fortitudo
„ Damasci , & spolia Samariæ coram Rege
„ Assyriorum , . De quo & S. Joannes Apo-
calypsis 5. 5. *Et unus de senioribus dixit mihi :*
Ne fleveris , ecce vicit Leo de Tribu Juda ,
Radix David . . . Deinde victoriæ ejus modum
Jacob describit his verbis : *Requiescens accu-*
buiſti ut leo , & quasi leæna ; quis suscitabit
eum ? Quæ Christi mortem ac resurrectionem
exprimunt ; ac si dicat : In ipsa morte fortitu-
dinem suam ostendet , hostibusque terrorem
incutiet , siquidem devicta morte , redibit ad
vitam propria virtute , Patrisque potentia .
Psal. 3. 6. „ Ego dormivi , & soporatus sum , &
„ exsurrexi , quia Dominus suscepit me . *Osee*
„ 13. 14. Ero mors tua , o mors : Morsus tuus
„ ero , inferne . *Joan.* 2. 19. Respondit Jesus ,
„ & dixit eis : Solvite Templum hoc , & in
„ tribus diebus excitabo illud . Dixerunt Judæi :
„ Quadraginta & sex annis ædificatum est Tem-
„ plum hoc , & tu in tribus diebus excitabis
„ illud ? Ille autem dicebat de Templo cor-
„ poris sui . Cum ergo resurrexisset a mor-
„ tuis , recordati sunt Discipuli ejus , quia hoc
„ dicebat , & crediderunt Scripturæ , & ser-
„ moni quem dixit Jesus . *Actum* 2. 24. Quem
„ Deus suscitavit solutis doloribus Inferni ,
jux-

„ juxta quod impossibile erat teneri illum ab
 „ eo . David enim dicit in eum : Providebam
 „ Dominum in conspectu meo semper ; quo-
 „ niam a dextris est mihi , ne commovear .
 „ Propter hoc lætatum est cor meum , & exul-
 „ tavit lingua mea ; insuper a caro mea re-
 „ quiescet in spe . Quoniam non derelinques
 „ animam meam in inferno , nec dabis sanctum
 „ tuum videre corruptionem . Notas mihi fe-
 „ cisti vias vitæ , & replebis me jucunditate
 „ cum facie tua . Viri fratres , liceat audenter
 „ dicere ad vos de Patriarcha David , Quo-
 „ niam defunctus est & sepultus ; & sepulcrum
 „ ejus est apud nos usque in hodiernum diem .
 „ Propheta igitur cum esset , & sciret quia ju-
 „ rejurando jurasset illi Deus de fructu lumbi
 „ ejus sedere super sedem ejus , providens lo-
 „ cutus est de Resurrectione Christi , quia ne-
 „ que derelictus est in Inferno , neque caro ejus
 „ vidit corruptionem . Hunc Jesum resuscita-
 „ vit Deus , cujus omnes nos testes sumus .

Pergit deinde Jacob vaticinium suum his
 verbis : *Non auferetur Sceptrum de Juda &
 Dux de femore ejus , donec veniat Qui mit-
 tendus est : ipse erit Expectatio Gentium .*
 Quibus verbis Principatus & Regnum , cu-
 jus finis in Messia adventu existet , prænun-
 tiatur ; futurumque ut Messias , ex Tribu Ju-
 da nasciturus , Regnum spirituale & æternum
 constituat , non solos Israelitas regens , sed
 Gentes universas ditioni suæ subjiciens . Hæc

autem in Christo completa facile demonstrantur . Sive enim ad solam Tribum Juda promissionem illam temporarii Regni referre placeat cum *Origene & SS. Epiphanio , Cyrillo , Augustino* , aliisque : Sive ad totam Gentem Judaicam , in qua præcellens semper fuit Tribus *Judæ* potestas , Messiam orbi daturæ , ut *S. Justino Martyri , Eusebio Casariensi , & S. Athanasio , S. Ambrosio* , aliisque Patribus , & Eru-
ditis Viris visum est : Sive *Sceptri & Ducis* nomine Regia Dignitas intelligatur : Sive auctoritas summa Senatus Hebraici ex Septuaginta Viris conflati , quem *Synedrium Magnum* , sive *Domum Judicii Magni Hierosolymitani* appellabant : hæc in Jesum convenire , & in illo adimpleri esse manifestum est , proindeque cæcos esse Judæos qui alium ab ipso Messiam expectent . Sub Christi ortum Regnum in Judaica gente defecerat , idque fiduciario jure a Romanis tenebat *Herodes* , quem alienigenam fuisse , utpote Idumæum genere , constat ex *Josepho Lib. 14. Antiquitatum Judaicarum* , Capitibus secundo , vigesimo-septimo , & ultimo , & *Lib. 1. De Bello Judaico , Cap. 4. Julio Africano , & Eusebio Lib. 1. Historiæ Ecclesiasticæ Cap. 6. S. Epiphanio Hæresi 20. S. Hieronymo , S. Ambrosio Lib. de Benedictionibus Patriarcharum , Cap. 4. S. Augustino Lib. 18. De Civitate Dei , S. Cyrillo Alexandrino Lib. 7. Commentariorum in Genesim* , quorum testimonia proferri solent contra *Nicolaum Damascenum* ignavum *Herodis* assentatorem , *Scaligerum* ,
Ca-

Casaubonum, & alios recentiores; qui in *Quæstione de Herodis* genere ac patria tractanda nimis a veritate aberrarunt. Quæ vero in *Herode* ante Christi ortum cœpta erat abrogatio Regiæ potestatis, non solum a Tribu *Juda*, sed ab ipsa Gente Judaica, cujus illa Tribus pars erat nobilior, in clade Hierosolymis a *Tito* illata consummata est. Synedrium Magnum Hierosolymis Jebanam captivum fuisse abductum quadraginta annis ante secundi Templi excidium, narratur in Thalmude, nempe circa tempora mortis Christi, ac penitus demum fuisse sublatum constat. Post cladem vero Hierosolymitanam quoquoversum dissipata est Gens infelix, alienis parere coacta legibus, nihil eorum habens, aut attentare ausa, quibus constat Regia potestas, puta Jus reos morte plectendi, Belli denuntiandi ac gerendi, Monetam cudendi, Leges ferendi. Immo vero ludibrio & contemptui ubique habita, velut in celeberrimo universi orbis Theatro mortis Jesu Christo illatæ pœnas luit, divinæ maledictionis manifestissimum signum ferens. Tandem quod Jesus Christus pro caduco & temporario Regno Judaicæ Gentis, Regnum spiritale æternum instituerit, quo non Judæos modo, sed Gentes orbis universi regit, Script. Sacræ Veteris & Novi Testamenti testantur. Psal. 11. „ Ego „ autem constitutus sum Rex ab eo super Sion „ Montem Sanctum ejus, prædicans præceptum ejus. Dominus dixit ad me, Filius meus „ es tu, ego hodie genui te. Postula a me, & „ dabo

„ dabo tibi Gentes hereditatem tuam , & pos-
„ sessionem tuam terminos terræ . Reges eos
„ in virga ferrea . *Isaiæ* 9. 6. 7. Parvulus enim
„ natus est nobis , & filius datus est nobis , & fa-
„ ctus est Principatus super humerum ejus , &
„ vocabitur nomen ejus Admirabilis , Consilia-
„ rius , Deus , Fortis , Pater futuri sæculi ,
„ Princeps pacis . Multiplicabitur ejus Impe-
„ rium , & pacis non erit finis : Super solium
„ David , & super Regnum ejus sedebit , ut
„ confirmet illud , & corroboret in judicio &
„ justitia , amodo , & usque in sempiternum .
„ *Isaiæ* 11. 14. 10. Et egredietur virga de
„ radice Jesse , & flos de radice ejus ascen-
„ det . Judicabit in justitia pauperes , & ar-
„ guet in æquitate pro mansuetis terræ , &
„ percutiet terram virga oris sui In die
„ illa , Radix Jesse , qui stat in signum popu-
„ lorum ipsum Gentes deprecabuntur . *Mi-
„ chææ* 4. Quia de Sion egredietur Lex , &
„ verbum Domini de Jerusalem . . . Et regna-
„ bit Dominus super eos in Monte Sion , ex
„ hoc nunc & usque in æternum . *Michææ* 5. 2.
„ Et tu Bethlehem Ephrata , parvulus es in
„ millibus Juda : Ex te mihi egredietur , qui
„ sit Dominator in Israel , & egressus ejus ab
„ initio , a diebus æternitatis . *Lucæ* 1. 32. 32.
„ Hic erit Magnus , & Filius Altissimi voca-
„ bitur , & dabit illi Dominus Deus sedem
„ David Patris ejus , & regnabit in domo Ja-
„ cob in æternum ; & Regni ejus non erit
„ finis . *Apocalypsis* 11. 15. Et septimus An-
„ gelus

„ gelus tuba cecinit , & factæ sunt voces magnæ in Cælo dicentes : Factum est Regnum hujus mundi Domini nostri , & Christi ejus , & regnabit in sæcula sæculorum . Amen .

Demum Christo Jesu conveniunt hæc verba , quibus celebre illud , de quo agimus Jacobi Oraculum concluditur : *Ligans ad vineam pullum suum , & ad vitem , o fili mi , asinam suam . Lavabit in vino stolam suam , & in sanguine uvæ pallium suum . Pulchriores sunt oculi ejus vino , & dentes ejus lacte candidiores .* Hinc enim Vitis vera , ut ipse de se ait , Joannis 11. 1. *Ego sum vitis vera , & Pater meus agricola est* Item , *Ego sum vitis , vos plamites : Qui manet in me , & ego in eo , hic fert fructum multum .* Asina autem & pullus ejus , symbola sunt Judæorum & Gentilium : quos cum gratiæ suæ & caritatis vinculis ad se trahit , sibi que per fidem devincit & conjungit , tum demum pullum , & asinam ad vitem ligat . *Lavit in vino stolam suam , & in sanguine uvæ pallium suum* , cum suum Corpus in Passione pretioso Sanguine suo , pro omnium hominum fusæ salute , cruentavit , prout *Isaias* prædixerat , Cap. 63. 1. 2. „ Quis est iste qui venit „ de Edom , tinctis vestibus de Bosra , iste „ formosus in stola sua ? . . . Quare ergo rubrum „ est indumentum tuum , & vestimenta tua sicut calcantium in torculari „ ? Quamobrem in Sanctissimo Eucharistiæ Sacramento Sanguinem suum ex vino fieri voluit ; & cruenta veste indutus S. Joanni visus est , *Apocal.* 19. 13.

Quæ

Quæ de oculorum pulchritudine, & candore dentium sequuntur, Christi Jesu speciem ac decorem commendant; non eum quidem, qui in externa corporis forma, sed qui in animi dotibus ac virtute positus est. De quo David Psalm. 44. 3. *Speciosus forma præ filiis hominum, diffusa est gratia in labiis tuis, propterea benedixit te Deus in æternum.*

Hoc Jacobi Oraculum ad Christum Jesum pertinere egregie ostendunt, & ita fere explicant S. Justinus Martyr in Dialogo cum Tryphone Judæo, Origenes, Eusebius lib. 8. *Demonstrationis Evangelicæ*, S. Joannes Chrysostomus Homilia 67. in Genesim, Sanctus Augustinus lib. 12. contra Faustum, cap. 42., S. Ambrosius lib. de Benedictionibus Patriarcharum, capit. 4. S. Cyrillus Alexandrinus lib. Glaphyrorum in Genesim, Theodoretus Quæst. 110. in Genesim, & alii. Unius S. Augustini verba hic subjicio, qui recensito Oraculo Jacobi Patriarchæ, ait: „Falsa sint ista, obscura sint ista, „si non in Christo evidentissima luce claruerunt. Si non eum laudant fratres ejus Apostoli, & omnes coheredes ejus, non suam „gloriam quærentes, sed ipsius. Si non sunt „manus ejus super dorsa inimicorum ejus. Si „non deprimuntur, atque curvantur ad terram „crescentibus Populis Christianis, qui „cumque illi adhuc adversantur. Si non adoraverunt eum filii Jacob in reliquiis, quæ per „electionem gratiæ salvæ factæ sunt. Si non „ipse catulus est leonis, quoniam nascendo: „par-



„ parvulus factus est : Propter hoc additum
 „ *De germinatione filius meus* . Causa quippe
 „ reddita est , quare catulus , in cuius laude
 „ alibi scriptum est , *Catulus leonis fortior ju-*
 „ *mentis* : hoc est , etiam parvulus fortior
 „ majoribus . Si non ascendit in Cruce recum-
 „ bens , cum inclinato capite reddidit spiri-
 „ tum . Si non dormivit ut leo , quia & in
 „ ipsa morte non est victus , sed vivit , & ut
 „ catulus leonis : inde enim mortuus est , unde
 „ & natus . Si non ille eum suscitavit a mor-
 „ tuis , quem nemo hominum vidit , & vi-
 „ dere non potest . Eo enim quod dictum est ,
 „ *Quis suscitabit eum ?* satis expressa est tam-
 „ quam ignoti significatio . Si defuit Princeps
 „ de Juda , & Dux de femoribus ejus , donec
 „ venirent opportuno tempore , quæ promissæ
 „ tamquam reposita fuerant . Sunt enim lit-
 „ teræ certissimæ Historiæ ipsorum quoque Ju-
 „ dæorum , quibus ostenditur primum alieni-
 „ genam Herodem Regem fuisse in Gente
 „ Judæorum , quo tempore natus Christus est .
 „ Ita non defuit Rex de semine Juda , donec
 „ venirent quæ reposita erant illi . Sed quia
 „ non solis Judæis fidelibus profuit quod pro-
 „ missum est , vide quid sequatur : *Et ipse*
 „ *erit expectatio Gentium* . Ipse alligavit ad
 „ vineam pullum suum , id est , Populum
 „ suum , in cilicio prædicans & clamans , *Ag-*
 „ *ite penitentiam , appropinquavit enim Regnum*
 „ *celorum* . Populum autem Gentium illi iub-
 „ ditum cognoscimus pullo asinæ compara-
 „ tum ,

„ tum , in quo etiam sedit , ducens eum in
 „ Jerusalem , id est , in visionem pacis , do-
 „ cens mansuetos vias suas . Si non lavit in
 „ vino stolam suam : ipsa est enim gloriosa
 „ Ecclesia , quam sibi exhibet non habentem
 „ maculam aut rugam . Cui dicitur etiam per
 „ Isaiam : *Si fuerint peccata vestra sicut phæ-*
 „ *nicium , tamquam nivem dealbabo* . Unde
 „ nisi de dimissis peccatis ? In quo ergo vino
 „ nisi in illo de quo dicitur , *Quod pro multis*
 „ *effundetur in remissionem peccatorum* ? Ipse
 „ est enim botrus ille qui pependit in ligno .
 „ Propterea & hic vide quid adjungat : *Et in*
 „ *sanguine uvæ amictum suum* . Jam vero ful-
 „ gere oculos ejus a vino , illa in corpore ejus
 „ membra cognoscunt , quibus donatum est
 „ sancta quadam ebrietate alienatæ mentis
 „ ab infra labentibus temporalibus , æternam
 „ lucem Sapientiæ contueri ; unde quiddam
 „ paullo ante commemoravimus , dicente Pau-
 „ lo : *Sive enim mente excessimus Deo* . Hi
 „ sunt fulgentes oculi a vino . Sed tamen quia
 „ sequitur , *Sive temperantes sumus vobis* :
 „ Nec parvuli relinquuntur , adhuc lacte nu-
 „ triendi , quia & hic sequitur , *Et dentes*
 „ *ejus candidiores lacte* . Quid ad hæc respon-
 „ detis infani ? Nempe ista manifesta sunt ,
 „ nempe omnes , non dico calumnias contra-
 „ dictionis , sed etiam nebulas dubitationis
 „ expellunt .

Objiciunt Judæorum nonnulli , Æchma-
 lotarcham quemdam e Tribu Juda oriundum ,
 quem

quem Patriarcham appellant , Judaicum Imperium in Asia tenere , perpetuaque successione eam dignitatem ad Christum usque exituram , qui proinde nondum venerit . Sic illi in *Seder Olam Zutha* , & apud *Maimonidem in Yad Chazakah* . In eaque persuasione fuerunt jam inde ab *Origenis* , superioribusque temporibus . *Benjamin Tudelensis* in sui Itineris Historia , *Æchmalotarcham* illum Bagdadi Sedem habere scribit . Infinitas Judæorum copias versus Eurum statuit , sui juris , rerum omnium ubertate affluentes , amplissima & amœnissima , uberrimaque loca incolentes , & ab omni reliquorum hominum commercio & aditu seclusas , propter vastissimas solitudines interjectas . *Postellus Historiæ Orientalis* , p. 1. cap. 5. & 6. tradit versus Orientem Solem diu latitasse decem Tribus , Montium angustiis circumclusas , sed tandem prognatos ex his Tartaros & Turcas inde erupisse , vastissimasque regiones armis occupasse . Quod ex *Haythoni Armeni Historia* , Cap. 17. probare conatur . Quin etiam a *Josepho Lib. 11. Antiquitatum Cap. 5.* memoriæ proditum est , Decem Tribus trans Euphratem deportatas , in immensam multitudinem suâ ætate excrevisse . Idemque testatur *Orosius lib. 2. cap. 7.* Denique lib. 4. *Esdræ cap. 13.* legimus , decem Tribus in longinquas terras abiisse ; ut Ritus suos sine impedimento observare possent , transisse illas aquas Euphratis , & post anni unius iter in regionem imperviam *Arsareth* pervenisse , ibique summa pace frui , donec
Deus

Deus ipsas Hierosolymam reducat . „ Hæ sunt
„ (*inquit*) decem Tribus , quæ captivæ factæ
„ sunt de Terra sua in diebus Osee Regis , quem
„ captivum duxit Salmanasar Rex Assyriorum ,
„ & transtulit eos trans flumen , & translati
„ sunt in terram aliam . Ipse sibi dederunt con-
„ silium hoc ut derelinquerent multitudinem
„ Gentium , & proficiscerentur in ulteriorem
„ regionem , ubi numquam habitavit genus
„ humanum : vel ibi observare legitima sua
„ quæ non fuerant servantes in Regione sua .
„ Per introitus autem angustos fluminis Eu-
„ phratem introierunt . Fecit enim eis tunc
„ Altissimus signa , & statuit venas fluminis
„ usquequo transirent . Per eam enim Regio-
„ nem erat via multa itineris , anni unius &
„ dimidii : Nam regio illa vocatur Arsareth .
„ Tunc inhabitaverunt ibi usque in novissimo
„ tempore ; & nunc iterum cum cœperint ve-
„ nire , iterum Altissimus statuet venas flumi-
„ nis , ut possint transire . Propter hæc vidi-
„ sti multitudinem cum pace .

Respondeo , mera hæc esse Judæorum fig-
menta , fabulasque putidissimas . Judæos nul-
quam gentium jus sceptri , ditionemve ullam
aut Imperium obtinere . Frequentes , longin-
quas , ac celebres illustrium viatorum peregri-
nationes , quibus accurata satis terræ habitabi-
lis notitia hac ætate percepta est , ipsorum men-
dacia refellere . Illos jus gladii , quod supre-
mæ potestatis insigne est nullibi habere . Quod
post Hierosolymitanum excidium in reos ali-

quando animadvertisse legantur ipsorum Tetrarchæ, ut se expertum affirmat *Origenes Epistola ad Julium Africanum*, id fecisse vel dissimulantibus Romanis, vel id juris ipsis permittentibus. Et id Palæstinis quidem Judæis in Palæstina dumtaxat concessum; non Babylo-
niis, aut Ægyptiis, ut testatur Maimonides. *Beniamin Tudelensis* de iis, quæ narrat, nihil præter auditum habere se profitetur; & Æchmalotarcham ipsum a Muhammedanorum Calipha potestatem per sigilli traditionem accipere solitum: quod fiduciarium tantum, non supremi dominii argumentum est. Sed ne Synagogas quidem, Collegia, aut Scholas, nisi de licentia Principum habuerunt. Regna illa ex decem Tribubus propagata, quamvis imaginaria non essent, eorum tamen Æchmalotarcham, sive Patriarcham ex Tribu Juda oriundum, quis sibi præter insanos Judæos persuadeat? Quomodo Tribus illæ aliquem ex Tribu Juda apud se reperire semper potuerunt, quem sibi præficerent, ex quo Israel hujus Tribus detrectavit Imperium, seque ab illa segregavit? cum ex illo tempore *Non contantur Judæi Samaritanis*, ut ait Christus Jesus Mulierem Samaritanam alloquens, *Joannis 4.9.* Præterea celeberrimi Rabbini ingenue fatentur Judæos Regia Potestate, Sceptro, ac Dominio penitus excidisse secundum illud *Oseæ* vaticinium *Cap. 3.4.* *Dies multos sedebunt Filii Israel sine Rege, & sine Principe, & sine Sacrificio, & sine Altari, & sine Ephod, & sine Theraphim*

phim . Id agnoscunt *R. Isaac Abrahamiel Commentar. in Isaiam* , *R. David Kimchi in Osee* , *R. Bechai* , *R. David Ganz* , & *R. Manasse* . Dissertissime vero omnium *R. Isaac Akrich* narrationes hujusmodi de Asiatico Judæorum Imperio , & Æchmalotarcha , fictitias esse declarat , & ad suorum solatium excogitatas . Denique *Origenes Lib. 4. περὶ Ἀρχῶν* , Cap. 1. Judæorum vanitatem his verbis redarguit , de Christo Jesu loquens : „ Quid vero inde di-
 „ cendum est quod Prophetæ de ipso ante præ-
 „ dixerant , Non cessaturos Principes ex Ju-
 „ da , neque Duces de femoribus ejus , us-
 „ quequo veniat Ille cui repositum est , Re-
 „ gnum scilicet ; & usquequo veniat expe-
 „ ctatio Gentium ? Manifestissime enim ex
 „ ipsa Historia apparet , ex his quæ hodie
 „ pervidentur , quia ex temporibus Christi ul-
 „ tra Reges apud Judæos non extiterunt . Sed
 „ & illæ omnes ambitiones Judaicæ , in quibus
 „ se jactabant quamplurimi , & in quibus exul-
 „ tabant , vel de Templi decore , vel de Al-
 „ taris insignibus , atque omnibus illis Sacer-
 „ dotalibus Infulis , Indumentisque Pontificum ,
 „ simul destructa sunt . Completa est enim
 „ Prophetia quæ dixerat : *Per dies multos se-*
 „ *debunt Filii Israel sine Rege , sine Principe ,*
 „ *non erit Hostia , nec Altare , nec Sacerdo-*
 „ *tium , nec Responsa* . His ergo testimoniis
 „ utimur adversus eos , qui videntur asserere
 „ de his quæ in Genesi ab Jacob dicta sunt ,
 „ quod de Juda dicta sint , & dicunt perma-

„ nere adhuc Principem ex genere Judæ ,
 „ istum videlicet qui est Gentis eorum Prin-
 „ ceps , quem nominant Patriarcham ; nec
 „ deficere posse de semine ejus qui permaneat
 „ usque ad adventum ejus Christi , quem sibi
 „ ipsi describunt . Sed si verum est quod ait
 „ Propheta : *Quia dies multos sedebunt Filii*
 „ *Israel sine Principe , nec erit Hostia , nec*
 „ *Altare , nec Sacerdotium* ; & utique ex
 „ quo subversum est Templum , nec hostiæ
 „ offeruntur , nec Altare invenitur , nec Sa-
 „ cerdotium ; constat & certissimum est defe-
 „ cisse Principes ex Juda , sicut scriptum est ,
 „ & Ducem ex femoribus ejus , usquequo
 „ veniet Ille cui repositum est . Constat ergo
 „ quia venit Ille cui repositum est , in quo ex-
 „ pectatio Gentium est . Quod manifeste vi-
 „ detur impletum de multitudine eorum , qui
 „ per Christum Deo ex diversis Gentibus cre-
 „ diderunt „ . Quæ de decem Tribubus Scrip-
 tor libri quarti *Esdræ* Apocryphus habet , ceu
 mera figmenta rejicimus , sicut & Thalmudis
 Hierosolymitani narrationem , in quo scriptum
 est , Decem Tribus nubibus protectas , & a
 reliquis mortalibus hujusmodi sepimento sepa-
 ratas . Esto vero trans Euphratem deportatas in
 immensam multitudinem excrevisse , cum *Jo-*
sepho & *Orosio* concedamus , ipsas tamen Re-
 ges Judæos habuisse negamus , neque id *Jose-*
phus vel *Orosius* asserunt . Immo illas Barbaro-
 rum Imperiis fuisse subjectas , *Sulpitius Seve-*
rus observat *Lib. II. Historiæ Sacræ* .

Obji-

Objiciunt alii : Vocem Hebræam *Sheveth* quam Latinus Interpres vertit *Sceptrum* sive *Virgam* , non significare summum Imperium quod in Tribu Juda , vel in Judaica Gente ad Messiae adventum permanfurum sit ; sed sævum & impotentem dominatum , quo misera ipsorum Gens ab alienis Principibus premitur & vexatur . Quæ calamitas finem accipiet , cum Christus advenerit .

Respondetur , Vocem *Sheveth* solitarie sumptam significare dominationem generatim , tam æquam & legitimam , quam tyrannicam . Hanc vero non designare , nisi adjuncto epitheto determinetur ut Psalmo 11. *Reges eos in virga ferrea* . Præterea , his verbis , *Et Dux de femore ejus* , non externos Principes , sed eorum gentiles ac tribules designari . Tertio , falsum esse quod duris semper Imperiis afflicti fuerint , cum mitissimis & æquissimis Regibus sæpe paruerint . Quarto , Tribum Juda a *Davide* usque ad *Sedeciam* annorum fere quingentorum spatio Regiam Potestatem habuisse ; adeoque falsum esse quod ad hæc usque tempora iniquum externorum Principum dominatum passa sit : post *Sedeciam* vero ac reditum ex Captivitate Ducibus , & Regibus ex propria Gente paruisse usque ad *Herodem* . Igitur si calamitas ipsorum & dura servitus a *Jacobo* , ut volunt , prædicta finem acceptura non erat , donec Messias veniret , Messiam jamdudum venisse contra ipsos conficitur : siquidem ante Christi Jesu adventum tribulibus suis ac gentili-

bus paruerunt , & florentissimum potentissimumque Imperium sub *Davide* & *Salomone* habuerunt .

At , inquit , hæc verba , *Donec veniat Qui mittendus est* , non significant Principatum a Tribu *Juda* non auferendum donec venerit *Messias* , sed post adventum *Messiae* nusquam deinceps Sceptrum *Judæ* auferendum . Et sane hæc ditio *donec* , non semper finem ac cessationem notat ejus rei , de qua sermo fit , sed ejus nonnumquam continuationem , cum interventu alterius , cui dictio *donec* adjungitur . Sic octavo *Genesis* de corvo dicitur : *Non revertebatur , donec siccarentur aquæ super terram* . Quo non significatur corvum esse reversum postquam siccatae sunt aquæ , sed numquam reversum , ne post siccatas quidem aquas . Sic vigesimo octavo *Genesis* Deus ait Jacobo : *Nec dimittam te donec fecero quod locutus sum tibi* . Quo non significatur quod *Jacobum* deserturus esset Deus postquam ea complevisset quæ sponderat ; immo vero nusquam ipsum deserturum . Sic *Job* vigesimo septimo capite : *Donec deficiam* , inquit , *non recedam ab innocentia mea* . Quo non significat *Jobus* se ab innocentia sua recessurum cum defecerit ; immo vero se nusquam ab ea discessurum . Sic *Libri 2. Regum Cap. sexto* legimus : *Igitur Michol filiae Saul non est natus filius usque in diem mortis suæ* . Quibus verbis non significatur *Michol* die mortis suæ filium tandem parituram ; Immo vero perpetuo sterilem fore . Sic de *Josepho*

sepho & Maria scripsit Matthæus Cap. 1. 25. Et non cognoscebat eam, donec peperit Filium suum primogenitum. Quibus verbis non significatur quod post *Mariæ* partum eam cognoverit *Josephus*, ut impius *Helvidius* asseruit; sed perpetuo Virginem fuisse cum interventu partus, quo Primogenitum suum edidit. Hujus itaque vocis *donec* similis est significatio in *Jacobæo Vaticinio*, scilicet Sceptrum a *Juda* nusquam ablatum iri, postquam semel venerit *Messias*. Atque hanc *Jacobæi Vaticinii* interpretationem, non solum *Judæi* plerique recentiores amplectuntur, sed etiam inter *Christianos & Catholicos Theologos Cajetanus Commentar. in Genesim*, cui ex parte suffragatur Doctissimus Præsul *Daniel Huetius Demonstrætionis Evangelicæ Propositione 9.*

Respondetur, vocem *donec*, designare finem *Judaici Imperii* quo tempore venturus erat *Messias*; alioqui nota & significatio temporis ipsius adventus *Jacobæo Vaticinio* nulla inerit, nulla *Jacob* signa demonstraverit quibus agnosci possit. Adde priscos *Judæos* vocem *donec* in vulgari significatione huc intellexisse, quatenus cessationum importat ejus rei, de qua fit sermo. Sic illam accepisse *Chaldaicarum Paraphrasum Auctores*, nec non *R. Salomonem*, & *R. Kimchi*. Sic intellexisse *Josephum*, cum hujus Oraculi exitum *Vespasiano* adulatorie adscripsit *Lib. 3. De Bello Judaico Cap. 28. & Lib. 8. Cap. 31.*, Quod autem (inquit) *Judæos* ad Bellum præcipue incitabat, *Vati-*

„ cinium erat ambiguum similiter in sacris Co-
 „ dicibus repertum , futurum nempe ut hoc
 „ tempore ex Religione aliquis eorum toti or-
 „ bi impararet . Hoc nonnulli quidem tam-
 „ quam sibi proprium accipiebant , & multi
 „ e Sapiantibus in eo intelligendo hallucinati
 „ sunt . „ Hic a *Josepho* notari Oraculum
 illud Jacobæum , Non auferetur Sceptum de
 Juda , & Dux de femore ejus , donec veniat
 Qui mittendus est , & ipse erit expectatio
 Gentium , Doctissimus *Huetius* probat , De-
 monstrationis Evangelicæ Propositione 7. nu-
 mer. 32. & ex hoc *Josephi* loco manasse cen-
 set quod *Suetonius* in *Vespasiano* Cap. 4. &
Tacitus Historiæ Lib. 5. scripserunt . Sic enim
Suetonius : „ Percrebuerat Oriente toto vetus
 „ & constans opinio , esse in fatiis ut eo tem-
 „ pore Judæa profecti rerum potirentur . Id
 „ de Imperatore Romano , quantum eventu
 „ postea patuit , prædictum Judæi ad se trahen-
 „ tes rebellarunt . „ *Tacitus vero* : „ Pluribus
 „ persuasio inerat , antiquis Sacerdotum Lit-
 „ teris contineri , eo ipso tempore fore , ut
 „ valesceret Oriens , profectique Judæa re-
 „ rum potirentur . Quæ ambages *Vespasianum*
 „ ac *Titum* prædixerant . Sed vulgus more
 „ humanæ cupidinis , sibi tantam fatorum ma-
 „ gnitudinem interpretati , ne adversis quidem
 „ ad vera mutabantur „ . Eminentissimi *Ca-*
jetani , & Illustris *Huetii* opinionem nihil mo-
 ror ; satis est observare quam immensum dif-
 crepet a Judæorum interpretatione . Judæi
 nam-

namque Regni sui tempus a Messia inchoant : at *Cajetanus* longe vetustiora Regni hujus statuit initia , de quo *Jacob* vaticinatus est . Judæi Regnum temporarium , & cum Mundo finem habiturum intelligunt : *Cajetanus* Regnum primo temporarium signatum esse censet , quod per Messiam spirituale fiat & æternum , ne ipso quidem Mundi occasu finiendum . Doctissimus vero *Huetius* addens *Cajetani* opinioni & expositioni, quod ipsi deesse putat , eamque majorem proferens in lucem , quatuor notari statuit his Jacobi verbis : *Non auferetur Sceptrum de Juda , & Dux de femore ejus , donec veniat Qui mittendus est , & Ipse erit expectatio Gentium* . Primum hanc prædictionis partem , *Non auferetur Sceptrum de Juda* , ait æternam Sceptri possessionem *Judæ* spondere . Alteram , *Et Dux de femore ejus* , temporarium & caducum *Judæ* præsignificare Principatum . Tertiam , *Donec veniat Qui mittendus est* , temporarii hujus Regni finem , & Messiae adventum prædicere . Postremam , *Et ipse erit expectatio Gentium* , Messiae Regnum non Chananæ Terræ claudendum angustiis , sed quaquaversus per omnem orbem patens , & spiritale futurum nuntiare .

Objicies : Jacobæum istud Oraculum nihil contra Judæos Messiam adhuc expectantes conficere , si Prophetiam hanc non simplicem & absolutam , sed hypotheticam esse respondeant : ea lege nimirum & omine Imperium usque ad Messiae tempora *Judæ* esse promissum,

si modo Legi Divinæ obsequatur ; sicut Deus Judæis æternam Terræ Chanaan possessionem & habitationem promiserat , neque tamen hæc promissio exitum habuit , quia hypothetica erat , ea scilicet conditione adimplenda , si pietatem ac justitiam colerent , Deique Legem observarent . Quod cum non præstiterint , non mirum est quod promissionum divinarum fructum non fuerint consecuti . Similiter, inquiunt, Deus Principatum usque ad Messię tempora *Judæ* promiserat , non tamen absolute , sed sub conditione , si a Dei cultu & observantia Divinæ Legis non deficeret . Quam quia non implevit , ideo Jacobæi illius Vaticinii eventus dilatus est .

Respondetur, hanc expositionem jure optimo rejici , cum nullo Scripturæ Sacræ testimonio fulciatur . Nullum enim est Prophetarum Vaticinium , quod simili exceptione eludi non posset . Certe Prophetiæ hypotheticæ vel expressam habent conditionem , cujus intervntu exitum habituræ sunt , vel ex aliis Scripturæ Sacræ locis ea conditio diserte colligitur . At Jacobæum Vaticinium neque conditionem ullam exprimit , neque quod conditionis alicujus intervntu exitum habiturum esset , ullibi in Sacris Litteris significatur . Hæc itaque Judæorum expositio arbitraria & temeraria est . Præterea , quemadmodum Prophetiæ de Messię adventu planæ , simplices , & absolutæ fuerunt ; sic absoluta fuere Vaticinia , quæ varias ejusdem Adventus circumstantias significabant ,

ni-

nimirum ex femine *Abrahæ*, ex Tribu *Juda*, ex Virgine Matre, in *Bethlehem* nasciturum. Sicut ergo hujusmodi Prophetiæ simplices & absolutæ fuerunt, non hypotheticæ, sic etiam illa quæ *Jacobi* verbis continetur, tempus adventus *Messia* per defectum Principatus *Judaici* significans.

PROPOSITIO III.

Jacobæum Oraculum: Non auferetur Sceptrum de *Juda*, & Dux de femore ejus, donec veniat Qui mittendus est; & Ipse erit Expectatio Gentium, non ad solam Tribum *Juda*, sed ad totam Gentem *Judaicam* pertinet.

P Robatur invicto argumento ex *Historia Sacra* petito. A *Jacobi* morientis edito Vaticinio ad *Davidem* usque plures extiterunt *Judaicæ* Gentis Duces ac Principes ex *Juda* minime oriundi. *Moses* enim, & *Josue*, qui post exitum ex *Ægypto* primo Populo *Judaico* imperarunt, tribules *Juda* non fuere, sed ille ex Tribu *Levi*, hic ex Tribu *Ephraim* ducebat originem. Inter *Judices*, quorum secuta est dominatio, duo tantum fuere ex Tribu *Juda* prognati, *Othoniel*, & *Abesan*. *Judicum* Principatum excepit *Regium Imperium*, quorum primus *Saul* ex Tribu *Beniamini* extitit. Rursum decem Tribus a *Roboamo Salomonis* filio defecerunt, & Principum ex Tribu *Juda*

excusso jugo , *Jeroboamo* ex Ephraimitica Tribu , aliisque Regibus nequiquam ex Tribu Juda ortis paruerunt . Tempore Captivitatis Babylonice , Sceptrum a Tribu Juda ablatum est in *Jechonia* & *Sedecia* . Post solutam Captivitatem Babylonicam , Aristocratia formam assumpsit Judæorum Respublica , & summa rerum penes Sacerdotes fuit usque ad Natale Christi per quingentos & amplius annos . Quæ potestas per Assamonæos in eo ordine adeo firmata est , ut tandem *Aristobolus* Pontifex Maximus regimen illius Reipublicæ in formam Regni mutaverit . Fuit penes *Aristobuli* posteros Regia Potestas ad *Pompejum* usque plena & solida . Umbram & nomen Imperii ipsis reliquit *Pompejus* , re adempta , donec ab *Herode* Regnum Assamonæis ereptum , & genus extinctum est . Verba igitur illa Jacobæi Vaticinii , *Non auferetur Sceptrum de Juda , & Dux de femore ejus , donec veniat Qui mittendus est* , ad solam Tribum Juda non pertinent , sed ad totam Gentem referenda sunt .

Respondent nonnulli , Sceptrum a Tribu Juda ablatum in *Sedecia* non fuisse , sed supremam potestatem in *Zorobabele* Tribus illius Principe , soluta Captivitate Babylonica fuisse suscitatum , ut observat *S. Cyrillus Lib.8. adversus Julianum* . Deinde ad *Zorobabelis* posteros transmissam , in hac eadem Tribu ad Christum usque per Assamonæos perseverasse , qui licet ex Levitica Tribu prognati , mater-
num tamen genus ex Tribu Juda ducebant .

Con-

Conjunctam quippe fuisse per Matrimonia Tribum utramque, ut probant exempla *Aaronis*, qui filiam *Aminadab*, & *Joadæ* Pontificis, qui filiam *Jorami* Regis, uxores duxisse leguntur *Exodi* 6.7.& 2. *Paralipomenon* Cap.22. Hac ratione ex illa difficultate se expediunt *Lyranus*, *Tostatus*, *Dionysius Carthusianus*, & alii.

Verum nec Regia potestas in Zorobabele fuit; nec Afsamonæos ex Tribu Juda maternum genus duxisse probari potest. Id enim unum aut alterum initi a Sacerdotibus cum Virginibus e Tribu Juda matrimonii exemplum non demonstrat. Neque credibile est Pontifices Maximos e Tribu sua uxores numquam duxisse, sed ex aliena semper, & ex eadem, nempe Judæ. Id cum nullo Scripturæ Sacræ, nullo Judaicæ Historiæ testimonio nitatur, ceu merum figmentum rejiciendum est. Secundo, Apostoli verbis id repugnat, diserte asserentis, Nullum umquam fuisse Sacerdotem ex Tribu Juda, ex qua Jesus Christus natus est. Ad Hebræos 7. 13. 14. *In quo enim hæc dicuntur, de alia Tribu est, de qua nullus Altari præsto fuit. Manifestum est enim quod ex Juda ortus sit Dominus noster, in qua Tribu nihil de Sacerdotibus Moyses locutus est.* Nullius porro esset roboris argumentum Apostoli, si Sacerdotes inter tribules Judæ recenseri jure potuissent. Tertio, nulla maternæ stirpis apud Judæos habita ratio est, secundum Thalmudicum illud scitum: *Familia Matris non vocatur familia.* Nullum itaque

que jus ad Sceptrum Tribui Judæ proprium, Leviticæ Tribui ex prætenſa illa affinitate acceſſiſſet .

Longe magis improbable videtur quod *Genebrardus* in Chronico , & *Baronius* in Apparatu , aſſerere non dubitarunt , Aſſamonzos paternum genus ad *Judam* referre . Eam enim aſſertionem aperte excludunt tum laudatus Apoſtoli locus ; tum inſignis ille *Numerorum* 16. 39. 40. ubi legimus , *Eleazarum* Sacerdotem , Deo jubente , impiorum *Core* , *Dathanis* , & *Abironis* thuribula ænea produxiſſe in laminas , & aſſixiſſe Altari , *Ut haberent poſtea filii Iſrael quibus comonerentur ; ne quis accedat alienigena , & qui non eſt de ſemine Aaron* , ad offerendum incenſum Domino , *ne patiatur ſicut paſſus eſt Core , & omnis congregatio ejus* , loquente Domino ad Moysen . Eamdem refellit illud *Jeremiæ* Oraculum de Jechonia , Cap. 22. 30. *Hæc dicit Dominus : Scribe virum iſtum ſterilem , virum qui in diebus ſuis non proſperabitur : Nec enim erit de ſemine ejus vir , qui ſedeat ſuper ſolum David , & poteſtatem habeat ultra in Juda* . Caduco vero fundamento nitebatur *Baronius* , hoc nimirum loco 1. *Macchabæorum* , v. 63. *Et Viri Juda magnificati ſunt valde in conſpectu omnis Iſrael* : Quo *Macchabæos* , *Macchabæorumque Patrem Judam* ſignificari conſebat . Legitur enim in Græco Textu , καὶ οἱ Ἰουδαὶς καὶ οἱ ἀδελφοὶ αὐτοῦ ἐδοξάσθησαν id eſt . *Et vir Judas , & fratres ejus glorificati ſunt valde in conſpectu omnis Iſrael* . Idem habet

bet Versio Syriaca : *Ita Juda , & fratres ejus magis laudati fuerunt apud omnes Israelitas . Sane Macchabæos ex Tribu Levi , non ex Tribu Juda prognatos , liquet ex Cap.2. Lib.1. Macchabæorum 5. 1. in quo Mathathias Macchabæorum parens dicitur Filius Joannnis , filii Simeonis , Sacerdos ex filiis Joarib : cujus sors prima exiit in descriptione stationum , quas ordine obire debebant Aaronitides familiæ , 1. Paralipomenom 24. 7. 19. Exiit autem sors prima Joarib , secunda Fedei , &c. Hæ vices eorum secundum Ministeria sua , ut ingrediantur Domum Domini , & juxta ritum suum sub manu Aaron Patris eorum . Eodem Lib.1. Macchabæorum Capite 5. 5. se Phinee oriundum prædicat Matthathias : Phinees , inquit , Pater noster zelando zelum Dei , accepit testamentum Sacerdotii aterni . Fuit autem Phinees Eleazari filius Aaronis nepos . Adde , Macchabæos non hereditario jure , sed electione Populi , Judaicæ Reipublicæ clayum tenuisse , ut constat ex 1. Macchabæorum 9. 28. 29. 30. Et congregati sunt omnes amici Judæ , & dixerunt Jonathæ : Ex quo frater tuus Judas defunctus est , vir similis ei non est , qui exeat contra inimicos nostros . Nunc itaque te hodie elegimus esse pro eo nobis in Principem , & Ducem ad bellandum bellum nostrum . Et Cap.14.41. de Simone Macchabæo dicitur : Judæi & Sacerdotes eorum consenserunt eum esse Ducem suum , & Summum Sacerdotem in aeternum , donec surgat Propheeta fidelis . Ne vero Patrum suffragiis destituti*

videamur , S. Cyrillo opponimus S. *Ambrosium Lib. 3. in Evangelium S. Lucae* diserte asserentem , Regnum Davidicum in *Jechonia* desuisse . *Jechonia regnante* , inquit , *Judæam Babylonii vastaverunt* , neque postea unquam de semine ejus Regnum quisquam in *Judæa* potuit obtinere . Postea enim populus de Captivitate dimissus sub Sacerdotibus & Tetrarchis fuit .

Respondent alii : Ex tribu Juda extitisse Principes ad Christi usque tempora , quod Supremus Hebræorum Senatus a *Mose* Dei jussu institutus , *Numerorum 11.* quem *Synedrium Magnum* vocabant , cui commissa erat Cabala , Legisque interpretandæ Munus summa cum auctoritate , totus Senatoribus Tribu Juda prognatis constaret . Ita *Paulus Burgenfis in Cap. 49. Genesis* , *Galatinus Lib. 4. De Arcanis Catholicae Veritatis* , *Joannes Annius in Breviario Temporum Pseudo-Philonis sui* , *Joannes Lucidus lib. de Emendatione Temporum* & *Joannes Mirandulanus* .

At inanis ea Responsio est , nullaque solida probatione fulta . Nec enim Regia fuit Auctoritas , aut summa Potestas in rebus politicis penes Synedrium : Neque verisimile est , una ex Tribu Juda selectos fuisse Senatores , quibus Confessus ille constabat : cum ea fuerit Judaici Populi consuetudo , ut quoties ad publicæ rei negotia certus aliquis virorum prudentium & proborum numerus deligendus esset , ii ex omnibus Tribubus diligerentur ; & *Moses* , auctore *Jethro* Socero suo , Judices ex toto

Israel, id est, ex omnibus Tribubus constituerit, Exodi 18. 25. *Et electis viris strenuis de cuncto Israel, constituit eos Principes Populi, Tribunos, & Centuriones, & Quinquagenarios, & Decanos. Qui judicabant plebem omni tempore.* Et Deuteronomii 2. 9. *Dixique vobis illo in tempore . . . Non valeo solus negotia vestra sustinere, & pondus ac iurgia. Date ex vobis viros sapientes & gnaros, & quorum conversatio sit probata in Tribubus vestris, ut ponam eos vobis Principes, Tunc respondistis mihi: Bona res est, quam vis facere. Tulique de Tribubus vestris viros sapientes & nobiles, & constituti eos Principes, Tribunos & Centuriones, & Quinquagenarios, ac Decanos, qui docerent vos singula. Præcepique eis, dicens: Audite illos, & quod justum est, judicate.* Nec verisimilior est eorum assertio, qui non totum quidem Senatum, sed Principem tamen Senatus, quem *Caput Scholæ* Judæi vocabant, dicunt ex Tribu Juda delectum fuisse. Nam summa rerum penes illum Senatus Principem nusquam fuit, sed penes Reges ante captivitatem; post reditum vero ex captivitate, penes Pontifices. Sequeretur ergo, in illa etiam hypothesis, Sceptrum de Juda, & Ducem de femore ejus ablatum esse ante Christi tempora. Deinde Principem illum Synedrii de Tribu Juda semper delectum fuisse, vel ex ea necessario deligendum, nec ipsi Rabbini consentiunt; nullaque hujus rei probatio proferri potest.

Respondent alii: Jacobæi Oraculi hunc
sen-

sensum esse . A Tribu Juda non ante ablatum iri Sceptrum , formam nempe Reipublicæ suis legibus utentis , seque ipsam regentis ac gubernantis , postquam semel ad eam pervenerit , quam Messias exoriat ; quo tempore solum iri communitatem ac regimen Tribus Juda ; atque id rerum ipsarum eventum confirmare . Si quidem Tribubus decem in peregrinas ac dissitas regiones expulsis & dissipatis , sola Tribus Juda sedibus propriis , ac pristinis restituta , Jurisdictionem suam , imperium , civilis corporis formam servavit ad Christi usque Adventum . Responsionem suam ex eo confirmant , quod vox *Sheveth* , quam Vulgatus interpret vertit *Sceptrum* , alii *virgam* , interdum in Sacris Litteris *Tribum* seu *familiam* significet , ut Psal. 57. 67. 68. *Tribum Ephraim non elegit : Sed elegit Tribum Juda* . Ubi illi voci , *Tribum* , in Hebræo Textu respondet , *Sheveth* . Eadem porro significatione vocem illam Hebraicam in Jacobæo Oraculo esse positam ; ut sensus Prophetiæ sit : *Non auferetur Tribus Juda* , id est , ad Messiam usque permanebit . Ita *Oleaster* , & alii .

Sed hæc Responsio nullo negotio evertitur . Sceptrum enim , Jurisdictionem , Imperium , ad Messiam usque non servavit Tribus Juda , siquidem post Captivitatem Babyloniam fuit penes Assamonæos , aliosque Sacerdotes , tribules Levi . Præterea non minus steterunt ad Messiam usque Benjamitica , & Levitica Tribus , quam Tribus Juda . Nil ergo singulare

re

re & eximium Tribui Juda Jacobæum Oraculum prædixisse, quoad Regni perennitatem, fateri debent. Tertio, etsi Sceptri nomine Tribum significatam daremus, his tamen verbis: *Et Dux de femore ejus*, Tribum notari nemo dixerit, sed singularium quarumdam personarum successionem, quarum interitus gignendo reparatur, quod de tota Tribu dici non potest. Quarto, nulla Scripturæ Sacræ Versio vocem Sheveth hoc in loco Tribum reddidit, sed Sceptrum, Virgam, Imperium, Principatum; & vocem *de femore ejus*, sive, ut Textus Hebræus sonat, *de inter pedes ejus*, Onkelos & Hierosolymitanus Paraphrastes verterunt, *de filiis eorum*: Jonathan, *de semine ejus*: Quo nomine Tribum neutiquam significari, sed singulares de Tribu vel Gente personas, perspicuum est. Cum itaque Regia Potestate in *Sedecia* & *Jechonia* extincta, ut prædixerat *Jeremias* cap. 22. 30. nemo homo ex Tribu Juda in eam successerit post Babylonicam Captivitatem, semper conficeretur contra hujus expositionis Vindices, Sceptrum de Juda fuisse ablatum longe ante Christi tempora.

Respondent alii: Etsi usufructus Sceptri a Tribu Juda sit aliquando ablatum, ipsam tamen proprietatem, ipsum jus ademptum non fuisse, illiusque aliquando per Messiam de se nasciturum recuperandi spem in ea superfuisse. Atqui jus ad Sceptrum, sive Sceptri proprietatem, Sceptrum recte appellari potest & solet. Sic dicimus, Imperium tot annos penes Ro-

manos fuisse , quamvis plurimi ex aliis Nationibus creati sint Imperatores ; quia jus & proprietatem Imperii semper habuerunt , quamvis usumfructum in aliarum Gentium homines interdum transtulerint . Sic Poloniæ Sceptrum penes Polonos semper fuisse dicimus , ex quo Reges habere cœperunt , quia jus & proprietatem Regni retinuerunt , quamvis interdum Reges ex aliis Gentibus sibi delegerint . Sic post Babylonicam Captivitatem jus & proprietatem Sceptri mansisse penes Tribum Juda , quamvis ususfructus ad Afsamonæos , aliosque Sacerdotes transmissus sit .

Verum hæc Responsio non minus nutat quam superiores ; Jus enim ad Sceptrum Judæicum Tribui Judæ ablatum est in *Jechonia* , Deo ita decernente , non ususfructus Sceptri dumtaxat ; ut apud *Jeremiam* legitur , cap.22. 30. „ Hæc dicit Dominus : Scribe virum istum „ sterilem , virum qui in diebus suis non pro- „ sperabitur ; nec enim erit de semine ejus „ vir , qui sedeat super Solium David , & Po- „ testatem habeat ultra in Juda „ . Præterea , Tribus Juda ita Sceptrum amisit , ut illius aliquando per Messiam ex se proditurum recuperandi spem nullam habuerit . Agitur enim hic de Regno terreno & temporali , quod Christus nec sibi vendicavit , nec Tribui Judæ restituit ; sed novum instituit , spirituale scilicet ac æternum , cujus in possessionem omnes Tribus & Nationes vocatæ sunt . Regnum enim Christi non fuit de hoc Mundo ; & ex *Jechonia* pro-
gna-

gnatum esse Evangelistæ testantur , de quo futurum prædixit *Jeremias* , ut nepotum ipsius nullus Judaicum Imperium teneat . Denique hæc responsio totum infringit robur demonstrationis , quam ex hoc Jacobi morientis Oraculo Judæ edito Christiani contra Judæos conficiunt . Reponent enim , & pertinaciter contendent , solum usumfructum Sceptri , non jus , & proprietatem , Tribui Juda , ac Judaicæ Genti ademptam , spemque illud recuperandi superesse , quia restituet illud aliquando tandem Messias , quem expectant .

Aliorum Responsionibus elisis , nostram propositionem Patrum testimonio , & auctoritate confirmamus , qui Jacobæum Oraculum ad totam Gentem Judaicam , sive ad omnes Tribus in commune , non ad solam Tribum Juda referunt . Præit ceteris *S. Justinus Martyr in Dialogo cum Tryphone Judæo* , pag. 271. „ *Per ipsum etiam Jacobum Patriarcham* (inquit) *prædictum est , duos Christi futuros adventus ; eumque in priore perpeffionibus subditum fore : atque ubi is venisset , in genere vestro neque Prophetam , neque Regem futurum .* Mox recensito *Jacobi Oraculo* , de quo agimus : Porro nunquam prius in Gente vestra de-
fuisse neque Prophetam , neque Principem , ex quo Imperium accepit , ne impudenter quidem vel dicere audetis , vel probare potestis . Nam *Herodem Ascalonitem* , sub quo passus est Christus , allegantes , nihilominus dicitis , in genere vestro fuisse Sacrorum Antistitem , adeo ut
etiam

etiam tum vobis licuerit juxta Legem Moysi offerre oblationes, & legitima alia custodire: Tum autem Prophetas successione sua usque ad Joannem extitisse. Quemadmodum tum quoque cum Babylonem abductus est Populus vester, terra vastata, & sacris vasis sublati, non desit esse ex vobis Propheta, qui Dominus, & Dux, & Princeps populi vestri fuerit. Spiritus enim qui erat in Prophetis, Reges vobis unxit & constituit. At post Jesu Christi nostri in genere vestro manifestationem, & mortem, haudquaquam Propheta extitit, nec exstat. Sed & sub Rege proprio esse desistis. Ad hæc & Terra vestra desolata est, & tamquam custodia pomorum derelicta. Quod autem Verbum per Jacobum dixit, Et ipse erit Expectatio Gentium: figurate duos ejus denotavit adventus, & futurum esse ut Gentes ei crederent significavit: Quod sero tandem vobis cernere licet. Memoriae lapsu ἰσὺ τῷ ἱστατο pro ἰσὺ τῷ ἱγυμνῳ Sub quo natus est, quod omnino postulat Historia, Sanctum Justinum scripsisse, Viri eruditi observarunt.

Sequitur S. Athanasius, Lib. de Incarnatione Verbi Dei. Prasente igitur Sancto Sanctorum (inquit) merito obsignata est & Visio, & Prophetia, & Regnum Hierosolymitanum desit. Tandiu enim ungebantur apud eos Reges, donec ungeretur Sanctus Sanctorum. Et Moyses quoque eodem spatio Regnum Judæorum circumscripsit, idque hujusmodi Vaticinio: Non deficiet Princeps ex Juda, neque Dux de femoribus

bus ejus , donec venerint ea , quæ reposita sunt ei ; & Ipse est expectatio Gentium . Unde & ipse Salvator clamat dicens ; Lex & Prophetæ usque ad Joannem prophetaverunt . Si igitur vel nunc nullus est apud Judæos aut Rex , aut Propheta , aut Visio ; recte inficiantur advenisse Christum . Sin autem neque Rex , neque ulla Prophetia superest , sed obsignata est in posterum & omnis Prophetia & Civitas & Templum capta , quorsum ista impietas & tergiversatio , ut cum ista ipsa facta videant , Auctorem qui hæc fecit Christum negent ?

Idem confirmatur ex Eusebio , cum Libro 8. *Demonstrationis Evangelicæ* , quem locum infra proferemus , tum lib. 1. *Historiæ Ecclesiasticæ* , cap. 6. Per idem tempus (inquit) cum Herodes primus ex alienigenis Judæicæ Gentis Regnum obtineret , completa esse videbatur Moysis prædictio , quæ sic habet : Non deficiet Princeps ex Juda , neque Dux de femore ejus , donec veniat cui repositum est . Quem etiam expectationem Gentium fore confirmat . Quippe sine effectu semper pendebat prædictio , quamdiu sub domesticis Principibus Judæis agere licebat ; qui quidem a Moyse initio ducto , ad usque Augusti tempora permanserunt . Cujus Principatu primus ex alienigenis Herodes Regnum Judææ a Romanis adeptus est ; cum , ut a Josepho quidem traditum est , paterno genere Idumæus , Arabs materno esset . Et infra : Hyrcano , in quem ultimum Sacerdotum progenies erat devoluta , a Parthis intercepto , primus
(ut

(ut dixi) ex alienigenis Herodes a Senatu , & Augusto Judææ Regnum accepit . Quo tempore cum Christi corporalis præsentia orbi illucesceret , expectata illa Gentium salus exitum sortita est ; & Nationum vocatio , prout Prophetarum Oraculis prædictum fuerat , subsecuta . Ex quo etiam tempore cum Principes , & Duces ex Juda , id est , ex Judæorum Gente defecissent , successio summi Sacerdotii quod per generis continuam seriem proximo cuique hætenus constanter delatum fuerat , consequenter turbata est .

Item ex Sancto Joanne Chrysostomo Homilia 67. in Genesim : Postea (inquit) & tempus quoque manifeste declarat , quo adventurus sit Christus juxta dispensationis rationem . Non deficiet , inquit , Princeps de Juda , neque Dux de femore ejus donec veniat , cui repositum est : & ipse erit Expectatio gentium . Tamdiu (inquit) durabunt Judaica , & Princeps Judæorum , quoad ille venerit . Et benedixit , quoad ille venerit , cui repositum est . Quasi dicat , Ille cui præparatum est Regnum : propterea Ipse est Expectatio Gentium .

Eodem modo hoc vaticinium intellexit S. Ambrosius Libro de Benedictionibus Patriarcharum , cap. 4. Et ideo donec Ille veniat , non deficiet Dux ex Juda ; ut usque ad ejus ortum regalis successionis fides incorrupta servetur . Postea enim , ut docuimus Tractatu habito in Evangelium , per Herodem , adulterata successio prærogativam dignitatis amisit . Etenim quia

ve-

verum Regem negaverunt, falsos habere ceperunt. Ergo hoc quod dicit Patriarcha, servabitur in Judicibus vel Regibus Judæorum intermeratae successionis hereditas ducta per Reges: Donec veniat cui repositum est: ut Ecclesiam Dei congreget ex conventu Nationum omnium, & Gentilium devotione Populorum, hoc est, ipsum manet, ipsi debitum reservatur, ipsi tantæ gratiæ prærogativa defertur.

Ita etiam intellexisse videtur S. Augustinus lib. 18. de Civitate Dei cap. 55. ubi cum præmisisset, Judæos, ex quo de Captivitate Babylonis reversi sunt, non Reges, sed Duces vel Principes habuisse ex Ordine Sacerdotali, donec Aristobolus, assumpto diademate, & Rex & Pontifex factus est; subdit: Deinde post paucos annos etiam Herodem alienigenam Regem habere meruerunt, quo regnante natus est Christus. Jam enim venerat plenitudo temporis significata Prophetico Spiritu per os Patriarchæ Jacob, ubi ait: Non deficiet Princeps ex Juda, neque Dux de femoribus ejus, donec veniat cui repositum est, & Ipse expectatio Gentium. Non ergo defuit Judæorum Princeps ex Judæis, usque ad istum Herodem, quem primum acceperunt alienigenam Regem. Tempus ergo jam erat, ut veniret Ille cui repositum erat, quod novo promissum est Testamento, ut ipse esset expectatio Gentium.

Ita Theodoretus Quæstione 110. in Genesim. Prænuntiat etiam (inquit) tempus adventus Illius: Non deficiet Princeps ex Juda,

C

& Dux

& Dux de femore ejus , donec veniat cui repositum est , & Ipse est Expectatio Gentium : *Hoc adventus Domini indicium est clarissimum . Nam ut Prophetiæ finis ostenderetur , defecerunt non tantum Judæorum Reges , sed Principes Sacerdotum , & Prophetæ , Si quidem cum Salvator noster nasceretur , allophyli Reges imperabant ut æternus Rex declararetur , qui erat Gentium Expectatio , secundum promissionem ab omnium Deo Patriarchis factam . Qui Sceptrum de Juda usque ad Messiae ortum propterea non defecisse asserunt , quo Judæi usque ad Herodem Principes ex sua Gente habuerint , Jacobæum Oraculum ad totam Gentem , non ad unam Tribum Juda referunt : Sed Patres supra laudati Sceptrum de Juda usque ad Messiae ortum propterea non defecisse asserunt , quod Judæi usque ad Herodem Principes ex sua gente , ex suo genere habuerint : Jacobæum igitur Oraculum ad totam Gentem Judaicam , non ad unam Tribum Juda referendum censent .*

Objiciunt contrariæ sententiæ Vindices, *Jacobum* morti proximum convocatis filiis suis singulis viritum , speciatim , & distincte prædixisse , quæ ipsis eorumque posteritati olim evenitura erant , Genesis 49. 28. *Omnes hi in Tribubus Israel duodecim ; Hæc locutus est eis pater suus , benedixitque singulis Benedictionibus propriis . Porro si ad totam Gentem Judaicam , seu ad omnes Tribus in commune , non ad unam Judæ Tribum Oraculum Judæ editum referatur , nulla Benedictio propria erit Tribui Juda ;*

da ; nulla ipsius singularis prærogativa aut dignitas .

Præterea : Ad eundem referenda est pars illa Jacobæi Vaticinii , ad quem præcedentia , & sequentia verba referuntur ; cum nulla ratio proferri possit cur prima , & postrema pars Prophetiæ ad Tribum Juda proprie spectet , media vero ad duodecim Tribus , sive ad Gentem totam detorqueatur . Nemo vero dixerit vel cogitaverit , primam Prophetiæ partem ad Tribum Juda proprie non pertinere : *Juda te laudabunt fratres tui , adorabunt te filii Patris tui . Catulus Leonis Juda : Ad prædam , fili mi , ascendisti .* Et sequentia , quæ fertilitatem indicant regionis , quam insedit Tribus Juda : *Ligans ad vineam pullum suum , & ad vitem , o fili mi , asinam suam . Lavabit in vino stolam suam , & in sanguine uvæ pallium suum .* Igitur & media illa pars Prophetiæ : *Non auferetur Sceptrum de Juda , & Dux de femore ejus ; donec veniat Qui mittendus est : & Ipse erit Expectatio Gentium ;* ad unam Tribum Juda proprie pertinet .

Respondetur : Hanc Prophetiam ad Tribum Juda proprie referri secundum priorem & posteriorem Oraculi partem : Ad secundum mediam illam , *Non auferetur Sceptrum de Juda , & Dux de femore ejus ; donec veniat Qui mittendus est* , ad eandem separatim , & proprie non pertinere , neque ad eam referri , sed quatenus cum aliis Tribubus conjuncta est , ac præstantia nihilominus singulari , ac dignitate , nominis-

que celebritate præcellens. Multiplex enim vero ratio fuit cur ad *Judam* hæc etiam verba *Jacob* dirigeret, illaque ipsi potius quam aliis Tribubus accommodaret. Prima, quod Tribus esset Regno destinata, penes quam scilicet Judaicum Imperium per annos amplius quingentos futurum esset, idque sub *Davide*, & *Salomone* florentissimum. Secunda, quod universus Populus Israeliticus a Tribu Juda nomen accepturus esset post Captivitatem Babyloniam. Tertia, quod eo ipso tempore quo summa rerum futura erat penes Assamonæos, aliosve Sacerdotes, regio ipsa, qua continebatur Imperium, tota aut maxima ex parte ad sortem Tribus Juda pertinere deberet, & subditi futuri essent de Tribu Juda. Quarta, quod Tribus Juda ceteris præstantia quadam, & excellentia singulari præire semper deberet, cujus excellentiæ testimonia colligit *Eusebius lib.8. Demonstrationis Evangelicæ, Cap.1.* Ut cum *Numerorum 13. 3. & 10. 14.* in Castris ponendis ceteris antefertur: Cum *Cap.12. 17.* in ordine offerentium reliquis anteit: Cum *Josue 15. 1.* in divisione Terræ Chanaan primam sortem tulit: Cum mortuo *Josue* in Bellis adversus Chananæos gerendis ducatum Belli, Deo jubente, accepit: *Judicum 1. 2.* cum toto Judicum tempore singularem quamdam honoris prærogativam semper servavit: Unde & *1. Paralipomenon 2.* Tribules Judæ inter Israelitas primo loco recensentur: Quam Tribus Juda præstantiam prænoscingens *Jacob, Judæ* nomen toti

toti Genti accommodavit , & partem Judaici Populi nobilissimam pro toto Populo posuit ; quemadmodum Jerusalem , & Sion pro Judæis , Samaria pro Regno decem Tribuum seu Israelis , Babylon pro Chaldæis , frequenter in Sacris Litteris posita sunt . Quinta ratio , cur hoc Vaticinium Jacob ad Judam direxerit , est , quod natalium prærogativam prioribus Oraculi verbis Judæ attribuisset : *Juda , te laudabunt fratres tui : Adorabunt te filii Patris tui . . .* Hæc scilicet prærogativa Rubeno ablata ob scelus illud commissum : *Ruben Primogenitus meus* Prior in donis , major in Imperio . Effusus es sicut aqua , non crescas , qui ascendisti cubile Patris tui , & maculasti stratum ejus : Bona & facultates Primogenito destinatae in *Josephum* translatae sunt . Quicquid vero honoris erat , & dignitatis attributum est *Judæ* , ut constat ex 1. Paralipomenon Cap. 5. 2. Porro *Judas* , qui erat fortissimus inter fratres suos , de stirpe ejus Principes germinati sunt : Primogenita autem reputata sunt *Joseph* . Sexta , omniumque potissima ratio , cur hanc de Messia venturo , ejusque adventus tempore Prophetiam *Jacob* ad *Judam* direxerit , quamvis illa verba , *Non auferetur Sceptrum de Juda , & Dux de femore ejus , donec veniat Qui mittendus est* , ad totam Gentem , sive ad omnes Tribus in commune pertinere probe nosset , ea est ; quod ceteræ Tribus , interventu Tribus *Juda* id honoris , & beneficii habituræ essent , ut Christus ex sua Gente nasceretur ; ex Tribu quippe *Juda* pro-

diturum *Jacob* prænoverat ; quam felicitatem auguratus , *Judæ* benedicit his verbis : *Juda te laudabunt fratres tui , adorabunt te filii Patris tui .*

Hanc Responſionem cum *Eusebio* debeamus , insignis ejus ea de re locus ex Libro 8. *Demonſtrationis Evangelicæ* hîc exhibendus eſt. Cum (inquit) tam multa de vocatione Gentium Oracula *Jacob* antea percepisset , & liberos maiores duodecim numero genuisset , omnibus illis extremo suo tempore convocatis , circumſpiciebat de cujus illorum propagatione divina Oracula finem suum eſſent acceptura . Deinde cum tribus primis crimina propria objecisset , docuit deinceps quemadmodum propter scelera , quæ ipsi ausi fuerant , non in ipsis complenda eſſent , quæ in prioribus Oraculis eventa continebantur . Cum autem venisset ad quartum qui *Judas* fuit , tum vero Oraculum quod ipsi olim responſum fuerat , Reges de lumbis tuis egredientur , ex hujus posteritate finem suum accepturum planissime cecinit . Conſtat enim quemadmodum de Tribu *Juda* Regium genus extiterit , & simul Dei responſa , gentiumque promiſſa quibus instarent temporibus ostendit . Atque ex eo proditurum eſſe docuit eum , qui eſſet omnibus Gentibus cunctisque Tribubus terræ , ſimilis ipſi *Abraham* benediſtionis Auctior futurus . Hæc igitur uni-verſa fuerunt , quæ ipsi *Juda* reposita erant , ea videlicet quæ de ipsis Gentibus olim responſa fuerant : & illud , Reges de lumbis tuis egredientur . Quare etiam reliquis fratribus antepositus ,

situs, Regiam ipsam, ceterisque illustriorem Tribum sortitus est. Continuo enim in totius Populi ordinatione, ipsius Moysis temporibus, reliquis Tribubus hanc præesse imperat Deus. Scriptum est enim: Et locutus est Dominus ad Moysen, & Aaron dicens: Singuli per turmas, signa, atque vexilla, & domus cognationum suarum, castrametentur filii Israel in conspectu Domini, per gyrum Tabernaculi testimonii, & castrametantes primi ad Orientem, acies castrorum filiorum Juda cum copiis suis. Ac deinceps in iis quæ ad invocationem Tabernaculi referuntur: Dixit Dominus ad Moysen: Princeps unus per singulos dies offeret munera sua, & fuit offerens primo die munus suum, Naasson filius Aminadab Princeps Tribus Juda. Et in libro Jesu Nave; cum Terra promissionis sorte ceteris Tribubus distributa esset, sine sorte, omniumque prima Tribus Juda propriam Terræ partem accepit. Sed etiam post mortem Jesu regnaverunt filii Israel in Domino dicentes: Quis ascendet ante nos contra Chananæum, & erit Dux belli in eum? Et dixit Dominus, Judas ascendet: Ecce dedi Terram in manus ejus. Plane igitur omni Israel præesse Tribum Juda, Deus his verbis jubet. Quocirca deinceps scriptum est: Et ascendit Judas, & tradidit Dominus Chananæum, & Pherezæum in manum ejus. Et rursus; Et bellaverunt filii Juda in Hierusalem, & comprehenderunt eam & descenderunt filii Juda in Chananæum. . . . Itaque cum in Libro Judicum, diversis temporibus (tametsi

diversarum Tribuum esse videbantur) Judices Populo præessent ; Tribus tamen Juda in universum totius Gentis dux erat . Idipsum vero temporibus David , Successorumque ejus multo magis , quippe cum plane de Tribu Juda illi existerent , & Regnum usque ad Babylonicam ipsorum cladem produxerint : post quam cladem iis , qui de ea servitute in patriam terram reversi sunt , rursus præfuit Zorobabel , Salathiel filius de Tribu Juda . Inde etiam Scriptura , quæ Paralipomenon dicitur , duodecim Tribuum Israel sortem generis enarrans , ab ea , quæ est ipsius Juda , fecit initium . Ergo ipso ordine sequitur ut etiam posterioribus temporibus fateamur , eandem Tribum reliquis præfuisse , quamvis in parte aliqua varii diversique Populo præficerentur , quorum singillatim genus enarrare solita diligentia nequaquam nos possumus , propterea quod nullus amplius fertur divinus Liber , qui ex illo usque ad tempora Salvatoris nostri narrationem continuaverit . Verumtamen & fama , & ratio dicetabit durasse tamdiu Tribum Juda , quamdiu tota Gens libertate , & suis legibus utens , sub domesticis Principibus Ducibusque vitam egerit . Porro hoc illis contigit ab initio usque ad tempora Augusti , in quibus cum Salvator noster Jesus hominibus se videndum præbuerit , tum vero in servitutem Romanis universa Gens cessit ; & pro patriis , ac legitimis Ducibus primus Herodes externus illis præfuit , & Rex Augustus . Quamdiu igitur non defecit Princeps de Juda , neque Dux de femore ejus ,
Pro-

Prophetiarum tempora appositis Principum gentis nominibus notabantur . . . Sed ubi defecit Princeps de Juda , & Dux de femore ejus , cum Expectatio Gentium , de qua Prophetæ locuti fuerant jamjam per Christum vitam esset illustratura , non amplius Reges Juda censeri , neque Duces Israel capere , sed his ipsis , quemadmodum Prophetiæ significaverant , suo certo & finito tempore deficientibus , primus quidem Augustus , secundus autem Tiberius , & aliarum & Judicæ Gentis nuncupati sunt Reges ; nec non alii secundum hos ipsos Judææ Procuratores atque Tetrarchæ , quibus adnumeretur Herodes , a Judæorum genere , ut jam antea dixi , alienus , qui etiam ipse a Romanis Judæorum Principatum accepit .

Subinde ostendit Eusebius , hanc Prophetiam , Non auferetur Sceptrum de Juda , ad singularem Judæ Tribum referendam non esse . Multis enim sæculis (inquit) Principes ac Duces in Judaica Gente extiterunt , qui de illius Viri genere profecti non sunt . Primus namque ipse Moyses Dux Populi fuit , qui non de Juda , sed de Levi natus est : Deinde Jesu de Tribu Ephraim , post quem præfuit Debbora de Tribu item Ephraim , deinde Samson de Tribu Dan : postea cum sine Principe essent , præfuit ipsis Heli Sacerdos de Tribu Levi . Hi cuncti Judices qui judicabant Israel , non de genere ipsius Juda , sed ex diversis Tribubus ex alia alius oriundi ; & qui post hos primus apud eos Regiam Dignitatem accepit Saul , de Tribu fuit

Benjamin . Quomodo igitur illud , Non deficiet Princeps de Juda , neque Dux de femoribus ejus , (ut quispiam fortasse putaverit) ad Principes de Tribu Juda , ac Duces referetur , quando videntur ex quo tempore mortuus est Jacob , totis propemodum mille annis , non ex una Tribu ipsius Juda profecti , sed ex alia aliis usque ad tempora David ? Quod si post tam multos , & David , & qui ipsi David in Regno apud Judaicam Gentem successerunt , de Tribu Juda nati sunt , sciendum tamen tibi est , quod hi ipsi ne totos quidem quingentos annos totius Gentis regnum obtinere potuerunt , sed trium dumtaxat Tribuum , ac ne harum quidem solidarum , quippe cum iisdem temporibus alii quidam in parte Gentis ampliore , & in totis novem Tribubus regnaverint , nam post mortem Salomonis , cum tota Gens a Juda divisa fuerit , ipsius David Successores trium , ut dicebam , Tribuum , ac ne harum quidem solidarum , in in Jerusalem Reges fuerunt usque ad Babyloniam cladem . Iisdem vero temporibus in Civitate quæ vocatur Samaria novem Tribuum Duces non de Tribu Juda , sed ex aliis alii extiterunt : Quorum primus Jeroboam fuit , de Tribu Ephraim , ac deinceps qui hunc secuti sunt , ut ne mediis quidem temporibus a David usque ad tempus quo in Babylonem captivi ducti sunt , ulli de Tribu Juda universa Genti præfuerint . Porro autem quid dicendum est , quemadmodum post reditum de Babylone rursus quingentis annis amplius usque ad Christi ortum vixerint , eo sta-

tu Civitatis utentes , in quo soli Optimates rem administraverint , Pontificibus utique toti Genti imperantibus , quorum nullus plane de Tribu Juda oriebatur ? Ut jam ex his omnibus perspicere possit non ad primum illum Judam , neque ad illius Successores referendum esse Oraculum illud dicens : Non deficiet Princeps de Juda , neque Dux de femoribus ejus ; sed ea quæ ad hunc locum pertinent , uno dumtaxat modo constare posse , si secundum ea quæ prius a nobis de tota Tribu exposita sunt , hæc ipsa intelligenda esse dixerimus . Hæc enim Tribus ab initio , & ab ipsius usque Moysis temporibus , universæ Gentis Dux fuit : itaque secundum hujus principatum , utpote quam Deus ceteris ab initio præfecerit , & ipsa regio etiam nunc ab ea ipsa Tribu Judææ vocabulum obtinet , & omnis illorum conventus Judæorum appellatur . Sic igitur intelligamus , quod dictum est , tamquam si manifestius dixisset . Non desinet toti Genti præesse Tribus Juda . Ex quo Symmachus : Non auferetur , inquit , Potestas de Juda ; Sic utique juris cujusdam amplioris , & Principatus auctoritatem ejus , quæ postea futura esset Tribus Juda , nobis intelligendam proponens . Hujus enim neque sceptrum , ut Aquila inquit , (Regii porro Principatus signum hoc erat) neque potestatem , ut Symmachus , sublatum iri vaticinatur , donec veniat , inquit , cui repositum est , atque ipsum fore Expectationem Gentium .

Primum igitur admirari operæ pretium fuerit , quid ita , cum 12. Tribus essent , a nulla alia

nisi una ipsius *Juda*, *Gentis* etiam nunc appellatio usurpetur. Quod ego quidem non ob aliud contigisse arbitror, quam ob ipsius *Prophetiæ* oraculum, quod uni *Tribui Juda* *Principatus* dignitatem attribuit. Quin etiam patria ipsorum terra eadem de caussa *Judææ* appellationem sortita est . . . sic sane istud; Non deficiet Princeps de *Juda*, ad ipsam *Tribum* a nobis relatum est, & hoc uno dumtaxat modo *Oraculi* veritas locum habet. Namque a *Moysis* usque temporibus deinceps non defecerunt particulares quidem ipsorum *Principes*, qui ex diversis *Tribubus* *Genti* præfuerint; in universum autem *Tribus Juda* quæ totius *Gentis* *Principatum* tenuerit. Exemplo id *Tibi* apertius liquebit. Ut enim in *Romano Imperio* singularum *Gentium* *Procuratores*, & *Præsides*, *Prætoresque*, & *Castrorum Præfecti*, & qui omnes dignitate anteeunt, *Reges*, non omnino omnes de ipsa *Romana Urbe* capiuntur, neque de *Remi* sive *Romuli* genere, sed ex innumerabilibus aliis aliunde *Nationibus*; omnes tamen & *Reges*, & qui post ipsos secundo loco *Principes*, *Præsidesque* habentur, *Romanorum* appellatione notantur, & *Romanorum* denominatur *Imperium*, & eandem denominationem in universum omnes *Magistratus* attingunt. Sic etiam in rebus *Hebræorum* constituere intelligereque oportet, tamquam una quidem in universum *Tribus Juda* totam *Gentem* de suo nomine illustram reddiderit, particulares vero *Duces*, ac *Reges* ex diversis extiterint *Tribubus*, qui tamen communi illa *Juda* appellatione honorem acceperint. AR-

ARTICULUS II.

De LXX. Danielis Hebdomadibus .

DUdum Eruditos exercuit celeberrimum *Danielis* de Christo intra Septuaginta Hebdomadas venturo vaticinium , quod legitur Cap.9. vers.24. & sequentibus . Septuaginta Hebdomades abbreviatæ sunt super populum tuum & super Urbem Sanctam tuam , ut consummetur pravaricatio , & finem accipiat peccatum , & deleatur iniquitas , & adducatur justitia sempiterna , & impleatur visio & Prophetia , & ungatur sanctus sanctorum . Scito ergo , & animadvertite : Ab exitu sermonis , ut iterum ædificetur Jerusalem usque ad Christum ducem , Hebdomades septem , & Hebdomades sexaginta duæ erunt ; & rursus ædificabitur platea , & muri in angustia temporum . Et post Hebdomades sexaginta duas occidetur Christus ; & non erit ejus populus , qui eum negaturus est . Et civitatem , & sanctuarium dissipabit populus cum Duce venturo ; & finis ejus vastitas , & post finem belli statuta desolatio . Confirmabit autem pactum multis Hebdomada una , & in dimidio Hebdomadis deficiet hostia & sacrificium . Et erit in Templo abominatio desolationis : & usque ad consummationem & finem perseverabit desolatio . Multis intricatum difficultatibus hoc Vaticinium est , quoad septuaginta Hebdomadam a

Da-

Daniele hic prædictarum exordium, exitumque. Unde variæ natæ sunt circa illius explicationem sententiæ. Hebdomadas annorum hic intelligi certum est, id est annos nonaginta & quadringentos. Septuaginta enim Hebdomades dierum, nonaginta dumtaxat, & quadringentos dies continent. Quo temporis intervallo nihil contigit eorum, quæ *Gabriel* Archangelus *Danieli* viro Desideriorum intra septuaginta Hebdomades eventura prædixit. Neque vero de Hebdomadibus decenniorum, quarum quælibet annis constat septuaginta; quod *Origeni* Tractatu 29. in *Matthæum* visum est. Aut de Jubilæorum vel sæculorum hebdomadibus, quod Rabbiorum quorundam delirium fuit, referente *Galatino* lib. 4. *De Arcanis Catholicæ Veritatis* cap. 14. hæc *Danielis* Prophetia intelligenda est: in sacris enim Scripturis duplex tantum invenitur Hebdomadis acceptio, scilicet dierum, & annorum. Septem Hebdomades dierum a Paschate ad Pentecostem numerantur *Levitici* 23. 15. 16. Numerabitis ergo ab altero die sabbati, in quo obtulistis manipulum primitiarum, septem Hebdomadas plenas usque ad alteram diem expletionis Hebdomadæ septimæ, id est quinquaginta dies. Tres Hebdomades dierum se jejunaſſe *Daniel* memorat anno tertio *Cyri* Regis, Cap. 10. 2. In diebus illis ego *Daniel* lugebam trium Hebdomadarum diebus, panem desiderabilem non comedi, & caro & vinum non introierunt in os meum, sed neque unguento unctus sum, donec complerentur trium

He-

Hebdomadarum dies. Septem Hebdomadas annorum numerari jubet Deus *Levitici 25.* & annum quinquagesimum, qui Jubilæus est, celebrari. *Numerabis quoque tibi septem Hebdomadas annorum, id est, septies septem, quæ simul faciunt annos quadraginta novem . . . sanctificabisque Annum quinquagesimum, & vocabis Remissionem cunctis habitatoribus terræ tuæ; Ipse est enim Jubilæus.* Cum itaque in hoc *Danielis* Vaticinio dierum Hebdomades intelligi non possint, superest ut annorum Hebdomades intelligantur. Qua in re Christiani Patres, & doctiores Hebræorum Magistri consentiunt.

At circa initium, exitumque harum Hebdomadam variæ fuerunt ac pugnantes Patrum, aliorumque Auctorum Ecclesiasticorum, & Hebræorum sententiæ. *Hyppolitus Martir*, ut *S. Hieronymus* refert in cap.9. *Danielis*, septuaginta Hebdomadam exordium statuit anno quinquagesimo ante solutionem Babylonicæ Captivitatis, idest, Olympiade quadragesima-prima: Exitum sexaginta novem Hebdomadam constituit in Natali Christi: Ultimam vero Hebdomadem refert ad consummationem Mundi; eamque partitur inter prædicationem *Enoch*, & *Eliæ*, & Regnum Antichristi. *Clementis Alexandrinus* Libro 1. *Stromatum* septuaginta Hebdomadam initium ducit a primo anno Cyri, quo soluta est Babylonica Judæorum Captivitas, & facultas instaurandi Templi Judæis concessa: Exitum vero statuit in Excidio
Hie-

Hierosolymitano per *Titum* Imperatorem . *Origenes* Libro 10. *Stromatum* (ut *S. Hieronymus* refert) Septuaginta Hebdomadas exorditur ab anno primo *Darii Medi* , quo Vaticinium istud a *Daniele* editum est : illarum vero finem in Natali Christi statuit . Nec tamen in ea opinione constans fuit . Tractatu enim 29. in *Matthæum* Hebdomades illas decenniorum esse censet : harum initium ducit ab *Adamo* : novem & sexaginta Hebdomadas in Christi Natali finitas asserit , septuagesimam , & ultimam Hebdomadam a Nativitate Christi ad everfionem usque Hierosolymorum sub *Tito* extendit . *Julius Africanus* , referentibus *Ensebio* Libro 8. *Demonstrationis Evangelicæ* , & *S. Hieronymo* in cap.9. *Danielis* , septuaginta Hebdomadas numerat ab anno vigesimo *Artaxerxis Longimani* , ad mortem Christi , quam refert ad annum 15. *Tiberii Caesaris* , quem concurrere ait cum Olympiadis ducentesimæ secundæ anno secundo . Annorum autem Lunarium Hebdomades fuisse vult , non Solarium : Ideoque dictas esse ab Angelo Abbreviatas . Quadringenti autem & nonaginta anni Lunares , quot septuaginta Hebdomadibus continentur , annis Solaribus septuaginta-quinque & quadringentis æquivalent . *Tertullianus* Libro *adversus Judæos* , a *Dario Medo* ad Nativitatem usque Christi Hebdomadas sexaginta duas & dimidiam , id est , annos triginta septem & quadringentos ; reliquas vero septem Hebdomadas cum dimidia , id est , annos quinquaginta tres , ab ortu Christi

Christi ad excidium Hierosolymitanum numerat. *Eusebius Casareensis* Libro 8. *Demonstrationis Evangelicæ* tres septuaginta Hebdomadam interpretationes proponit; prima initium illarum ducit ab anno primo *Cyri*, quo soluta Captivitas est, Templique permissa instauratio: Finem autem Hebdomadam novem & sexaginta refert ad *Hyrçani* Pontificis tempora, cui *Pompejus* captis Hierosolymis Pontificatum confirmavit. Hunc ultimum Christum, id est, ultimum Pontificem legitime institutum fuisse. Postquam enim *Herodes*, interfecto *Hyrçano*, Regnum Judæorum Senatusconsulto accepit, & primus alienigena Judæis præfuit, Pontificatum alieni generis hominibus, ad breve tempus, ob gratiam & pretium, divinam Legem contemnens, tradebat. Secunda Interpretatio *Eusebii* Hebdomadarum Septuaginta initium figit anno sexto *Darii Hystaspis*, quo Templi instauratio absoluta est: Et inde usque ad *Herodem* & *Cæsarem Augustum* numerat Hebdomades septem & sexagintaduas, id est, annos quadringentos octogintatres, quando *Hyrçanus* novissimus Pontifex de genere Macchabæorum, quem Christum interpretatur, ab *Herode* jugulatus est, & cessavit legitima Pontificum successio. Septuagesimam vero Hebdomadam longo a ceteris disjungens intervallo, duas in partes dividit. In priori Christum baptizatum ait, Evangel. suum prædicasse tribus annis & sex mensibus: & sic pactum suum, sive novum fœdus confirmasse. In posteriori occisum esse Christum, & in ejus morte ho-

stiana

stiam & Sacrificium defecisse . Quidquid enim in Templo postea factum est , non fuit Sacrificium Dei , sed cultus Diaboli , cunctis in commune clamantibus , *Sanguis ejus super nos , & super filios nostros* . Tertia *Eusebii* Expositio eo tantum a prioribus differt , quod Hebdomadæ sexaginta novem sint Hebdomadæ annorum , septuagesima vero sit Hebdomada decenniorum quæ annos septuaginta contineat . Ita *Eusebium* intellexit *S. Hieronymus* . Priorem illius Hebdomadæ partem a Passione Domini ad *Neronis* Imperium , quando contra Judæos Romana primum arma commota sunt : Alteram a *Vespasiano* , & *Tito* , quando eversa Hierosolyma , Templumque succensum est , usque ad *Trajanum* extendit . Et hanc esse Hebdomadam ait , de qua Angelus *Danieli* loquitur : *Confirmabit autem pactum multis Hebdomada una* . In toto enim orbe per Apostolos Evangelium prædicatum est , qui usque ad illud tempus perseveraverunt : tradentibus Ecclesiasticis Historiis , *S. Joannem* usque ad *Trajani* tempora vixisse . *S. Cyrillus Hierosolymitanus* Cathechesi 12. Septuaginta Hebdomadam initium arcessit ab exordio Regni *Darii Medi* quem cum *Dario Hyastaspis* confundit : indeque ad ortum Christi annos octoginta tres & quadringentos numerat : Hebdomadam septuagesimam alto involvit silentio . *S. Joannes Crisostomus* Oratione contra Judæos 2. ab anno vigesimo *Artaxerxis Longimani* ad Excidium Hierosolymitanum sub *Tito* , septuaginta *Danielis* Hebdomadas computat .

Sul-

Sulpitius Severus Libro 2. *Historiæ Sacræ*, Septuaginta Hebdomadum initium statuit anno secundo *Darii* Regis, sub quo Templum instauratum est, quem *Darium Nothum*, seu *Ochum* (ut vocat) esse censet. Fine vero sexaginta-novem Hebdomadum ad Excidii Hierosolymitani tempus rejecto, de septuagesima fileat. *Theodoretus* in Caput 9. *Danielis*, has Hebdomadas annorum Lunarium esse statuit, easque ab anno *Artaxerxis Longimani* vigesimo exorditur. Sexaginta duas in nece *Hyrçani* completas opinatur. Inde usque ad Baptismum Christi Jesu septem Hebdomadas reliquas numerat. In septuagesima & ultima Christum per tres annos & dimidium prædicasse, & absoluta predicatione mortuum esse ait in medio Hebdomadæ: Reliqua vero ejusdem Hebdomadæ parte Evangelium ab Apostolis in Judæa prædicatum. Veteres quidam Hebræi, referente *S. Hieronymo*, Hebdomadum *Danielis* exordium a primo anno *Darii Medi* repetebant, quo vaticinium istud editum est: Finem vero collocabant in prima clade Jerosolymis ab *Hadriano* illata; cum tamen istud temporis intervallum centum septuaginta quatuor Olympiades, id est, annos sexcentos nonaginta-sex; qui faciunt Hebdomadas Hebraicas nonaginta-novem, & annos tres contineat, ut observat *S. Hieronymus*. Alii Hebdomadum initium in prima Templi everfione per *Nabuzardanem* anno *Sedeciae* undecimo; finem in Excidio Hierosolymitano per *Titum*, anno *Vespasiani* secundo constituunt, non

non animadvertentes hoc temporis intervallo nonagintaquatuor Hebdomades contineri. *Aben-Ezra* Hebdomadum exordium ducit *Ab exitu sermonis in oratione*, nempe ab anno primo *Darii Medi*, quo *Daniel* orationem hanc fudit ad Deum, quæ nono ipsius Capite habetur. Inde septem Hebdomadas numerat ad professionem *Nehemiae* quæ in annum vigesimum *Artaxerxis Longimani* incidit, cum tamen Hebdomades amplius quindecim intercedant. Inde sexaginta duas Hebdomades cum dimidia computat ad secundi Templi conflagrationem, cum tres & septuaginta interfluxerint. Posterioris ætatis Commentatores de Septuaginta Hebdomadum initio & fine varie senserunt. *Nicolaus de Lyra*, *Paulus Burgenfis*, *Vatablus*, *Galatinus*, Hebdomadas illas ab anno quarto *Sedecia* Regis numerare incipiunt, & in Christi Passione absolvunt. Sed calculus ille vitiosus est, cum annos septuaginta & sexcentos illud temporis intervallum contineat, ab Olympiade nempe trigesima-quinta ad Olympiadem ducentessimam-secundam. *Driedo* Lib. 3. *De scripturis Sacris* Cap. 5. & *Cornelius Jansenius* in *Concordia Evangelica*, Cap. 122. septem priores Hebdomadas numerant ab ædificatione Templi sub *Dario Hystaspis*, usque ad instaurationem mœnium & Urbis Jerusalem sub *Artaxerxe Longimano*. Inde vero usque ad mortem Christi sexaginta duas Hebdomadas, id est, annos quatuor & triginta supra quadringentos numerant. Quorum calculus in eo deficit,

cit, quod prius intervallum, non septem dumtaxat Hebdomadas, id est, annos quadraginta-novem, sed amplius septuaginta contineat, quot nempe ab Olympiade sexagesima-quinta usque ad octogesimam-quartam intercedunt. Posterius vero non annos tantum quatuor & triginta supra quadringentos, sed sex & septuaginta complectatur, quot nempe intercedunt ab Olympiadis octogesimæ tertiæ anno tertio, ad Olympiadis ducentesimæ-secundæ annum quartum. *Scaliger* Libro 6. *De Emendatione temporum*, Septuaginta Hebdomadum exordium statuit in anno secundo *Darii Nothi*. Finem refert ad annum *Neronis* duodecimum, quo Judæos inter & Romanos bellum flagrabat: ex quo si tres annos cum dimidio numeres, incidet in Excidium Hierosolymitanum. *Darium* autem illum cujus anno secundo inchoatam secundi Templi fabricam, sexto absolutam esse docet Liber *Esdrae*, vult esse *Darium Nothum*, Artaxerxis Longimani Successorem, non *Darium Histaspis*. Qua in re egregie fallitur, ut facile a nobis ostendi posset. Septem autem Hebdomadas, sexaginta duas, & unam singulariter ab Angelo commemoratam, continuari negat *Scaliger*, sed a diversis capitibus asserit proficisci, nec eodem conspirare. Sexaginta & duas Hebdomadas ductas ab anno quinto *Ataxerxis Memoris*, quo Edictum de restauranda Urbe promulgatum perperam censet, ad annum Passionis Dominicæ porrigit. Septem priores Hebdomades ab anno secundo

Darii Nothi ad annum trigessimum-primum *Artaxerxis Memoris* pertingere vult. Septuagesimam Hebdomadem duas in partes tribuit: priorem annorum quatuor cum semisse, a Baptismo Christi ad ejus Passionem extendit; reliquum biennium cum sex mensibus ab anno duodecimo *Neronis* ad bellum Judaicum confectum. Ita quidem ille in editione prima sui operis. At in secunda totam Septuaginta Hebdomadam seriem ab anno secundi *Darii Nothi* ad Excidium Templi perducit, adjectis annis tribus & semisse. Opinioni hujus absurditatem demonstrat *Petavius* Libro 12. *De Doctrina Temporum* Capite 31. *Jacobus* & *Ludovicus Capelli*, ille in *Historia Sacra*, hic in *Chronographia Sacra Not. ad Tab. 11.* & alii, Septuaginta Hebdomadam initium ponunt in *Artaxerxis Longimani* anno septimo, & easdem in Christi Morte concludunt. *Joannes Lucidus* Libro *De Emendatione Temporum* ab anno 20. *Artaxerxis Longimani* Septuaginta Hebdomadam initium ducit; in quarto post Christi Mortem anno exitum ipsarum constituit: sed in medii intervalli numerandis annis illum toto decennio aberrare *Pererius* ex accurata Olympiadum supputatione demonstrat Lib. 11. in *Danielem* Parte 2. Cum *Lucido* sensu *Petavius* Lib. 12. *De Doctrina Temporum*. At vigesimum annum *Artaxerxis* non numerat a *Xerxis* obitu, sed ab eo tempore quo in Regni communionem ab ipso vocatus est, anno circiter duodecimo Regni ipsius; cum forte ad bellum extra Persidem

ge-

gerendum proficisceretur. *Petavii* conjecturam inanem esse, nulloque fultam fundamento probavit Doctissimus Præsul *Daniel Huetius* Demonstrationis Evangelicæ Propositione 9. Capite 7. §. 8. Eamque, cum sibi in mentem venisset, olim exsuflaverat *Pererius*. Hic Libro 11. in *Danielem*, 3. parte Disputationis de Septuāginta Hebdomadibus, censet illas fuisse annorum Lunarium. Non aliunde ipsarum initium sumi debere ait, quam ab anno *Artaxerxis Longimani* vigesimo. Exitum vero collocari posse ait, vel in quarto anno post Christi Domini Passionem; vel in ipso Dominicæ Passionis anno, Si primum asseratur, non Septuaginta dumtaxat Hebdomades, sed dimidiam insuper in illo temporis intervallo agnoscit, idest, annos quadringentos nonaginta-tres. Sed Angelum numerum dumtaxat maximum plenum & integrum Hebdomadum Septuaginta expressisse, minutum & imperfectum dimidiæ Hebdomadis numerum prætermisisse, more Scriptoribus Sacris sollemni. Si posterius statuatur, Hostiam & Sacrificium defecisse ait in medio Hebdomadæ, quando Christus baptizatus est. Tunc enim instituto Baptismo, primo Legis Evangelicæ Sacramento, datum esse signum defectionis mox futuræ Cæremoniarum Legalium: Vel certe septuagesimam Hebdomadam in duas partes æquales dividendam: posteriori parti Baptismum, Prædicationem & Mortem Christi esse illigandam, quam Legalium Sacrificiorum abrogatio consecuta est.

Quod

Quod itaque ait Angelus : *In dimidio Hebdomadis deficiet Hostia & Sacrificium* ; id de posteriori & extrema parte septuagesimæ Hebdomadis esse intelligendum .

Tam variarum , ac repugnantium opinionum examen operosum nimis ac molestum esset , immo & inutile , cum pleræque exoleverint . Quamobrem ab illis sigillatim discutendis ac refellendis supersedeo , tum quia hæc Provincia occupata est ab Interpretibus , & Theologis Eruditis : tum quia illam adstruendo , quæ omnium maxime probabilis videtur , ceteræ satis confutatæ manebunt & convictæ : tum quia *S. Hieronymi* observantiam erga Patres , qui ipsum præcesserant , imitari religiosum est : quorum interpretationes referre satis habuit , dijudicare noluit . „ Scio (*inquit*) de „ hac Quæstione ab eruditissimis viris varie „ disputatum , & unumquemque pro capta „ ingenii sui dixisse quod senserat . Quia igitur „ periculosum est de Magistrorum Ecclesiæ „ judicare sententiis , & alterum præferre alteri , dicam , quod unusquisque senserit Lectoris arbitrio derelinquens , cujus expositionem sequi debeat „ . Ne tamen jejunum omnino Lectorem dimittamus , totam de septuaginta *Danielis* Hebdomadibus Quæstionem duabus Propositionibus expediemus . Prima exordium ac finem Hebdomadum explicabit : Altera Oraculi Prophetici cum eventu convenientiam , ejusque in Christo consummationem .

PROPOSITIO I.

Septuaginta Hebdomadam Danielis exordium probabilius ducitur ab anno vigesimo Artaxerxis Longimani : Finis vero earumdem statuitur post Passionem Christi : ita ut in medio septuagesimæ & ultimæ Hebdomadis occisus fuerit Christus .

Probatur prima pars Propositionis . Septuaginta Hebdomadam exordium peti debet *ab exitu sermonis ut iterum ædificetur Jerusalem* ; id est a promulgatione Ediſti , quo Judæis instaurandæ Urbis data potestas est . Illud porro Ediſtum ab *Artaxerxe Longimano* promulgatum est anno Regni ejus vigesimo : Inde ergo peti debet Septuaginta Hebdomadam exordium .

Probatur Minor . Quatuor leguntur a Regibus Persarum data in gratiam Judæorum Ediſta : Primum *Cyri* (1. Esdræ cap. 1.) Alterum *Darii Hystaspis* . (1. Esdræ 6.) Tertium *Artaxerxis Longimani* anni Regni ejus septimo (1. Esdræ 7.) Quartum ejusdem *Artaxerxis* anno Regni ejus vigesimo . (2. Esdræ 2.) At *Cyri* & *Darii Hystaspis* Ediſta Templi dumtaxat restaurandi , non reparandæ Urbis potestatem faciunt Judæis . Primum etiam *Artaxerxis* , Templum tantum & Sacrificia spectat . Quartum vero Urbis ædificationem permittit antea non concessam . Illud itaque Ediſtum

D

est ,

est, a cujus promulgatione Septuaginta Hebdomadam exordium duci debet.

Probatur Minor ipsius *Nehemie* testimonio : „ Ex dixi Regi , Rex in æternum vive :
 „ Quare non mæreat vultus meus , quia Civitas domus sepulchrorum Patris mei deserta
 „ est , & portæ ejus combustæ sunt igni ? Et
 „ ait mihi Rex : Pro qua re postulas ? Et oravi
 „ Deum Cæli , & dixi ad Regem : Si videtur Regi bonum , & si placet servus tuus
 „ ante faciem tuam , ut mittas me in Judæam
 „ ad Civitatem sepulchri Patris mei , & ædificabo eam . . . Et placuit ante vultum Regis ,
 „ & misit me . . . Et dixi Regi : Si Regi videtur bonum , Epistolas det mihi ad Duces
 „ regionis trans Flumen , ut traducant me ,
 „ donec veniam in Judæam , & Epistolam ad
 „ Asaph Custodem Saltus Regis , ut det mihi
 „ ligna , ut tegere possim portas Turris Domus , & Muros Civitatis . . . Et dedit mihi
 „ Rex juxta manum Dei bonam mecum , : Et infra , postquam Hierosolymam pervenit , se Sacerdotibus , & Optimatibus , & Magistratibus Judæis dixisse memorat ; „ Vos
 „ nostis afflictionem in qua sumus , quia Jerusalem deserta est , & portæ ejus consumptæ
 „ sunt igni . Venite & ædificemus Muros Jerusalem , & non simus ultra opprobrium . . .
 Narrat deinde cap. 4. quomodo *Sanaballat* , & *Tobias Ammanites* , & Arabes ; & Ammanitæ , & Azotii ipsis insidiati fuerint , & opus interturbare conati sint armata manu , ut necessesse

se fuerint ædificiis & bello simul intendere.
 „ Factum est autem, cum audisset Sanaballat
 „ quod ædificaremus murum, iratus est valde,
 „ & motus nimis subfannavit Judæos, & di-
 „ xit coram fratribus suis, & frequentia Sa-
 „ maritanorum: Quid Judæi faciunt imbecil-
 „ les? . . . Numquid ædificare poterunt lapi-
 „ des de acervis pulveris, qui combusti sunt?
 „ *Et infra:* Factum est autem, cum audisset Sa-
 „ naballat, & Tobias, & Arabes, & Am-
 „ manitæ, & Azotii, quod obducta esset ci-
 „ catrix muri Jerusalem, & quod cœpissent
 „ interrupta concludi, irati sunt nimis. Et
 „ congregati sunt omnes pariter, ut venirent
 „ & pugnarent contra Jerusalem, & moliren-
 „ tur insidias &c. *Et infra:* Et factum est a
 „ die illa, media pars juvenum eorum facie-
 „ bat opus, & media parata erat ad bellum,
 „ & lanceæ, & scuta, & arcus, & loriceæ,
 „ & principes post eos in omni domo Juda,
 „ ædificantium in muro, & portantium one-
 „ ra, & imponentium: Una manu sua facie-
 „ bat opus, & altera tenebat gladium, . . . Tan-
 „ dem completum est opus brevi temporis inter-
 „ vallo scilicet quinquaginta duobus diebus, fre-
 „ quentibus circumquaque hostibus, qui insidiis
 „ & insultibus illud impedire frustra conati fue-
 „ rant. Hoc est quod ab Angelo, & Propheta
 „ prænuntiatum fuerat his verbis: *Et rursus*
 „ *ædificabitur platea, & muri in angustia tempo-*
 „ *rum.* Non solum autem muros, turres, pro-
 „ pugnacula, plateas ædificarunt Judæi permit-

tente *Artaxerxe*, duce *Nehemia*, sed & publica ædificia, strata viarum, fora, porticus, cisternas, aqueductus, aliaque hujus generis quamplurima, quæ Chaldæi disturbaverant. Domus etiam tumultuario opere antea exstructæ, in meliorem formam directis ordinibus compositæ sunt, ut colligitur ex *Ecclesiastici* cap. 49. 15. *Et Nehemias in memoria multi temporis, qui erexit nobis muros everfos, & stare fecit portas & seras; qui erexit domos nostras.* Sed hæc opera longiori temporis intervallo absoluta sunt, quam muri & propugnacula, sicut & templi ædificatio, cui quadraginta sex annos impensos fuisse Judæi testantur, (*Joannis* 2. 20.)

Frustra vero quis objiciat. *Artaxerxem* anno Regni sui septimo *Esdra* omnem petitionem ejus dedisse, ut dicitur 1. *Esdra* 7. 6. *Ipse Esdras ascendit de Babylone . . . & dedit ei Rex secundum manum Domini Dei ejus super eum omnem petitionem ejus:* adeoque, & facultatem instaurandæ Urbis concessisse. Nihil enim *Esdram* tunc a Rege postulasse quod mœnium & Urbis restorationem spectaret; sed tantum quæ ad cultum Templi, Legis observationem, & politiam pertinerent, petiisse, & impetrasse, constat ex cap. 7. lib. 1. *Esdra*, & ex verbis Edicti tunc dati.,, *Artaxerxes*,,, *Rex Regum*, *Esdra* Sacerdoti, *Scribæ* *Legis Dei Cæli* doctissimo, salutem. A me,, decretum est, ut cuicumque placuerit in,, Regno meo de Populo *Israel*, & de Sacer-,, do-

„ dotibus ejus , & de Levitis ire in Jerusalem ,
„ tecum vadat . A facie enim Regis , & se-
„ ptem Consiliatorum ejus missus es , ut visi-
„ tes Judæam & Jerusalem in Lege Dei tui ,
„ quæ est in manu tua : Et ut feras argentum
„ & aurum , quod Rex & Consiliatores ejus
„ sponte obtulerunt Deo Israel , cujus in Je-
„ rusalem Tabernaculum est . Et omne argen-
„ tum & aurum quodcumque inveneris in uni-
„ versa Provincia Babylonis , & Populus of-
„ ferre voluerit , & de Sacerdotibus quæ
„ sponte obtulerint Domui Dei sui , quæ est in
„ Jerusalem , libere accipe . . . Sed & cete-
„ ra quibus opus fuerit in Dñm Dei tui ,
„ quantumcumque necesse est ut expendas ,
„ dabitur de thesauro & de fisco Regis , & a
„ me . Ego Artaxerxes Rex statui , atque de-
„ crevi omnibus Custodibus Arcæ publicæ ,
„ qui sunt trans Flumen , ut quodcumque pe-
„ tierit a vobis Esdras Sacerdos , Scriba Le-
„ gis Dei , absque mora detis , usque ad ar-
„ genti talenta centum , & usque ad frumen-
„ ti coros centum , & usque ad vini batos cen-
„ tum , & usque ad batos olei centum , sal-
„ vero absque mensura . Omne quod ad ritum
„ Dei Cæli pertinet , tribuatur diligenter in
„ Domo Dei Cæli : ne forte irascatur contra
„ Regnum Regis , & filiorum ejus . Vobis
„ quoque notum facimus de universis Sacer-
„ dotibus , & Levitis , & Cantoribus & Jani-
„ toribus , Nathinæis , & Ministris Domus Dei
„ hujus , ut vectigal , & tributum , & anno-

nas non habeatis potestatem imponendi super
 eos . Tu autem Efdra , secundum sapien-
 tiam Dei tui , quæ est in manu tua , consti-
 tue Judices & Præsides , ut judicent omni
 Populo qui trans Flumen , his videlicet qui
 noverunt Legem Dei tui , sed & imperitos
 docete libere . Et omnis qui non fecerit Le-
 gem Dei tui , & Legem Regis diligenter ,
 judicium erit de eo , sive in mortem , sive
 in exilium , sive in condemnatinem substan-
 tiæ ejus , sive in carcerem , . Ex his ver-
 bis , & ex totius Historiæ serie constat , *Arta-*
xerxem Longimanum anno Regni sui septimo
 Urbis ædificandæ facultatem Judæis non con-
 cessisse .

Quod autem *Artaxerxes* ille , cujus an-
 no vigesimo promulgatum Edictum est de Urbe
 instauranda , fuerit *Longimanus* , non *Memor* ,
 ut *Scaligero* visum est , facile probatur . Nam
Artaxerxes Memor Regnum obtinuit anno pe-
 riodi Julianæ quater millesimo trecentesimo-de-
 cimo , ante Æram Christianam quarto supra
 quadringentesimum : adeoque annus ejus vige-
 simus concurret cum anno Periodi Julianæ qua-
 ter millesimo trecentesimo vigesimo-nono , an-
 te Æram Christianam ter centesimo octogesi-
 mo-quarto : Quo anno superstes non fuit *Ne-*
hemias , nisi vitam illius ad annum ætatis no-
 num & trigesimum supra ducentesimum produ-
 camus . Siquidem unus fuit eorum qui sub *Cyro*
 cum *Zorobabele* ascenderunt anno Periodi Ju-
 lianæ quatermillesimo centesimo septuagesimo-
 octa-

octavo , ante christianam Æram sexto & trigésimo supra quingentesimum .

Probatur secunda pars Propositionis . Statuamus *Artaxerxem Longimanum* Regnum iniisse anno Periodi Julianæ quater millesimo ducentesimo quadragesimo primo ; vigésimus ejus annus inciderit in annum Periodi Julianæ quater millesimum ducentésimum sexagesimum , Mundi ter centésimum quingentesimum quinquagesimum . Si adjeceris sexáginta-novem Hebdomades annorum , hoc est , annos tres & octoginta supra quadringentos , habebis annum Mundi quater millesimum trigésimum-tertium , Periodi Julianæ quater millesimum septingentesimum quadragesimum-tertium , Æræ Christianæ trigésimum , quo anno Baptismum Christi poni debere probant graviores Auctores cum Natali Alexandro . Tunc temporis Christus *Ducem* agere cœpit , Prædicationem auspicando suam , Novamque Legem sensim condendo & promulgando . Cum igitur Mense Nisan exierit Edictum illud Artaxerxis *Nehe-miæ* datum , ab eodem Nisan anni hujus , hoc est , a primo Paschate , quod Christus post Baptisma celebravit (*Joannis 2.*) incipit primus annus septuagesimæ & ultimæ Hebdomadæ ; *In qua fœdus confirmatum est multis* . Pascha autem nostrum Christus , legalibus omnibus Sacrificiis hoc unum præfigurantibus sine imposito , immolatus est ineunte anno quarto , sive in medio postremæ ejusdem Hebdomadæ : Tunc-

que defecit Hostia & Sacrificium , ut Angelus *Danieli* prædixerat . Annus ille quartus fuit Olympiadis ducentessimæ-secundæ , Julianus quadragesimus octavus , *Æræ* vulgaris trigessimus-tertius , *Tiberii Cæsaris* decimus-nonus , Hebdomadam *Danielis* quadringentesimus octogessimus-septimus . Post triennium exitum habuere septuaginta Hebdomades . Hæc sententia , quatenus ab anno vigesimo *Artaxerxis Longimani* septuaginta Hebdomadam *Danielis* ducit exordium , nobiles ex antiquis Patribus Patronos habet , *Julium Africanum* , *S. Joannem Chrysoft.* , *Theodoretum* , *Bedam* , *S. Thomam* . Quamquam vero Systema illud , septuaginta Hebdomadam per annos lunares probabiliter explicari possit ; ad illos tamen confugere minime necesse est , cum incertum sit an Hebræi lunari anno usi fuerint , immo usos non fuisse probabilius sit ; aut certe ad lunarem annum solari coæquandum secundo aut tertio quolibet anno mensem intercalasse , seu quolibet octennio tres Menses embolismos adjecisse . Quod jam olim a *Mosis* temporibus usitatum tradit *Aben-Ezra* . Neque lunares annos intelligere cogit Angelica & Prophetica locutio , qua septuaginta Hebdomades *Abbreviatæ* dicuntur . *To enim Abbreviatæ* , idem est ac *decise* , seu *definitæ* : quod nempe ex incerto & infinito tempore ad certum & constitutum spatium prophetico Vaticinio , ac divina ordinatione contractus sit adventus Messiae : sive quod

quod ex longiore intervallo , quod Orbis initio fluxit , brevissimum restabat ; quemadmodum in senectute vita hominis abbreviata dicitur .

PROPOSITIO II.

Undecumque Septuaginta Hebdomadum numerandarum exordium sumatur , ex hoc Danielis Oraculo venisse Messiam demonstratur contra Judæos ; Eumque non alium esse quam Christum Jesum .

Probatur prima pars . Undecumque illarum Hebdomadum petatur initium , plane elapas eas esse necesse est : Atqui iis elapsis ungi debuit *Sanctus Sanctorum* , & occidi *Christus* : Ergo negari absque summa cæcitate & pertinacia non potest , unctum esse Sanctum Sanctorum , natum & occisum fuisse Christum . Post ejus vero mortem , dirui debuerunt Templum & Urbs , secundum Oraculi Prophetici verba : *Et Civitatem & Sanctuarium dissipabit Populus cum Duce venturo : & finis ejus vastitas , & post finem belli statuta desolatio .* Atqui Templum & Urbs diruta sunt : Judæi Templi restorationem frustra sunt aggressi *Juliano Apostata* imperante ; cælestibus prodigiis cæptum opus disturbatum est , ut certam fidem faciunt *S. Gregorius Nazianz.* Oratione 4. *S. Joannes Chrysostomus* Orat. 3. in Judæos , Homilia 4. in Matth. Homil. 41. in Acta. Sermone 2. in S. Babilam . *Philostorgius* Historiæ Ecclesiasticæ

Lib.12. Cap.9. *Theodoretus* Lib.3. Historiæ Ecclesiasticæ, Cap.20. *Sozomenus* Lib.5. Cap.22. S. *Ambrosius* Ep.29. ad Theodosium. *Ammianus Marcellinus* Lib.23. ubi de *Juliano* Impatore ita scribit : „ Ambitiosum quondam „ apud Hierosolymam Templum , quod post „ multa & internecina certamina , obsidente „ Vespasiano , posteaque Tito , ægre est op- „ pugnatum , instaurare sumptibus cogitat im- „ modicis , negotiumque maturandum Aly- „ pio dederat . . . Cum itaque rei instaret Aly- „ pius , juvaretque Provinciæ Rector , me- „ tuendi globi flammæ prope fundamenta „ crebris assultibus erumpentes fecere locum , „ exustis aliquoties operantibus , inaccessum : „ Hocque modo elemento destinatus repel- „ lente , cessavit inceptum . „ Nulla ab Exci- „ dii Hierosolymitani tempore Judæorum Respu- „ blica . Sedibus suis exterminati , & toto orbe „ dispersi , servilem vitam agunt . Contriti sunt „ sicut vas figuli , quod non potest ultra instaura- „ ri , ut prædixerat *Jeremias* , Cap.19. Com- „ pletum est & *Isaiæ* Vaticinium Cap.25. „ Do- „ mine Deus meus es tu , exaltabo te , & „ confitebor nomini tuo : Quoniam fecisti mi- „ rabilia , cogitationes antiquas , fideles , Amen. „ Quia posuisti Civitatem in tumultum , Ur- „ bem fortem in ruinam , domum alienorum : „ Ut non sit Civitas , & in sempiternum non „ ædificetur „ . Illa itaque Templi & Urbis „ vastitas in perpetuum tempus duratura , Chri- „ stum venisse , & occisum fuisse probat . Præ-
te-

terea in medio postremæ Hebdomadis abrogari debuerunt Sacrificia & Cæremoniæ Veteris Legis, juxta verba Angelici & Prophetici Oraculi. *Et in dimidio, Hebdomadis deficiet Hostia & Sacrificium.* Cum itaque a tot Sæculis abrogata sint, negari non potest, postremam Hebdomadam præteriisse.

Probatur secunda pars Propositionis. In illo completum est hoc Archangeli Gabrielis, & Danielis Prophetæ Oraculum, qui Justitia Sempiterna est, & Sanctus Sanctorum a Deo unctus: Per quem finem accipit peccatum, & deletur iniquitas: In quo Visio & Prophetia impletur. His enim characteribus describitur Messias, qui post Hebdomadas sexaginta novem occidendus erat: „ Septuaginta Hebdomades abbreviatæ sunt super Populum tuum, „ & super Urbem sanctam tuam, ut consummetur prævaricatio, & finem accipiat peccatum, & deleatur iniquitas, & adducatur Justitia sempiterna, & impleatur Visio & Prophetiæ „: Hi porro characteres Christo Jesu conveniunt. Illud itaque *Danielis* Oraculum in Christo Jesu completum est.

Probatur Minor. Se enim a Deo unctum, quemadmodum Prophetæ prædixerant, Jesus ipse testatur *Lucæ* 4. 17. & sequentibus: „ Et traditus est illi Liber Isaïæ Prophetæ. Et ut „ revolvit Librum, invenit locum ubi scriptum erat, Spiritus Domini super me, propter quod unxit me . . . Cœpit autem dicere ad illos. Quia hodie impleta est hæc Scri-

„ ptura in auribus vestris. *Idem docent Christi*
 „ *Discipuli Actum 4. 26. 27.* Adstiterunt Re-
 „ ges terræ, & Principes convenerunt in unum
 „ adversus Dominum, & adversus Christum
 „ ejus. Convenerunt enim vere in Civitate
 „ ista adversus Sanctum Puerum tuum Jesum,
 „ quem unxisti, Herodes & Pontius Pilatus.
 „ *S. Petrus, Actuum 10. 37. 38.* Vos scitis
 „ quod factum est verbum per universam Ju-
 „ dæam, incipiens enim a Galilæa, post ba-
 „ ptismum quod prædicavit Joannes, Jesum a
 „ Nazareth, quomodo unxit eum Deus Spi-
 „ ritu Sancto & virtute. *S. Paulus ad He-*
 „ *bræos 1. 8. 9.* Ad Filium autem: Thronus
 „ tuus Deus in Sæculum Sæculi, virga æqui-
 „ tatis, virga Regni tui. Dilexisti justitiam,
 „ & odisti iniquitatem, propterea unxit te
 „ Deus, Deus tuus, oleo exultationis præ
 „ participibus tuis. *Jesus Sanctus & Justus,*
 „ *immo Justitia ipsa. Lucæ 1. 35.* Quod nasce-
 „ tur ex te Sanctum, vocabitur Filius Dei.
 „ *Actuum 2. 27. de ipso dictum explicatur,*
 „ Quoniam non derelinques animam meam in
 „ inferno, nec dabis Sanctum tuum videre
 „ corruptionem. *Actuum 3. 14.* Vos autem
 „ Sanctum & Justum negastis, & petistis virum
 „ homicidam donari vobis. *Ad Romanos 3. 26.*
 „ Ut sit ipse Justus; & justificans eum, qui est
 „ ex Fide Jesu Christi. *1. ad Corinth. 1. 30.*
 „ Ex ipso autem vos estis in Christo Jesu, qui
 „ factus est nobis Sapientia a Deo, & Justitia,
 „ & Sanctificatio, & Redemptio. Et 2. ad Co-
 „ rin-

„ *rinthios* 5. 21. Eum qui non noverat pecca-
„ tum , pro nobis peccatum fecit , ut nos ef-
„ ficeremur Justitia Dei in ipso „ . Per Chri-
„ stum Jesum delentur peccata , in idque venit ,
„ ut hominum noxas elueret , Deumque Sangui-
„ ne suo propitiaret . *Luca* 24. 45. & sequenti-
„ bus : „ Tunc aperuit illis sensum , ut intellige-
„ rent Scripturas , & dixit eis : Quoniam sic
„ scriptum est , & sic oportebat Christum pati ,
„ & resurgere a mortuis tertia die ; & prædi-
„ cari in nomine ejus pœnitentiam , & remis-
„ sionem peccatorum in omnes gentes. *Actuum*
„ 13. 38. 39. Notum igitur sit vobis , viri fra-
„ tres , quia per hunc vobis remissio peccato-
„ rum annuntiatur , & ab omnibus , quibus
„ non potuistis in Lege Moysei justificari ; in
„ hoc omnis qui credit justificatur . *Vide etiam*
„ *Actuum* 10. 43. *Ad Romanos* 3. 24. &
„ *sequentibus* : Justificati gratis per gratiam
„ ipsius , per redemptionem , quæ est in Chri-
„ sto Jesu , quem proposuit Deus propitiatio-
„ nem , per Fidem , in sanguine ipsius , ad
„ ostensionem justitiæ suæ , propter remissio-
„ nem præcedentium delictorum , in sustenta-
„ tione Dei , ad ostensionem justitiæ ejus in
„ hoc tempore , ut sit ipse justus , & justifi-
„ cans eum qui est ex Fide Jesu Christi . *Et ad*
„ *Colossenses* 2. 13. 24. Et vos , cum mortui ef-
„ setis in delictis , & præputio carnis vestræ ,
„ convivificavit cum illo , donans vobis omnia
„ delicta , delens quod adversus nos erat chi-
„ rographum decreti , quod erat contrarium
„ no-

„ nobis , & ipsum tulit de medio , affigens il-
 „ lud cruci „ . Christo nato , finis Prophetiis
 impositus est : Nullus deinceps apud Judæos
 Propheta . Unde ipse ait Matthæi 11. 13.
 „ Omnes enim Prophetæ , & Lex usque ad
 „ Joannem prophetaverunt . *Et S. Paulus ad*
 „ *Hebræos* 1. 1. 2. Multifariam , multisque
 „ modis olim Deus loquens Patribus in Pro-
 „ phetis , novissime diebus istis locutus est no-
 „ bis in Filio „ . Omnes etiam Prophetiæ in
 Christo Jesu sunt impletæ , qui de se ipso ait
 Matthæi 5. „ Nolite putare quoniam veni sol-
 „ vere Legem aut Prophetas ; non veni sol-
 „ vere , sed adimplere . *Idemque testatur San-*
 „ *ctus Paulus ad Romanos* 10. 4. Finis enim Le-
 „ gis Christus ad iustitiam omni credenti. „ Quæ
 spectans *Tertullianus* Libro *adversus Ju-*
dæos , ait : „ Itaque quoniam impleta est Pro-
 „ phetia per adventum ejus , id est per Nati-
 „ vitatem & Passionem ; propterea & Daniel
 „ signari Visionem & Prophetiam dicebat ,
 „ quoniam Christus est signaculum omnium
 „ Prophetarum , adimplens omnia quæ retro
 „ erant de eo nuntiata . Post enim Adventum
 „ ejus & Passionem ipsius , jam non Visio ,
 „ neque Prophetia . Unde firmissime dicit Ad-
 „ ventum ejus signare Visum & Prophetiam .
 Christus Jesus Dux est a *Daniele* , aliisque Pro-
 phetis prædictus , qui verum Israëlẽ spiritali-
 ter recturus erat , & ab hostibus invisibilibus ,
 scilicet Dæmonibus , vindicaturus , atque ad
 æternam felicitatem perducturus . Matt. 2. 4. 5.
 „ Sci-

„ Sciscitabatur ab eis , ubi Christus nascere-
 „ tur . At illi dixerunt ei : In Bethleem Ju-
 „ dæ . Sic enim scriptum est : Et tu Bethleem
 „ Terra Juda , nequaquam minima es in Prin-
 „ cipibus Juda : Ex te enim exiet Dux qui re-
 „ gat Populum meum Israel „ . Hic a Judæis
 occisus est , sub *Pontio Pilato* crucifixus , que-
 madmodum *David* prædixerat *Psal.21.* „ In
 „ pulverem mortis deduxisti me , quoniam
 „ circumdederunt me canes multi . Concilium
 „ malignantium obsedit me . Foderunt manus
 „ meas & pedes meos „ . Et *Isaias Cap.53.7.*
Sicut ovis ad occisionem ducetur . Unde Jesus
 ipse Discipulis Emmauntem euntibus „ Ape-
 „ ruit sensum ut intelligerent Scripturas , &
 „ dixit eis : Quoniam sic scriptum est , & sic
 „ oportebat Christum pati , & resurgere a mor-
 „ tuis tertia die , & prædicari in nomine ejus
 „ pœnitentiam , & remissionem peccatorum
 „ in omnes Gentes „ . Hinc Eunuchus *Canda-
 cis* Reginæ *Æthiopum* , mox laudatum *Isaiæ*
 locum legenti , cum occurrisset *Philippus* , in-
 cipiens a Scriptura ista , evangelizavit illi *Je-
 sum* ; ut refertur *Actuum 9.* Pactum quod mul-
 tis confirmandum prædixit *Daniel* , sanxit &
 confirmavit Jesus , Novi & Æterni Fœderis a
 Deo cum hominibus initi Mediator & Seque-
 ster , ut S. Paulus docet ad Hebræos scribens
Cap.8. „ Nunc autem melius sortitus est Mini-
 „ sterium , quanto & melioris Testamenti Me-
 „ diator est , quod in melioribus repromissioni-
 „ bus sancitum est , &c. *Cap.9.* Et ideo Novi
 „ Te-

„ Testamenti Mediator est , ut morte interce-
„ dente , in redemptionem earum prævarica-
„ tionum , quæ erant sub priori Testamento ,
„ repromissionem accipiant , qui vocati sunt ,
„ æternæ hereditatis . Ubi enim Testamentum
„ est , mors necesse est intercedat testatoris .
„ Testamentum enim in mortuis confirmatum
„ est: alioquin nondum valet , cum adhuc vi-
„ vit qui testatus est . Unde nec primum qui-
„ dem sine sanguine dedicatum est . „ San-
„ guine itaque suo novum & æternum Pactum
„ Deum inter & homines Jesus confirmavit .
„ Unde ipse ait Matthæi 26. Marc. 14. Lucæ 22.
„ *Hic est Sanguis meus Novi Testamenti , qui pro*
„ *multis effundetur in remissionem peccatorum .* In
„ morte Jesu defecit Hostia & Sacrificium, quan-
„ tum ad jus , etsi nondum quantum ad rem , nisi
„ post excidium Templi & Urbis Hierosolymo-
„ rum . Sacrificia secundum Legem abrogata
„ sunt , oblato immaculati Agni , qui tollit pec-
„ cata Mundi , vero Sacrificio . Qua de re S. Pau-
„ lus Epist. ad Hebræos Cap. 10. scribit : „ Um-
„ bram enim habens Lex futurorum bonorum ,
„ non ipsam imaginem rerum , per singulos
„ annos eisdem ipsis hostiis , quas offerunt in-
„ desinenter , numquam potest accedentes per-
„ fectos facere : alioquin cessassent offerri :
„ ideo quod nullam haberent conscientiam pec-
„ cati cultores semel mundati ; sed in ipsis
„ commemoratio peccatorum per singulos an-
„ nos fit . Impossibile enim est sanguine tau-
„ rorum & hircorum auferri peccata . Ideo
„ in-

„ ingrediens Mundum dicit : Hostiam & obla-
 „ tionem noluisti : Corpus autem aptasti mihi :
 „ Holocaustomata pro peccato non tibi placue-
 „ runt . Tunc dixi : Ecce venio : In capite
 „ Libri scriptum est de me , ut faciam , Deus ,
 „ voluntatem tuam . Superius dicens : Quia
 „ hostias , & oblationes , & holocaustomata
 „ pro peccato noluisti , nec placita sunt tibi ,
 „ quæ secundum Legem offeruntur , tunc di-
 „ xi ; Ecce venio , ut faciam , Deus , vo-
 „ luntatem tuam : aufert primum , ut sequens
 „ statuatur . In qua voluntate sanctificati sumus
 „ per oblationem corporis Jesu Christi semel .
 Id significabat Christus Jesus , cum moriens di-
 „ ceret (Joannis 19. 30.) *Consummatum est* .
 Ideo cum peracto Sacrificio emisisset spiritum ,
Velum templi scissum est in duas partes a summo
usque deorsum , ea quæ pridem cerni non pote-
 rant , omnibus conspicua faciens , & quæ con-
 tingi , aut ad quæ adiri non licebat , ad ea adi-
 tum aperiens . „ Cum enim (inquit *Theodo-*
 „ *retus* Commentario in Daniele) velum se-
 „ pararet a Sanctis Sancta Sanctorum , in qui-
 „ bus erant Propitiatorium , & Cherubim , &
 „ Arca , fractum totum velum rebus ipsis
 „ ostendit , quemadmodum ab interioribus par-
 „ tibus , quæ ibi custos assidebat , gratia reces-
 „ serit , & communia illa facta sunt , ad quæ
 „ pridem soli Principi Sacerdotum aditus pa-
 „ tebat . Hoc autem contigit cum Sacrificium
 „ pro universo Mundo esset oblatum , . Judæi
 Christum Jesum negarunt , cum rogante Pila-
 to ,

to, *Regem vestrum crucifigam ? responderunt : Non habemus Regem nisi Cæsarem . Tolle , tolle , crucifige eum .* Et rursus : *Sanguis ejus super nos , & super filios nostros .* Negationem illam Christi Jesu a Populo suo , id est , a Judaica Gente , S. Joannes his verbis expressit Evangelii sui Cap. 1. *In propria venit , et sui eum non receperunt .* Ideo reprobati sunt , & dispersi, impletaque est Dei per Osee Prophetam comminatio: *Quia vos non Populus meus, et ego non ero vester .* Confer cum Epist. ad Romanos Cap. 9. Desolationem Templi , & Excidium Urbis a Daniele , aliisque Prophetis prædictam, Christus Jesus perfidæ Genti denuntiavit, Matthæi 23. 37. 38. ,, Jerusalem , Jerusalem quæ
 ,, occidis Prophetas , & lapidas eos qui ad te
 ,, missi sunt , quoties volui congregare filios
 ,, tuos , quemadmodum gallina congregat pul-
 ,, los suos sub alas , & noluisti ? Ecce relin-
 ,, quetur vobis domus vestra deserta . Mat-
 ,, thæi 24. 1. Et egressus Jesus de Templo ,
 ,, ibat . Et acceperunt Discipuli ejus , ut osten-
 ,, derent ei ædificationes Templi . Ipse autem
 ,, respondens dixit illis : Videtis hæc omnia ?
 ,, Amen dico vobis , non relinquetur hic lapis
 ,, super lapidem , qui non destruat . . . Cum
 ,, ergo videritis abominationem desolationis ,
 ,, quæ dicta est a Daniele Propheta , stantem
 ,, in loco sancto : Qui legit intelligat : Tunc
 ,, qui in Judæa sunt , fugiant ad Montes . Lu-
 ,, cæ 24. 41. & sequentibus : Et ut appropin-
 ,, quavit videns Civitatem , flevit super illam ,
 ,, di-

„ dicens ; Quia si cognovisses & tu , & qui-
 „ dem in hac die tua , quæ ad pacem tibi ,
 „ nunc autem abscondita sunt ab oculis tuis .
 „ Quia veniet dies in te , & circumdabunt te ,
 „ & circumdabunt te inimici tui vallo , &
 „ coangustabunt te undique : & ad terram
 „ prosternent te , & filios tuos qui in te sunt ,
 „ & non relinquent in te lapidem super lapi-
 „ dem , eo quod non cognoveris tempus visi-
 „ tationis tuæ , . Id quomodo in Excidio Hie-
 rosolymit. completum sit , constat ex Hist. Jo-
 sephi *De Bello Judaico* Lib.7. & ex Jo: Xiphilino
Epitom. Dionys. in Tito. Dei vindicis manum in
 Excidio illo agnovit *Josephus* cap.3. libri mox
 laudati . *Deus profecto* , inquit , *Deus ipse cum*
Romanis ignes lustrales ipsi (Templo) injicit ,
& Civitatem tot piaculis plenam exscindit . Et
 cap.10. *Templum invito Tito exurit* . Agno-
 vit *Titus* apud eundem *Josephum* cap.16. ejus-
 dem libri , cum solida murorum altitudine con-
 specta , & singulorum lapidum magnitudine ,
 & accurata compage , & quantum hi in altum ,
 quantum item in latum paterent ; *Deo* , inquit ,
favente bellum gessimus , & Deus ab istis mu-
nitionibus Judæos detraxit : Nam quid manus
hominum , vel machinæ possunt adversus has
turres ?

Stupenda Judæorum cæcitas , & pertinacia
 est , qui Christum Ducem *Cyrum* esse statuunt ,
 aut *Jesum* *Josedec* Sacerdotem , aut *Zorobabelem* ,
 vel *Agrippam* *junio*rem . Nemini enim illorum
 Messiae characteres a *Daniele* delineati conve-
 niunt

niunt . Nemo illorum *Sanctus Sanctorum & justitia sempiterna* merito dici potest . Nemo illorum Christus , seu *Messias Nagid* , id est , *Princeps* , sive *Dux* fuit . Nullus enim Christi nomine in Scriptura invenitur appellatus ; qui unctus non fuerit vel sacro illo corporali oleo , quo Reges & Sacerdotes ungebantur , ut *Aaron & Saul* ; aut spiritali , id est Spiritu Sancto , & Gratia Prophetiæ , quod in Psalmo dicitur *Oleum letitiæ* . Corporali autem oleo uncti non fuere Sacerdotes & Reges qui post solutam Captivitatem Judæis præfuerunt . Quinque enim rebus Templum primum secundo antecelluit , ut tradunt Judæi , nempe Igne sacro , Arca , Urim & Thummim , Oleo unctionis , & Spiritu Sancto . Cum iis ergo Templum secundum caruerit , Reges aut Pontifices qui eo cadente Populo Judaico præfuerunt , Christi jure ac proprie dici non possunt . Ita contra Judæos disserit *Raymundus Martini* in *Pugione Fidei* , p.2. Cap. 3. §.29. Frustra vero Judæi objicerent , Cyrum *Isaiæ* 45. 1. Christum appellatum , quamvis neutro oleo unctus esset : *Hæc dicit Dominus Christo meo Cyro , cujus apprehendi dexteram , ut subjiciam ante faciem ejus Gentes*, &c. Præterea quosdam alios Christos vocari Psalmo 105. *Nolite tangere Christos meos* . Nam *Cyro* Christi nomen a Deo propterea tributum est , quia electus ab ipso fuit , ut Populum ipsius e captivitate solveret , ac libertate donaret , eaque in re *Messæ* typus fuit , hominum genus a *Dæmonis* captivitate

liberaturi, & in libertatem filiorum Dei vindicaturi. Unde *Isaias* loco laudato statim a *Cyro* Christo typico, ad verum Messiam asurgens, in has voces erupit: *Rorate Cali desuper, & nubes pluant Justum: Aperiat terra & germinet Salvatorem, & justitia oriatur simul. Ego Dominus creavi eum.* Præterea *Cyrum* verum Messiam non esse Judæi agnoscunt, & hæc *Isaiæ* verba ad Messiam ipsum, non ad *Cyrum* referunt. Sic enim habetur in *Tbalmud*, in Libro qui dicitur *Megilla*, Distinctione quæ incipit, *Megilla Nikrath*, ut refert *Raymundus Martini*: *Quid est quod scriptum est Isaiæ 45. 5. 1. Hoc dixit Dominus Messiae suo, &c. Numquid Cyrus Messias est? sed Deus sanctus & benedictus dicit Messiae: Opponens ego te Cyro, quem fortificavi in dextera sua, Ego dixi: Ille ædificabit mihi domum.* Et *R. Selomoh* hunc *Isaiæ* locum exponens, ait: *Magistri nostri dixerunt, Dixit Deus Regi Messiae, Opponens ego te Cyro &c. Sicut est in libro Megilla. Denique Aben-Ezra in c. 9. Danielis, ait: Opinio ejus qui dixit, quod Cyrus est Messias Domini, non est congrua.*

Quod spectat Versum 15. Psal. 105. *Nolite tangere Christos meos*, illum de *Abraham*, *Isaac* & *Jacob* interpretatur *R. Barachias* in *Midrasch*. Hos autem unctos fuisse oleo spirituali, id est, Spiritu Prophetico, certum est. Unde subdit Psalmista. *Et in Prophetis meis nolite malignari.* Veteres præterea Judæi recentiorum cæcitatem arguunt. Illi enim ingenue con-

confessi sunt *Danielis* Oraculum , quod hujusce Articuli secundi argumentum est , ad Messiam pertinere , ut refert *S. Hieronymus* . Idem fatetur *R. Moses* filius *Nachman* Gerundensis , in *Danielem* : *Sanctuarium* , inquit , *Sanctuariorum* , sive *Sanctus Sanctorum* , est *Messias sanctificatus de filiis David* . De cujus unctione *Psalmo 45.* dicitur : *Sedes tua , Deus , in sæculum sæculi , virga directionis , virga Regni tui . Dilexisti justitiam , & odisti iniquitatem , propterea unxit te Deus , Deus tuus oleo latitiæ præ consortibus tuis* . Quod *Targum* de Messia diserte exponit . Tertio nec *Cyrus* , nec *Jesus Josedec* , nec *Zorobabel* post *Hebdomadas* sexaginta duas ab edicto de Urbis *Jerusalem* ædificatione promulgato sunt occisi , nec eorum temporibus *Hostia* & *Sacrificium* defecerunt : nullus igitur illorum est *Christus* ab *Angelo* prænuntiatus . Nec etiam is fuit *Agrippa Junior* , quippequi *Romanorum* partes secutus sit , *Belloque Judaico* superstes fuerit , testibus *Josepho* Libro 2. de *Bello Judaico* , Cap. 16. & *Tacito* Libro 5. *Historiæ* . Hunc Articulum opportune claudet sincera confessio , quam *R. Samueli* vis veritatis extorsit , in epistola ad *Regem Isaac* , quam in *Dionisii Carthusiani* *Commentariis* legere est , „ Videtur , Domine mi , „ *Danielis* *Prophetia* , quæ scribitur nono Ca- „ pite , jam completa esse ; ubi sic dicitur „ Post sexaginta duas *Hebdomadas* occidetur „ *Christus* ; & veniet *Populus cum Principe ven-* „ *turo* , destruetque *Civitatem* & *Domum* , & „ erit

„ *erit consummata destructio desolationis perpe-*
 „ *tuae* . Et non est , Domine mi , dubium ,
 „ quin destructio perpetuæ desolationis sit hæc
 „ Captivitas in qua jam sumus . Nam jam sunt
 „ mille anni , & aperte dicit Dominus per
 „ Prophetam , quod erit desolatio perpetua
 „ propter occisionem Christi : sicut est desola-
 „ tio nostra post occisionem Christi . Non enim
 „ comminatus est desolationem perpetuam ,
 „ nisi post occisionem Christi . Et si volueri-
 „ mus dicere quod ante occisionem Christi fue-
 „ rimus in desolatione : Respondent nobis
 „ Christiani , quod ante illam mortem non
 „ fuit desolatio nisi septuaginta annis ; & post
 „ hoc fuimus reducti in Terram promissionis ,
 „ & fuimus apud Deum in gratia & honore .
 „ Certe , Domine mi , non video evasionem .
 „ De facto enim probatur nobis , quod post-
 „ quam a reædificatione Templi completæ fue-
 „ runt septuaginta Hebdomades annorum ,
 „ tunc fuit Jesus occisus a Patribus nostris ; &
 „ postea venit Dux , scilicet Titus ; & Popu-
 „ lus , scilicet Romani , & fecerunt nobis secun-
 „ dum Prophetiam istam . Hodie sunt mille
 „ anni , & nihilominus in ira Dei sumus ; &
 „ tamen nos in ipso speramus , expectantes
 „ adhuc venturum Messiam , & reversuros
 „ nos in Terram Promissionis ; & Civitatem
 „ atque Templum instauraturos , futurosque
 „ in gratia & honore apud Deum : nec deso-
 „ lationem hanc fore perpetuam , sed tempo-

„ ra-

„ ralem . Heu , mi Domine , non est ista ex-
 „ cusatio , & evasio consona ; & vana vide-
 „ tur talis expectatio .

ARTICULUS III.

De Vaticiniis Aggæi , & Malachie .

Iudæi anno Darii Hytaspidis secundo , ob Templi , quod Duce Zorobabele extruebant , tenuitatem , mœrori se dabant effusius . Quorum animos erigendi causa , quantus hujusce posterioris Templi , Messiae præsentia decorandi , splendor futurus esset , ore Aggæi Propheta Deus in hunc modum magnifice prænuntiat . *Adhuc unum modicum est , & Ego commovebo Cælum , & Terram , & Mare , & Aridam , & movebo omnes gentes , & veniet desideratus cunctis Gentibus , (Hebraice , veniet desiderium cunctarum gentium , plurali numero per emphasim usurpato pro singulari) : & implebo Domum istam gloria , dicit Dominus exercituum . Meum est aurum , & meum est argentum , dicit Dominus exercituum . Magna erit gloria domus istius novissimæ plusquam primæ , dicit Dominus exercituum ; & in loco isto dabo pacem , dicit Dominus exercituum .*

Non absimile quoque habetur Vaticinium apud Malach. cap.3. v.1. *Ecce Ego , inquit Dominus , mitto Angelum meum , & præparabit viam ante faciem meam . Et statim ad*
Tem-

*Templum suum Dominator , quem vos quaritis ,
& Angelus Testamenti quem vos vultis . Ecce
venit , dicit Dominus Exercituum .*

Duo illa oracula , quæ ideo conjungi vo-
luimus , quia sese invicem mirifice illustrant ,
perspicuum adversus Judæos suppeditant argu-
mentum , quod nunc exponendum est .

P R O P O S I T I O I.

*Ex Prophetiis Aggæi , & Malachiæ efficaciter
astruitur , tempora adventus Messie
jamdudum esse præterita .*

P Rob. Illius adventus jam pridem præteriere
tempora , qui juxta Vaticinia Aggæi , &
Malachiæ , stante secundo Templo venire de-
buit , siquidem ab annis prope septingentis ,
supra mille Templum illud a Tito combustum ;
& funditus eversum est . Atqui ex laudatis
Aggæi , & Malachiæ Vaticiniis Messias veni-
re debuit secundo Templo stante .

Ac istud quidem conficitur ex Vaticinio
Aggæi . Is enim , a quo Aggæus prædicit glo-
riam Templi secundi esse orituram , profecto
venit , si Aggæo fides , hoc Templo stante :
atqui gloriam Templi secundi a Messia esse ori-
turam Aggæus prædixit . Namque I. In Ag-
gæi Vaticinio de Templo secundo agi demon-
strant tum circumstantiæ temporis , quippe ædi-
ficabatur Templum secundum , cum illud Ag-
gæi Vaticinium editum est : tum series conte-

E

xtus ,

xtus, & scopus Vaticinii; scilicet mox dixerat Propheta v.4. Templum cujus extruccioni Zorobabel instabat, *tamquam non esset* visum esse oculis eorum qui templi Salomonici gloriam conspexerant; quocirca ad solandos Judæos Vaticinium, de quo disserimus, continuo subjicitur: tum pronomen demonstrativum *istius, istam, isto*, non alia de causa ibi multoties adhibitum, nisi ut illud quod tunc condebant Judæi Templum indicaretur. Ergo de Templo secundo agitur in Vaticinio Aggæi. Atque id confitentur Judæi. 11. Is a quo Aggæus ejusmodi Templi gloriam vaticinatur orituram, ipse est Messias. Quatuor quippe characteribus soli Messię propriis ille designatur, de quo in hac Prophetia sermo est. Nimirum 1. quo tempore is est venturus, magna rerum immutatio eventura prænuntiatur ab Aggæo his verbis: *Adhuc unum modicum est, & ego commovebo calum, & terram, & mare, & aridam, & movebo omnes gentes, & veniet &c.* 2. *Desideratus cunctis gentibus*, seu, ut Hebræi habent, *venient desiderium cunctarum gentium*, id est, ille qui maxime exoptandus est gentibus, & *implebo domum istam gloria &c.* 3. nomine pacis etiam indicatur: *Et in loco isto dabo Pacem dicit Dominus exercituum.* 4. Ab ejusdem præsentia Templum secundum prædicatur sortiturum gloriam Templi Salomonis magnificentię longe superiorem: *Meum est aurum, & meum est argentum dicit Dominus exercituum*; id est, si vellem auro,

& ar-

& argento Templum illud exornare, id facile exequeretur: sed alia ratione longe excellentiori illud decorare intendo, præsentia videlicet illius, qui pacem perfectam allaturus est: *Magna erit gloria domus istius novissimæ plusquam primæ, dicit Dominus exercituum; & in loco isto dabo pacem, dicit Dominus exercituum.*

Atqui solus Messias quatuor illis characteribus designari potuit. Enimvero nonne in tempora Messię per se, & per Discipulos suos tot prodigia edituri, totque nationes Religioni suæ addicturi, aptissime quadrat maxima illa rerum immutatio, gentiumque omnium commotio, quam Deus splendidis verbis jam citatis describit: *Commovabo Cælum, & Terram, & Mare, & Aridam, et movebo omnes Gentes?* Certe quoties in Scripturis adhibetur ejusmodi loquendi modus, ut Psalm. 17. v. 8. Isaïæ 24. v. 19. Jerem. 49. v. 21. Ezech. 38. v. 19. Aggæi ejusdem 2. v. 22. & alibi sæpe, toties de prodigiis insignibus, ac nobilissimis verba fiunt. Pariter, nomine *Desiderati cunctis Gentibus*, quis alius significari potuit præter Messiam aliis in locis Scripturæ eadem nota insignitum, tantorumque bonorum hominibus collatorum auctorem? Ad hæc, an non etiam pacis nomen maxime convenit Messię, qui, & alibi appellatur *Pax*, & *Princeps pacis*, quique ut veræ pacis largitor ubique exhibetur? Nec sane pacem secundo Templo eo loci promissam, interpretari queunt Rabbini temporaneam pacem Templo Zorobabeli-

belico præ Salomonico concedendam . Nemo enim nescit Templum Zorobabelicum a Seleuco , ab Antiocho , a Pompejo violatum fuisse , ac a Tito dirutum & solo æquatum ; dumque illud stetit , dissensiones diras inter Judæos exortas esse , & eorum Rempublicam gravissimis bellis fuisse exagitata , quibus tandem penitus extincta est ; ergo . Denique , an ab alio quam a Messia Templum secundum valuit tantum decus consequi , ut Templi Salomonici gloriam superaret ? Etenim non modo Templum posterius longe minori quam prius magnificentia enituit , sed præterea , ut ipsimet Rabbinii tradunt , rebus sanctissimis , ac maximis ornamentis caruit , quibus Templum prius decorabatur , Urim , & Tummim videlicet , Arca , & Tabulis fœderis , Virga Aaron , igne cælesti , oleo Divinæ unctionis , præsentia Divinitatis , & Spiritu prophetiæ ; quæ tanta profecto re nulla compensari , ac suppleri potuerunt , nisi Messias Templum secundum adierit . Quam ex his rebus Templum prius præ posteriori dignitatem consecutum est , hanc inæstimabilem R. Azarias appellat ; atque earumdem habita ratione doctus R. Menasseh pronuntiat Templum Salmonicum tanto excellentius fuisse Zorobabelico , quanto Sol est Luna præstantior . Ergo ex Vaticinio Aggæi , Messiam stante secundo Templo venire debuisse , omnino conficitur .

Jam vero idem quoque ex Vaticinio Malachix eyincitur . Nam *Dominator* , quem Malach

lachias ait a Judæis quæsitum , & *Angelus* , seu Legatus fœderis ab iis exoptatus , ipse est procul dubio Messias , & Liberator illis promissus , & ab iisdem tantopere expetitus , ut agnoscunt ipsi Judæi cum R. Maimonide in *Hilchoth melachim* , seu *Traët. de Regibus* ; & R. David Kimchi in hunc Malachiæ locum . *Dominator* , inquit Kimchius , *ipse est Rex Messias* , *idemque Angelus fœderis* . Templum autem quod is *Dominator* , & *Legatus* præsignificatur ingressurus , non aliud esse quam Zorobabelicum monstratur 1. Quia eodem nomine donatur quo Templum a Judæis solebat designari . Scilicet Judæi consueverant Templum appellare *Templum Domini* . Atqui Malachias Templum de quo vaticinatur æquivalenti indigitat appellatione ; nempe illud vocat *Templum Dominoris quem* Judæi *quærebant* , id est Messias , qui Dominus in sacris litteris non semel nuncupatur ; ergo . 2. Quia Templo secundo extante , aut saltem dum illud absolvebatur , vaticinatus est Malachias ; proclive igitur est , ut de ejusmodi Templo intelligatur ejus Prophetia , utpote intra *tempus modicum* adimplenda . 3. Quia Malachiæ oraculum de Templo secundo explicari exigit affinitas , quæ Vaticinium illud inter , & Prophetiam Aggæi intercedit . Quemadmodum qui gentes omnes commoturus , gentibus desideratus , pacemque ipsis allaturus dicitur ab Aggæo , idem ipse est ac *Dominator* , & *Legatus fœderis* a Judæis expetitus , cujus meminit Malachias ; ita Templum de quo apud

Malachiam agitur, censendum plane est quid unum cum Domo Dei in Aggæi Vaticinio memorata. 4. Quia vel de Templo secundo loquitur Malachias, vel de tertio quodam olim extruendo. Atqui tertium Templum, quod Rabbini quidam restaurandum fingunt, commentitium est: spem enim illius non modo nullus Scripturæ locus firmat, ut deinde ostendetur; sed contra Daniel cap. 9. Templum a Tito evertendum prædicens, eadem, ut jam notavimus, voce utitur, qua Moyses Sodomæ, Gomorrhæ dissipationem expressit; additque futurum, ut abolitis Sacrificiis, & visa in loco sancto abominatione, desolatio in consumptionem, & finem perseveret. Aggæus etiam in mox adducto Vaticinio satis aperte indicat Templum Zorobabelicum futurum esse ultimum, dum ejus gloriam tam splendide exprimit, dum desiderabilem gentibus ad illud venturum esse, & pacem in eo concedendam docet, tuncque Cælum, & Terram, Mare, & Aridam a Deo agitanda, ac Gentes omnes movendas prænuntiat. Et vero, ut quid Templum tertium extrueretur cum juxta Prophetarum oracula, ut postea dicetur, ritualia Legis Mosaicæ, & Sacrificia abolita nunquam debeant in posterum obtinere? Hinc frustra tentarunt non semel Judæi Templum suum denuo suscitare, atque flammis e terra erumpentibus, aliisque prodigiis sub Juliano Apostata deterriti sunt, ne facta sibi ab illo Imperatore in odium Christianæ Fidei, Templi Jerosolymis ex-

extruendi facultate uterentur . Cujus rei testes sunt non solum SS. Patres qui tunc temporis vixere , sed etiam Ammianus Marcellinus scriptor Ethnicus , & coætaneus . Ergo intelligendus Malachias de Templo secundo , proindeque &c.

Solvuntur Objectiones .

Objicies 1. Etsi Templum secundum præsentia Messiae non fuisset illustratum , vicisset tamen prioris gloriam 1. Ratione durationis ; nam decennio amplius duravit quam Templum a Solomone extructum ; 2. ratione celebritatis ; si quidem Templum secundum exteris Nationibus magis innotuit , atque ab earum Regibus Dario , Artaxerxe &c. donis splendidissimis exornatum est . 3. Ratione decoris , & magnificentiae , postquam scilicet ab Herode in majus auctum , & magnificatum fuit ; ergo . Ita R. Salomon Jarchi , R. Kimchi , R. Menasseh &c. Adde Josephum lib. 15. *Antiq.* cap. 11. alias 14. num. 3. testari , majoribus sumptibus Templum ab Herode quam ab alio quovis fuisse exornatum .

1. Nego antecedens præsertim quantum ad tertiam partem , quæ præcipua est . Fatemur itaque Templum secundum non modo annis decem , ut Judæi putant , sed revera annis 169. juxta accuratiores calculos , diuturnitatem Templi prioris excessisse . Quod tamen levioris est momenti : ubi namque de ædificiorum ad se

invicem collatorum splendore quæstio est, illa potissimum in se spectantur, & ad durationem eorum majorem, minoremve parum attendi solet, nisi quatenus ea majoris, aut minoris ædificiorum, quæ vetustate pereunt, soliditatis indicium esse potest: utrumque autem Templum vi & flammis, non vetustate destructum est. Quamquam posterius etiam postquam ab Herode est instauratum, priori minus solidum fuit, si Josepho fides, qui viginti cubitos, id est pedes triginta ex ejus altitudine, pressis nimia mole fundamentis, retrocessisse auctor est. Fatemur etiam donis eximiis a Dario Hystaspide, ab Artaxerxe Longimano, & ab aliis Gentilibus Templum Zorobabelicum locupletatum fuisse. Verum constat 1. ipso durante, Judæos ab exteris gentibus fuisse oppressos, & vexatos; 2. hoc ipsum Templum non semel violatum fuisse, & spoliatum, quod priori non contigerat; 3. idem Templum, ut ipse Abravanel in Aggæum observat, nullo pacto, etiam ubi ab Herode auctum est, accessisse ad magnificentiam Templi, quod Salomon Regum ditissimus, & sapientissimus immenso apparatu, stupendisque impensis, ac structura supra modum mirabili ædificaverat; in quo *nihil erat*, Scriptura teste III. Reg. 6. v. 22. *quod auro non tegeretur*; cujusque ibid. cap. 7. sumptuosissima, ac tota aurea erat suppellex. Vide etiam I. Paralip. 22. & II. Paralip. 2. 3. & 4. & confer quæ a Josepho referuntur de utroque Templo. Enim vero ex Josepho, cui concinunt Jo-
se-

sephus ben Gorion, Hegefippus, S. Hieronymus &c. habemus mille carros ad vehendos lapides ab Herode comparatos, & decem peritissimorum opificum millia ad opus perficiendum electa, cuncta vero octo annis ædificata: qui apparatus quidem etsi immensus in se, atamen si comparatur iis quæ idem Iosephus *Antiq.* lib.8. cap.2. & 3. de Templo Salomonico post Scripturas refert, nihil magni continere videbitur. Nam I. Paralip.22. v.14. David legitur *auri talenta centum millia, & argenti mille millia talentorum, æs vero, & ferrum cujus non erat pondus . . . Ligna, & lapides ad universa impendia &c.* ad Templum ædificandum præparasse. Salomon autem III. Reg.5. v. 13. 14. 15. & 16., & II. Paral.2. adhibuit *operarios de omni Israel triginta millia virorum, mittebatque eos in Libanum, decem millia per menses singulos vicissim &c.* insuper vero *septuaginta millia eorum, qui onera portabant, & octoginta millia latomorum in monte: absque præpositis, qui præerant singulis operibus, numero trium millium &c.* Nec tamen Domum Dei ad culmen perduxit ante annum ab ejus fundatione septimum III. Reg.6. v.38. ergo.

Quod de Iosepho objicitur, nullum negotium facescit. Non ibi comparatur Templum Herodianum cum Salomonico, sed Herodes cum iis confertur qui antea ad Templi secundi decorem adjumento fuerant. 2. Nego conseq.

1. Evidentissimum est quæcumque Templo se-

cundo deerant, nempe Arcam fœderis, Tabulas legis, & alia modo enumerata, nulla duratione, celebritate, & magnificentia compensari, & suppleri potuisse. Ergo. 2. Series horumce verborum, *Meum est aurum, & meum est argentum Magna erit gloria Domus istius novissimæ plusquam primæ & in loco isto dabo pacem*, manifestum faciunt non de gloria caduca ab auro, & argento donisque gentium profecta Vaticinium explicandum, sed de gloria veriori, & præstantiori, quæ exortura esset a pace in templo isto danda, id est, a Messia pacis auctore ad Templum illud offerendo 3. Non minus perspicuum est ex Vaticinii contextu eandem Templi secundi gloriam, ut dictum est, ab adventu *Desiderati cunctis gentibus*, seu Messia repetendam, ac proinde Messia ejusdem in hocce Templo coram Domino sistendi, maxime hic habendam esse rationem. Licet ergo potuerit, quod falsum est, Templum posterius priori quantum ad famam, & magnificentiam æquiparari, nihilominus ex Vaticinio Aggæi evincitur, Messiam jamdudum advenisse.

Inst. Ubi habet Vulgata nostra: *Veniet Desideratus cunctis gentibus*, Hebræi legunt: *Venient desiderium cunctarum gentium*, quæ juxta R. David Kimchi in hunc sensum explicanda sunt. *Venient cunctæ Gentes cum desiderabilibus*, id est cum donis; supplendo nempe præpositionem ante vocem *chemedath*, *desiderium*, & legendo *bechemedath*, *cum desiderabili-*
li-

libus. Et certe dici nequit *desiderium*, seu *desiderabilia gentium venire*, bene vero *gentes venire cum desiderabilibus* ac donis; ergo.

Nego antecedens, nempe hanc Kimchii expositionem adhibendam. Etenim male hic supplet Kimchius præpositionem, quæ in Hebræo non legitur, & qua emphasis illius loci, & sublimitas penitus evanescit.

Ad id quod adjicitur, dici non posse *desiderium gentium venire*, id fateor, si nomine *desiderii* significarentur opes, & munera gentium: at nihil in sacro contextu sensum hunc Rabbiorum recentiorum sapit. Num autem Messias bona summa populis allaturus, ipsisque ideo maxime desiderabilis, *Desiderium cunctarum gentium* simpliciter nuncupari nequit? aut potius, ubi Propheta magnifice exprimit, futurum ut aliquando veniât *Desiderium cunctarum gentium*, quidquamne aliud intelligere licet, præter Messiam, qui in Scripturis ut populorum salus, & gentium expectatio semper exhibetur? Quod si de muneribus gentium, de auro, & argento ad Templum afferendis, Aggæum interpreteris, quomodo ista expones, quæ in Vaticinio præmittuntur: *Adhuc unum modicum est, & ego commovebo cælum, & terram, & mare, & aridam, & movebo omnes Gentes*? An commotio illa insignis, quæ hac magniloquentia a Deo præsignificatur, ad munera quædam, ad aliquod argenti, & auri pondus a Gentilibus offerenda referri, & accommodari potest? Postremo, nec patiuntur hæc

verba, *Et in loco isto dabo pacem*, ut Aggæi oraculum de muneribus Gentilium explicetur; nec ejusmodi donis effici potuit, ut Templum Zorobabelicum gloriam Salomonici superaret; ergo.

Instabis iterum. Ille non potuit appellari *Desideratus cunctis gentibus*, seu *Desiderium gentium*, quem Gentes ignorabant: atqui Gentes ignorabant Messiam; ergo.

Nego Majorem; & dico Messiam potuisse dici *desiderium Gentium*, etsi illum explicite non cognoscerent gentes; nam ad hoc satis est quod ipse futurus esset Gentium spes, & salus maxime desideranda.

Objicies 2. Ex circumstantiis, in quibus Aggæus de gloria Templi secundi vaticinatus est, patet eam in ubertate, ac copia bonorum esse collocandam. Cum enim Judæi ob suam in construendo Templo negligentiam, agrorum sterilitatem essent experti, ut ex v. 13. perspicuum est, Propheta, ut eos simul exstimularet, ac solaretur, prædicit Cælum, Terramque commovenda, frugesque uberes Templo absoluto concedenda; ergo.

Nego antecedens. Nec ad fruges Terræ possunt aptari splendida hæc Dei verba: *Adhuc unum modicum est, & ego commovebo cælum &c. movebo omnes Gentes*: nec ubertas Terræ major fuit stante secundo Templo, quam fuerat primo existente; ac tandem evidens est, ut diximus, sermonem in hoc Vaticinio de Messia institui, Templique posterioris, com-
pa-

parate ad Salomonicum , fere nullam fuisse gloriam , nisi Mefsiæ ratio habeatur .

Objicies 3. Nihil obstat , quominus Aggæus explicetur de Edicto Regis Perfærum , nempe Darii Hiftafpidis , quo pax data est Judæis , & facta Templi ædificandi facultas ; ergo .

Nego antecedens . Nunquam in Scripturis , uti jam observatum est , Deus cælum , Terramque commoturus dicitur , nisi ubi de stupendis , & maximis prodigiis sermo fit . Quid autem apparet prodigii in Decreto quo Darius Edictum a Cyro jam concessum confirmavit ? Præterea , illud Decretum Darii *ad Desideratum cunctis Gentibus* nihil contingit , nec eo data est eximia illa pax juxta Vaticinium in Templo secundo concedenda , qua effici debebat , ut gloria hujus Templi gloriam alterius longe superaret ; Ergo .

PROPOSITIO II.

Quæ adductis Aggæi , & Malachie Vaticiniis continentur , in Christo Domino evenere .

P Rob. Nam 1. juxta Vaticinium Aggæi , tempore adventus Mefsiæ Cælum , & Terra, Mare, & arida a Deo commovenda sunt, gentes & omnes agitandæ . Atqui id in Christo effectum est . Ipso enim nascente Sydus novum in Cælo apparuit Matth.2. v.2. & facta est *multitudo militiæ celestis laudantium Deum, & dicentium: Gloria in excelsis Deo &c.*
Luc.2.

LUC.2. v.13. Dum baptizatus est a Joanne , *Apertum est Cælum , & descendit Spiritus Sanctus corporali specie sicut columba in ipsum , & vox de Cælo facta est : Tu es Filius meus dilectus &c.* Luc.3. v.21. & 22. Similiter cum transfiguratus est , *vox facta est de nube , dicens : Hic est Filius meus dilectus, ipsum audite.* Luc.9. v.35. &c. Ipso prædicante , seu per se seu per Apostolos , miracula summa terra , marique edita sunt . Ipso moriente , Sol miraculose obtenebratus est , *velum Templi scissum est , petreæ scissæ sunt , & monumenta aperta sunt , & multa Corpora Sanctorum , qui dormierant , surrexerunt* , Matth.27. v.45. 51. & 52. Ad hæc , ipse resurrexit Matth. ult. & alibi , & Cælos ascendit Marc.16. v.19. &c. Tandem Christus Nationum Religionem immutavit , earum Idola confregit , populosque omnes sibi devinxit . Ergo tempore Christi Cælum , & Terra , Mare , & arida , atque omnes Gentes a Deo commota sunt :

2. Juxta Aggæum , & Malachiam Messias Templum secundum ingressurus erat , atque ita ex Aggæo futura erat *magna gloria Domus istius novissimæ plusquam primæ* . Quod Christus quoque adimplevit, quippe in Templo præsentatus est coram Domino Luc.3. v.22. , & in eadem æde docuit, Matth.26.v.55. Marc.12. vers.35. &c. atque inibi innumera Miracula edidit .

3. Christus fuit pax quæ in Templo secundo juxta Aggæum dari debuit; Si quidem ad Templum

MYSTERII INCARNAT. III

plum coram Domino se ut victimam sisti voluit
præludens sacrificio pleniori , quo Deus *pacifi-*
cavit per sanguinem Crucis ejus , sive quæ in
Terris , sive quæ in Cælis sunt , Coloss. 1.
v. 20. ergo &c.

Dices 1. Christus non intravit in secun-
dum Templum , quod a Zorobabele extructum
fuerat , sed in Herodianum . Narrat enim Jo-
sephus lib. 15. *Antiq.* cap. 11. aliàs 14. num. 3.
Templum ab Herode fuisse de integro reædifi-
catum , *sublatis nempe veteribus fundamentis ,*
& jactis aliis ; ergo .

Nego anteteditens , & dico Templum ab
Herode restauratum idem cum Zorobabelico ju-
xtà omnium tunc existentium æstimationem ha-
bitum fuisse . Rabbini in Thalmude , & in aliis
operibus suis Herodianum Templum a Zoroba-
belico numquam distinguunt , semper suppo-
nunt , asseruntque Templum secundum fuisse
dirutum a Romanis , atque ubi agunt de Tem-
plo quod a Messia ædificandum fingunt , illud
non Templum quartum appellant , sed tertium.
Nec sane his Josephus dissonat,quippe qui facile
explicetur de maximæ tantum Templi , ac ejus
fundamentorum partis instauratione , atque reæ-
dificatione successive intra octo annos ab Hero-
de peracta ; adeo ut Herodes Templum secun-
dum non æquaverit Solo , ut novum extrueret ,
sed per partes illud reparaverit , jactisque no-
vis fundamentis,ei ampliorem ambitum dederit,
& in majorem altitudinem illud erexerit ; ac
tandem *Templo universo circumdederit porticus*
in-

ingentes, aliaque ornamenta adjecerit . Et verò si Templum fuisset ab Herode ex integro dirutum , ut aliud ejus loco ædificaretur , cessasset igitur Sacrificium perpetuum quod in solo Templo offerri poterat : num autem ejusmodi defectionem passi essent Judæi ? Num illius nullam Josephus mentionem fecisset ? Ergo &c.

Dices 2. Non potuit præsentia sua Christus majorem Templo secundo gloriam conferre quam quæ prioris fuit . Nam 1. quis dixerit majorem alicujus Templi gloriam inde potissimum repeti , quod in illud semel aut iterum aliquis ingressus fuerit ? 2. In Templo priore semper aderat præsens Dei responsa dantis majestas ; at Jesus aliquoties tantum in Templum secundum introivit ; ergo &c.

Nego antecedens . Christus in Templo secundo docuit , miracula edidit , ut diximus , atque in eo stetit , ut mediator , ut victima , ut pacem asserens , Deoque homines reconcilians ; ergo . Pax illa firma , & constans hæc reconciliatio tempore Messiae , ac stante secundo Templo futura significatur his Prophetiae Aggae verbis : *Et in loco isto dabo pacem* . Atque id procul dubio intellexerat auctor Libri II. Machab. de templo secundo hæc habens cap. 5. v. 20. : *In Magni Domini reconciliatione cum summa gloria exaltabitur* . Inde patet responsio ad utramque antecedentis probationem .

ARTICULUS IV.

*De Prophetia Michææ de loco
Nativitatis Messiae.*

Michæas c. 5. prædicta imminente a Chaldæis Jerosolymorum vastatione, quo loco Messias nasciturus sit his præsignificat verbis v. 2. & seqq. *Et tu Bethleem Ephrata, parvulus es (supple locum) in millibus Juda: ex te mihi egredietur qui sit Dominator in Israel, & egressus ejus ab initio a diebus æternitatis . . . Et stabit, & pascet in fortitudine Domini in sublimitate nominis Domini Dei sui: & convertentur, quia nunc magnificabitur usque ad terminos Terræ. Et erit iste pax.*

Omnes consentiunt in hoc Vaticinio nomine Bethleem designari oppidum Tribus Judæ, appellatum quoque Ephrath seu Ephrata, duobus circiter milliariis ab Jerusalem distans, juxta quod Rachel sepulta fuerat, & ex quo David erat oriundus, ab altero ejusdem nominis Bethleem oppido in Tribu Zabulon sito valde diversum. Hoc observato, sit

P R O P O S I T I O .

*Prophetia Michææ de Messia Bethleemi
nascituro in Christo est adimpleta .*

P Rob. prima pars , nempe Messiam eum esse qui Bethleemi nasciturus eo Vaticinio prædicitur . Nam 1. is appellatur *Dominator in Israel* exoptandus , *cujus egressus ab initio , à diebus æternitatis* ; quod soli Messia competit , quem alloquens Deus apud Psalterium Regium , jam dixerat Psal. 109. v. 4. *Ex utero ante Luciferum genui te*. 2. Dicitur *Pastor* , homines *in fortitudine Domini , & in sublimitate nominis Domini Dei sui reclusurus , eruditurus , conversurus* , quibus graphicè describuntur fructus ex Messia adventu colligendi . 3. *Dicitur magnificandus usque ad terminos terræ* , id est , nationibus universis imperaturus . 4. Dicitur *pax* , & quidem sine addito , quam appellationem soli Messia antonomastice competere jam non semel advertimus . Ergo nonnisi de Messia intelligi potest Prophetia Michææ , proindeque &c.

Atque eam fuisse veterum Judæorum sententiam , constat ex Paraphraste Jonathan , ex Thalmude utroque , Jerosolymit. quidem , tract. *Berachotb* fol. 5. Babylonico verò , tract. *Sanhedrin* cap. ult. , & tract. *de Paschate* ex *Bereschit rabba* , & ex *Midrasch thebillim* ; quibus concinunt R. Judas Haccadosch in *Galerazia* ,
R. Sa-

R. Salomon Jarchi , Aben Ezra , David Kimchi &c. Sanè Judæi ætate Christi non dubitabant Bethleem futurum esse Messię patriam . Matth.enim 2. v.4. interrogati ab Herode Principes Sacerdotum , & Scribæ : *ubi Christus nasceretur* ; respondent illi v.5. & 6. *In Bethleem Judæ* , idque probant adducto Michææ Vatinio , quod tractamus . Et Joan.7. v.42. alii Judæi sic loquuntur : *Nonne Scriptura dicit : Quia ex semine David , & de Bethleem Castello , ubi erat David , venit Christus ?* hoc autem *Scriptura non dicit* nisi apud Michæam ; ergo &c.

Et verò , vel Dominator ex Bethleem juxtà Michæam egressurus Messias dicendus est , vel designat Zorobabilem , uti sentiunt Judæi recentiores , quibus hac in parte male accedit Grotius , Prophetiam de Christo mysticè tantum , & spiritualiter exponens . Atqui is Dominator non est Zorobabel .

Nam 1. Zorobabel non Bethleemi , sed Babylone natus est , atque inde nomen suum duxit , quippe Zorobabel idem est ac *semen Babylonicum* , ut observat Theophilaſt. in Matth.2. Respondit Grotius Zorobabilem cenſeri Bethleemo ortum , quod ex Davidis Bethleemitiæ familia eſſet oriundus . At inquit Huetias Prop.7. n.25. *Id ſi accipimus , jam ergo multiplex nobis patria erit , totque natales terras numerabimus , quot loci majoribus noſtris ortum dederunt . Ergo & Zorobabel , præter Babylonem , in qua natus eſt , Jeruſalem quoque patriam*

triam habebat, in qua tot Reges ipsius decessores sunt procreati; & Bethleemum, in qua David, & Booz, & Obed, & Jesse; & Aegyptum, in qua Aminadab, & Nahasson; & Haran Mesopotamiae, in qua Judas &c. quod neque dici, neque ferri potest.

2. De Zorobabele nequaquam dici potuit: *Egressus ejus ab initio a diebus aeternitatis*: sive ut habetur in Hebræo, *ab olim a diebus aeternitatis*: quæ geminata ejusdem rei significatio aliquid procul dubio amplius designat, quam diuturnitatem temporis a Davide ad Zorobabelem, uti Grotius explicat.

3. Michæas apertè significat propter ortum Dominatoris quem prænuntiat, futurum ut Bethleemum, hætenus exigui nominis locus, celeberrimum fieret. Ergo ab illius Dominatoris ortu tantam sibi famam debuit conciliare, ut comparatè ad eam nulla ferè esset celebritas, quam a Davide, & Regibus ab eo ad usque Michææ tempus prolatis consequi potuerat. Atqui tantum decus ipsi afferre par non fuit Zorobabel, qui David nullo pacto æquiparari potuit, qui in gentem pene excisam ab exilio redeuntem auctoritate regiæ longè inferiori potitus est. Ergo.

4. Is quem Michæas prænuntiat, dicitur *v.4. & 5. magnificandus usque ad terminos terræ*, & futurus *pax* per antonomasiam. Atqui Zorobabel non legitur *magnificatus usque ad terminos terræ*, neque potuit singulari modo *pax* appellari. Quid? quod ipse Samaritanorum
insu-

insidiis, & criminationibus fuit obnoxius, Judæique postcuptivitatem a finitimis, & extraneis populis multoties laceffiti fuerunt, multisque cladibus afflicti, donec eorum Respublica penitus evanuerit; ergo.

5. *Regnum illud filia Jerusalem, potestas illa prima*, quæ tam splendidis verbis pinguntur cap.4. quæque eodem manifestè pertinent, ac prophetia capitis 5. ad Zorobabelem profecto non spectant, sed ad solum Messiam; ergo.

Probatur altera pars, Prophetiam videlicet Michææ in Christo ad eventum perductam. Nam Matth.2. v.1. expressè legitur, *natum esse Jesum in Bethleem Juda*. Et Luc.2. exponitur quomodo Christus Dominus, licet Nazarethi in Galilæa conceptus, Deo tamen sic providente, Bethleemi natus sit. *Ascendit autem, & Joseph*, inquit Evangelista v.4., & seqq. *a Galilæa de Civitate Nazareth, in Judæam, in Civitatem David, quæ vocatur Bethleem, eò quod esset de Domo, & Familia David, ut proficeretur* (sicut ab Augusto fuerat imperatum) *cum Maria desponsata sibi Uxore pregnante. Factum est autem, cum essent ibi, impleti sunt dies ut pareret, & peperit filium suum primogenitum*.

Porro aliis omnibus quæ de Messia præcinit Michæas, cohæret quoque Evangelium. Istis enim. *Egressus ejus ab initio a diebus æternitatis*, respondet v.1. & 14. cap.1. Joan. *In principio erat Verbum . . . & Verbum caro factum est*, plurimæque alia novi Fœderis testi-

monia . Istis : *Magnificabitur usque ad ter minos terræ* , cohæret potestas , & imperium , quod , ut jam diximus , & aliquando amplius expone-
mus , Christo datum est *in calo* , & *in terra* Matth. ult. v. 18. Philip. 2. v. 10. &c. Denique Christus Dominus est *pax* . *Ipsè est pax nostra* , inquit Apostolus Ephes. 2. v. 14. & seqq. . . .
interficiens inimicitias in semetipso . Et *veniens evangelizavit pacem vobis* , qui longe fuistis , & *pacem iis qui prope* : quoniam per ipsum habemus *accessum in uno spiritu ad Patrem* .

ARTICULUS V.

*De Prophetia Isaia , & de Prophetarum ,
& Evangelistarum circa Messia Passio-
nem & Mortem consensione .*

PROPOSITIO .

*Quæ de Christi Passione, & Morte ab Evangeli-
stis narrantur , Vaticiniis Prophetarum Mes-
siam contingentibus plane respondent .*

P Rob. 1. Ex Vaticinio Isaia capit. 53. ubi
Propheta postquam cap. præcedenti a v. 7.
ad finem de Messia splendidissimis verbis locu-
tus est , contexte sic habet : „ Quis credidit
„ auditui nostro , & brachium Domini cui re-
„ velatum est ? Et ascendet sicut virgultum
„ coram eo , & sicut radix de terra sitienti :
„ Non est species ei , neque decor : & vidi-
„ mus eum , & non erat aspectus , & desi-
„ de-

„ deravimus eum : despectum , & novissi-
 „ mum virorum , virum dolorum , & scien-
 „ tem infirmitatem : & quasi absconditus vul-
 „ tus ejus & despectus , unde nec reputavi-
 „ mus eum . Vere languores nostros ipse tu-
 „ lit , & dolores nostros ipse portavit : & nos
 „ putavimus eum quasi leprosum , & percus-
 „ sum a Deo , & humiliatum . Ipse autem vul-
 „ neratus est propter iniquitates nostras , attri-
 „ tus est propter scelera nostra : disciplina pacis
 „ nostræ super eum , & livore ejus sanati sumus .
 „ Omnes nos quasi oves erravimus , unus-
 „ quisque in viam suam declinavit : & posuit
 „ Dominus in eo iniquitatem omnium no-
 „ strum . Oblatus est quia ipse voluit , & non
 „ aperuit os suum : sicut ovis ad occisionem
 „ ducetur , & quasi Agnus coram tondente se
 „ obmutescet , & non aperiet os suum . De
 „ angustia , & de judicio sublatus est : gene-
 „ rationem ejus quis enarrabit ? quia abscessus
 „ est de terra viventium : propter scelus po-
 „ puli mei percussit eum . Et dabit impios pro
 „ sepultura & divitem pro morte sua , (*Hebr.*
 „ *clarius* , & dedit cum impiis sepulturam
 „ ejus , & cum divite in morte sua) : eo
 „ quod iniquitatem non fecerit , neque dolus
 „ fuerit in ore ejus . Et Dominus voluit con-
 „ terere eum in infirmitate : si posuerit pro
 „ peccato animam suam videbit semen longæ-
 „ vum , & voluntas Domini in manu ejus di-
 „ rigetur . Pro eo quod laboravit anima ejus ,
 „ videbit , & saturabitur : in scientia sua iustifi-
 ca-

„ cabit ipse justus servus meus multos , &
„ iniquitates eorum ipse portabit . Ideo dis-
„ pertiam ei plurimos : & fortium dividet spo-
„ lia pro eo quod tradidit in mortem animam
„ suam , & cum sceleratis reputatus est ; &
„ ipse peccata multorum tulit , & pro trans-
„ gressoribus rogavit .

Perlongum hunc Prophetæ textum ex-
scribere non pinguet , cui tam accurate conve-
niant quæ de Christi passione , & morte ab
Evangelistis exponuntur , *ut eo præsertim loco*
non putes de futuro vaticinari , sed de præteri-
is historiam texere , quemadmodum advertit
S. Hieronymus Præfat. ad Isaiam , aliique San-
cti Patres passim . Et quidem Messiam dolori-
bus traditum , propter hominum peccata in se
libenter suscepta percussum a Deo , & humi-
liatum , livoribus , quibus nos sanavit , defor-
mem , despectum , opprobriis opertum , vitæ
innocentia mirabilem , & in perferendis tot
malis patientia & mansuetudine cum ove , &
agno obmutescente comparandum , ad aliorum
iniquitates delendas seipsum in victimam ultro
neci objicientem , cum sceleratis reputatum ,
de terra viventium abscissum , cum impiis in
sepultura positum , nempe in loco impiorum
suppliciiis destinato mortuum , & tamen *cum*
divite in morte sua , id est , in sepulchro divi-
tis conditum , pro transgressoribus orantem ,
spontanea morte sua multos justificantem , ejus-
dem mortis merito semen longævum , seu in-
numeros spirituales filios generantem , inde
et-

etiam in plurimos, id est, Judæos, & Gentiles dominium acquirentem, fortesque spoliandam ac vincentem describit isto in capite Vates facer. Atqui his simillima sunt quæ de Christi Domini passione narrant Evangelistæ; ergo &c.

Vim istius argumenti non alio modo elidere conantur Judæi recentiores, quam adductam Isaïæ caput Messiaë abjudicando. At vero Messiam ibi immediate designari, facillime, & manifestissime adstruitur, tum ex Isaïæ contextu, tum Paraphrastarum, & Judæorum veterum auctoritate, tum etiam quia ad nullum alium Regem, aut Prophetam Vaticinium, de quo agimus, potest accomodari.

Atque id apparet quidem ex contextu Isaïæ. Nam allato cap. 53. evidens est de eodem agi, de quo cap. præcedenti v. 7. & seqq. hæc leguntur: „ Quam pulchri super montes
 „ pedes annuntiantis, & prædicantis pacem,
 „ annuntiantis bonum, prædicantis salutem,
 „ dicentis Sion: Regnabit Deus tuus. . . .
 „ Ecce intelliget servus meus, exaltabitur,
 „ & elevabitur, & sublimis erit valde. Sicut
 „ obstupuerunt super te multi, sic inglorius
 „ erit inter viros aspectus ejus, & forma ejus
 „ inter filios hominum. Iste asperget gentes
 „ multas, super ipsum continebunt Reges os
 „ suum; quia quibus non est narratum de eo,
 „ viderunt: & qui non audierunt, contempla-
 „ ti sunt „. Cum enim his prolatis continenter pronuntiet Isaïas, quæ ex cap. 53. adduximus, cumque præsertim hæc verba proxime
 F lau-

laudata, *sic inglorius erit inter viros aspectus ejus &c.* illis capitis 53. *Non est species ei, neque decor: & vidimus cum, & non erat aspectus, & aliis ejusmodi omnino congruant; clarum est de una, eademque persona in utroque capite esse sermonem. Et vero, cui bono negarent Rabbini, caput 53. ad Messiam attinere, si semel faterentur exponendum de eo laudatum capitis 52. versiculum 14. Sicut obstupuerunt super te multi, sic inglorius erit inter viros aspectus ejus, qui summam capitis 53. repræsentat? Atque illa duo capita eodem pertinere ita certum visum est Hebræis veteribus, ut caput 52. a versu 7. cum integro capite 53. conjunctum, unica ipsis fuerit, numero trigesima, Isaïæ Prophetia.*

Porro adducta verba capitis 52. de Messia accipienda sunt, Etenim ille Domini servus sapientia, & prudentia eximius, qui citatis cap. 52. vers. 13. & 14. dicitur *exaltandus, elevandus, sublimis valde futurus*, hominesque *obstupefacturus*, ille idem dicitur v. 7. etiam citato *annuntians, & prædicans pacem, annuntians bonum, prædicans salutem, dicens Sion, regnabit Deus tuus*: dicitur v. 10. *is in quo paravit Dominus brachium sanctum suum in oculis omnium gentium: & videbunt omnes fines terræ salutare Dei nostri*: dicitur v. ultimo *aspersurus*, seu in admirationem rapturus *gentes multas, & Regum ora compressurus*. Atqui hæc totidem sunt Messia speciales, ac maxime proprii characteres; ergo.

Adde,

Adde , verba hæc quæ v.1. capitis 53. Prophetiæ de qua agimus præmittit Isaïas: *Quis credidit auditui nostro ? & brachium Domini cui revelatum est ?* & ista v.8. *Generationem ejus quis enarrabit ?* illa denique v.12. *Ideo disper-tiam ei plurimos , & fortium dividet spolia ,* indicare de re maxima , de mysterio summo , de persona eximia fieri sermonem , ac proinde ibi intelligendum Messiam . Et re ipsa adeo sublimia sunt , ac supra omnem humanam cogitationem posita , quæ de redemptione generis humani , de satisfactione pro peccatis Deo per unius oblationem , & mortem impendenda , de pretio tanti sacrificii &c. eo loci ab Isaïa proferruntur , ut in solum Messiam ea cedere posse nemini dubitandum sit . Soli igitur Messię competere , quæ in hoc Isaïæ oraculo continentur , ex ipso Vatis sacri contextu adstruitur .

Idem etiam evincitur ex Paraphrasi Jonathanis , qui utrumque istud caput de Messia explicat , quem etiam expresse nominat vers.13. capitis 52. & cap.53. v.10. atque ex Judæis antiquis in *Siphre* , in *Thalmude Tract. Sanhedrin* , in *Bereschith rabba* R. Mosi Hadarsan &c. quos laudat Huetius Prop.7. n.15. & quorum testimonia refert Raym. Martin. in *Pu-gione fidei* part.2. cap.9. n.25. & part.3. dist.1. cap.10. n.3. & 4. & dist.3. cap.8. n.5. cap.16. num.20. &c. & D. de Voisin ad Proæmium .

Jam porro quæ recentiores Rabbini fingunt , ut Vaticinium aliorum detorqueant ,

aperte falsa, & absurda sunt, ac facillime refelluntur.

Etenim 1. nihil infelicius interpretatione R. Mosis Alschech, qui postquam versiculos præcedentes Regi Messiae applicuit, genuinam cujuslibet justii imaginem v.2. & seqq. capit. 53. effingi, Moysenque nominatim v.9. exprimi arbitratur. Num igitur ista: *Vulneratus est propter iniquitates nostras, attritus est propter scelera nostra . . . & livore ejus sanati sumus . . . oblatus est quia ipse voluit . . . Generationem ejus quis enarrabit?* & alia ejusmodi, ad justum quemlibet, & ad Moysen ipsum ulla ratione accommodari queunt? Ultro quidem fatemur *Justum* aliquem ibi designari, sed *Justum* hunc præcellentem, qui simpliciter, & antonomastice *Justus*, & *Justitia* a Prophetis appellatur, id est, ipsum Messiam.

2. Non magis feliciter R. Abravanel in secunda sua hujus loci expositione, idem caput interpretatus est de pio Rege Josia, qui in Campis Megeddo pugnans adversus Nechaonem Regem Ægypti, vulnus a sagittariis accepit, quo brevi confectus est, ut narratur IV. Reg. 23. v.29. & fusius II. Paral. 35. v.20. & seqq. Enimvero Josiæ mortis causam imprudentia ejus attulit, non iniquitas Populi. *Noluit Josias reverti*, ait Auctor Paral. II. capit. laudato versic. 22. *nec acquievit sermonibus Nechaon ex ore Dei: verum perrexit inconsulto, ut dimicaret in Campo Megeddo, ibique a sagittariis,*

riis mortifero vulnere ictus est. Tunc fuga conatus est morti se subtrahere. Vulneratus a sagittariis, ait sacer contextus v.23. dixit pueris suis: Educite me de pralio, quia oppido vulneratus sum. Qui . . . asportaverunt eum in Jerusalem, mortuusque est &c. Itaque pius ille Rex nullo pacto dici potest *propter scelus populi fuisse vulneratus, attritus, & a Deo percussus*, atque ad delendas populi iniquitates voluntarie in victimam *oblatus*. Non *posuit pro peccato animam suam*, non *ductus est quasi ovis ad occisionem*, non *obmutuit*, non *reputatus est cum sceleratis*, *fortium spolia* non tulit &c.

3. Aperte etiam falsa est interpretatio quam plerique celeberrimi Judæorum recentiorum Doctores, Lipmanus, Salomon Jarchi, Aben-Ezra, Kimchius &c. tradiderunt. Hi vaticinium Isaïæ de Populo Israelitico in præsentis captivitate afflicto exponendum censent, voluntque Judæos iis, quibus afficiuntur calamitatibus, Deo alioqui mundum destructuro pro peccatis Gentium satisfacere. Verum is de quo Isaïas sermonem habet non est cœtus hominum, sed persona singularis: si quidem v.3. appellatur *vir dolorum*; de eo dicitur v.8. *Generationem ejus quis enarrabit?* de morte, & sepultura ejus &c. verba facit Propheta; quæ omnia profecto ad personam singularem, non ad cœtum pertinent. Præterea de illo ibi agitur, qui v.9. *iniquitatem non fecit, neque dolus fuit in ore ejus*: sed hanc ab omni dolo, & iniquitate immunitatem, nec Isaïas sane, nec alij

Prophetæ populo Israelitico adscribunt, quippe qui hujusce gentis obcæcationem, & perfidiam sæpissime coarguunt; ipsique non diffidentur Rabbini apud suos etiam multa vitia obtinere; ergo &c. Deinde num populus Israeliticus dici potest victima, & oblatio spontanea pro peccatis Gentium? *Oblatus est*, inquit Prophetæ v.8. *quia ipse voluit, & non aperuit os suum: sicut ovis ad occisionem ducetur &c.* An in præsentī captivitate voluntarie detinentur Judæi? nonne ex ipsorum historia constat eos sæpissime variis locis rebelasse, & toties quidem, quoties alicujus prosperi exitus sese obtulit occasio? Ad hæc, pro Gentibus non orant Judæi; is autem de quo Isaïas, *pro transgressoribus rogavit*. Postremo ista vers.4. & seqq. *Languores nostros ipse tulit, et dolores nostros ipse portavit... vulneratus est propter iniquitates nostras, attritus est propter scelera nostra... livore ejus sanati sumus... Posuit Dominus in eo iniquitatem omnium nostrum... Justificabit ipse justus servus meus multos, et iniquitates eorum ipse portabit... et ipse peccata multorum tulit*: ista, inquam, significantne solum jejunam hanc Judæorum pro gentium peccatis satisfactionem nullum iis salutis medium afferentem, quam comminiscuntur Rabbini?

4. Illorum pariter rejicienda veterum Rabbīnorum expositio, qui duplicem distinxerunt Messiam, alterum obscurum, doloribus affligendum, & occidendum, alterum victoriis, ac imperio conspicuum. Qui enim in adducto
Isaïæ

Isaiæ Vaticinio vir dolorum pro peccatis nostris atterendus dicitur, ille idem characteribus soli Messiae glorioso propriis ibid. exprimitur: Scilicet ca. 52. v. 7. sic de eo legitur: *Quam pulchri super montes pedes annuntiantis, et prædicantis salutem* v. 10. appellatur *Salutare Dei nostri* v. 13. præsignificatur *exaltandus, et elevandus, et sublimis futurus valde* v. 15. *asper surus gentes multas, & reges in admirationem rapturus*. Cap. 53. v. 12. dicitur imperium in plurimos accepturus, & *fortium divisurus spolia*; ergo &c.

Confirmatur maxime istud argumentum concentu aliorum Vaticiniorum, in quibus dolores, opprobria, & occisio Messiae prædicuntur. Nempe Psal. 21. omnes passionis Christi circumstantiæ describuntur, & simul ipse exhibetur gloria conspicuus, & gentes universas ad Dei cultum adducturus. Idem quoque Messias qui Daniel 9. dicitur occidendus, ibidem prænuntiatur peccata deleturus, justitiam sempiternam adducturus, visionem, & Prophetiam completurus, in Sanctum Sanctorum ungendus, pactum multis confirmaturus; ergo.

Accedit hanc duplicis Messiae distinctionem non nisi ad eludenda Christianorum argumenta esse excogitatam, & ab ea plerosque Rabbinos hodie recedere.

5. Tandem non minoribus laborat vitiis Rabsaadiæ Gaonis sententia, juxta quam Vaticinium de Jeremia intelligendum est; inanemque operam sumit Grotius, dum in commentario

fuò in Isaiam ad sacrum Prophetiæ contextum enitur hanc aptare opinionem , quam ex parte sequitur , cæteroqui tamen sensu *sublimiori*, *sæpe & magis* *נאם לזון* (ad verbum) , Christum ibi significari observans . Enim vero nonne absone vir doctissimus v.4. *languores nostros ipse tulit &c.* significari vult Jeremiam *non talia meritum mala tulisse , quæ Judæi erant meriti* ? Supponit illa explicatio propter perpeßos a Jeremia dolores , & eorum causa , populum calamitatibus , quas meruerat immunem fuisse : atqui tamen constat Judæos ob iniquitates suas a Chaldæis fuisse obsessos , & partim interfectos , partim in captivitatem abductos , paucissimis relictis , iisque pauperrimis , & itidem Chaldæorum servis ; ergo .

Istud pariter v.5. *Vulneratus est propter iniquitates nostras &c.* male interpretatur Grotius de peccato , quo Judæi in Jeremiam desævierunt , perinde atque si esset dictum : *Male tractatus est nostro crimine . . . attritus est per nostram culpam* . Namque præpositio Hebraica ibi usurpata , idem sonat ac *propter* , *ob* , nec voce *per* reddi potest : Quod si illud Hebræum vocabulum duplicem haberet intellectum , ad eum , quem defendimus contextu Vaticanii evidenter determinaretur , & præsertim versu 6. *Posuit Dominus in eo iniquitatem omnium nostrum* , & vers. 10. *Si posuerit pro peccato animam suam* ; denique vers. 12. *Ipse peccata multorum tulit* . Hinc Grotius ipse lib.5. *De Relig. Christiana* cap.19. nobis consentiens sic verterrat ,

rat. *Ob nostra peccata vulneratus est, attritus ob nostra crimina.*

Istud autem v.7. *Non aperuit os suum . . . quasi agnus . . . obmutescet, & non aperiet os suum*, qua ratione ad Jeremiam accomodabitur? certe non modo non obmutuit Jeremias, sed contra in Phassurem, a quo in carcerem missus fuerat, mala maxima vaticinatus est, ac coram Deo gemitibus sese dedit, dieique suo natali maledixit. Dandum quidem Grotio iracunde nihil esse locutum Prophetam: sed quid inde? hunc non peccasse? fatemur: an vero sequitur illum ad occisionem ductum, quasi agnum obmutuisse, et os suum non aperuisse? ergo.

Hæc deinde v.8. *Generationem ejus quis enarrabit? quis sustinebit Grotium ita frigide interpretantem: Erit valde longævus?*

Denique, ut alia plura omittam, is de quo apud Isaïam agitur, *ad occisionem ductus est v.7. abscissus est de terra viventium v.8. posuit pro peccato animam suam v.10. tradidit in mortem Animam suam v.12.* Hæc autem Jeremiæ non competunt, quippe quem Judæi neci non tradiderunt, sed tantum in carcerem, & in cænosum lacum detruserunt, unde post breve tempus creptus est. Consultius igitur ac verius in citato L.5. cap.19. *De Relig. Christ.* Grotius totam hanc Prophetiam soli Christo applicans recitatis Isaïæ verbis sic habet; *Quis potest nominari aut Regum, aut Prophetarum, in quem hæc congruunt? Nemo sanè.*

ARTICULUS VI.

*De Celebri Josephi Testimonio Christum
Jesum spectante.*

Testimonium istud habetur Lib.18. Antiquitatum, Cap.4. quod ita vertit *Sanctus Hieronymus* in Catalogo Scriptorum Ecclesiasticorum: *Eodem tempore fuit Jesus vir sapiens, si tamen virum eum oportet dicere. Erat enim mirabilium patrator operum, & Doctor eorum qui libenter vera suscipiunt. Plurimos quoque tam de Judæis, quam de Gentibus, sui habuit Sectatores, & credebatur esse Christus. Cum invidia nostrorum Principum Crucem eum Pilatus addixisset, nihilominus, qui eum primum dilexerant, perseveraverunt. Apparuit enim eis tertia die vivens. Multa, & hæc & alia mirabilia carminibus Prophetarum de eo vaticinantibus; & usque hodie Christianorum gens ab hoc sortita non defecit. Quod quidem testimonium adulterinum, & a priscis Christianis Historiæ Josephi assutum opinati sunt Osiander, Gifanius, Montacutius, Capellus uterque, Cloppenhurgius, Blondellus, Tanaquillus Faber, aliique intemperantioris Criticæ Auctores. Contra vero genuinum propugnant Galatinus, Junius, Sixtus Senensis, Possevinus, Baronius & Bellarminus Cardinales, Casaubonus, Vsserius, Petitus, Vossius uterque, Henricus Valesius, Huetius, aliique Viri Eruditi.*

PRO-

PROPOSITIO.

*Præclarum illud de Christo Jesu testimonium;
quod apud Josephum legitur, genuinus
Josephi factus est.*

P Robatur primo ex constanti & perpetua hujus testimonii lectione in Codicibus omnibus *Josephi* tum manuscriptis, tum editis. Deinde ex Operum *Josephi* distractione, quo tempore hunc locum assutum volunt, sub finem scilicet tertii sæculi. Codices enim omnes *Antiquitatum Judaicarum* penes Christianos non erant, ut eos interpolare possent, ac istud testimonium pio dolo inferere. Tertio, *Josephi* diligentia in tradenda Historia sui temporis, & rebus memoria dignis, quæ apud Judæos contingerant, referendis, non patitur de Jesu Nazareno ipsum siluisse existimemus, cujus occasione maximi in Judæa motus excitati, cujus nomen Orbe toto celeberrimum, qui Christus appellatus est, de cujus nomine nova Christianorum Secta prodiit, & longe lateque per ejus Apostolos & Discipulos propagata est. Quarto, cum *Joannis Baptiste*, & *Jacobi fratris Jesu* meminerit, eosque laude dignos censuerit, incredibile est de Christo Jesu siluisse, cujus nomen longe clarius fuit. Quinto, series orationis, locus appositus mentionem faciendi de Jesu Nazareno, ubi de *Pilato* agit, styli similitudo & locutiones *Josepho* familiares, hoc te-

testimonium intrusum & adulterinum non esse probant, sed *Joseph* genuinum factum. Sexto illud tamquam genuinum & legitimum laudant, & iisdem verbis repræsentant *Eusebius* Lib.3. *Demonstrationis Evangelicæ*, pag.124. & lib.1. *Historiæ Ecclesiasticæ*, Cap.11. *S. Hieronymus* in Catalogo Scriptorum Ecclesiasticorum, in *Joseph*o, *S. Isidorus Pelusiota* Lib.4. Ep.225. *Sozomenus* Lib.1. Cap.1. *Cedrenus* *Histor. Compend.* pag.196. *Nicephorus Callistus* Lib.1. Cap.39. *Suidas* in *Lexico*, verbo *ΓΕΝΕΤΕΣ*.

Objicitur, Veteres Patres qui Christianæ Religionis veritatem adversus Judæos propugnarunt, numquam hoc *Joseph*i testimonium protulisse, non *Justinum* in Dialogo cum Tryphone, non *Tertullianum* Libro adversus Judæos; qui certe illud prætermitturi non videntur, utpote ad Causæ Christianæ defensionem validissimum, si tunc in *Joseph*i Codicibus extitisset. Accedit *Photii* silentium, qui cum *Joseph*i summarium & censuram dederit *Thematæ* 238. hujus testimonii nullatenus meminit.

Præterea, *Origenes* Jesum a *Joseph*o pro Christo agnitum non fuisse diserte testatur, Tom.11. in *Matthæum*., Et vero (*inquit*) „ mirabile est, quod cum Jesum nostrum non „ agnosceret esse Messiam, nihilominus tale „ justitiæ testimonium Jacobo dederit. *Et lib.1.* „ *Contra Celsum*: Idem quamvis Jesum parum „ agnoscens pro Christo, dum quærit causam „ Hierosolymorum Excidii, Templique de- „ molitionis (cum debuisset dicere id accidisse

„ pro-

„ propter ejus Populi contra Jesum insidias ,
 „ quia Christum a Prophetis promissum inte-
 „ remissent) quasi invitatus haud procul a veri-
 „ tate discedens , ait hæc contigisse Judæis in
 „ ultionem Jacobi cognomento Justi , fratris
 „ Jesu qui dicitur Christus , quia justissimum
 „ hominem occiderant „ . Idem *Theodoretus*
 asserit , nec injuria . Vaticinia enim Prophe-
 tarum Messiae prænuntia *Josephus* , sive adula-
 torie , sive ex animi sententia , *Vespasiano* ac-
 commodavit : cum tamen in hoc loco Jesus cla-
 rissimis verbis Messias esse dicatur . *Hic erat*
Christus .

Tertio , Testimonii hujus Auctor homi-
 nem dici non vult Jesum . Deum igitur esse
 vult ; quod de Messia suo Judæi numquam cre-
 diderunt .

Quarto , Jesum plurimos e Gentibus ad se
 pertraxisse dicit , cum ex Ethnicis unam tan-
 tum alteramve mulierem ad suam Sectam Je-
 sus Christus traduxerit .

Quinto , absurdum est *Josephum* , cujus
 in Ethnorum superstitionem magis quam in
 Religionem Christianam inclinabat animus , fa-
 tentem inducere , Prophetas prædixisse casus ,
 gesta , miracula , & Resurrectionem Christi
 Jesu .

Sexto , verisimile non videtur , *Josephum*
 Secta Phariseum Jesum laudasse , qui Phari-
 sæos palam fuerat infectatus .

Septimo , hæc periocha cum anteceden-
 tibus & consequentibus minus cohæret .

Octa

Octavo, styli discrepantia testimonium istud assutum probat.

Respondetur ad primum, inficialis argumenti nullam aut exiguam esse vim. *Justinum Martyrem*, *Tertullianum*, priscos alios Patres, Judæorum pertinaciam Prophetarum Vaticiniis convincendam sibi proposuisse, testimonium *Josephi* recentioris Auctoris, cujus non magnam apud Judæos auctoritatem esse noverant, prætermisisse, maxime cum exploratum haberent, illud probe intellectum nihil adversus Judæos conficere, sed quæ de Jesu Nazareno esset Christianorum opinio dumtaxat exponere. *Photium* quod spectat, non mirum quod itius testimonii non meminerit, nec illud in suis Excerptis retulerit, cum *Judaicarum Antiquitatum* absolutissimam Epitomen dare non instituisset, cujus quatuordecim priores Libros prætermisit; & Themate 238. selecta quædam de *Herode* tantum excerpfit, ut ipse profitetur. Et hæc quidem non ea fide descripsit, ut detrahere aliquid vel addere religio ipsi fuerit. In exemplum sit hæc periocha, quæ apud *Josephum* non habetur: *Hic est Herodes, Antipatri Idumæi, & Arabissæ (Cypris autem nomen ipsi fuit) filius: sub quo Christus Deus noster pro salute nostri generis virgineo utero editur: adversus quem furore actus Herodes, aberravit quidem a Domino, plurimorum autem Infantium interfector fuit. Si Josephi non sunt, quæ hic a Photio commemorantur, cur Josephi esse negemus, quicquid a Photio prætermittitur?* Ad

Ad secundum respondetur, *Origenem & Theodoretum* recte asseruisse, *Jesum a Josepho* pro Christo habitum non fuisse, quia in Christum non credidit, neque Christianus fuit. Cum enim de Jesu ait, *Christus hic erat*, non id significat, illum esse revera Christum qui a Judæis expectabatur, sed vulgata appellatione Christum nominari solitum a Judæis, Christianis, & ipsis Ethnicis. Matth. 1. 16. *De qua natus est Jesus, qui vocatur Christus*. Sic Pilatus, Matth. 27. 17. 22. *Quem vultis dimittam vobis Barabbam, an Jesum, qui dicitur Christus?* Sic impii Satellites, Matt. 26. 68. *Prophetiza nobis, Christe, quis est qui te percussit?* Sic Summi Sacerdotes cum Scribis, Marc. 15. 32. *Christus Rex Israel descendat nunc de Cruce*. Ita Svetonius in Claudio Cap. 25. *Judæos impulsore Christo assidue tumultuantes Roma expulit*. Et Tacitus Lib. 25. Annalium, Cap. 44. *Auctor nominis ejus Christus, qui Tiberio imperitante per Procuratorem Pontium Pilatum supplicio affectus erat*. Ita & Plinius Epistola ad Trajanum, & Lampridius in Vita Alexandri Severi. Hinc Eusebius Lib. 1. *Historiæ Ecclesiasticæ*, Cap. 3. *Incorporeæ autem & divinæ virtutis, quæ in ipso fuit, magnum & luculentum indicium est, quod solus ipse ex omnibus, qui umquam extiterunt ad hanc diem, nunc quoque ab omnibus hominibus per universum orbem Christus vulgo appellatur; & ab omnibus communi consensu & testificatione hoc celebratur cognomine, & a Græcis ac Barbaris præ-*
disa-

dicatur. Cum ergo dixit *Josephus*, ὁ Χριστὸς ἵπτεται
 seppleri voluit, ὁ λεγόμενος quod alibi conceptis
 verbis expresseerat, scilicet Lib. 20. Cap. 8.
Ἀδελφὸν Ἰησοῦ τοῦ λεγομένου Χριστοῦ. Fratrem Jesu, qui
 dicitur Christus. Atque hunc *Josephi* sensum
 esse docet *S. Hieron.* hæc verba ὁ Χριστὸς ἵπτεται ἢ ita
 reddens: *Et credebatur esse Christus.*

Ad tertium respondetur, Judæos Messiaæ
 suæ divinitatem adscripsisse; nec tamen *Josephum*
 existimasse Jesum esse verum Deum, si-
 cut nec verum Messiam. Quod ergo ait, *Si*
tamen illum fas est virum dicere, id oratorio
 more dixit, ut prodigiorum a Jesu patratorum
 admirabilitatem extolleret, & significaret il-
 lum tanta gessisse, ut Deo quam hominibus
 prior videatur. Quem loquendi morem &
 profanis Scriptoribus familiarem, nec a Chri-
 stianis omnino repudiatum pluribus exemplis
 ostendit doctissimus Præsul *Daniel Huetius*
Demonstrationis Evangelicæ Propositione 9. &
 inter alia ex *Matthiæ Corvini* Pannoniæ Regis
Epitaphio, quod refert *Jovius.*

*Corvini brevis hæc urna est, quem magna
 fatentur*

Facta fuisse Deum, facta fuisse hominem.

Ad quartum respondeo, etsi una tantum
 alterave mulier ex Ethnicis Christo in terris
 agenti nomen dederit, Gentes tamen integras
 Apostolorum prædicatione ad Christum conver-
 sas. *Josephum* itaque ad suum tempus respe-
 xisse, quo Christianum nomen jam longe late-
 que propagatum erat; & Christo jure tribuisse
 quod

quod Apostoli Christi virtute se facere prædicabant .

Ad quintum respondeo , *Josephum* ex propria sententia non loqui , sed ex publica fama , & Discipulorum Christi , atque omnium Christianorum fide , cum ait : Illum Discipulis apparuisse tertia die redivivum : *Multa hæc & alia mirabilia carminibus Prophetarum de eo vaticinantibus* : Quasi diceret , eos qui Jesum credebant esse Christum , credere etiam ipsum die tertia resurrexisse a mortuis , & Prophetarum de Messia prædictiones in illo exitum habuisse .

Ad sextum respondeo , mirum non esse , quod *Josephus* , Secta licet Pharisæus tam magnificè de Christo scripserit , cum *Vespasianum* capitalem Judaicæ Gentis hostem , aut Messiam esse crediderit , aut credere se finxerit . Et si Deus , qui hominum ingenia , & corda regit omnipotentissima potestate , Paulum Secta quoque Pharisæum , & Christianæ Religioni infensissimum Christi Prædicatorem , & Apostolum effecit : quid mirum si a *Josepho* in Judaismo pertinaci præclarum illud de Christo testimonium expressit ?

Ad septimum respondeo , *Josephum* temporum ordinem , non rerum attendere , & diversas , ac omnino disparatas narrationes rerum , quæ iisdem temporibus gestæ sunt , in unum caput congerere , nulla quæsitæ argumentorum commissura ; qui nobilissimorum Historicorum mos est , quamvis alius sit Oratorum sty-

stylus . Quæ autem eo in Capite narrat *Josephus* , in quo præclarum illud de Christo testimonium habetur , *Pilati* temporibus contigerunt . Unde non est , quod ea minus cohærere Adversarii caussentur .

Ad octavum respondeo , Styli discrepantiam viros eximiè criticos , & eruditos nullam subodorari , inter alios *Casaubonum* , *Vsserium* , *Vossios* , *Valerium* , *Huetium* &c.

His itaque conjecturis non obstantibus , genuinum habeatur *Josephi* testimonium de Christo Jesu Salvatore nostro , sine Legis , & Prophetarum , cui sempiterna laus , honor , & gloria .

CAPUT SECUNDUM.

De variis aliis momentis , & indiciis , quibus Messiam venisse , eumque esse Jesum Christum confirmatur .

ADductis huc usque adversus Judæos argumentis , alia adjicienda supersunt momenta , quæ paucis exponemus .

PRIMUM MOMENTUM,

Ex Typis quibus olim Messias figuratus est , petitum .

TYpi Messia sunt veluti quoddam Prophetiarum genus , non verbis , sed rebus , personisve , & actionibus expressum . Non inficiant-

ficiantur Judæi multos ejusmodi fuisse olim Messiae Typos, & figuras, Isaacum videlicet Josephum, Moysen, Davidem, Salomonem, Jeremiam, Agnum Paschalem &c. Christum porro inter & Typos illos tanta est in præcipuis convenientia, ut inter figuram, & rem figuratam, inter umbram, & veritatem major desiderari nequeat. Lege Huetium Proposit. 9. cap. 170. singulos illos Typos erudite, more suo, recensentem, & post SS. Patres accurate explicantem: neque enim nobis licet varia hujusmodi admirandæ consensionis capita sigillatim evolvere. Atqui quamvis argumentum, quod ex ejusmodi Typis eruitur, tanti non sit ponderis, quanti illud invictum quod ex Prophetis hætenus deductum est, eam tamen, quæ in Christo Jesu cum tot insignibus Messiae Typis deprehenditur, admirabilem cohærentiam nemo sane casui fortuito adscripserit. Multum ergo Messiae Typis firmatur, quod jam demonstratum est, nempe Messiam non amplius expectandum, sed jamdiu venisse, & esse Christum Dominum.

SECUNDUM MOMENTUM

Ex Prophetiarum Messiae prænuntiarum cessatione.

EX quo Joannes Baptista, qui Christo præivit, ipsique testimonium perhibuit, neci ab Herode Antipa traditus est, nullus apud Judæos

dæos prodiit Propheta Messiaæ prænuntius. Hoc ipsum prænuntiaverat Christus Luc. 16. v. 16. his verbis : *Propheta usque ad Joannem*. Jam vero quid causæ esse potuit cur ab ævo Joannis Baptistæ, idest a plusquam septemdecim sæculis, Vaticinia Messiaæ prænuntia desierint, nisi quod ille jamdudum advenerit, in quo prædictum fuerat *implendam esse visionem, & Prophetiam*, hoc est, Messias, isque sit Christus Jesus?

TERTIUM MOMENTUM.

*Christus tunc venit, cum Messias
a Judæis expectabatur.*

SI illo ævo quo Christus natus est, Messias venerit, fateantur Judæi necesse est, hunc alium esse non posse, quam Christum. Quis enim alter illius ævi homo Messiaæ titulo cum vel minima veri specie insigniri posset? Atqui præter evidentia argumenta quibus supra stabilitum est, Christum eo tempore natum esse, quo Messias ex Prophetiis nasci debuit, istud insuper in Judæos urgemus, eorum videlicet majores non dubitasse, quin Messias tunc adventurus esset. Atque id quidem evincitur

1. Ex testimonio Evangelistarum. Luc. 2. v. 25. & 26. de Simeone Sene hæc leguntur : *Homo iste justus, & timoratus expectans consolationem Israel, & Spiritus Sanctus erat in eo, & responsum acceperat a Spiritu Sancto non visurum*

*surum se mortem, nisi prius videret Christum Domini. Ibid. v. 38. Anna Prophetissa inducitur loquens de illo (Christo) omnibus qui expectabant redemptionem Israel. Et ex Joann. 1. v. 19. & seqq. colligitur Judæos omnes, ubi Joannes Baptista prodire cœpit, in hanc dubitationem fuisse adductos, an non is esset Messias, quem expectabant. Quapropter ut ibi habetur, miserunt Judæi ab Hierosolymis Sacerdotes, & Levitas ad eum, ut interrogarent eum: Tu quis es? nempe, an esset Christus. Hinc, cum natus esset Jesus in Bethleem Judæ, & Magi ab Oriente venissent Hierosolymam, ut eum inquirerent, & adorarent, audiens Herodes Rex turbatus est, & omnis Hierosolyma cum illo, et congregans omnes Principes Sacerdotum, et Scribas populi sciscitabatur ab eis, ubi Christus nasceretur. At illi dixerunt ei: In Bethleem Juda. Omitto Joannem Baptistam Matth. 11. v. 3. et Luc. 7. v. 9. misisse duos e discipulis suis ad Jesum, ut interrogarent eum: Tu es qui venturus es, an alium expectamus? Omitto & verba mulieris Samaritanæ ad Jesum Joann. 4. v. 25. Scio quia Messias venit, qui dicitur Christus: cum ergo venerit ille, nobis annuntiabit omnia. Testes itaque sunt Evangelistæ pro certo tenuisse Judæos futurum ut illo ævo quo Christus venit, Messias esset ori-
 turus.*

2. Idem Rabbiorum ipsorum testimonio comprobatur. Nam ex eorum libris clare eruit Huetius propos. 9. cap. 8. num. 1. eam fuisse
 Do-

Doctorum paulo ante Christi tempora florentium sententiam, tempora adventus Messiae tunc instituisse. Testatur vero Josephus lib.6. *De bello Judaico* cap.5. aliàs 12. num.4. Judæos spe, & opinione Messiae mox venturi incitados fuisse ad bellum illud in Romanos suscipiendum, quod ultinia Jerosolymorum conflagratione conclusum est. Tandem Thalmud Babylonicum in Gemara Tract. *Sanhedrin* cap.11. sic habet: *Traditio Domus Eliæ: Sex mille annos durat mundus. Bis mille annis inanitas, et vastitas. Bis item mille annis Lex. Denique bis mille annis dies Christi.* Quæ, interprete Rab. Menasseh lib.2. *De resurrectione*, significat bis mille annis ante Abrahamum homines sine lege scripta vixisse; bis mille annos alios ab Abrahamo ad Messiam interjacere; *ita ut elapsis a mundo condito quater mille annis, illustris, ac mirabilis dies exoriturus sit, quo Messias in has terras veniet.* Ergo cum juxta acceptam Judæis Chroaologiam versus annum mundi quatermillesimum Christus natus sit, consequens est eum venisse eo tempore, quo Messias ex traditione Domus Eliæ venire debuit.

3. Suffragantur historici profani. A Judæis quippe procul dubio orta fuerat, quæ fideiullore Svetonio in *Vespasiano* cap. 4. *percrebuerat Oriente toto vetus, & constans opinio, esse in fatis, ut eo tempore Judæa profecti rerum potirentur.* Eadem iterum tradit in Nerone cap.40. His similia quoque scribit Tacitus Libro 5. *Histor. Pluribus, inquit, persuasio iner-*
rat,

rāt , antiquis Sacerdotum litteris contineri , eo ipso tempore , fore ut valesceret Oriens , profetique Judæa rerum potirentur . Eodem referri solet , tum quod in Tullio lib.2. De Divinat. legitur de rege , cui nisi parerent Romani , a salute exciderent ; tum istud Virgilii Ecloga 4. de Deo juxta Sybillinos versus nascituro : Clara Deum soboles , Magnum Jovis incrementum .

4. Adeo certum est versus Christi tempora opinatos esse Judæos Messiaæ adventum imminere , ut cum antea nemo sese Messiam perhibuisset , tunc multi Psuedo-Messiaæ prodire cæperint , & ex illo tempore varii variis sæculis eruperint . Herodes juxta plurimos , ab Herodianis Messias est habitus . Josephus Theudæ , & aliorum Psuedo-Prophetarum mentionem facit , a quibus ante excidium Urbis non semel deceptus est populus , & in desertum abductus . Omnium porro falsorum Messiarum famosissimus fuit insignis ille impostor , qui nomen *Bar-Kokeba* , id est , Filii stellæ , sibi eo consilio imposuit , ut *Stella Jacob* a Balaamo prævisa haberetur . Is juvante celebri R. Akiba Sinagogæ principe , quem sibi comitem , seu potius præcursores elegerat , Messiam se esse Judæis persuasit , immensoque eorum in Judæa congregato exercitu , adversus Adrianum Imperatorem anno Christi circiter 129. , vel ut aliis placet 135. rebellare ausus est , sicque Romanis bellum difficile , gentique suæ novam stragem , horrendas calamitates intulit .

Qua-

Quapropter Judæi fraude hominis agnita , cum cognominaverunt *Bar Kosiba* , id est filium mendacii . Legi possunt de hoc falso Messia Eusebius in *Chronico* ad annum 17. Adriani ; S. Justinus in *Apologia* 2. pro Christianis , olim 1. S. Hieron. in *Catalogo script. Ecclesiastic.* R. David Ganz in *Tzemach David* ad annum 4880. Hujus etiam mentio fit in Thalmude & in *Echarabati*. Id obiter notandum , Rab. Akibam , & si tantæ fraudis artifex præcipuus , & tot malorum causa extiterit , haberi men a Judæis , ut doctorem summum , quem maxima veneratione prosequantur .

QUARTUM MOMENTUM.

Ex multitudine Pseudo-Messiarum , a quibus juxta Christi Vaticinium, decepti sunt Judæi.

I Nepta credulitate Judæos laboraturos , & falsis quibuslibet Messiiis temere adhæsurus , diserte prædixerat Christus Joann. 5. v. 43. his verbis : *Ego veni in nomine Patris mei , et non accipitis me : si alius venerit in nomine suo , illum accipietis .* Prædictioni porro eventus stupendum adeo in modum respondet , ut certo indicio sit criminis a natione commissi , dum eum , a quo hæc prædicta sunt , noluit ut Messiam agnoscere . Scilicet , quoties eruperunt pseudo-Messia , aut Messia pseudo-Præcursores , toties plebs Judaica , & Rabbini ipsi , non sine magno plerumque miseræ nationis detrimento

trimento eis fidem adhibuerunt . Quod non solum eo sæculo quo venit Christus , aut sequenti , ut mox dicebamus , observatum est , sed sæpius etiam temporibus subsecutis . Narrat Socrates Hist. lib.7. cap.38. magnam Judæorum multitudinem Christo Domino fidem dedisse , postquam se a falso Messia , cui nomen Moyfes , inepte delusam intellexisset : quod anno Christi 434. contigit . Anno 529. Justiniano imperante , alter pseudo-Messias , nomine Julianus , plures sibi Judæos in Palestina devinxit , Gentium domitoris sibi nomen arrogans : sed brevi a Romanis oppugnatus est , & ipse captus , morte pœnas temeritatis suæ dedit . Octavo sæculo alter prodiit , de quo loquitur Theophanes . Octo novemve alii , sæculo duodecimo variis in Regionibus apparuere . Famosus fuit sæculo desinente decimoquinto , & ineunte decimosexto David Leemlein , qui anno 1499. audacter pronuntiare non dubitavit , futurum ut ipso anno sequente 1500. Messias oriretur . Cui adeo confidenter crediderunt Judæi , ut eorum multi furnos suos azymis panibus coquendis destinatos demoliti sint , rati se anno sequenti panes azymos Jerosolymis esse comesturos . Auctor est R. David Ganz avum suum Salikman Ganz Rabbini celebrem in eam cœcitatem cum cæteris impegiisse , suumque paschalem furnum etiam destruxisse . Atque ad iter Jerosolymam peragendum plerique se accingebant , cum impostor promulgavit propter populi iniquitates paulisper retardatum esse

se adventum liberatoris . Natio tamen adhuc erroris tenax anno 1502. jejunium solemne celebravit , ut quam frustra expectabat liberationem acceleraret . Alter Messias exortus est in Hispania an. 1532. Alius in India Orientali visus est anno 1615. Alter patria Smirnenſis anno 1666. totam nationem seduxit ; qui ne a Turcarum Imperatore ob tumultuationes inter Judæos in Imperio Turcico excitatas capite plecteretur , de Messia Judæorum factus est Musulmannus eodem anno die 17. Septembris. Tandem anno 1682. alter se esse Messiam in Italia , & in Germania mentitus est . Vide plura apud Imbonatum *Bibliot. Latino-Hebr. in Difert. de Adventu Messia pag. 111. & seqq. & apud Scriptores , seu Judæos , seu Christianos ibidem citatos .*

Q U I N T U M M O M E N T U M .

*Ex statu dispersionis , & captivitatis
in quo Judæi detinentur .*

DE solationem Populi Judaici , a tot sæculis e solo patrio extorris , & per gentes varias toto orbe disjecti , jam consideravimus ut pœnam , quam prædixerant Prophetæ Judæis ob Messia interempti scelus irrogandam . Nunc stupendum hunc Nationis Judaicæ statum alio modo attendimus , eumque habita ratione promissionum Dei , & consuetæ ejus erga hunc populum benevolentia , statuimus non posse ori-

oriri nisi ex illa causa, quam Evangelium assignat; nempe ex eo quod Judæi Messiam crucifigendum tradiderint, *sanguinem ejus super se* (Matth. 27. v. 25.) & *super filios suos* esse consenserint, atque hujusce patrum suorum criminis adhuc sese reos efficiant, Christum respuendo. Sic itaque argumentari licet: Si Judæis pœna sit alicujus sceleris, ut in præsentī captivitate versentur, atque id criminis non aliud esse possit quam rejectio, & occisio Messiae, quarum eos esse reos contendimus, perfecto Messias venit, isque est Christus Jesus a Judæis neci traditus.

Atqui 1. Judæis pœna est sceleris alicujus gravissimi, quod in hac captivitate detineantur. Quippe tamdiu Judæos Terram Chanaan possessuros Deus expressis verbis sæpius promiserat, quandiu mandata ejus observarent; simulque eosdem a quavis dispersione in illam Terram revocandos pollicitus fuerat, ubi eos pœniteret.

2. Scelus ejusmodi non aliud esse potest quam Messiae rejectio, & occisio, quarum eos reos esse contendimus. Debuit enim esse crimen, cujus se natio tota participem reddiderit, & cui etiamnum illa consentiat: siquidem propter alicujus privati facinus, cæteris execrandum, toti nationi irrogata non fuisset adeo singularis, gravis, & diuturna pœna. Debuit quoque esse crimen summum, & ipsa idololatria pejus; etenim delictum, quod gravitate sua idololatriam non superasset, tam lugenda

captivitate a Deo non puniretur . Certe captivitas Babylonica , qua in populum propter effusam ejus in idololatricos ritus libidinem Deus animadverterat , annis solum 70. duravit , atque per id tempus populo solamen afferebant tum Prophetæ Ezechiel , & Daniel qui tunc vixere , tum certa spes Dei ipsius promissis innixa in patriam post illos 70. annos redeundi . Præsens vero captivitas a plusquam sexdecim sæculis perseverat , nec ulla spes affulget ejus aliquando finiendæ . Dubitari itaque non potest , quin præsentis Judæorum dispersione , & captivitate puniatur crimen aliquod idololatria pejus , quo se illi obstrinxerint , & obstringere se etiamnum pergant .

Jam vero solam Messiaë rejectionem , & occisionem Judæis in Evangelio adscriptam , posse esse illud Populi Judaici crimen idololatria pejus , facile perspicere est . Si enim attendatur , Judæos præ cæteris gentibus a Deo specialiter electos fuisse , qui ejus cultui manciparentur , atque eos innumeris perpetuisque beneficiis cumulosos ; quis inficias ierit , cultus Divini desertionem ut se Idolis dederent , maximum fuisse crimen quod in se admittere illi possent , una Messiaë rejectione , & occisione excepta ? Quodnam aliud ita enorme scelus assignabunt Judæi , quo eorum natio sese devinxerit , & adhuc devinciat , nisi quod ipsis attribuimus ? Illud fatemur de quo conqueruntur Rabbini , plerosque Judæos gravioribus sese obligare peccatis : at peccata hæc privatorum sunt , non

non nationis , quæ contra profitetur ea esse ve-
tita , & a Deo punienda . Deinde ejusmodi
peccata , saltem respectu Judæorum idolola-
tria minora sunt , a qua prorsus abstinent Judæi .
Et præterea inquiero num ab ejusmodi noxis sese
immunes olim servaverint omnes Israelitæ , cum
Terram Chanaan incoluerunt , cum e captivi-
tate Babylonica redierunt , cum eorum Respu-
blica maxime floruit ? Fateantur ergo illi hu-
jusmodi peccata dispersionis , & captivitatis
in qua nunc versantur , causam non esse , sed
potius istud unum , quod Messiam occiderint ,
& etiamnum obfirmato animo abjiciant .

Confirmatur . Vel propter Messiam rejecti ,
& occisi facinus Judæi in hac captivitate affli-
guntur , vel ii soli dicendi sunt in Orbe uni-
verso veræ Legis Divinæ observantes , veræ
Religionis cultores , & veritatis assertores :
hanc propositionem tenetur Judæus libenter ad-
mittere . At si Judæi soli Legem Dei observa-
rent , si soli veram Religionem colerent , ac
veritatem tuerentur , num erga dilectum suum
Populum nullo Deus flecteretur misericordiæ
motu ? num adeo constans Legi Mosaicæ adhæ-
sio nullam delictorum veniam nationi concilia-
ret ? numquid Deus promissorum suorum obli-
tus populum suum e patria extorrem in captivi-
tate , & dispersione a septemdecim sæculis
perseverante desereret ? Ergo Judæi non pos-
sunt dici soli Legis Divinæ cultores , & veri-
tatis assertores ; proindeque &c.

Dices 1. Sæcula fere quinque supra vigin-

ti effluxerunt, ex quo decem Tribus a Salmanasare Assyriorum Rege abductæ manent e solo patrio extorres; quæ tamen Messia occisi insontes sunt: ergo captivitas similis qua ab annis plusquam sexcentis supra mille affliguntur Judæi, infirma res est ad probandum Messiam ab ipsis rejectum, & trucidatum fuisse.

Nego paritatem. Ut aliqua paritatis species institueretur, ostendendum esset 1. propter crimen idololatria minus decem Tribus fuisse in manus Assyriorum traditas; 2. eas in terram longinquam deportatas ad meliorem frugem sese aliquando recepisse, sicque meruisse, ut in Terram patrum suorum reducerentur. Judæorum namque in præsentis dispersione conditio utrumque, ut dictum est, completitur, si Messia rejectio, & occisio captivitatis hujusce causam non attulerint. Atqui non modo hæc duo de Tribubus decem non probantur, sed contra 1. ex Scripturis indubitatum est ideo Tribus illas fuisse captivitati traditas, quod ab execrando idolorum cultu nollent recedere. 2. Cum Israelitarum in captivitatem a Salmanasare deportatorum nullum jam dudum vestigium supersit, nec ulla eorum certa apud veteres deprehendatur mentio, ii censendi sunt ad ritus gentium, inter quas deportati fuerant sese adjunxisse, sicque omni distinctionis ratione sublata, in unum corpus cum iisdem coaluisse: unde nihil mirum quod in Terram Canaan, juxta verbum Moyſis Deut. 30. reducti non fuerint. Nec tamen eos Deus deseruisse dicen-

dicendus est, quippe qui hos ad fidem Messiae simul cum Gentibus, quibus erant immixti, Apostolorum prædicatione vocavit.

Saltem illud certissimum est, totam stirpem Israelitarum a Salmanasare abductorum vel Gentibus, vel Judæis reliquis esse insertam, & confusim conjunctam, si quidem nulli existit separatim. Si primum, nulla est objectio, ut dictum est. Si secundum, ex quo illi Israelitæ aliis Judæis sese adjungere, eorum conditionem secuti sunt. Nempe tam potuere ante Christum in Patriam remeare, quam cæteri Judæi: cunctis namque indiscriminatim Israelitis facta fuit a Cyro potestas in Judæam revertendi. Ubi vero a natione rejectus, & occisus est Christus, tanti criminis facti sunt consortes quotquot ex Israelitis, etiam tum temporis per Orbem dispersis, Christo nomen dare noluerunt.

Dices 2. Captivitas præsens spectari debet, ut continuatio captivitatis Babylonica: hæc enim edicto Cyri soluta non fuit, cum major pars Judæorum disperforum in patriam tunc non redierit. Igitur captivitas præsens non fuit inflicta propter Messiae necem.

Nego antec. Solutam fuisse captivitatem Babylonicam patet 1. ex prophetia Jeremiæ, qui cap. 25. eam post 70. annos solvendam prædixerat. 2. Ex Prophetia Danielis 9. de Civitatis, & Sanctuarii restauratione. 3. Ex oratione Nehemiæ, qui II. Esdr. 1. ad reditum populi e captivitate Babylonica transfert, & ap-

plicat promissionem nomine Dei a Moyse factam de Judæis , si ipsi resipuerint , ab extremis terræ in terram Canaan reducendis . 4. Ex Decreto Cyri II. Paralip. 36. v. 22. & 1. Esdr. 1. v. 1. atque ex edicto Artaxerxis I. Esdr. 7. v. 11. quibus fit facultas universis e populo Dei in Judæam revertendi . 5. Ex eventu , siquidem ex Judæis quotquot voluere in patriam cum Zorobabele post edictum Cyri , & cum Esdra post Decretum Artaxerxis reversi sunt , ibique Religionem , & Rempub. gentis suæ restaurarunt .

Ad probationem dist. Major pars Judæorum extra Terram Canaan mansit lubens , & volens , concedo : remansit invita , & coacta ; nego . Solvitur captivitas , cum potestas revertendi in solum patrium conceditur ; ad id necesse non est ut captivi cogantur discedere . Si captivus qui donatur libertate abeundi , malit in terra aliena remanere , quam ad suos reverti , nihilo secius liber est , & a captivitate solutus .

Dices 3. Judæi non debuerunt puniri ob rejectum , & occisum Jesum 1. Enim ipsum non occiderunt Judæi , sed Romani 2. Eos ignorantia excusabat , ut patet ex his Christi verbis Luc. 23. v. 34. *Pater , dimitte illis : non enim sciunt quid faciunt ;* & ex testimonio Apostoli I. Cor. 2. v. 8. *Si cognovissent , nunquam Dominum gloriæ crucifixissent ;* ac tandem ex eo quod idem Paulus I. Timoth. 1. v. 13. ait se , cum Christi Discipulos persecutus est , *ignorantem fecisse .*

Nego

Nego ant. Ad primam prob. Etsi a Pontio Pilato Præside Romano Christus cruce damnatus fuerit, attamen cum id iudicium latum fuerit, Christum accusante Judæorum Concilio, quod eum morte dignum pronuntiaverat; cum nihil non moliti sint Judæi ut ad ferendam istam sententiam mortis Judicem Romanum invitum adducerent; cum impia voce conclamaverint Matth. 27. v. 25. *Sanguis ejus super nos, & super nos & super filios nostros*: cum denique hanc patrum suorum agendi rationem approbent omnes Judæi ad Christum non conversi; evidens est occisionis Christi reos esse Judæos, ac totam nationem criminis tam horrendi sese constituere participem.

Ad secundam probationem; nego anteced. Ignorantia vincibilis ex invidia, & cupiditatibus orta minimè excusat: atqui ea fuit ignorantia qua Judæi circa Christum laboraverunt. Terrenarum rerum cupidine irretiti Salvatorem a bonis temporalibus avertentem, ad cælestia animos erigentem, noluerunt recipere. Præ invidia eum Pontio Pilato tradiderant Principes Sacerdotum, & Seniores Populi Matt. 27. v. 18., & Marc. 15. v. 10. Christus rogans Patrem ut illis dimittat, hos a crimine immunes non fuisse satis ostendit. Dum vero addit: *Non sciunt quid faciunt*, affert qualemcumque eorum excusationem, non autem eam legitimam fuisse significat. Inde patet quid respondendum sit ad testimonium adductum ex cap. 1. Epist. 1. ad Corinthios. Porro Paulus quem

zelus Legis nimius Discipulis Christo infensum reddiderat, minori scelere constrictus fuerit quam cæteri; nec tamen se criminis infontem judicavit, qui se *blasphemum, persecutorem, & contumeliosum* fuisse confitetur, & ideo indiguisse misericordia Dei.

Dices 4. Non puniuntur Judæi quod Messiam occiderint, sed potius quia unus gentis suæ, nempe Jesus Nazarenus sese filium Dei prædicare ausus est; ergo &c.

Nego anteced., in quo insulsè non minus quam impiè supponitur propter crimen ab aliquo homine privato commissum, quod ejus natio detestatur, & execratur, ac supplicio ultimo animadvertit, posse Deum æquissimum pœnas maximas ab illa natione per longam sæculorum seriem repetere.

SEXTUM MOMENTUM.

Judæi sibi conscii sunt, tempora adventus Messiae a Prophetis præfixa præteriisse.

ID a nobis non temere affirmari probatur 1. ex imprecatione qua temporis Messiae computorum caput solent defigere. Nimirum, cum omnem ejusmodi temporum computationem sibi adversari sentiant, ab illa prorsus abstinendum statuunt, quamvis tamen ratio temporum unum sit ex insignioribus adventus Messiae indiciis apud Prophetas assignatis. Imprecatio illa in Thalmude cap. 11. Gemaræ Tract.

San-

Sanhedrin his verbis exprimitur. *Inflata rumpantur ossa eorum*, qui periodos temporum computant, atque in consuetudinem proverbii venit inter Judæos.

Probatur 2. ex eorum vulgari dicto, Messia adventum peccatis populi retardatum esse; seu quod eodem recidit, Messiam secundum Prophetarum Vaticinia jamdudum advenire debuisse, sed Dei promissorum executionem propter populi iniquitates procrastinatam. *Elapsi sunt omnes termini*, inquebat jam olim celebris *Raf*, relatus in Thalmude loco mox citato, & *res non pendet nonnisi a resipiscentia*, & *bonis operibus*. Ejusmodi effugium supra non semel præclusimus, præsertim quia cum ex Prophetis Messias venturus sit ad delenda peccata, & homines ab iniquitatibus liberandos, non potest intelligi promissio sub ea conditione, quod ante ejus adventum homines non peccarent. Sed præterea num sperant Judæi, futurum ut aliquando peccare desinant ante Messia adventum? Nonne eorum Rabbini finem peccato imponendum vulgo habent ut fructum adventus Messia? Numquid ex solis Justis constitutam sese tunc exultabat natio, quoties a falsis Messis delusa est? Ergo &c.

Probatur 3. ex variis celeberrimorum Rabbiorum ea de re opinionibus, quas paucis sic recenset Huetius *Demonstr. Evangel. Prop. 9. cap. 8. n. 1. Fertur in Libris Rabbiorum*, confessos esse majores ipsorum, qui temporibus Christo Jesu paulo superioribus vixerunt,

Messia adventum imminere ; qui non multò recentiores fuerunt , & Templum excindi viderunt , Messia tempus jam venisse . Sunt qui non alium quam Ezechiam fuisse velint ; quam sententiam penitus damnari posse negat . R. Joseph Albo in Libro Ikkarim . Tradit R. Selomoh Jarchi , asseverasse vetustos gentis suæ doctores jam venisse Messiam , eoque die esse natum quo excisa Jerosolyma . Referunt R. Gedalias in catena Cabalæ , & R. Azarias in lumine oculorum , quid ipsi de tempore adventus Messia , quid R. Bechai , quid . R. Jaadias , quid is quem proximè laudavi R. Selomoh Jarchi , quid R. Levi ben Gerson , quid R. Abraham Hannasi , quid R. Moses Gerundensis , quid Abrahaniel senserint , quid , & in libro Zohar proditum sit ; ex quorum rationibus sequitur , jam id tempus esse elapsum . Quocirca in eodem libro Sanhedrin venisse quidem Messiam ajunt de verporum grege nonnulli ; at Romæ inter egros lepris laborantes latitare ; (nam ex his Isaia verbis : Et nos putavimus eum quasi Leprosum , nomen ipsi Leproso esse fingunt) : ratum verò tempus , quo ex his latebris emersurus sit , non assignant . Quidam inter horti Eden delicias ævum agitare volunt cum Elia , a quo ungendus sit olim letitia oleo , cum ad muneris sui administrationem foras prodibit . Hinc Raf modo confitentem audivimus , elapsos esse omnes terminos . Hinc excogitata a Judæis distinctio duplicis Messia , quorum alter sit filius Joseph , seu de Tribu Ephraim , pauper , mortu-

tra-

traditus, & a Christianis adoratus, alter filius David ad Judæos mittendus, eosque liberaturus. Quæ omnia deliramenta non aliunde orta sunt, quam quod Messias adventus tempora esse præterita perspicere.

SEPTIMUM MOMENTUM.

Ex miraculis Christi, & Apostolorum.

DIximus supra hæc prodigia fuisse a Prophetis prædicta; nunc ea spectamus in se. His autem, si semel de eorum veritate constiterit, evidentissimum est planè confici Divinam esse Christi & Apostolorum missionem, nec proinde recedi debere a sensu, quo Christus, & Apostoli veteres prophetias explicarunt, nullumque esse posse dubium, quin Dominus Jesus sit verus Messias Patriarchis promissus.

Atqui miracula Christi ejusque Apostolorum ipsismet editis a Moyse miraculis certiora esse satis superque probatur, atque eadem extra omnem dubitationis aleam longe esse posita mox evincemus adversus Gentiles, & incredulos; tandem vel ipsi Judæi ejusmodi miraculorum fidem augment, dum iis elevandis incumbunt toti. Namque cum maxima a Christo prodigia edita fuisse inficiari non potuerint Judæi, adeo scilicet nationem affecerant ejusmodi prodigiorum magnitudo, & numerus, eò sese converterunt, ut magicis artibus, ac inef-

fabilis nominis Dei prolationi illa attribuerint .
 Qua in re eos non esse audiendos manifestè li-
 quet vel ex ipsa ratione , qua fabulam hanc ipsi
 compingunt . Ita rem narrant in *Toldoth Jesu*,
 libro absurdissimis in omni genere commentis ,
 & blasphemis referto quem Wagenfeilius He-
 braicè , & Latine edidit Altdorfii Noricorum-
 an. 1681. ut quam ineptis mendaciis Judæi a
 Christiana Religione avertantur manifestum fa-
 ceret: *Tum temporis erat in Templo insculptum*
nomen Dei ineffabile lapidi τὸ σφραγισμένον (fun-
 damenti) . Etenim cum David rex foderet
 fundamentum , reperit ibi lapidem quemdam
ἐπὶ τῷ σφραγισμένῳ τῷ ὀφθαλμῷ (super os abyssi) , in quo
 Dei nomen incisum conspiciebatur , quem inde
 sustollens in Sanctum Sanctorum deposuit . Cum
 verò metuerent sapientes ne forte studiosi Ju-
 venes nomen hoc discerent , orbique (quod Deus
 omen prohibeat !) inferrent vastitatem , confe-
 cere incantationibus aeneos Leones duos, quos ante
 fores Sancti Sanctorum , unum a dextris , al-
 terum a sinistris statuerunt . Si quis igitur in-
 trasset illuc , & arcanum nomen didicisset ,
 hunc exeuntem allatrabant Leones , & in causa
 erant , ut ob ingentem pavorem , ac consterna-
 tionem nomina menti exciderent , & oblivio il-
 lorum eum pervaderet Jesus itaque venit
 clanculum Jerosolymas , ingressusque templum
 didicit ibi τὰ ἱερὰ γράμματα (sacros caracte-
 res) , nomenque ἀνεκφώνητον (ineffabile) mem-
 brane cum inscripsisset , nomine hoc enuntia-
 to ; ne dolorem persentisceret , scindit carnem ;
 ibi-

ibique membranam cum mysteriis condit . Mox prolato rursus nomine effecit , ut caro consolidaretur . Necesse est autem arte magica , & vi incantaminum templum introierit : secus enim si foret , quomodo permissuri erant Sanctissimi Sacerdotes Aaronis progenies , ut illuc ingrederetur ? Proinde manifestum est eum ope impuri nominis , & magica arte patrasse ista omnia . Eredientem per ostium allatrabant Leones, unde ἡ τῷ ὀνόματος λησμονή (nominis obliuio) . Ergo extra Urbem se confert, ac dissecta rursus carne educit Scripturam, & cum characteres perpendisset, tenet nomen . Abiit deinde Bethlehemum Judæ, locum nativitatis suæ , ac voce magna clamare occipit : Et quales sunt isti nequam homines ? . . . Annon mater virgo me peperit ? . . . De me vaticinatus est Isaias Propheta : Ecce virgo concipiet &c. Afferte huc ad me hominem mortuum , eum ego vitæ reddam . Festinat plebs , & sepulchro quodam effosso nihil ibi reperit præter mera ossa arida . . . Iis allatis combinat inter sese ossa singula , eaque obducit pelle , inque pedes erectum ibi staret , quod fuerat cadaver . . . Cumque ante eum statuissent Leprosum , hunc similiter per nomen ἀνεκράντης (ineffabile) sanitati restituit &c. Hæc illi , quæ retulisse refutasse est . Qui plura voluerit , adeat Wagen-seilium in confutatione illius Libri .

SECTIO SECUNDA.

CAPUT UNICUM.

*Quomodo adversus Gentiles demonstretur
mysterium Incarnationis esse peractum.*

ADversus Gentiles, & incredulos divinam Scripturarum inspirationem non agnoscetes, eatenus valet Incarnationis mysterium demonstrari, quatenus missio Christi, & Apostolorum ejus, a quibus mysterium illud prædicatum est, divina esse ostendi potest. Si enim Christus, & Apostoli a Deo missi sint, doctrina Christiana juxta quam Christus est Homo-Deus, vera sit necesse est, & fide tenenda. Porro missionem Christi, ejusque Apostolorum esse a Deo profectam, eadem evincunt argumenta, quibus ipsamet Religionis Christianæ veritas, & revelatio adstruitur. Quapropter, si de proposita quæstione, ea quam res ferre posset diligentia differeremus, tractatio integra veritatis religionis Christianæ esset instituenda, quod præsentis propositi ratio non patitur. Itaque ut scholarum mori hic obsequamur, & simul brevitati consulamus, præcipua tantum hujusce negotii capita summatim attingemus. 1. Ex factis Evangelicis, præsertim vero ex miraculis Christi, & Apostolorum, hunc esse a Deo missum adversus Gentiles, & Incredulos ostendemus. 2. Ex resurrectione Christi speciale du-
ce-

cemus argumentum . 3. De miraculis in historia Ecclesiastica relatis quidquam addemus . & 4. De mirabili Religionis propagatione .

ARTICULUS I.

Ex factis Evangelicis , præsertim vero ex miraculis Christi , & Discipulorum ejus hunc esse a Deo missum adstruitur .

Miraculorum nomine ab omnibus intelliguntur effectus illi rari , sensibiles , stupendi, hominis facultates excedentes, nulli causæ physicæ , saltem naturaliter , seu ratione , seu experientia cognitæ , connexi , cujusmodi complures in scripturis , & in historia memorantur , ut sunt mortuorum resurrectiones , subitæ morborum etiam desperatorum curationes , transformationes variæ , v. g. aquæ in vinum , virgæ in serpentem &c. Hæc miraculi notio , quam omnes recipiunt , haberi potest instar definitionis nominis .

Multa a Theologis de Miraculi Divini ; aut Angelici natura disceptari solent , quæ tamen hic omittimus , cum necesse non sit ea omnia perspecta haberi , ut intelligatur vim summam inesse miraculis ad probandam doctrinæ veritatem . Ita enim genus humanum a Deo constitutum est , ut miraculis maxime alliciatur ad credendum , ne quisquam sapiens possit iis non assentiri , ubi certis characteribus vestiuntur . Hæc potissimum regula

ea de re statuenda est tamquam evidentissima : Quisquis novit Deum unum , optimum , maximum rebus omnibus præesse , sapienter non potest temperare se ab adhibenda fide homini pio , doctrinam sanctam , dogmata sublimia , etsi rationi impervia prædicanti , qui se a Deo missum perhibens , miraculis innumeris , indubitatis , splendidissimis , nulla prava circumstantia vitiatis , nullo iis comparando prodigio impugnatis , missionem suam comprobat . Quapropter cum fateri omnes cogantur miracula Christi , & Apostolorum ejusmodi fuisse , modo facta Evangelica extra omnem dubitationis aleam posita demonstrantur , is nobis hic erit præcipuus scopus , ut illorum factorum fidem indubitatam faciamus .

Factorum Evangelicorum veritas demonstratur .

Sic arguimus : Facta possibilia , publica , & magni momenti a pluribus testibus oculatis , aut coætaneis , qui nec falli potuerunt , nec mendacii , & fraudis possunt insimulari , unanimiter nulloque alio scriptore contradicente narrata , cum factis aliis posterioribus extra omnem controversiam positis necessario connexa , ac tandem usque ad nos sine ulla corruptione , & depravatione transmissa , ejusmodi , inquam , facta vera , & certissima sunt : atqui facta quæ in Evangelio narrantur sic se habent : ergo &c.

Major negari nequit . Enim vero qui facta hisce caracteribus vestita in dubium revoca-

caverit , is circa facta historica incidat necesse est in Pyrrhonismum universalem , cui hominis ratio , & natura , ipsorumque Deistarum in rebus humanis cogitandi , & agendi modus prorsus repugnant : idem ille apud se statuatur homines nullo motivo ductos , immo motivis omnibus posthabitis , posse veritatem odisse , mendaciis , & falsitatibus manifestissimis delectari : judicet fieri posse , ut cuncti ad eum decipiendum conspirent : neget Romam olim extitisse , aut etiamnum extare : plerasque demonstrationes mathematicas rejiciat , quippe quæ ejusmodi factorum certitudinem moralem evidentia non superant , sunt vero plerumque hominum indoli ac ingenio multo minus proportionatæ .

Non tot autem & tantas enumeravi certitudinis factorum notas , quod omnes crediderim ad unamquamque veritatem historicam firmiter stabiliendam requiri ; sed ea mente ut quæcumque facto alicui suadendo prodesse possunt , in unum collecta ostendam factis Evangelicis competere .

Jam probanda est minor propositio per partes : I. Possibilia sunt facta quæ in Evangelio narrantur . De solorum Miraculorum possibilitate post Spinosam dubitatio moveri posset : Atqui evidens est miracula esse possibile , seu nullam contradictionem involvere . Miracula enim , ut ex dictis colligere est , seu quæ a Deo solo , seu quæ ab Angelis producuntur , sunt effectus rari , sensibiles , stupendi , ex legi-

gibus generalibus motuum excepti, seu quod idem est, dissimiles iis effectibus quos iisdem in circumstantiis physicis Leges naturales producant. Atqui ejusmodi exceptiones, ejusmodi effectus nullam contradictionem involvunt. Deus enim qui libere instituit leges naturæ, potuit, eas instituendo, quas voluerit exceptiones decernere; potuit statuere, futurum ut illæ leges ad speciales quosdam non pertinerent casus, in quibus volebat alios effectus produci. Rem explico exemplo. Leges motuum a Deo institutæ exigunt, v. g. corpus aqua gravius ipsi superpositum mergi: quis negaverit Deum, cum illam legem tulit, potuisse eum excipere casum in quo S. Petrus super aquas incessit, & contra præfinire, ut in ejusmodi casu produceretur effectus ei, quem in iisdem circumstantiis physicis leges motuum producant, oppositus? Ergo miracula, ac proinde omnia facta, quæ in Evangelio narrantur, possibilia sunt.

2. Ejusmodi facta publica fuerunt. Id inductione aliqua patebit. Namque Joannem Baptistam, hominem sanctissimum, baptisma penitentiae prædicantem, Christi Præcursores fuisse, & ipsi testimonium reddidisse; pariter Christum Bethleemi natum; Magos cælesti phænomeno ab Oriente deductos ad eum adorandum venisse, eaque occasione infantes omnes in Bethleem, & in omnibus finibus ejus a bimatu & infra Herodis jussu fuisse occisos; anno ætatis suæ duodecimo Christum, stupentibus, & fa-

& sapientiam ejus admirantibus Judæorum Magistris, in templo docuisse; dum a Joanne baptizatus est, apertos fuisse cælos, & auditam de cælo vocem dicentem: *Hic est Filius meus dilectus, in quo mihi complacui*; duodecim Apostolis plebejis viris, rudibus, illiteratis, quibus doctrinam suam traderet, selectis, ipsum per tres annos prædicasse, & sese Messiam perhibuisse: innumera interim ab ipso edita miracula, in Civitatibus, in pagis, in domibus, in plateis, in Templo, ubique, coram Scribis, & Pharisæis, coram Samaritanis, coram alienigenis: filium Archisynagogi, puerum Centurionis Romani, cæcum a nativitate, innumerosque alios, leprosos, claudos, cæcos, mutos, & morbis quibuslibet etiam desperatis affectos, ab eo sanatos fuisse; quatuor mortuos suscitatos, mare sedatum, aquam in vinum versam, paucos panes pluribus hominum millibus saturandis multiplicatos: eundem nihilominus promoventibus Judæis a Pontio Pilato cruci affixum: tenebras, eo moriente super universam terram factas fuisse: Sepulchrum ipsius a Principibus Sacerdotum, & Pharisæis obsignatum & militibus traditum fuisse custodiendum; in eo tamen corpus ejus tertia die non repertum, sicque ipsa Judæorum cautione auctam resurrectionis ejus certitudinem: Apostolos in die Pentecostes, audiente hominum multitudine ex omni natione, quæ sub cælo est, variis linguis locutos, etsi nullam didicissent, ac instar magistri sui, ejusque

nomine , maxima patrans miracula , Evangelicam fidem primum Judæis , & deinde Gentibus usque ad extremas terras prædicasse &c. Hæc , inquam , omnia facta ; aliaque similia , quæ in novo Testamento narrantur , manifesta fuisse , eorum natura ipsa satis ostendit , eaque tamquam publica , id est , ut nota Synagogæ , magistratibus , & nationi Judaicæ in Evangelio narrari ex sola ejus lectione perspicuum est ; ergo &c.

3. Eadem facta erant magni momenti , adeo-ut ea attendi necesse fuerit , nec sine maturo examine prævio potuerint recipi . Namque ejusmodi factis Apostoli Judæis suadere conabantur , *& Dominum eum , & Christum a Deo factum esse, hunc Jesum, quem illi crucifixerant; fidem illi nomini esse adhibendam , nec aliud nomen esse sub Cælo datum hominibus , in quo oporteat nos salvos fieri ;* in quo Vaticinia omnia Prophetarum compleri , & Regnum ejus non esse illud terrenum , quod cupiditatibus ducti inaniter sperabant ; sed regnum spirituale in quo bona summa quidem , sed insensibilia , & cælestia subditis conferuntur . Receptum ubique , & cupiditatibus faventem Deorum cultum Infidelibus interdicebant , ejusque loco ipsis porrigebant Religionem severam , sensibus , & præjudiciis adversam , cupiditatibus inimicam dogmatum suorum sublimitate percellentem , morum sanctitate absterrentem , afflictiones , erumnas , persecutiones , cruces cultoribus suis prædicentem , nec nisi cælestia bo-

bona promittentem, malis pœnas in altero ævo æternum duraturas comminantem. Hæc ut suaderent Apostoli, testes se Evangelicorum factorum præbebant, Christum resurrexisse affirmabant, miracula innumera edebant, sævissimis suppliciis sese alacres offerebant. Quis autem non videat facta cum rebus tanti ponderis connexa non facile recipi debuisse, nec nisi post sufficiens examen potuisse admitti?

4. Facta Evangelica referuntur ab auctoribus coætaneis, quorum plurimi fuerunt testes oculati.

Primus Evangelistarum Sanctus Matthæus e telonio ad Apostolatum, ut ipse refert, a Christo vocatus, & unus deinceps ex ejus comitibus individuus. Evangelium suum anno æræ vulgaris circiter 39. paulo post Christi mortem, Jerosolymis conscripsit.

Marcum fuisse unum e 72. Christi Discipulis quidam opinati sunt: sed Apostolorum dumtaxat, præsertim vero S. Petri Discipulus videtur extitisse. Quidquid sit, auctoris coætanei ab Apostolis eruditi titulus ipsi denegari non potest: sed præterea constat Evangelium ejus a S. Petro fuisse approbatum, & proinde eandem (humano modo loquor) auctoritatem habere, ac si a S. Petro exaratum fuisset.

S. Lucas pariter coætaneus historiæ Christi Scriptor dicendus est. Is in locis Palestinæ vicinis natus; & in ea diu versatus, sese Sancto Paulo discipulum adjunxit. Non ea quidem ipse vidit, quæ in Evangelio suo litteris con-

consignat ; sed testatur cap. 1. v. 2. & 3. se afsecutum *omnia a principio diligenter*, eaque scribere *quæ tradiderunt qui ab initio ipsi viderunt*, & *ministri fuerunt sermonis.* Cum autem ejus Evangelium ante Apostolorum mortem exaratum fuerit, & ab omnibus Ecclesiis semper, & unanimiter receptum, dubitari non potest quin illud approbaverint Apostoli.

Porro S. Joannes e Galilæa oriundus Apostolorum Collegio sociatus, & ob accepta a Christo singularis prorsus dilectionis testimonia, dilecti Discipuli nomen adeptus, Christum ad crucem usque secutus est, primusque testis, & testis, & præco resurrectionis ejus fuit, & ad extremum usque spiritum per annos fere septuaginta assertor indefessus. Hæc & alia quæ de eo, sive in Evangeliiis, sive in Historia Ecclesiastica leguntur, testem gestorum Christi ipso graviolem, & locupletiolem desiderari non posse ostendunt.

Actuum Apostolorum auctor S. Lucas, plerarumque rerum, quas in hac historia commemorat, spectator fuit.

Quæ autem in Evangelio edisseruntur, Apostoli in suis Epistolis pro certo, & inconcusso habent, & suo testimonio confirmant. *Non doctas fabulas secuti*, inquit S. Petrus Epist. 1. cap. 1. v. 16. *notam fecimus vobis Domini nostri Jesu Christi virtutem, & præsentiam : sed speculatores facti illius magnitudinis.* Et S. Joan. Epist. 1. cap. 1. v. 1. & 2. *Quod audivimus, quod vidimus oculis nostris, quod perspe-*
xi-

ximus, & manus nostræ contrectaverunt de Verbo vitæ, & vita manifestata est, & vidimus, & testamur, & annuntiamus vobis &c.

Nec omittendum est curavisse Apostolos, ut in locum Judæ proditoris seligeretur aliquis factorum Christi oculatus testis, qui Apostolatus officium exerceret, adeo interesse existimabant facta Evangelica idoneis testimoniis muniri. *Oportet*, ait super hac re S. Petrus Act. 1. v. 21. *ex his viris, qui nobiscum sunt congregati in omni tempore quo intravit, & exivit inter nos Dominus Jesus, incipiens a baptismo Joannis, usque in diem qua assumptus est a nobis, testem Resurrectionis ejus nobiscum fieri unum ex istis.*

5. Testes factorum Evangelicorum falli non potuere. Eos enim decipi natura ejusmodi factorum plerumque non sinebat. Facta illa erant visibilia, sensibus objecta, manifesta, publica, circa quæ error in testem oculatum non cadit. Num. v.g. decipi potuerunt Apostoli, & Discipuli circa Christi, & Præcursoris ejus prædicationem, circa miracula multiplicationum panum, circa restitutionem visus cæci nati, circa resurrectionem Lazari, circa resurrectionem ipsius Christi, qui vulnera sua ipsis palpanda præbuit, circa donum linguarum quo in die Pentecostes a Spiritu Sancto donati sunt, circa alia innumera, quæ enarrare longius foret?

Insuper, ne in ejusmodi rebus stolidè alucinari potuisse judicentur vetat etiam sapien-

tia illa plane divina , quæ in Evangelistarum , & Apostolorum scriptis elucet . Expolitum quidem , & elegans dicendi genus non adhibent ; nempe , ut ait Apostolus 1. Cor. 2. v. 4. *non in persuasibilibus humanæ sapientiæ verbis* . At vero quanta in doctrina quam tradunt, deprehenditur ubertas ! Quanta in morum præceptis gravitas , & sanctitas ! Quanta in dogmatibus , & mysteriis divinis altitudo , & majestas ! quanta in factis exponendis ingenuitas , diligentia , & perspicuitas ! Quantam Numinis supremi ac cultus ipsi debiti ideam ingenerant animis , ea ætate qua in densissimis tenebris , in erroribus turpissimis , universum genus humanum circa Religionem versabatur ! Quam sapienter tandem ad rerum quas tractant diversitatem , ad varias circumstantias , ad fines a se intentos sermonem accomodant ! Res gestas accurate , ut congruit , & simpliciter narrant : ratione , exemplis , parabolis regulas morum , ubi opus est , confirmant , explicant , suadent . Quæ miraculis ac Prophetarum oraculis fuerunt stabilienda , ut missionis suæ divinitas , & mysteria fidei , hæc prodigiis Dei virtute patris , & testimoniis Scripturarum , prout expediebat , adductis , adstruere norunt . Ergo seu doctrinæ præcellentia , seu forma dicendi attendatur , fatendum erit Evangelistarum , & Apostolorum libros summa fulgere sapientia , quæ testes factorum Evangelicorum circa ejusmodi facta turpiter allucinari non potuisse demonstrat .

Sed si decipi potuerint Apostoli , & alii Disci-

sci-

scipuli circa miracula, quæ patravit Christus, numquid ipsi sibi videri potuerunt innumera miracula edere? Atqui miraculorum Christi testes, Apostoli scilicet, miracula & ipsi innumera ediderunt, ut ipsi, & alii Scriptores Novi Testamenti auctores sunt. *Per manus Apostolorum*, inquit S. Lucas Act. 5. v. 12., & seqq. *fiabant signa, & prodigia multa in plebe ita ut in plateas ejicerent infirmos, & ponerent in lectulis & grabatis, ut, veniente Petro, saltem umbra illius obumbraret quemquam illorum, & liberarentur ab infirmitatibus suis. Concorrebat autem, & multitudo vicinarum Civitatum Jerusalem, afferentes agrotos, & vexatos a spiritibus immundis; qui curabantur omnes. Et Act. 19. v. 11. & 12. Virtutes non quaslibet faciebat Deus per manum Pauli: ita ut etiam super languidos deferrentur a corpore ejus sudaria, & semicinctia, & recedebant ab eis languores, & Spiritus nequam egrediebantur. Hinc S. Paulus I. Cor. 2. v. 4. Sermo meus, & prædicatio mea non in persuasibilibus humanæ sapientiæ verbis, sed in ostensione spiritus, & virtutis. II. Cor. 12. v. 12. Signa Apostolatus mei facta sunt super vos in omni patientia, in signis, & prodigiis, & virtutibus. Et Hebr. 2. v. 4. Contestante Deo signis, & portentis, & variis virtutibus, & Spiritus Sancti distributionibus secundum suam voluntatem. Vide etiam Luc. 10. v. 17. Joan. 14. v. 12. Act. capp. 2. 3. 5. 6. 8. 9. 10.*

6. Sinceri fuere Testes factorum Evangelii-

corum , nec fraudis , & mendacii insimulari possunt , quod argumento ex eorum fortuna , conditione , moribus , genio , indole , & officiis , & ex horumce factorum promulgatione , modo , circumstantiis , ac fine plane efficitur .

Si enim quo genere nati factorum Evangelicorum testes , qua disciplina innutriti fuerint , inquiras : viri fuere rudes , sine litteris , piscatores , quibus proinde universi orbis deiciendi consilium tribuere insulsum foret .

Si doctrinam inspicias quam tradiderunt : nihil ea sanctius , & illibatius , nihil majori dignum veneratione , & nihil ab omni dolo abhorrens magis .

Si ad eorum mores , & vitæ rationem attendas : terrena contemnebant , fidei propagandæ , muneri suo implendo sese toti dedebant , sanctissimæ Magistri sui , quam prædicabant , doctrinæ vitæ eorum tam pulchre congruebat , ut nullum in iis vel minimum vitium redarguerint Porphyrius , Celsus , alique Religionis Christianæ hostes .

Si modum scribendi consideres : res candide , & ingenue narrant , sine fūco sine ulla exaggeratione , aut dissimulatione , sine animi motu , & ostentatione . Nec Apostolorum cum Christo conversantium inscitiam , asperitatem , & in fide ipsi adhibenda tarditatem , nec eorundem in sese invicem jurgia , & altercationes , nec denique ipsorum , dum Christus passus est , pusillanimitatem , & fugam tacuerunt . Omnia fidei historię commiserunt , unius veritatis ,

tis studiosi . In Christi osiores , in principes Sacerdotum , & alios Judæos ejus necis auctores , in Judam proditorem , in Pilatum , & Milites Romanos , in eos , a quibus ipsi contumelias , carceres , flagra , & alia supplicia passi sunt , non invehuntur , non effervescent , nihil convitii proferunt , nihil querimoniarum sibi permittunt . Iis satis est singula nude exponere . Ipsum Christi supplicium ejusque mortem sedato animo , & simpliciter referunt : *Ibi* , inquit , *crucifixerunt eum* , Luc. 24. v. 33.

Si tandem motivum perpendas quo ducti Evangelistæ , & Apostoli facta evangelica attestati sunt : nulla eos spe depastos , nullo temporali emolumento illectos fuisse deprehendes . Quid enim Apostoli munus crucis Christi prædicandæ parere poterat , nisi labores plurimos , paupertatem , ignominias , supplicia , necesse ? Propter Christum , & salutem æternam sibi a Christo promissam iis ærumnis , & periculis sese libenter obtulere ; atque adeo ipsis persuasa erat factorum Evangelicorum veritas , ut eam sanguinis sui effusione consignaverint .

Denique si modum , tempus , & varia adjuncta promulgationis Evangelicorum factorum ab Apostolis vel eorum jussu editæ observaveris , hæc ea esse facile perspicies , cum quibus voluntas fallendi consistere non possit . Enimvero paucis post Christi ascensionem diebus , ipso scilicet festo Pentecostes , multitudinem Judæorum , quæ , propter factum repente de celo sonum tamquam advenientis spi-

ritus vehementis, convenerat in domum ubi manebant Apostoli, alloquens Jerosolymis Sanctus Petrus Act.2. v.22.23. & seqq. *Viri Israelitæ*, inquit, *audite hæc verba: Jesum Nazarenum*, virum approbatum a Deo in vobis, virtutibus, & prodigiis, & signis, quæ fecit Deus per illum in medio vestri, sicut & vos scitis: hunc definito consilio, & præscientia Dei traditum, per manus iniquorum affligentes interemistis: quem Deus suscitavit, salutis doloribus inferni.... hunc Jesum resuscitavit Deus, cujus omnes nos testes sumus. Audis Apostolorum principem, cæterorum nomine verba facientem, præcipua facta Evangelica ob Judæorum oculos, ut res ipsis compertas, & in medio eorum factas tunc subjicientem, cum vix a morte Christi dies 52. elapsi essent. Se igitur, & alios Discipulos resurrectionis Christi testes esse confidenter eo tempore perhibuit, quo, si res falsa fuisset, facillime potuissent mendacio convinci. Quod ad alia facta, virtutesque, & prodigia Christi attinet, illa commemorat, ut res apud Judæos publicas; & nemini in Judæa non exploratas: *Quæ fecit Deus, per illum in medio vestri, sicut & vos scitis*. Idem Apostolus in alio sermone Act.10. vers.37. & seqq. summario factorum Evangelicorum quod exhibet, hæc præmittit, auditores compellans: *Vos scitis quod factum est verbum per universam Judæam*. Porro ex eodem Actuum libro passim colligere est, alios quoque Apostolos iis in concertationibus quæ cum

cum Judæis seu in Palæstina , seu alibi commorantibus , frequentes ipsis de Christo fuerunt , de factis Evangelicis pari fiducia esse locutos . Ergo testes illorum factorum , ut Judæis suaderent Christum esse Messiam , facta ejusmodi promulgarunt , ac testificati sunt , cum eorum recentissima adhuc esse debuit apud Judæos memoria , diebus videlicet paucis post Christi obitum , & resurrectionem . Numquid hæc cum voluntate fallendi consistunt ?

Ad hæc , quæ facta Apostoli sæpius viva voce in memoriam revocaverant , & oraculis Prophetarum consona ostenderant , unus ex illis S. Matthæus cæterorum jussu anno a morte Christi sexto, æræ vulgaris 39. Jerosolymæ literis consignavit . Anno ab hinc circiter 18. prodiit Evangelium à S. Luca in Achajæ , & Beotiaë partibus conscriptum . Forte priusquam scriberet S. Lucas aut saltem paucis post ipsum annis , S. Marcus Romæ Evangelium Christi concinnavit . Tandem anno æræ nostræ 96. Evangelium a Joanne Ephesi exaratum est . Interea diversis temporibus , & variis in locis conscripti sunt alii Novi Testamenti Libri , quibus facta Evangelica supponuntur , & confirmantur .

Jam vero hæc advertenda sunt . 1. Ab Evangelistis magna diligentia notantur circumstantiæ vel minimæ annorum , dierum , locorum , personarum , principum tunc regnantium , summorum Sacerdotum &c. Id non assolent deceptores , nec sane possent quin statim mendacio evincerentur . 2. S. Matthæus , utpote Je-

rosolymis scribens , sermonem adhibuit Hebraicum , seu potius Syriacum , quo tunc Judæi utebantur ; cæteri vero librorum Novi Testamenti auctores , cum aliis in regionibus scriberent , Græcam linguam usurpavere , quam populis omnibus , atque ipsius Judæis apud Græcos , & Romanos degentibus valde usitatam fuisse constat . Voluere igitur ejusmodi scriptores historiam a se promulgatam posse non difficulter ab unoquoque comprobari . 3. Et si annis a se invicem aliquo intervallo dissitis , & in diversis regionibus scripserint auctores Novi Testamenti , attamen de factis Evangelicis summe consentiunt , quod non leve est veritatis argumentum . Certe si Matthæus falsi convictus fuisset , eadem prorsus ac ille non ausi essent proferre Evangelistæ subsequentes , aut saltem nonnisi rebus quibusdam , & circumstantiis ad earum substantiam pertinentibus immutatis hæc protulissent . Nempe fraus pro varietate circumstantiarum varias induit formas , nec iisdem semper armis pugnat , quorum infirmitatem est experta . 4. Quantumvis inter se similes sint Evangelistæ quatuor , attamen simul a se invicem nimium diversi deprehenduntur , quam ut collusionis possint accusari . Si falsa narraissent , numquam potuissent non communicatis consiliis adeo perfecte concordare . Si communicatis consiliis colludere voluissent , minor in eorum historiis dissimilitudo deprehenderetur . Itaque cæteris , quæ attulimus , Apostolorum sinceritatis evidentibus argumentis ,
istud

istud addendum est non minus manifestum , eo de fine , iis in circumstantiis , quæ cum voluntate fallendi consistere nequeunt , promulgata fuisse facta Evangelica .

7. Unanimiter ab Evangelistis narrantur Facta Evangelica , ut modo dictum est , iisque concinunt alii librorum Novi Testamenti auctores .

8. Factis Evangelicis non contradicunt alii Scriptores , immo vel infestissimi Christianæ Religionis hostes , Judæi , Pagani , Mahumetani , magna e Christo edita fuisse prodigia , & miracula non inficiati sunt .

Et quidem Judæi . De coætaneis testes sunt Evangelistæ , a quibus habemus sæpe Judæos prodigia Christi admiratos esse . Hinc ipsum alii existimabant esse *Eliam* , alii autem *Jeremiam* , aut unum ex Prophetis , alii , ipseque Herodes Antipas , *Joannem Baptistam* a mortuis suscitatum . Vide Matth. 16. vers. 14. Marc. 8. vers. 28. Luc. 9. v. 19. Ne ipsi quidem Pharisei negabant a Christo miracula patrari . Conquesti sunt non semel quod die Sabbati ægros curaret : dixerunt eorum quidam in nomine Beelzebub principis dæmoniorum ejici ab ipso dæmonia . Sed & his querimoniis , & conviciis maxime apparet illum manifestissima prodigia esse operatum . Tandem post resurrectionem Lazari Joan. 11. v. 47. 49. & seqq. *Collegerunt Pontifices , & Pharisei concilium , & dicebant : Quid facimus , quia hic homo multa signa facit ? Si dimittimus eum sic , omnes cre-*

dent in eum Ab illo ergo die cogitaverunt,
ut interficerent eum .

Quantum ad posteriores Judæos, jam diximus in *Thalmude* , & in utroque libro *Toldoth Jesu* , prodigia Christi adscribi virtuti ineffabilis nominis Dei , quod magicis artibus e Sancto Sanctorum ab eo ereptum fuisse comminiscuntur . Fabulam ridiculam , quam ea de re proferunt , ibidem exposuimus , atque ex ea collegimus Christi prodigiis Judaicam gentem olim stupendum in modum fuisse affectam , quippe cum ejusmodi miracula , licet tot fabellis eorum traditiones scateant , nondum penitus apud eos obliterari potuerint .

Pagani etiam fidem miraculorum Christi confirmant . Porphyrius enim , Celsus , Julianus Imperator facta Evangelica non impugnaverunt : aliqua a Christo edita esse miracula non negarunt , immo fassi sunt expresse . Sed quod majoris est ponderis , Christi sapientiam , & opera admirati sunt ipsi Imperatores Pagani . Tiberius , cognitis ex Pilati relatione miraculis , morte , & resurrectione Christi , divinos illi honores decerni , re ad Senatum delata , postulavit . Id affirmat in *Apologetico* capit. 5. Tertullianus , qui profecto , veritus ne causæ noceret suæ , factum ejusmodi , quod ex Archivii Imperii comprobato facillimum erat , numquam tanta confidentia Senatui ipsi objecisset , nisi illud compertum , & exploratum habuisset . Magna veneratione Christum persecutos esse Adrianum , & Alexandrum Severum ,

rum, auctor est Lampridius Scriptor paganus in *Severo*. Loquitur Chalcidius *Commentario in Timæum* de Stella seu phænomeno cælesti, quod Magis apparuit, & Phlegon *Olymp. Chronic.* L. 13. mentionem facit stupendæ illius defectionis Solis, quæ tempore mortis Christi contigit. His addi possunt, quæ in gratiam Christianorum dicta sunt a Plinio lib. 10. Epistol. 102. ad Trajanum, a Severo Gravano Proconsule in Epist. ad Imperatorem Adrianum, ab Adriano Imperatore in Epist. ad Minutium Fundanum, a Tito Antonino Imperatore in Epist. ad Asian. Vide *Euseb.* H. E. l. 4.

Factis Evangelicis Mahumetani quoque suffragantur. Mahumetes in *Alcorano*, & Moslemi Doctores Alcorani interpretes Christum Dominum magnum Prophetam fuisse prædicant, & hominem a Deo missum, atque innumera ab eo patrata fuisse miracula confitentur, inter quæ nonnulla commemorant quæ nos non agnoscimus.

9. Facta Evangelica necessariam connexionem habent cum factis posterioribus extra omnem controversiam positis. Nempe orbem fere integrum densis Paganismi tenebris obsitum ante Christi tempora jacuisse certissimum est. Constat pariter idola fuisse everfa, & cultum Christianum, etsi a nulla errorum nostrorum causa ortum habere potuerit, idolatricorum rituum loco obtinuisse. Hæc porro tanta rerum immutatio nonnisi a factis Evangelicis originem duxit, adeo ut planum sit nullam illius

assignari posse causam , nisi eorum veritas agnoscat . Accedet huic argumento robur maximum ex infra dicendis de propagatione Religionis Christianæ .

10. Facta Evangelica ad nos usque transmissa sunt sine ulla corruptione , & depravatione . Ad hoc enim satis est, libros Novi Testamenti , & præsertim Evangeliorum , integros , & incorruptos usque ad nostram ætatem pervenisse . Arqui argumento triplici id facile adstruitur . Primum est , librorum hujusmodi , & rei Christianæ statum ab initio eum semper fuisse , ut illi libri a nemine corrumpi , & adulterari potuerint . Nam si adulterati , & depravati fuissent , vel a Judæis , vel a Paganis , vel a Christianis : Sed nullum horum dici potest . Non a Judæis , quippe cum tot ipsis adversantia in hisce libris etiamnum contineantur . Deinde passi-ne essent Christiani libros , quos manibus quotidie terebant , quos tamquam fidei suæ regulam summe venerabantur , ab extraneis corrumpi ? Istud postremum evincit pariter neque a Paganis ejusmodi depravationem inductam ; qui præterea nullo motivo ad contemendam impelli potuerunt . Jam vero neque a Christianis . Namque an ab omnibus uno consensu Christianis id tentatum , an ab aliquibus tantum ? Non ab omnibus communi consilio . Quomodo enim omnes Christiani consentire inter se potuissent de sacro librorum suorum textu corrumpeudo ? quomodo sperassent non divulgandam ejusmodi librorum toto orbe disse-

mi-

minatorum corruptionem communi tot hominum consilio peractam ? quomodo ejusmodi fraude & se , & Religionem suam ludibrio & irrisioni Paganorum & Judæorum certo exponere non dubitassent ? quomodo , detecta illa fraude, potuisset Christiana Religio , quæ factis Evangelicis tota innititur , propagari ? quomodo Christianis turpem hanc librorum suorum depravationem Celsus , Porphyrius , Julianus &c. non objecissent ? Ergo evidentissimum est ab omnibus simul Christianis corrumpi non potuisse Novi Testamenti libros . Planum est pariter ab uno aut paucis aliquibus Christianis id fieri nequivisse . Etenim Novi Testamenti , ac præsertim Evangeliorum libri statim atque exarati sunt , in varias Orbis partes fuere deportati , & disseminati ; innumera eorum exemplaria transcripta sunt ; plures subinde in varias linguas editæ versiones ; illorum intelligentiæ , & meditationi præcipue incumbabant Pastores ; terebantur assidue a cæteris Christianis , & ab iis memoriter disci solebant ; legebantur quotidie , & explicabantur in cœtibus fidelium ; maxima asservabantur cura præsertim in Ecclesiarum matricum archivis ; atque ex historia Ecclesiastica compertum est , quod & res ipsa loquitur , Christianos tanta erga illos veneratione semper affectos fuisse , ut in iis quidquam immutari tulissent nunquam , ac vel unius litteræ inter pronuntiandum mutatio de se indifferens magno crimini versa aliquando sit ; ergo &c.

Ne

Ne adulterari potuerint Novi Testamenti libri, illud etiam maxime obstitit quod ab Ecclesiæ incunabilis extiterint hæretici, Ebionitæ scilicet, Valentiniani, Carpocratiani, Gnostici &c. li adversus Ecclesiam pugnantes, perversa sua dogmata male intellectis scripturæ locis adtruere conabantur, & ex scripturarum auctoritate etiam revincebantur. An ergo Catholici libros sacros corrumpere ausi fuissent? Sed ab illis hæreticis cum ignominia, & dedecore illico fracti fuissent. An illud moliti fuissent hæretici? Verum a Pastoribus Catholicis contra fraudem aperte reclamatum fuisset, sacrilegumque erroris ausum, & temeritas repressa, quod & adversus Valentinum, & Marcionem id facinoris attentantes factum legimus. Novi igitur Testamenti, & præsertim Evangeliorum libros corrumpi potuisse nunquam permisit eorum librorum, & rei Christianæ status.

Alterum incorruptæ ejusmodi librorum integritatis argumentum est, citationes locorum Novi Testamenti in SS. Patrum operibus, & in variis traditionis monumentis frequentissime occurrentes, exemplaribus textus sacri, quibus hodie utimur, plane concinere; quod argumentum sic proponi potest: Si libri Novi Testamenti corrumpi potuerint, vel antequam fidei illustrandæ ac defendendæ causa Scriptores Ecclesiastici opera edere cœperint, vel nonnisi postea: neutrum dici potest. Non prius; siquidem Evangelistarum, & Apostolorum libros,
& Epi-

& Epistolas excepere scripta ab eorum discipulis exarata. Nec etiam posterius; cum enim loca quæ in ejusmodi auctorum Ecclesiasticorum operibus leguntur, eadem in nostris librorum sacrorum exemplaribus extent, corruptionis argui non possunt exemplaria nostra, quin Scripta auctorum Ecclesiasticorum, aut supposita, aut saltem quantum ad Textus Scripturæ in iis citatos corrupta statuatur. Atqui non supposita: quid enim repugnat magis quam tot ejusmodi scripta, & monumenta suppositionis insimulare, quorum propria ab immediate sequentibus, & ista rursus ab aliis nostro ævo vicinioribus laudantur, & fidem certam obtinent? Eadem scripta, & instrumenta adhuc absurdus dicerentur solum corrupta quantum ad loca Textus sacri in iis allata: enim vero Scriptores Ecclesiastici loca illa explicant, ex iis argumenta eruunt; atque eorum interpretationes, & ratiocinationes testimoniis ejusmodi, prout in illorum scriptis nunc leguntur, consentaneæ sunt, & accomodatæ: sed si testimonia illa in eorum operibus immutata fuissent, & corrupta, quomodo staret hæc cohærentia, & consensus? Ergo Scriptores Ecclesiastici qui variis Ecclesiæ sæculis floruerunt, eosdem revera adhibuerunt sacrarum Scripturarum textus quos in eorum operibus legimus; cumque ejusmodi textus frequentissime ab iis laudentur, & nostris librorum sacrorum exemplaribus consonent, consequens est libros nostros non fuisse adulteratos.

Tertium argumentum ex consensione omnium exemplarium, & versionum eruitur. Etenim si textus librorum novi testamenti corruptus, & vitiatum fuisset; variarent eorum exemplaria, & versiones, atque in rebus maximis secum invicem non constarent. Atqui quantum ad mores, ad fidem, & ad substantiam factorum attinet, inter tot varia exemplaria seu manuscripta, seu edita textus primigenii librorum novi Testamenti, inter tot versiones diversas & ejusmodi textum, inter varia illarum versionum exemplaria summam esse consensionem affirmant unanimiter eruditi, qui rem ejusmodi accuratissime expenderunt. Ita testatur Ricchardus Simon in *Hist. critica textus novi Testam.* cap. 30. Ita Ludovicus Capellus *Criticæ sacræ* lib. 1. cap. 2. n. 13. Ita etiam liquet ex immensa illa variantium lectionum sylva, quas ex innumeris propemodum Novi Testamenti codicibus manuscriptis, versionibus, & editionibus, continuo 30. fere annorum labore collegit Jo: Millius in suo *Novo Testamento Græco*: de quibus merito Kusterus in præfatione ad secundam hujusce operis editionem observat; *plerasque Codicum MSS. lectiones variantes ita comparatas esse, ut parum, aut nihil inter eas intersit. Quid enim, quæso, inquit, interest utrum exempli gratia scribatur $\alpha\chi\gamma\omega$, an $\alpha\chi\iota\gamma\omega$ &c. & innumera alia hujus generis, quæ longe maximum variantium lectionum numerum in hac editione implent?* Sane, pergit ille, si leviora illa a reliquis separaveris, mirum quam exiguus eo-

rum reliquatur numerus, quæ videantur alicujus esse momenti, & erudito pioque lectori dubitandi materiam præbere possint utra lectio alteri præstet. Idem advertit Daniel Whitby in suo *Examine variantium lectionum Joannis Millii in novum Testamentum*, ubi ideo operam Millii tamquam inutilem, & nocivam reprehendit.

Objiciuntur aliqua, sed levioris momenti;

1. Decipi potuisse Apostolos, quippe qui rudes erant, & sine litteris; 2. Non repugnare eos nobis voluisse illudere, ac forte ex collusione natam esse consensionem illam summam quæ inter eos deprehenditur; 3. Periisse autographum Historiæ Evangelicæ, superesse tantum exemplaria ab Amanuensibus, & librariis transcripta aut impressa, proindeque innumeros potuisse irrepere errores; 4. Celsum olim Origeni objecisse a Christianis quibusdam textum Evangelii primigenium variis modis mutari; 5. referri a Victore Tunuensi in *Chronico: Messala Consule, jubente Anastasio Imperatore, Sancta Evangelia tamquam ab idiotis Evangelistis composita, reprehensa fuisse, & emendata*: quod etiam narrat Isidorus Hispal. in *Chronol.* 6. Duodecim postremos versus S. Marci olim in melioribus manuscriptis desideratos fuisse, testibus S. Greg. Nysseno, S. Hieron. & Euthymio: pariter in pluribus Græcis Exemplaribus Evangelicis S. Joannis desiderare vel obelo confodi historiam mulieris adulteræ: ac tandem deesse in plerisque codicibus Græcis, latinisque nonnullis versiculum 6. cap. 5. Ep. 1.

S. Joan.

S. Joannis , *Tres sunt qui testimonium dant in celo , Pater , Verbum , & Spiritus Sanctus , & hi tres unum sunt .*

Resp. ad singula breviter .

Ad primum , & secundum , jam demonstratum est, Apostolos nec falli , nec fallere potuisse . Illud dumtaxat hic observandum superest , nempe incredulos in manifestam labi contradictionem , dum ex una parte volunt adeo rudes fuisse Apostolos , ut circa facta visibilia , & manifestissima , eorum oculis subjecta , decipi potuerint , & ex altera ponunt eos potuisse decipiendi universi Orbis consilium suscipere , & exequi .

Ad tertium , 1. Nullius historiæ veteris autographum habemus : ergone ideo de omnibus historiis dubitandum est ? 2. Agitur hic de libro ubi primum prodiit per totum orbem diffeminato , de libro cui omni ævo addictissimi fuerunt Christiani , quem illi summe venerabantur , quem quotidie legebant , atque meditabantur , quem in suis sermonibus , & scriptis perpetuo Pastores adducebant , & explicabant , cujus omnes versiones , omnia exemplaria inter se quantum ad substantiam maxime conveniunt . Ergo si multi extent veterum Libri , de quorum authenticitate , etsi perierit autographum , nemo sapiens dubitaverit ; summæ profecto foret insanix de integritate libri Evangeliorum dubitare , quamvis autographum ejus ex hiberi non possit . Sed

Sed ut quid autographum Evangelii sibi exhiberi increduli postulant? Num si exhiberetur, ideo tricas movere, & cavillare desinerent? Si sincere veritatem quærant, nonne ipsis satis esse debet, certo, ostendi authentica esse quæ adhibemus exemplaria? Certe si ipsum exemplar autographum superesset, quibuscumque momentis probaretur, illud esse autographum (non temere conjicimus), de ejusmodi probationibus eadem calliditate altercarentur, qua de evidenti nostrorum exemplarium authenticitate vitilitigant.

Ad quartum, ipse reposuit Origenes, fideles illos quos vocabat Celsus, haud alios fuisse revera quam Hæreticos, qui Christianorum titulum sibi impudenter arrogavere, neque a se quosquam cognosci evangelia corrumpere ausos, præter Marcionitas, & Valentinianos, quorum corruptiones jam diximus a SS. Patribus fuisse graviter notatas, & confutatas.

Ad quintum, Victor Tununensis refert unam voculam textus sacri jussu Anastasii Imperatoris in Nestorianismi gratiam a quodam Episcopo mutatam fuisse, reclamantibus Catholicis. Nonne hæc potius argumento sunt integritatis librorum sacrorum maxima cura servatæ?

Ad ultimum, 1. Nullum factum in duodecim postremis S. Marci versiculis exprimitur, quod ab aliis Evangelistis non fuerit relaturn. Ex historia Mulieris Adulteræ nihil prorsus in gratiam Religionis a nobis deducitur. Dogma Sanctissimæ Trinitatis aliis in locis expri-

primitur , quæ præcludendis Arianorum effugiis magis idonea sunt quam versiculus 7. cap. 5. Epist. 1. S. Joannis ; ergo causæ Christianæ parum interest ejusmodi locorum authenticitas .

2. Seu amanuensium incuria , seu quocumque casu factum sit ut circa tria illa loca codices varient , ea tamen esse authentica merito , & facile defendi potest .

Nam quantum ad duodecim ultimos sancti Marci versiculos , ii in omnibus exemplaribus , seu manuscriptis, seu editis , & in omnibus versionibus leguntur . Præterea laudati sunt a S. Iræneo , ab Ammonio , Eusebio , a Sancto Athanasio , & Augustino , a Theophylacto &c. proindeque de eorum versuum authenticitate non est quod dubitemus . Cur autem in pluribus manuscriptis codicibus olim omisi fuerint , rationem reddit S. Hier. *quod diversa atque contraria* cæteris Evangelistis continere videantur : quæ ratio nulla omnino est , ut ex commentariis interpretum ad hunc locum videre est ; ergo &c.

Porro historiam mulieris Adulteræ , licet in pluribus Græcis exemplaribus desit , & a quibusdam Patribus omittatur , omnes tamen Stephanici codices retinent , & plerique alii optimæ notæ , quos Millius viderat . Eandem laudant Ammonius Alexandrinus Origenis Magister , Tatianus , Eusebius , SS. Athanasius , Hieronymus , Ambros. , August. Hanc habent versiones Persica , Arabica , Æthiopica , Coptica , & Vulgata Latina . Ergo tamquam au-

then-

thentica omnino habenda est. Cæterum ex Sanctorum Ambr. in *Apolog.* 2. pro Davide cap. 1. & August. lib. *De Adulterinis Conjugiis* cap. 7. colligere est, unde factum sit, ut in aliquibus codicibus hæc historia non habeatur; nempe in iis omiſſa est, ne, ait S. Ambr. *ſi quis eam auribus accipiat otioſis, incentivum erroris occurrat*: vel, ut ait S. Augustinus, ne quis putaret *peccandi impunitatem dari mulieribus*.

De verſiculo 7. cap. 5. Epist. 1. S. Joann. major est difficultas, de qua conſule jam laudatum Millium in hunc locum, & Rogerium Eccleſiæ Bituricenſis Decanum in *Differt.* quam ſuper hac re edidit ann. 1713. Interim cum teſtimonium illud reperiatur in antiquiſſimo codice Græco Britannico quem viderat Eraſmus, in alio codice Græco Montfortiano, licet recentiſſiori manu deſcripto, de quo P. Le Long *Biblioth. ſacr.* Tom. 1. pag. 172. col. 2. & in uno aliquo antiquiſſimo Vaticanæ Bibliothecæ codice, in quo ſe illud reperiſſe aſſerit P. Amelotte; cum idem exhibeant quamplurimi manuſcripti codices latini antiquiſſimi, & vetus Correctorium Sorbonicum, cujus auctor circa decimum ſæculum ſcripſit; cum in multis antiquis codicibus Græcis ad marginem ſuppleatur ille verſiculus, & ſæpe eadem manu; cum fere omnes manuſcripti codices Græci, a quibus ille abeſt, ſexcentis annis minores ſint, ipſo fatente Simonio in *Differt. circa de mſs. Novi Teſtamenti*; cum Eccleſia Græca verſum hunc legat in ſuo Lectionario cui titulus *ἀποστολὴ*,
te

feria 5. Hebdomadis 35. post Pascha, & in omnibus suis Bibliis, similiterque Ecclesia Moscovitica, quantumvis Latinis inimicæ; cumque præsertim adductus ille fuerit a Tertull. auctore Apostolicis temporibus vicino lib. *contra Praxeam* cap. 25. a S. Cypr. Epist. ad Iubajanum, & lib. *De unit. Eccl.* ab Auctore disputationis in Concil. Nicæno habitæ, inter opera S. Athanasii a Pseudo-Athanasio lib. 11. de *Trinit.* qui in editione Paris. anni 1627. nonus est, a S. Fulgent. lib. *De Trinit.* cap. 4. & in Lib. *Respons. contra Arianos* ad object. 10. ab Auctore Prologi in Epistolas Catholicas S. Hieronimo adscripti, ab Idatio lib. 1. *contra Varimadum* cap. 5. a quadringentis Episcopis Africanis in Sardinia exulibus in confessione Fidei oblata Hunnerico Vandalorum Regi ann. 484. apud Victorem Vitensem lib. 3. *de Persecut. Vandal.* a Vigilio Tapsensi, aliisque sexti sæculi scriptoribus, ac tandem a Cassiodoro, cujus ea de re summa est auctoritas, in Summario hujus loci; versiculum hunc juxta prudentis critices regulas rejici non posse judicamus. Omnes vero corruent difficultates, si attendamus versum octavum ejusdem capituli iisdem ac 7. vocibus incipere, *Tres sunt qui testimonium dant*, adeoque versiculi septimi, de quo agimus, sine dolo prætermittendo facile ansam amanuensis præbuisse. Certe in Hebraicis Græcisque codicibus alia reperiuntur loca simili lapsu omissa, ut vers. 36. capituli 21. libri Josue, qui *versus* in longe pluribus exemplaribus Hebraicis

cis deest ; quem tamen restituendum evidenti-
bus argumentis demonstrant eruditi .

ARTICULUS II.

*Ex Resurrectione Christi speciale
argumentum eruitur .*

Resurrectio Christi , si vere contigerit ,
evidentissimum est veritatis ejus doctri-
næ , ac proinde Mysterii Incarnationis argu-
mentum . Etenim tria in ea includuntur maxi-
ma miracula : nempe 1. Est resurrectio, quod
ostentum cætera quævis prodigia , omnibus fa-
tentibus , superat : 2. Est resurrectio ipsius Pro-
phetæ cujus missio probanda erat , & quidem
resurrectio effecta sine ullius alterius hominis
sancti interventu : 3. Hanc sui resurrectionem
ejusque diem Christus pluries conceptis verbis
prædixerat . *Dixit illis (Discipulis) Jhesus ,*
inquit Sanctus Matthæus cap.17. v.21. & 22.
Filius hominis tradendus est in manus hominum ,
& occident eum , & tertia die resurget . Vide
etiam Matth.16. v.21. & cap.20. v.19. Mar.8.
ver.31. cap.9. v.30. & cap.10. ver.34. Luc.9.
v.22. & cap.18. v.33. Joann.2. v.19. &c.

Atqui Christum resurrexisse indubitatum
est : quod duplici conficio argumento .

Primum sic se habet : Illud factum indu-
bitatum est , quod plurimorum testium oculato-
rum , qui nec decepti , nec deceptores fue-
runt ,

runt , auctoritate comprobatur : atqui Resurrectio Christi &c.

1. Resurrectio Christi plurimorum Testium auctoritate comprobatur . Christus enim post Crucem , & mortem sibi irrogatam multis se vivum compluries exhibuit. Matth. 28. Marc. 16. & Luc. 24. narratur quomodo Christus apparuerit tum mulieribus sanctis , quæ cum aromatibus ad ejus sepulchrum venerant , ut ejus corpus ungerent , tum Discipulis duobus in Castellum Emmaus euntibus , tum undecim Apostolis , aliisque Discipulis qui cum illis erant congregati . S. Joannes Evangelii sui cap. 20. & 21. Christum Apostolis ter apparuisse commemorat. Ex Actib. 1. v. 3. Apostolis Christus *præbuit se ipsum vivum post passionem suam in multis argumentis , per dies quadraginta apparens eis , & loquens de Regno Dei* . Testatur S. Paulus 1. Cor. 15. v. 3. & seqq. *quoniam Christus mortuus est & quia resurrexit tertia die secundum Scripturas : & quia visus plusquam quingentis fratribus simul : ex quibus , inquit , multi manent usque adhuc , quidam autem dormierunt . Deinde visus est Jacobo , deinde Apostolis omnibus . Novissime autem omnium , subdit ille , tamquam abortivo visus est mihi* . Plurimorum igitur oculatorum testium auctoritate resurrectio Christi confirmatur .

2. Illi testes non fuerunt decepti . Ii namque in ejusmodi negotio falli non potuerunt , qui ad credulitatem minime proni , non facile ,
nec

nec nisi cunctis caute perpensis rem esse sibi persuaserunt . Atqui Apostoli , & Discipuli , scripturarum juxta quas Christus a mortuis suscitandus erat adhuc nescii (Joan.20. v.9.) non facile , nec nisi cunctis caute perpensis Christum resurrexisse sibi persuaserunt . Ne ipsæ quidem Mulieres Sanctæ ad fidem resurrectionis suscipiendam plus æquo sese ostenderunt proclives ; & ex Evangelio (Joan.20. v.11.) apparet præter earum expectationem id prodigii evenisse . Quoad Apostolos autem , dum regressæ a monumento mulieres nuntiaverunt hæc omnia , quæ ipsæ viderant , illis undecim , & cæteris omnibus , S. Luca teste cap.24. v.9. & 11. *visa sunt ante illos sicut deliramentum verba ista , & non crediderunt illis* Apostoli . Neque etiam ut Apostoli hoc sibi miraculum persuaderent , satis iis fuit (Marc.16. v.12. & 13.) testimonium Discipulorum , quibus in Castellum Emmaus euntibus Christus sese manifestaverat . Ad eorum frangendam incredulitatem necesse fuit , ut Christus ipse ante eorum oculos se sisteret , ut eis , Luc.24. v.39. manus suas , & pedes confixos ostenderet , ut sese iisdem palpandum exhiberet , ut postremo cum illis manducaret , & biberet , v.41. & 43. Atque adeo oppositum credulæ temeritati affectum , & animum gerebant , ut Thomas , qui tunc aberat , cum Christus cæteris sese ostenderat , redux deinde noluerit uniformi Apostolorum testificationi credere . *Nisi videro , inquit ille Joan.20. v.25. in manibus ejus fixu-*

ram clavorum , & mittam manum meam in latus ejus , non credam ; Et revera ab ejusmodi obstinatione sua non recessit Thomas , donec die ab hinc octavo Christus iterum Discipulis apparens , illum in manus suas , & in latus suum digitos inferre jussit , ut ejus incredulitatem sanaret , Joan. 20. v. 26. & 27. Decepti ergo non fuerunt resurrectionis Christi testes .

3. Noluerunt decipere . Huc ea recurrunt invicta momenta ex conditione , moribus , & n. dole Apostolorum , & ex eorum prædicationis sine ac adjunctis deprompta , quibus supra pag. 172. demonstravimus Apostolos non fuisse deceptores . Quæ quidem eo aptius huic loco accomodata sunt , quod , ad persuadendam Christi fidem Apostoli ab initio prædicationis suæ resurrectionem ejus maxime , & perpetuo attulerint . Nempe resurrectio Christi ipsis fuit fundamentum prædicationis suæ ac totius fidei & spei christianæ . *Si autem Christus non resurrexit* , inquit S. Paulus 1. Cor. 15. v. 14. 17. & seqq. *inanis est ergo prædicationis nostra , inanis est fides vestra adhuc enim estis in peccatis vestris . Ergo & qui dormierunt in Christo , perierunt , Si in hac vita tantum in Christo sperantes sumus , miserabiliores sumus omnibus hominibus .* Ergo Apostoli idcirco tot laboribus se dediderunt , tot periculis caput obsecarunt , quia ipsis persuasissima erat Christi resurrectio , atque in ejusmodi facti , quo tota eorum spes innitebatur , confirmationem , sanguinem suum fuderunt .

Alterum argumentum ejusmodi est: vel Christus vere surrexit a mortuis, vel ejus Discipuli, corpore ejus sublato, hunc a mortuis resurrexisse divulgant. Enimvero si Christus non resurrexisset, & Apostoli, corpore ejus non subrepto, hunc tamen resurrexisse statim, & tanto apparatu prædicassent, id facinoris viri illi religiosi & sapientes ausi essent, quod ne quidem ab hominum impudentissimis attentaretur; atque ipsum sepulchrum Domini, & corpus ejus penes Principes Sacerdotum, & Phariseos existens illos adeo turpis mendacii manifestos fecisset, ut nemo eos audire vultuisset. Atqui Apostoli corpus Christi non sustulerunt, ut ipsum a mortuis resurrexisse persuaderent. Nam 1. cautiones, ne id eveniret, a Principibus Sacerdotum, & Phariseis adhibitæ furtum illud impossibile effecerant. Nempe ii obsignandum curaverant magnum illud saxum advolutum ad ostium monumenti novi, & in petra excisi, quo Christi corpus reconditum erat, ac sepulchrum illud militibus usque in diem tertiam, qua sese resurrecturum Christus asseruerat, cura maxima custodiendum commiserant. Vide Matth. 27. v. 63. & seqq. & cap. 28. v. 4. 11. & seqq. Ad suffurandum itaque Christi corpus, vel adversus milites armis dimicandum, & prævalendum fuisset; vel custodum hujusmodi, quos Pharisei, & Sacerdotum Principes e sinu suo (Matth. 27. v. 63. & 66.) apposuerant, vigilantia fallenda, aut corrumpeunda fides; vel ad monumentum in

pe tra excisum via sibi aliqua subterranea aperienda , cujus nulla vestigia remansissent . Atqui tria hæc , ut patet , perinde impossibilia erant . Cautionibus igitur quas Pharisei , & Principes Sacerdotum adhibuerant id effectum , ut Christi corpus a nemine potuerit e sepulchro subripi .

2. Si ejusmodi furtum aliquo modo fieri potuisset , certe non ab hominibus exterritis , periculi metuentibus , pavidis , & consternatis : atqui passione Christi ita exterriti , & consternati fuerant ejus Discipuli , ut *omnes relicto eo , fugerint* , Matth. 26. v. 56. ut ipse Petrus , qui omnium fortissimus videbatur , ter eum negaverit , ibid. v. 33. 35. 51. 70. & seqq. ut denique mortuo Christo omnes in cœnaculum se receperint , ibique manserint *foribus clausis , propter metum judæorum* , Joann. 20. vers. 19. ergo &c.

3. Denique si hoc furto sese obstrinxissent Christi Discipuli , nonne facillime illo crimine convicti fuissent ? Certe illi nec fuga , nec latetris , inquisitiones , judicium , aut pœnam subterfugerunt . Vel initio prædicationis suæ , id est ipso quinquagesimo-tertio die a morte Christi sese aperte coram Judæis promulgaverunt resurrectionis ejus testes , atque ex hoc præsertim prodigio ipsum a Deo constitutum Dominum , & Christum Judæis demonstrare aggressi sunt . Exinde perpetuo , constanter , confidenter idem testati sunt , & ut invictum fidei Christianæ argumentum auditoribus subje-

cerunt . Judæorum igitur Christo adversantium referebat maxime , ut Discipuli circa resurrectionem Christi , quam prædicabant , doli mali convincerentur . Quare igitur id a principibus Sacerdotum , & a Pharisæis non tentatum ? Numquid timendum fuit ne ejusmodi facinus Discipulorum ita occulte , & secreto patratum esset , ut nullo pacto posset detegi ? Nonne potius tum ipsum rei genus , tum cautiones quas jam diximus a Judæorum principibus adhibitas fuisse , fraudis , si qua fuisset , certo certius detegendæ indubitatum erat indicium ? Quare ergo nullam de ejusmodi negotio inquisitionem principes Sacerdotum , & Pharisæi præscribere ? Nodum solvit S. Matth. cap. 28. v. 11. & seqq. hæc scribens : *Quidam de custodibus venerunt in civitatem , & nuntiaverunt principibus Sacerdotum omnia quæ (resurgente Domino) facta fuerant . Et congregati cum senioribus , consilio accepto , pecuniam copiosam dederunt militibus , dicentes : Dicite quia Discipuli ejus nocte venerunt , & furati sunt eum , nobis dormientibus : & si hoc auditum fuerit a Præside , nos suadebimus ei , & securos vos faciemus .* Ubi contradictio manifesta cum S. Augustino advertenda est . Nam , *si dormiebant ,* inquit S. Doctor , *quid videre potuerunt ? Si nihil viderunt , quomodo testes sunt ?* Verum principes Sacerdotum , Pharisæi , & Seniores , veriti ne quo major inquisitio circa Christi resurrectionem ageretur , eo amplius illud confir-

firmaretur prodigium , quidquid sibi mente oblatum est avide arripuerunt , obstinati non discernere , ut ea de re legibus quæreretur .

Dices 1. Si Christus resurrexisset a mortuis , resurrectio ejus fuisset publica sicut & ejus mors fuerat , nec solum Discipulis post resurrectionem suam apparuisset , sed omni Israeli ; ergo &c. 2. Auctores profani nullam Christi resurrectionis mentionem faciunt ; ergo &c. 3. Repugnat Christum semetipsum resuscitasse ; ergo . 4. Apostoli apud Luc. cap. 24. & Joann. cap. 20. referuntur vulnera Christi a mortuis suscitati inspexisse , & tetigisse : at quomodo vulnera , quæ Christo mortem intulerant , potuerunt post ejus resurrectionem , in ipsius corpore remanere , conspici , & tangi ? ergo &c.

Resp. ad primum : Nego anteced. Ut factum aliquod certissimum sit , necesse non est illud perinde esse publicum ac mors Christi fuerat : sufficit plane auctoritas plurimorum testium oculatorum , qui nec falli , nec fallere potuerunt . Et certe nonne satis publica facta est resurrectio Domini vel ex solis cautionibus , quas Judæi adhibuerunt , ne quid fraudis ea in re posset obrepere ? Quo autem fine Deus Christum quem suscitavit *tertia die* , dederit manifestum fieri non *omni Populo* , ut ait S. Petrus Act. 10. v. 40. & 41. sed tantum *testibus præordinatis a Deo* , Apostolis scilicet & Discipulis , qui *manducaverunt & biberunt cum illo postquam resurrexit a mortuis* ; quo , inquam , fine

ne Deus ita disposuerit , certo assignare non possumus , quia sapientissimas , & altissimas consiliorum suorum vias hlc , ut & in aliis multis , non dignatus est hominibus revelare . Id tantum novimus populum Judaicum malitia , incredulitate , & pervicacia sua sese illa gratia indignum præbuisse , ac tum ipsi tum nobis satis esse testes resurrectionis Christi præordinatos a Deo fuisse ejusmodi , ut fides indubitata , & inconcussa ipsis debeatur .

Ad secundum resp. auctores profanos , dum Christi , & prodigiorum ejus generatim mentionem faciunt , omnia facta Evangelica , ac ipsam proinde resurrectionem Domini confirmasse . Eorum porro de Christi speciatim resurrectione silentium abunde suppletur , & compensatur tot Gentilium ad fidem Christi conversione , qui accuratius , & proprius rem inspexerant quam profani Historici .

Ad tertium nego anteced. Posito Incarnationis Mystério , non magis repugnat Christum semetipsum resuscitasse , id est Divinitatis Christi virtute corpus ejus , & animam in pristinum statum reddita , & sibi invicem denuo inita fuisse , quam impossibile est alium hominem a Deo resuscitari . Verum hoc unum impræsentiarum volumus Gentilibus , & incredulis tuadere , Christum a Deo fuisse suscitatum , ac proinde doctrinam ejus esse veram : quod si semel illi faterentur , cito convinci possent Dominum Jesum , in una Verbi persona , naturæ divi-

næ, & naturæ humanæ esse consortem, ac proinde semetipsum resuscitare potuisse.

Ad quartum, falso ponitur Evangelistas loqui de vulneribus, quæ post resurrectionem Christi eodem in statu fuerint ac quando ille in cruce pendebat. Sermonem faciunt tantum de ostensis a Christo manibus, pedibus, & latere, de *fixura*, & *loco clavorum*; quibus nemo non videt significari solum ejusmodi vulnorum notas, & cicatrices; ergo &c.

ARTICULUS III.

De Miraculis, quæ ab Apostolis, & eorumque Discipulis, ac primis Fidelibus edita sunt.

Maxima, & splendidissima ab Apostolis, & eorum Discipulis aliisque piis Religionis Christianæ cultoribus patranda esse miracula, prænuntiaverat, & præmiserat ipse Christus Dominus Marc. 16. v. 17. & 18. *Signa autem eos, qui crediderint, hæc sequentur: In nomine meo dæmonia ejicient: linguis loquentur novis: serpentes tollent: & si mortiferum quid biberint, non eis nocebit: super agros manus imponent, & bene habebunt*, & Joann. 14. v. 12. *Amen, amen dico vobis, qui credit in me, opera quæ ego facio, & ipse faciet, & majora horum faciet.* Quod oraculum in Apostolis completum fuisse, ex supra dictis art. 1. p. 171. indubitatum est. Similiter autem innumera

mera ab Apostolorum Discipulis , a Martyribus & aliis fidelibus esse primis Ecclesiæ sæculis patrata miracula , testes sunt S. Justinus *Apol.* 2. num. 6. , & *Dialog. cum Tryphone* num. 88. S. Iren. lib. 2. *contra hæreses* cap. 32. (olim 57.) num. 4. Orig. *contra Celsum* passim , præcipue vero lib. 1. num. 2. & 46. , & lib. 2. num. 8. &c. Tertull. *ad Scapulam* cap. 2. & 4. , & *Apologet.* cap. 23. S. Cypr. *ad Demetrian.* & *Epist.* 2. *ad Donatum* &c. aliique illorum temporum Scriptores Ecclesiastici . Unius S. Irenæi textum exhibere liceat . In illius (Jesu Christi) nomine , inquit loco citato , qui vere illius sunt Discipuli , ab ipso accipientes gratiam , perficiunt beneficia reliquorum hominum , quemadmodum unusquisque accepit donum ab eo . Alii enim demones excludunt firmissime , & vere , ut etiam sæpissime credant ipsi , qui emundati sunt a nequissimis spiritibus , & sint in Ecclesia . Alii autem , & præscientiam habent futurorum , & visiones , & dictiones propheticas . Alii autem laborantes aliqua infirmitate per manus impositionem curant , & sanos restitunt . Jam etiam quemadmodum diximus , & mortui resurrexerunt , & perseveraverunt nobiscum annis multis . Et quid autem ? Non est numerum dicere gratiarum , quas per universum Mundum Ecclesia a Deo accipiens , in nomine Christi Jesu crucifixi sub Pontio Pilato per singulos dies in opitulationem Gentium perficit . . . Nec invocationibus Angelicis facit aliquid , nec incantationibus , nec reliqua prava curiositate : sed munde

de & purè , & manifeste orationes dirigens ad Dominum qui omnia fecit , & nomen Domini nostri Jesu Christi invocans , virtutes ad utilitatem hominum , sed non ad seductionem , perficit .

Ipsis Paganorum adversus Christianos calumniis confirmantur hæc Scriptorum Ecclesiasticorum testimonia . Quare enim Christiani a Gentilibus veritati repugnantibus sæpe appellati sunt incantatores , & incantatorum Secta ? Non aliam sane ob causam , quam propter frequentia illa , quæ edebant signa , & prodigia . Videatur Celsus apud Orig. Lib. I. n. 16. &c. Svetonius in Nerone , Lucianus *De morte Peregrini &c.*

Jam vero hæc miracula non leve esse veritatis Christianæ , ac proinde Incarnationis argumentum , nemo non videt , atque illorum pondus ex eo etiam maxime augetur , quod ea , ut vidimus , prædixerit Christus Dominus : unde nihil mirum , si Religionis propagationem adeo juverint , & promoverint .

ARTICULUS IV.

Christum esse a Deo missum ejus Religionis propagatione ostenditur .

Religionis Christianæ propagatio Christi missionem esse divinam adeo manifeste evincit , ut mirum videatur vi hujus argumenti incredulorum pervicaciam non frangi ; ea
quip-

quippe omnium miraculorum maximum est, præsertim si virtute miraculorum Christi, & Apostolorum non fuerit peracta ut increduli statuunt. Sic enim argumentari licet: Maximum sane est prodigium ope paucorum hominum simplicium, omni humano auxilio destitutorum, late per orbem, & velocissime propagatam fuisse Religionem sanctam, eorum quibus annuntiabatur affectibus plane contrariam, & omni genere potentissimorum hostium impugnatam; solus enim Deus qui voluntatum humanarum quo voluerit inclinandarum habet omnipotentissimam voluntatem, tanti prodigii auctor esse potest.

Atqui 1. Religio Christi late per Orbem, & velocissime propagata est. Testis est S. Paulus qui in Epistola ad Romanos agebat cap. 1. v. 8. *fidem eorum annuntiari in universo Mundo*: & cap. 10. v. 18. *in omnem terram exivisse sonum vocis Discipulorum Christi, & in fines orbis terræ verba eorum*: & cap. 16. v. 25. & 26. gratias esse agendas Deo, quod Evangelium esset *in cunctis gentibus cognitum*. Idem Apostolus in Epistola ad Coloss. 1. v. 6. scribit: *Evangelium in universo Mundo fructificare, & crescere sicuti in illis*; & v. 23. *illud in universa creatura quæ sub calo est prædicari*. Vide etiam cap. 3. Epist. 1. ad Tim. v. 16.

Testes sunt omnes Scriptores Ecclesiastici S. Justinus Apologia prima, S. Irenæus lib. 1. *adversus hæreses* cap. 5. Tertullianus lib. 1. *adversus Judæos*, & in Apologetico, Origenes
tum

tum homilia 4. in Ezechielem , tum lib.1. contra Celsum . S. Clemens Alexandrinus lib.5. Stromatum , Arnobius lib.2. &c. Testes sunt ipsimet auctores pagani : Seneca Christianos Judæorum nomine designans , quod Scriptoribus profanis tunc temporis non infrequens est , eo quod Christiani ex Judæis essent orti , sic habet apud S. Augustinum lib.6. de Civit. Dei cap.11. *Sceleratissima gentis consuetudo usque eo invaluit , ut per omnes jam terras recepta sit ; victi victoribus leges dederunt : quæ verba Rutilius Nomentianus , Itinerarii lib.1. sua fecit .*

Tacitus Annalium lib.15. cap.44. immensæ multitudinis Christianorum , qui in persecutione Neronis , variis suppliciis affecti mortem subierunt , mentionem facit .

Plinius Junior in celebri Epistola quam dum Pontum ac Bithiniam regeret versus annum 104. ad Trajanum Imperatorem de Christianis misit , non modo innocentia Christianorum fidejussor est locuples , sed & eorum multitudinis , & diffusionis . Ait enim illam Religionem , quam superstitionem vocat , in Urbibus ac in vicis apud cujuslibet ætatis , conditionis ac sexus personas obtinere .

Dion Lib.37. loquens de Christianis sub nomine Judæorum , *Est etiam , inquit , apud Romanos genus istud imminutum quidem sæpe numero , adeo tamen auctum , ut vim legum per- vicerit .*

Atque hæc quidem spectant priora sæcula ante Imperium Constantini elapsa . Quod si sæculo-

culorum subsecutorum rationem habeas , nonne mirum nationes barbaras a quibus imperium Romanum destructum est , Christo se subdidisse ? hæresim Arianam , & si dogma rationi penitus impervium impugnetur , etsi omni Imperatorum auctoritate fulciretur , nunquam prævalere potuisse ? per ipsum decimum sæculum plures Nationes Christo fuisse partas , atque etiamnum ad Indias seu Orientales , seu Occidentales ab Ecclesia Catholica tot mitti Evangelii præcones qui juxta præscriptum Christi illarum religionum incolas ad ejus fidem convertant ? denique Religionem Christianam quæ perpetuo , & undequaque impugnatur , semper firmam , & stabilem sine ulla sui mutatione permansisse ?

2. Ope quorundam hominum simplicium omni auxilio humano destitutorum Christiana Religio sic propagata est . Apostoli enim , ut constat non modo ex Historia Evangelica , sed etiam ex omnium consensu , erant viri simplices , plebeji , illiterati . Media humana quibus homines seducuntur , vel sunt promissiones de honoribus , & divitiis concedendis , vel minæ de hujusmodi bonis auferendis . Hæc media ab Apostolis adhiberi non potuerunt , quippe qui ad gentes verbo Dei subigendas missi fuerant pauperes , neque aurum , neque argentum possidentes , viri privati , sine auctoritate , vexationibus , ac insectationibus obnoxii , quorum arma patientia , crux Christi , Verbum Dei ,

3. Re.

3. Religio Christi eorum quibus annuntiabatur affectibus erat contraria. Hi enim vel erant Judæi, vel Pagani, Judæi verum quidem agnoscebant Deum, sed cupiditatibus, & affectibus terrenis plerique irretiti divina sacrorum vatum Oracula carnali sensu interpretabantur, atque ideam Messiae longe diversam ab ea, quam Christus exhibeat, sibi efformabant. Denique ceremoniis legis suae plus æquo addicti, dignos morte judicabant quotquot eas abolendas esse sentiebant.

Pagani vero de quibus præsertim hic agitur, extincto in se sensum rationis lumine in cæcitatem mentis & corruptionem summam inciderant. Astris, fluminibus, bestiis, animalibus vilissimis, plantis, manuum suarum operibus, ipsis morbis, & calamitatibus quibus homines affliguntur, ipsi amoris impudico honores divinos exhibebant. In honorem Veneris celebrabantur projectæ libidines, Diis homines immolabantur, vel nobilissimæ nationes ejusmodi abominationibus erant addictæ, tantisque in tenebris, ac corruptione miseri mortales tunc temporis erant demersi, ut maximi Philosophi, Socrates, Plato &c. unicum, summum Deum quem agnoscebant, non ausi sint populo colendum proponere, ne se irrisioni ac periculo mortis exponerent. Hæc ex historia certissima sunt.

Itaque suadendum erat Judæis virum nomine Jesum, pauperem, multis modis exagitatum, opprobriis saturatum, cruci tandem affi-

xum,

xum , hunc esse Messiam quem expectabant ; eorumque legis ceremonias tandem abolendas . Non ergo admirari subit quod tot Judæi terrena appetentes Christo non crediderint ; sed ad illud potius , si Christus miracula , ut increduli volunt , non patrasset , maxime obstupendum , quod Judæorum magna multitudo Christi fidem susceperit , eique ut vero suo Messia regi spirituali adhæserit .

Gentilibus porro persuadendum erat eos omnes Deos quos colebant , quique cultorum suorum cupiditatibus favebant , esse rejiciendos , omnia sacrificia , omnes superstitiones ab ipsis adhibitas debere deleri ; ejusmodi numinum loco non modo adorandum esse in spiritu , & veritate supremum Deum , criminum vindicem , sed & Jesum Christum hominem-Deum a Judæis crucifixum ; hujus fidem tenendam ; Legi ipsius obtemperandum ; exemplis adhærendum ; refræandas proinde cupiditates &c. Religio igitur Christiana , cum ab Apostolis , & eorum Discipulis promulgata est , eorum quibus annuntiabatur affectibus summe repugnabat .

4. Omni genere hostium impugnabatur . Nam ut Religio Christi stabiliretur , vincendi fuere adversarii , quos in Religionem suscitabant præjudicia , & cupiditates quibus adversabatur . Vincenda fuit Philosophorum facundia atque subtilitas religionem suam pro virili defendentium , ac Christianam fidem summo conatu aggredientium ; vincenda fuit Imperatorum

torum religionem paganam legibus confirmandum, & in Christianos tyrannice defævientium ipsamet suprema auctoritas; hæc, inquam, vincenda fuere crucis Christi, & verbi Dei virtute, patientia in tribulationibus, & suppliciis, ac sanguinis sui effusione. Superandum fuit, & aliud hostium genus Religioni magis adhuc reformidandum, hæresis nempe, & schisma perpetuo pullulans, atque auctoritate tota Imperatorum aliquando suffultum. Denique Religio debuit integra permanere, etsi major eam profitentium pars mores sequeretur perversos, etsi maxima extiterint scandala, ut a Christo prædictum fuerat; etsi, quod ad doctrinam fidei, & morum attinet, nunquam sese tempori accomodare voluerit Ecclesia, nec suis definitionibus quidquam detrhai permiserit, ut suæ securitati consuleret.

Ergo Religio Christiana, nisi fuisset opus divinum, neque hocce modo propagari; neque hæctenus illibata stare potuisset.

F I N I S.



DE NESTORIO,
ET EJUS HÆRESI
EXPOSITIO HISTORICA.

§. I.

*De Nestorii persona, Patria, præ-
ceptoribus, ac moribus.*



NESTORIUS Germanicia Syriae op-
pidulo oriundus, Monasticam
vitam in Laura S. Euprepîi, pro-
pe Antiochiam, professus est:
quo in genere vitæ socios ha-
buit Joannem & Theodoretum. Antiochenæ
deinde Ecclesiæ Presbyter factus; mortuo
Sisinnio Constantinopolitano Episcopo, cum
Clerus divisus esset in partes, & alii Pro-
clum, alii Philippum Presbyterum ad illius
regimen Ecclesiæ promovere studiis omnibus
conarentur, Theodosius Imperator ex Antio-
chenæ civitatis Presbyterio Nestorium evoca-
vit, virum eloquentiæ doctrinæque opinione
celebrem. Ipsum Pauli Samosatani nepotem

vocat Suidas, non quod eodem genere oriundus esset, sed ob consanguinitatem doctrinæ. Præceptorem habuit Theodorum Mopsuestenum, a quo de Incarnatione Verbi male sentire didicit. Sanctitatis speciem affectabat, cui fidem conciliabant pallor vultus maciesque corporis, indices abstinentiæ, cogitabunda frontis gravitas, & modesta quædam tristitia, pulla vestis, solitudinis & librorum amor. Constantinopolim advenit Tauro & Felice Coss. anno Christi 427. ibique ordinatus est 4. Idus Aprilis. Statim post inaugurationem suam, cum orationem ad Imperatorem haberet, in eas voces erupit: *Tribue mihi, Imperator, terram Hæreticis purgatam, & ego tibi calum tribuam. Tu mihi in profligandis Hæreticis subveni: & ego tibi in profligandis Persis subveniam.* Quibus vocibus, inquit Socrates, visus est non tam zelum Fidei, quam animi intempestivam audaciam, & inanis gloriæ cupiditatem prodidisse. Arianos, Macedonianos, Quartodecimanos infectatus est, omnibusque hæresibus bellum indixit, ut uni suæ hæresi aditum patefaceret, inquit Vincentius Lirinensis. Auctor fuit Theodosio ferendæ adversus omnes Hæreticos Legis, ad Florentium Præfectum Prætorio directæ. Cum Arianorum Templum demoliendum curaret, ipseque faces præ iræ impotentia in tectum iniecisset, ignis vicinas ædes corripuit, incendiique periculum creavit Urbi Regiæ. Unde commotus populus ipsi incen-

cendiarii nomen indidit. Lege Theodoretum in Epistola ad Sporadium, Socratem lib. 7. c. 29. Evagrium. lib. 1. c. 2. & Liberatum Diaconum in Breviario c. 4. Hanc primum famæ suæ maculam aspersit Nestorius, quod Pelagianos foverit, ut colligitur ex Epistola Cælestini Romani Pontificis ad ipsum data, qua Nestorii Epistolæ in gratiam Pelagianorum Constantinopoli degentium ad se scriptæ respondit.

§. II.

*De erroribus Nestorii, & ipsius
Hæreses exordio.*

IPso suæ Ordinationis anno primo, Nestorius novam hæresim molitus est, ut ex Lucentii Chronico Liberatus refert. Hujus palmares errores duo. Primus, Hominem in utero Virginis formatum alium esse ab unigenito Dei Verbo, & Incarnationem esse meram inhabitationem Dei Verbi in homine velut in suo Templo, adeoque Deum non esse natum, passum & mortuum; nec Christum esse Deum, sed Templum dumtaxat Dei. Alter ejus error erat, quod B. Virginem Mariam θεότοκον *Deiparam*, esse negaret: χριστότοκον, ac ἀνθρωπότητοκον dicendam potius assereret. Id constat ex Nestorii Serm nibus, Epistolis, Anathematismis, quos S. Cyrilli Capitulis opposuit: ex Anathematismis & libris ipsius S. Cyrilli adversus Nestorium,

ex Actis Ephesinæ Synodi, ex Mario Mercatore, Theodoreto lib. 4. Hæreticarum Fabularum, Socrate, Evagrio, Liberato, Cassiano, Vincentio Lirinensi, S. Leone, Faundo Hermianensi, Leontio in libro de Scitis, &c.

Blasphemiarum præcones adhibuit Dorotheum quemdam Episcopum, & Anastasium Presbyterum, qui anathema in eos, qui Beatissimam Virginem Mariam Deiparam dicerent, in Ecclesia sedente ac probante Nestorio, impudentissime inclamaverunt, ut referunt S. Cyrillus in Epistola ad Acacium Beeroensem, Socrates, Evagrius; Liberatus locis laudatis. Omnibus ad impias voces cohorrescentibus, simplex quidam Monachus palam contradixit, & Anastasium velut hæreticum ab Ecclesiæ ingressu arcere conatus est. Sed Vir Sanctus Nestorii oppressus potentia, flagris publice cæsus est, & missus in exilium, ut testantur Monachi Constantinopolitani in Supplicatione Imperatori oblata, quæ extat 1. p. Concil. Ephes. c. 30. Mox a Synaxibus abstinere cœperunt Monachi, Senatusque & populi Constantinopolitani maxima pars, ne se Nestorii communione polluerent, ut testatur S. Cyrillus in Epistola ad Cælestinum I. quæ extat 1. p. Concil. Ephes. cap. 14.

Non multo post, Nestorio nefariæ hæreseos venenum in Concionibus spargente, Eusebius caussarum Patronus, eximium animo-

fæ in defendenda Fide fortitudinis specimen dedit, Contestatione in Nestorium publice proposita, tamquam impia Pauli Samosatæni dogmata renovantem, quæ extat 1. p. Concilii Ephesini, cap. 13. Tunc & Presbyteri in Ecclesia quæ *Irene Maritima* dicebatur, Concionibus dogma hæreticum arguere cœperunt, sed frendentis Episcopi minis & auctoritate silere jussi. Unde accidit, ut populus usitatam Fidei prædicationem requirens publice inclamaret: *Imperatorem habemus, Episcopum non habemus*. Id referunt Basilii & Monachi in Supplicatione, quæ extat 1. p. Concilii Ephesini, cap. 30.

Anno Christi 429. Proclus qui a Sisinnio Cyzicenorum Episcopus ordinatus fuerat, in maximo omnium Ordinum cœtu, admirabilem pro Virgine Deipara Orationem habuit contra Nestorium, die 29. Martii. Cui continuo contradixit Nestorius extemporali Oratione, & tribus exinde Sermonibus.

Interim, quo latius spargeret hæresim, primum suum *de Incarnatione Tractatum*, aliasque Homilias, in Ægyptum misit per fidos homines: ex quo necessitas imposita est S. Cyrillo, ut obviam iret malo, scribendi Epist. ad Monachos, ut testatur ipse ad Cælestinum Papam scribens. Extat 1. p. Concilii Ephesini, c. 2. Hæc Epistola Nestorii exacerbavit animum, & Photium quemdam ipsi respondere jussit. Accusatores præterea subornavit, qui oblatis Theodosio Libellis Cy-

rillum turbarum , & pene usurpatæ in Ægypto tyrannidis reum agerent , ut testatur S. ipse Cyrillus in *Apologia ad Theodosium* .

Eodem anno scripsit ad Nestorium S. Cyrillus , quem sibi succensere acceperat , propter Epistolam ad Ægypti Monachos datam . Ac primo aliquatenus se excusat , ut Hæresiarcham lenitate sua ad sanio rem mentem revocare possit , ipsum deinde rogat in viscibus charitatis, ut errorem incaute forsitan pro palatum emendet , ac B. Virginem Deiparam vocare non gravetur . Extat hæc Epistola 1. p. Concilii Ephesini , cap. 6. Rescripsit Nestorius alteram , frigidam omnino ac jejunam , qua conquerebatur , quod intemperantius ad se prior scripsisset . Hanc deferri curavit per Lamponem Presbyterum & Monachum . Extat ibidem cap. 7.

Post hæc Anastasius , impudentissimus ille Nestorianæ hæreseos præco , sese pacis studiosum simulavit , & eadem se cum Cyrillo sentire palam mentitus est , ut testatur Cyrillus ipse in *Epistola ad Clericos Constantinopolitanos* , quæ extat 1. p. Concilii Ephesini , cap. 12. Tunc temporis alteram ad Nestorium Epistolam dedit S. Cyrillus , quæ ibidem extat cap. 8. In ea conqueritur primo de calumniis ab eo sibi illatis . Secundo , ipsum hortatur ut sectetur sanam doctrinam , legat & sequatur Sanctos Patres , nihil inter concionandum populo proponat , quod scandalum movere possit . Tertio , suam circa
In-

Incarnationem Verbi divini Fidem exponit. Quid ad hæc Nestorius? Alteram & ipse reposuit ad Cyrillum Epist. superbiam, & insolentiam Auctoris redolentem. In ea monet Cyrillum ut attendat lectioni, exhortationi, & doctrinæ. Scribit quod Cyrillus obiter tantum legens Sanctorum Traditionem, inscientiam venia dignam hauserit: quod arbitratus perperam fuerit Verbum Dei patibile ab illis traditum esse. Addit Virginem Mariam non *Deiparam*, sed *Christiparam* appellandam esse.

Inter hæc cum Nestorius ad Cælestinum Pontificem Maximum data semel & iterum Epistola, ipsius animum occupare tentasset, S. Cyrillus veritus ne Romano Pontifici imponeret vaser Hæresiarcha, ipsum de illius erroribus certiore fecit, & de iis quæ in ipsum huc usque egerat. Extat Epistola 1. p. Concilii Ephesini, cap. 14. Sic inscribitur: *Beatissimo, Deoque dilectissimo Patri Cælestino in Domino salutem. Alexandrinus Antistes, secundæ Sedis Episcopus, Romanum Patrem vocat, ob Primatus utique dignitatem. Duo præterea in illa Epistola notanda veniunt. Primo, quod testetur Cyrillus hanc esse Ecclesiarum consuetudinem, ut de emergentibus ubique terrarum hæresibus ad Sedem Apostolicam referatur. Vetus, inquit, Ecclesiarum consuetudo suadet, ut ejusmodi res Sanctitati tuæ communicentur. Secundo, quod ait, se ausum non fuisse incon-*

sulto Cælestino, & inexpectata Sedis Apostolicæ sententia, se a Nestorii communione subtrahere. *Non prius autem, inquit, illius communionem palam aperteque deseruimus, quam hæc ipsa Pietati tuæ indicaremus. Digneris proinde quid hic sentias præscribere; quo liquido nobis constet, communicare ne nos cum illo oporteat, an vero libere eidem denuntiare: Neminem cum eo communicare, qui ejusmodi erroneam doctrinam favet ac prædicat. Porro tuæ integritatis mens, & super hac re sententia, piissimis Deoque devotissimis Macedoniæ Episcopis, necnon totius Orientis Antistitibus perspicue per litteras exponi debet. Nam cupientibus illis ansam dabimus, ut omnes uno animo in una sententia persistant, rectæque Fidei, quæ jam impugnatur, opem ferant. His etiam temporibus, S. Cyrillus scripsit libros *De recta in Christum Fide*, partim ad Theodosium Imperatorem, partim ad Reginas: qui extant 1. p. Concil. Ephes. quorum librorum & ipse meminit in Apologia ad Theodosium. Scripsit etiam ad Acacium Beroensem de causâ Nestorii; at Cyrillo subdole respondit Acacius, ipsum ita laudans propter studium fidei, ut Nestorium tamen excusaret, tanquam solo verbo lapsus. Extat utriusque Epistola 1. par. Concilii Ephesini, cap. 22. & 23.*

§. III.

*Quid egerit in caussa Nestorii Cælesti-
nus I. cum Romana Synodo.*

ACceptis Nestorii litteris, & quaternio-
nibus apertam continentibus blasphemiam, necnon Cyrilli Alexandrini Epistolis, Cælestinus Romæ Synodum habuit Episcoporum, qui vel tunc in Urbe reperti sunt, vel ex vicinia acciti anno 430. sub initium Augusti. In ea lata excommunicationis & depositionis sententia est in Nestorium, nisi intra decimum a denuntiatione diem, errores suos *aperta & scripta confessione* damnaret. Restituti quoque sunt in Ecclesiæ communionem, qui propter Fidem a Nestorio ejeſti fuerant: confirmata Pelagianorum, quos Nestorius receperat, damnatio: scriptæ tandem ex Synod. 7. Epistolæ a Cælestino Pontifice, Cyrillo scilicet, ut Sedis Apostolicæ vice fungeretur in caussa Nestorii, ad sententiam contra eum latam executioni mandandam, providendumque Apostolica auctoritate Ecclesiæ Constantinopolitanæ: Nestorio, ut ad sanam mentem rediret: Clero Constant. ut constans in Fide maneret, nec cederet persecutioni quam adversus Fidei vindices movebat Nestorius: Joanni Antiocheno, Rufo Thessalonicensi, Juvenali Hierosolymitano, Flaviano Philippensi majorum

rum Sedium Orientis Episcopis, ut strenue causam Fidei agerent. Extant 1. p. Concilii Ephesini. Lege Liberatum in *Breviario* c. 5. Pontificias litteras detulit Possidonius. His suas adjunxit S. Cyrillus ad Joannem Antiochenum, & ad Juvenalem Hierosolymorum Episcopum. Iis acceptis, Joannes Antiochenus Nestorium amice monuit, ut Ecclesiæ totius offensionem confessione *ὁμολογίας* tolleretur, erroremque retractaret.

§. IV.

De Synodo Alexandrina contra Nestorium.

Eodem anno Christi 430. S. Cyrillus Alexandrinus Patriarcha Pontificia instructus auctoritate ad sententiæ in Nestorium latæ, nisi resipisceret, executionem, Concilium Alexandria ex universa diocesi Ægypti coegit, die 3. Nov. Inde Synodica missa est ad Nestorium cum Cælestini Pontificis litteris, per legatos quatuor, scilicet Theopemptum, Danielelem, Potamonem, & Macarium Episcopos. Extat Synodica 1. p. Conc. Ephes. c. 28. Ea continet primo denunciationem sententiæ a Romano Pontifice contra Nestorium latæ. Secundo Cyrillus, ac ceteri Patres ipsi significant, se cum omnibus tam clericis, quam laicis, quos propter Fidem communione vel ordine moverat, com-

communicare . Tertio , ut nedum Symbolum Nicænum profiteatur jubent , sed etiam ut nefaria dogmata sua publice & scripto damnet . Quarto , Fidei Professionem & expositionem subjiciunt . Quinto , expositioni Fidei subnectunt Anathematismos duodecim editos a Cyrillo quibus subscribere debeat Nestorius . In ea Synodica velim attendere Calvinistas ad insignem locum , quo realis Christi Corporis in Eucharistia præsentia , & incruentum Missæ Sacrificium asseruntur . *Quin & illud (inquit S. Cyrillus & tota cum eo Synodus Ægypti) non possum hoc loco non ad-
 icere , nempe dum Unigeniti Filii , hoc est Je-
 su Christi mortem , & resurrectionem ex mor-
 tuis annuntiamus , ejusdemque in cælum Assum-
 ptionem confitemur ; incruentum in Ecclesia
 Sacrificium nos celebrare , atque ad mysticas
 benedictiones accedere , eaque ratione sanctifi-
 cari , utpote sacræ Carnis , & pretiosi San-
 guinis Christi omnium nostrum Salvatoris par-
 ticipes effecti . Neque enim illam ut carnem
 communem suscipimus : absit hoc : neque rur-
 sum tamquam divinam inhabitationem sortiti ,
 aut dignitatis tantum æqualitate Verbo conso-
 ciati , sed tamquam vere vivificam , ipsiusque
 Verbi propriam .*

Cum Synodica scripsit S. Cyrillus duas alias Epistolas , ad Clerum nempe , & Archimandritas Constantinopoleos , quibus de re tota docerentur , & ad tuendam Fidem incitaren-
 tur vehementius , interimque monerentur

communicandum esse iis , quos inique Nestorius a communione removisset .

§. V.

De Concilio Ephesino .

Acceptis Cælestini Pontificis Maximi , Cyrilli & Synodi Alexandrinæ litteris , tantum abfuit ut errores ejuraret Nestorius , quin potius XII. Anathematismos edidit, Cyrilli capitulis e regione oppositos : in quibus singulis singulæ continentur blasphemix . Joannem Antiochenum præterea & Syriæ Episcopos contra Cyrilli Capitula armavit , tamquam Apollinaris errore fœdata . Imperatorem vero Theodosium contra ipsius personam commovit , ipsumque apud illius majestatem accusavit , cum perturbatæ protervis contentionibus fidei , tum propensioris in partes Pulcheriæ Augustæ studii . Facilioribus auribus calumniam excepit Theodosius , cui sororis potentia cœperat esse invidiosa , & videriquasi jugum , quod excussum vellet . Suspicionem firmabat , quod Cyrillus non contentus scripsisse librum de recta in Christum Fide ad Theodosium , librum quoque singularem eodem argumento ad Pulcheriam scripsisset . Quo facto ejus gratiam adversus Imperatorem fratrem velle captare videbatur . Id ipsi Theodosius exprobrat in Sacra ad eum missa , quæ extat 1. p. Concilii Ephesini capite

pite 31. Lege Liberatum cap. 4. Breviari .

Synodum interim œcumenicam , quam Cyrillus congregari postulaverat , quam Basiliiſus , & Archimandritæ , & Monachi rogabant , Cœleſtinus Romanus Pontifex indixit ; atque eidem Cyrillo , ut ſuas vices ſubiret , commiſit , ut conſtat ex Relatione ad Theodoſium Imperatorem miſſa . Theodoſius vero ex univerſis Diœceſibus Episcopos , ut ad illam ad diem Pentecoſtes anni ſequentis convenirent , Ephesum invitavit , miſſis Litteris ad Majorum Sedium Antiliſites , atque etiam ad Sanctum Auguſtinum Hippo-nenſem Episcopum , ad quem Epistoſa per-honorifica traſmittebatur per Ebagnium Magiſtrianum , qui tamen , ubi Carthaginem advenit , didicit a Capreolo , ſanctiſſimum Episcopum ac Doctorem e vita migraviſſe . Porro Candidianum Comitem ad Concilium miſit Imperator , ut ordinem ſervari curaret , ut Sæculares , & Monachos , qui ſpectandi Concilii cauſſa Ephesum confluxerant ex urbe exire compelleret , ut ſuffragiorum conſuleret libertati , ut nullum ante abſolutam Synodum abire ſineret Episcopum , ut nullam denique controverſiam , ante quæſtionem Fidei permitteret agitari . Ipiſi autem prohibuit religioſiſſimus Imperator , ne ſe quæſtionibus quæ circa Fidei dogmata inciderent , ullatenus immiſceret . Id patet ex Litera per ipſummet Candidianum ad Ephesi-næ Synodi Patres miſſa , quæ extat 1. p. Concilii Ephe-
ſini

fini cap. 35. Ephesum quoque perrexit Irenæus Comes nulla quidem Principis legatione, mandatis nullis instructus, sed ut Nestorium sibi amicissimum comitaretur, ut constat ex eadem Imperatoris Epistola. Convenerunt ad Concilium Episcopi ducenti septuaginta quatuor, si Mario Mercatori credimus. Præfuit S. Cyrillus jure suæ Sedis, & ut Sedis Apostolicæ Legatus ad executionem sententiæ in Nestorium latæ, donec alii Legati a Cælestino Pontifice Maximo & Synodo Occidentis missi, scilicet Arcadius & Projectus Episcopi & Philippus Presbyter. Capreolus Carthaginensis Episcopus, cum propter impetum Wandalorum in Africam, adesse Concilio non posset, Epistolam misit per Bessulam Diaconum suum. Venit Ephesum & Nestorius, cum decem suarum partium Episcopis, quorum nomina subscripta sunt Relationi a Nestorio factæ de rebus Synodi ad Imperatorem. Celebrata est Synodus anno Christi 431. Theodosii Junioris 24.

§. VI.

Quid gestum singulis Actionibus Ephesini Concilii.

AD conditam diem non adfuit Ephesi Joannes Antiochenus, sed moras traxit cum suis Orientalibus, sive ex industria & ut gratificaretur Nestorio amico suo, quod asserit

rit Ephesina Synodus in Relatione ad Cælestinum Papam ; sive quod Episcopos suos ob locorum distantiam tam cito cogere non potuisset , quod Evagrius lib. 1. cap. 3. ipsum excusans testatur . Quo solidis diebus sexdecim frustra expectato , duo illius Metropolitæ scilicet Alexander Apameæ , & Alexander Hierapoleos , Ephesum pervenerunt cum ipsius litteris excusatoriis ad Cyrillum Alexandrinum , cum abesset ipse itinere tantum quinque aut sex dierum . Hi testati sunt , non semel , sed sæpius sibi datum in mandatis a Joanne , ne sacra Synodus prorogaretur , si ipsum tardare amplius contingeret , ut testantur Ephesini Patres in Relatione ad Cælestinum Papam . Quamobrem ipso diutius non expectato , factum est Synodi initium in Ecclesia quæ *Maria* dicebatur , die 22. Junii .

Actiōne 1. cum citatus legitime fuisset Nestorius , recitata est Nicæna Fides , ut sententiis ad Fidei doctrinam spectantibus cum ea Expositione collatis , consentientes quidem confirmarentur , dissentientes autem rejicerentur . Secundo , lecta est Sacra Imperatoris . Tertio , Epistola 2. S. Cyrilli ad Nestorium , quæ communibus Patrum suffragiis probata est , ut *Nicænæ Fidei Symbolo per omnia consentiens* . Quarto , lecta est Nestorii Epistola ad Cyrillum , quæ incipit : *Admirabilium litterarum tuarum contumelias &c.* Quæ unanimi Patrum calculo explosa est , ob eamque Nestorius anathemate confixus tamquam hæreticus .

cus . Quinto , lecta est Cælestini Pontificis ad Nestorium Epistola , quæ incipit : *Aliquantis diebus vitæ nostræ* . Lecta insuper Epistola Synodica Cyrilli ad Nestorium , illi tradita per Theopemptum , Daniele , Potamenum , & Macarium Episcopos , Ægyptiacæ Synodi Legatos . Excepta subinde illorum testimonia , quibus asseruerunt , Nestorium non satisfacisse , neque Cælestini , neque Cyrilli , & Synodi Alexandrinæ litteris ; sed publice pro Concone eadem , quæ ante , & his deteriora dogmata proposuisse . Audita denique Theodori Ancyranæ , & Acacii Meliteni testimonia , juramento confirmantium , sese blasphemia dogmata ex ore Nestorii audivisse .

Sexto , lecta sunt Fragmenta quædam & sententiæ SS. Patrum , quibus error Nestorii confoditur , quæ in Acta relata sunt . Septimo , lecta sunt Excerpta quædam blasphemiarum Nestorii ex ejus Scriptis : de quibus perperam ait Liberatus cap. 5. Breviarii : *Cyrillus deflorationes quasdam librorum Nestorii faciebat , eum perturbare volens : erat enim ut dicitur , ejus inimicus* . Octavo , lecta est Epistola Capreoli Carthagenensis Episcopi . Tandem lata est in Nestorium hæreseos nefariæ convictum reum & auctorem , exauctorationis & excommunicationis sententia . In qua maxime notandum quod sacra Synodus ad eam ferendum *Coactam* se dicit *per sacros Canones , & Epistolam sanctissimi Patris & Commistri Cælestini , Romanæ Ecclesiæ Episcopi ;*

scopi; ex quibus patet, Ephesinos Potres officii loco duxisse, recipere Cælestini Epistolam, eique obsequi. Sententia Concilii postridie significata est Nestorio cum hac Inscriptione: *Nestorio Novo Jude*. Tum scripta fuit Synodica ad Clericos & Oeconomos Ecclesiæ Constantinopolitanæ, qua ipsis nuntiabatur Nestorii depositio, & Ecclesiæ rerumque Ecclesiasticarum cura ipsis ad novi usque Episcopi consecrationem commendabatur. Misæ sunt & Relationes gestorum Synodaliū ad Cælestinum Pontificem, & ad Imperatores, necnon ad Clerum, populumque Constantinopolitanum. Scripsit etiam San. Cyrillus ad Dalmatium Archimandritam sanctissimum, & ad Agentes in rebus suis, scilicet Macarium & Potamionem Episcopos, qui Constantinopoli subliterant, & Timotheum atque Eulogium Presbyteros, ut res Concilii apud Imperatorem promoverent. Interim Joannes Antiochenus congregato seorsim Conciliabulo in suis ædibus, ubi primum curru dissiluit, depositionis sententiam dixit adversus S. Cyrillum & Memnomen Ephesiorum Episcopum, quasi ille Arii, Apollinaris, & Eunomii hæreses suis Capitulis doceret, iste per violentiam cuncta in civitate gereret; excommunicationis vero in alios Patres, nisi post constitutam diem, relictis Cyrillo & Memnone, ad suas partes transirent. Sententiæ subscripserunt 43. Episcopi. Misæ Relationes e Schismatica Synodo ad Imperato-

ratorem & Reginas per Irenæum Comitem, Nestorii amicum, quas fallis quoque Relationibus Candidianus Comes sustentavit. Datæ etiam a Schismaticis litteræ ad Clerum populumque Regiæ Urbis. Lege Acta Conciliabuli, quæ extant post Actionem primam Concilii Oecumenici. De his quoque legenda sunt Relatio ejusdem Sancti Concilii ad Cælestinum Papam, Apologeticus Cyrilli ad Theodosium Imperatorem 3. par. Concilii Ephesini c. 13. Socrates lib. 7. cap. 34. Evagrius lib. 1. cap. 5. Liberatus cap. 5. Breviarii.

Notandum tamen in duobus peccare laudato mox loco Socratem. Primo, quod ita scribat de S. Cyrillo, ipsum *Quibusdam quasi sermonum velitationibus pugnam exorsum esse, ut Nestorium perterreret, quippe qui in senso erga illum animo esset*. Secundo, in hoc hallucinatur, quod Conciliabuli adunationem, & Cyrilli ac Memnonis depositionem ante Joannis adventum contigisse scribat.

Schismaticorum, nec non Candidiani & Irenæi Comitum Relationibus deceptus Theodosius; qui Synodi Oecumenicæ Relationes & Epistolas interceperant, ne ad Aulam perferrentur, misso per Palladium Magistranum Rescripto, jussit omnia rescindi tamquam vitio gesta, nec aliquem Episcoporum Epheso exire, donec pietatis dogmata stabilita essent, & aliquis ex Aula destinatus, qui una cum Candidiano Comite de gestis hucusque cognos-

gnosceret. In studia Candidiani abreptus Palladius, Nestorii & Ioannis Antiocheni partibus favit. Noluit expectare donec Litteræ Synodi Oecumenicæ ad Imperatorem ab omnibus Episcopis subscriberentur: sed rediit illico, novam Relationem Joannis Antiocheni & Schismatici Conciliabuli contra Cyrillum, Memnonem, & Oecumenicæ Synodi Patres deferens. Paucos post dies Irenæum Comitem submisit in Aulam Joannes Antiochenus, qui suas Nestoriiue partes coram Imperatore tueretur, ac Cyrillum, Memnonem, & Sacræ Synodi Patres, calumniis suis opprimeret.

Interim die 10. Julii, Cælestini Pontificis, & Occidentalis Synodi Legati, Arcadius & Projectus Episcopi, & Philippus Presbyter Ephesum pervenerunt, & excepti sunt a Concilio, celebrataque Actio 2. Synodi Oecumenicæ, in qua lectæ ritu sollemni Cælestini litteræ; ipsi a Patribus acclamatum: *Novo Paulo Cælestino, Cælestino custodi Fidei, Cælestino cum Synodo concordî: Cælestino universa Synodus gratias agit.* Tum Legati Apostolici gesta Concilii communicari secum petierunt. Miserat Cælestinus Epist. duas per novos Legatos, unam ad Theodosium Imperatorem, alteram ad Cyrillum Alexandrinum. In priori notanda sunt hæc verba, quæ Christianorum Principum officium diserte explicant. *Major vobis Fidei causa debet esse, quam Regni, ampliusque pro pace Ecclesiarum*
cle-

Clementia vestra debet esse sollicita, quam pro omnium securitate terrarum. Subsequuntur enim omnia prospera, si primitus quæ sunt Deo cariora servantur. Et infra: Pro vestri enim Imperii salute geritur, quidquid pro quiete Ecclesiæ, vel sanctæ Religionis observantia laboratur.

Postridie Actio 3. celebrata est apud S. Mariam, in qua lecta sunt Gesta Synodi in causa Nestorii, cujus damnationi & depositioni assensu sunt Legati, & Summi Pontificis, Occidentaliſque Synodi nomine subscripserunt. Inde Relatio missa est a S. Synodo ad Imperatorem, qua de Legatorum adventu, & utriusque Ecclesiæ consensu in Nestorii damnationem certior fieret. Postulata etiam ordinandi in ejus locum novi Episcopi facultas, & discedendi Epheso; *Pietate jam declarata, totoque terrarum orbe consonam de illa sententiam proferente, paucis tantum exceptis, qui Nestorii amicitiam pietate potio- rem ducebant.* Missa etiam Relatio est ad Clerum populumque Constantinopolitanum.

17. Kal. Augusti, seu 16. Julii, Cyrillus & Memnon Libellum querelarum adversus Joannem Antiochenum & Orientales obtulerunt, quod contra Canones & jus omne depositionis sententiam in illos tulissent. Semel & iterum citatus est Joannes Antiochenus per tres Episcopos a S. Synodo missos: qui Militibus ejus ædes vallantibus indignissime sunt repulsi. Quod cum retulissent ad Synodum,

dum, Patres irrita esse pronuntiarunt, quæ in Cyrillum & Memnonem ab ipso ejusque Symmittis decreta fuerant.

Die sequenti, celebrata est Actio 5. Concilii, in qua Cyrillus contra Joannem Antiochenum iterum questus est de charta quadam, seu famoso libello publice ab ipso proposito, quo Cyrillum ipsum velut hæresos Apollinariæ Principem sugillabat. Secundo, quo pravam omnem de se suspensionem amoliretur Cyrillus, Apollinario, ceterisque Hæreticis anathema dixit. Tertio, postulavit Joannem ultimo conveniri, ut quidquid scripto objecerat, coram Synodo probaret, vel justam sententiam exciperet. Citato itaque tertio per tres Episcopos Joannes, lata in contumacem excommunicationis sententia est, necnon in Episcopos cum eo in schismatica Synodo collectos & Ecclesiam turbantes. Missa rei gestæ ad Cælestinum Pontificem, & ad Theodosium Imperatorem Relatio. Relatione ad Cælestinum facta, constat Pelagianorum depositionem ab ipso decretam, Ephesinos Patres confirmasse. Hujus & præcedentis Actionis Historiam refert Evagrius lib. 1. cap. 5. ubi & recte monet res aliter quam gestæ sint a Socrate Historico narrari. Lege etiam Liberatum cap. 6. Breviarii, quamquam iniquus sit in S. Cyrillum & Memnonem, de quibus scribit; *Igitur Cyrillus cum Memnone, volentes se ulcisci, Joannem damnaverunt, & omnes qui cum eo convenerant, & multa mala*
pari

pari fastu utrique Ephesi pertulerunt. Sed non mirum quod trium Capitulorum defensor, & Epistolæ Ibas acerrimus vindex, de S. Cyrillo ita scribit.

Die 22. Julii, Charissii Philadelphienſis Ecclesiæ Præsbyteri atque Œconomi causa, agitata est Actione 6. Synodi. Is oblato Libello supplicavit Patribus, ut sententiam ab Episcopo suo Theophane in se latam rescinderent, a quo fuerat excommunicatus, quia Jacobo & Antonio Presbyteris obstitit, qui ab Anastasio & Photio Presbyteris Nestorianis missi, Theodori Symbolum plane impium per Lydiam spargebant, & Quartodecimanis ad Ecclesiam redeuntibus offerebant subscribendum. Absolutus est a S. Synodo Charissius, damnatum Theodori Mopsuesteni impium Symbolum: prohibita alterius Fidei a Nicæna conscriptio, & novi Symboli prolatio, vel compositio.

Pridie Kal. Septembris 7. Synodi confessus habitus est, in quo Reginus Constantiæ Cypri Episcopus, & alii ejusdem Insulæ Antitites, Libellum obtulerunt Synodo, quo adversus Antiochenum Episcopum exposcebant, Ordinationes Episcoporum illius Insulæ usurpantem, quæ secundum Canones, ad Synodum Provinciæ spectabant. Re accuratius expensa, & lectis Flavii Dionysii utriusque exercitus Magistri Litteris ad Clericos Constantiæ Cypri, necnon ad Theodorum illius regionis Præsidentem, quibus novi Episcopi

pi Ordinationem in locum Troili fieri prohibebat, donec Ephesina Synodus tunc congregata controversiam istam judicasset: pronuntiarunt Patres, jus Ordinationum Cyprii Episcopis, Canonibus & consuetudine veteri quæsitum servari debere. Sed & prohibuerunt ne regionum aliarum Episcopi alienas Provincias invaderent, aut jam occupatas retinerent, insuper habitis Canonibus; *Ne sub Sacerdotii prætextu mundanæ potestatis fastus irreperet; &, Ne clam paulatim libertas amitteretur, quam nobis donavit sanguine suo Dominus Iesus Christus.*

In ista etiam Actione sex Canones conditi sunt adversus Cælestium & Pelagianos, nec non adversus Nestorium, ejusque Symmittas ac Fautores. Annuit insuper sacra Synodus Eustathio Pamphiliæ Metropolitæ, qui senio confectus, sese Episcopatu abdicaverat propter exiguum rerum gerendarum usum, ut nomine, honore, & communione Episcopali frueretur. Qua de re scriptum est ex sententia Patrum ad Synodum Pamphiliæ.

In eadem Actione, suggerentibus Valeriano & Amphiloquio in Pamphilia & Lycæonia Episcopis, damnati sunt Messaliani; confirmata fuit schedula Synodica de illis composita Constantinopoli sub Sisinnio. Decretum denique ut isti Hæretici convenirentur, siue Clerici essent, siue Laici, & ejuratis erroribus, in pristinos gradus, & communionem reciperentur: sin minus exauctorati
Cle.

Clerici, communione pulsi Laici manerent: nulla vero habere Monasteria Sæctæ illius homines permetterentur.

Denique in hac Actione oblatus fuit Libellus supplex ab Euprepio Episcopo Byzes & Archadiopolis, & Cyrillo Episcopo Cælenſi, quo Patres rogabant, ut, secundum antiquos mores, unus Episcopus duobus, jure Metropolitani, præſſet Episcopis, in Ecclesiis Europæ. Quod S. Synodus ex prisca ejus regionis consuetudine ratum habuit.

Juvenalem Hierosolymorum Episcopum in Concilio Ephesino Primatum totius Syriæ Palæstinæ usurpare voluisse, cum gravi Cæsareensis Ecclesiæ injuria, cui ex Nicænis Canonibus & veteri more debebatur, testis est S. Leo Epist. 62. vel 92. in edit. P. Quenellii, ad Maximum Antiochenum Episcopum data. Ipsi vero obſtitisse S. Cyrillum, Disciplinæ Ecclesiasticæ, sicut & Fidei strenuum defensorem. Hujus quidem rei nulla est in Actis Ephesinæ Synodi mentio, sed difſerta est apud S. Leonem. *Subripiendi occasiones, inquit, non prætermittit ambitio, & quoties ob occurrentes causas generalis Congregatio facta fuerit Sacerdotum, difficile est ut cupiditas improborum non aliquid supra mensuram moliatur appetere: sicut etiam in Ephesina Synodo, quæ impium Nestorium cum dogmate suo perculit, Juvenalis Episcopus ad obtinendum Palæstinæ Provinciæ Principatum credidit se posse sufficere, & insolentes ausus*
per.

per commentitia scripta firmare. Quod sanctæ memoriæ Cyrillus Alexandrinus Episcopus merito perhorrescens scriptis suis quid prædicti cupiditas ausa esset, indicavit: & sollicita prece multum poposcit, ut nulla illicita conatibus præbcretur assensio. Nam cujus exemplaria Epistolæ ad nos direxisti sanctæ memoriæ Cyrilli, eam in nostro Scrinio requisitam, nos authenticam noveris reperisse.

§. VII.

De Gestis post Synodum, vel pendente etiamnum Synodo, cum adhuc Patres Ephesi detinerentur.

CUm ad Imperatorem variæ rerum in Synodo gestarum, contrariæque Relationes missæ essent, tum ab Œcumenici Concilii Patribus, cum a Joanne Antiocheno, ceterisque Schismaticis, & Candidiano ipsis favente, qui Theodosii animum occupaverat, & Princeps malam de sacra Synodo, & de Cyrillo & Memnone opinionem concepisset, visum erat Patribus selectos ad Aulam Episcopos mittere, qui Imperatori rerum gestarum ordinem & rationem exponerent. Sed Iræneus Comes, qui triduo post Synodi Legatos Constantinopolim appulit, malis effecit artibus ut nihil ipsi promoverent. Theodosio placuit, ut missi a Synodo una cum Irenæo Comite, litem coram se disceptarent. Scis-

sa in partes Aula, missus ab Imperatore Joannes sacrarum Largitionum Comes Ephesum, qui tres depositos esse juberet, Cyrillum, Memnonem, & Nestorium, omnesque in unam Synodum cogeret, & res agendas reliquas pacifice curaret. Is ubi pervenit Ephesum, Episcopis ad se vocatis legit Imperatoris litteras: & post depositionis denuntiationem, Nestorium Candidiano Comiti custodiendum tradidit; Jacobo vero Comiti Cyrillum & Memnonem.

Sacra Synodus Comitibus facta vehementer commota, datis ad Imperatorem Litteris quæstæ est, mendaciter ipsi fuisse suggestum, quod Cyrilli & Memnonis depositio ab Œcumenica Synodo approbata fuisset. Significavit etiam se cum Joanne Antiocheno & Orientalibus inire non posse communionem, priusquam Nestorii damnationi & depositioni subscriberent, & objecta Synodo per calumniam revocarent. Petiit denique reddi sibi Cyrillum ac Memnonem, Fidemque dilucide expositam in Commentariis retineri: & accersiri Constantinopolim Episcopos, qui palam Imperatori de omnibus referrent. Datæ sunt etiam a Synodo Epistolæ ad Episcopos in Regia Urbe agentes, & ad Clerum. Additum est Commonitorium ad Dalmatium sanctissimum Archimandritam. Quæ omnia arundine inclusa Mendicus detulit, ut Joannis Antiocheni & Orientalium artes falleret, per amicos prohibentium, ne quid a sacra

Sy-

Synodo Constantinopolim afferretur, quod rebus suis nocere posset.

Interim Joannes Comes, partium concordiam frustra tentavit, propositis conditionibus, quas sine summa sui injuria & dedecore, & sine proditione causæ Fidei accipere Sacra Synodus non poterat, ut constat ex Epistola S. Cyrilli ad Clerum, populumque Constantinopolitanum. Libellum supplicem pro Sacra Synodo Imperatori porrexit Regiæ Urbis Clerus, libertate vere Ecclesiastica ipsum urgens. Quo obtinuit ut septem ex utraque parte Legati Constantinopolim mitti juberentur, qui de omnibus in Synodo gestis certiores Principem facerent. Misit igitur utraque pars septem Episcopos cum Mandatis. Novam Relationem per suos ad Imperatorem misit sancta Synodus.

Utriusque partis Legati, ubi Chalcedonem appulerunt, jussi sunt ibidem subsistere. Hac transiens in Villam Rufinianam, Theodosius ipsos non semel audivit. Certissimam sibi victoriam pollicebantur Orientalium Legati, ut constat ex Epistola quam ad suos Ephesum miserunt: sed aliquot post dies, inanis spei lætitiæque fructu sunt frustrati. Synodi namque Œcumenicæ Legatos radiens Constantinopolim Imperator comitari jussit, ut Episcopum in locum Nestorii ordinarent, relictis Chalcedone Schismaticis. Qui tumultuati sunt, oblato Libello, ut Ordinationem impedirent; sed frustra. Nihil

quippe ipsis responsi datum; sed facta est ipsis, eorumque Symmistris, adhuc Ephesi agentibus, facultas redeundi ad suas Ecclesias. Missi quoque sunt Synodi Œcumenicæ Patres. Die 25. Octobris Maximianus ex Monacho Presbyter, non excultissimus quidem litteris, sed probatæ vir Fidei ac pietatis, Constantinopolitanæ Ecclesiæ Episcopus consecratus est. De ejus Ordinatione ad primas Sedes, & ad Episcopos veteris Epiri, quos Schismatici fallere tentabant, datæ Litteræ. Scripsit etiam novus Episcopus ad Cælestinum Papam, & ad S. Cyrillum: ad quem etiam uterque Epistolæ gratulatorias dedit. Scripsit etiam ad Theodosium Augustum Cælestinus, quibus illi ob præstitum causæ Fidei patrocinium, ob Nestorii abdicationem illius Edictis confirmatam, ob Maximiani Ordinationem illius jussu factam gratulatus est: & Nestorii deportationem postulavit, ne plures perderet, novasque in Ecclesiâ turbas excitaret. Extant hæ omnes Epistolæ 3. p. Concilii Ephesini.

§. VIII.

De pace inter Ecclesias inita.

Cælestino Pontifice Maximo ad cælestem gloriam translato, & Sixto jam totius Ecclesiæ clavum regente, anno Christi 432. Theodosius Imperator apud Joannem Antioche-

chenum naviter egit ut Nestorium damnaret, & cum Cyrillo Alexandrino iniret concordiam, pacemque inter omnes Orientis Ecclesias conciliaret. Itaque Aristolaum Tribunalum cum potestate misit, ipsique dedit Mandata cum ad Joannem ipsum, tum ad Cyrillum, partis utriusque Principes deferenda, quibus aut per se conspirare in conditiones pacis jubebantur, aut Nicomediam venire, nec inde discedere, donec pacem inivissent. Extant Theodosii Litteræ 3. p. Concil. Ephes. cap. 24. Dedit etiam litteras ad Acacium Beroensem, & ad Beatum Simeonem Stylitem, quos sequestres pacis apud Joannem Antiochenum accedere voluit. Extant ibidem cap. 25, & 26.

Acceptis his litteris, Joannes Antiochenus cum Syriae Episcopis convenit apud Acacium Beroensem, ibique re deliberata constituerunt pacis conditiones proponendas esse Cyrillo, quibus suo consultum esset honori: ut scilicet abolerentur omnia, quæ vel Epistolis, vel Tomis, vel Libris evulgaverat, & soli Fidei Nicænæ consentiret. Absurdas & iniquas adeo conditiones privatis Acacii Beroensis litteris sibi propositas, Cyrillus, ut par erat, rejecit rescripsitque hunc in modum: *Expositioni Fidei, quam Nicæni Patres ediderunt, adhæremus omnes, nihil eorum quæ in ipsa continentur, labefactantes. Sunt enim ea omnia recte inculpateque tradita: neque tutum est post illam Fidei editionem,*
B 3
quid-

quidquàm adhuc curiosius tractare. *Quæ vero recte contra Nestorii blasphemias scripsimus, ea hujusmodi esse, ut nulla nobis ratione persuaderi possit, ut recte scripta esse negemus. Opus proinde magis esse, ut ipsi juxta pientissimi Christique amantis Imperatoris Decretum, immo vero sanctæ Synodi Ephesinæ Sanctionem, illum qui contra Salvatoris Christi gloriam pugnavit, ejicerent, impiasque illius blasphemias anathemate insectarentur, ejusque depositioni consentirent, ac sanctissimi, piissimique Episcopi Maximiani Ordinationem approbarent.*

Spe sua frustrati Joannes Antiochenus & Episcopi Orientales, Paulum Emissenum, Episcopum Alexandriam miserunt, qui potioribus & honorificentioribus quibus posset, conditionibus concordiam iniret. Illuc ubi pervenit, S. Cyrillum ad præteritarum injuriarum oblivionem hortatus est, litterasque ipsi tradidit Joannis Antiocheni: quas alias ab iis fuisse, quæ in collectionibus Conciliorum leguntur, persuasum habeo. Testatur enim S. Cyrillus duriores illas fuisse, tantumque abfuisse ut ejus dolorem excusatione aliqua lenirent, quin potius Joannis Antiocheni contra ipsum gesta, jure & Fidei zelo facta propugnabant. De his ita scribit ad Acacium Melitenum. *Mox ille (Paulus Emissenus) Epistolam reddidit, non ea, quæ debebat, habentem; sed potius, non quo conveniebat modo dictatam. Complectebatur enim irri-*

irritationis vim, potius quam exhortationis. Hanc itaque non acceptavi. Nam cum meam animi ægritudinem, qua fueram affectus, ex iis, quæ præcesserant, excusatione aliqua demulcere debuissent, tantum abest ut id fecerint, ut se quoque propter sacrorum dogmatum zelum jure optimo mihi succensuisse dicerent.

Verum cum Paulus Emissenus Joannis Antiocheni & Orientalium propositum excusasset, illosque paratos esse affirmasset ad prava Nestorii dogmata anathemate confodienda, & ad subscribendum ejus depositioni, & Maximiani ordinationi, caritatis pacisque Ecclesiasticæ causa purgationem admisit, Paulumque, his per se impletis conditionibus, ad Synaxim recepit S. Cyrillus, ut testatur in Epistola ad Donatum Nicopolitanum. Ceterum cum Joanne Antiocheno & Orientalibus pacem se initurum negavit, nisi scripto præstarent ipsi, quod eorum nomine se præstare Paulus assererat. *Modis autem omnibus opus esse affirmabam, (inquit Cyrillus ad Acacium Melitenum scribens) ut Reverendissimus Joannes Antiochenus Episcopus scriptam his de rebus confessionem ederet.* Hæc quidem tunc Alexandria gella; sed ut ad exitum perduceretur pacis negotium, duos e suis Diaconis una cum Aristolao Tribuno, & Paulo Emisseno Antiochiam misit, chartamque ipsis tradidit, confessionem Fidei, pacisque condiciones continentem, quam si

acciperet Joannes Antiochenus, illique subscriberet, litteras ei communionis redderent. Conditiones pacis erant, anathema in doctrinam Nestorii, assensus illius depositioni, & ordinationis Maximiani approbatio. Ista constant ex Epistola S. Cyrilli ad Donatum Nicopolitanum Episcopum.

Consensit Joannes Antiochenus omnibus conditionibus pacis, & Confessioni Fidei a S. Cyrillo missæ subscripsit, Paulumque Emisenum Alexandriam rursus misit cum litteris ad Sanctissimum Antistitem, quæ extant 3. part. Concil. Ephes. cap. 30. Professionem Fidei continent, quam S. Cyrillus inseruit suis ad Joannem litteris, quæ incipiunt: *Latentur celi*. Quæ confessio non a S. Cyrillo edita, ut Baronio Cardinali visum est, sed a Joanne Antiocheno & Orientalibus, a Cyrillo vero probata, & suis ad Joannem litteris inserta. Cujus rei testem, contra Scriptorem Eminentissimum Annalium, Cyrillum ipsum Alexandrinum proferimus in Epistola ad Joannem Antiochenum. *Quod autem*, inquit, *Ecclesiarum dissensio superflua prorsus, & citra ullam justam causam accideret, id ex charta, quam Dominus meus religiosissimus Episcopus Paulus nunc attulit, evidenter cognovimus, quæ irreprehensibilem continet Fidei Confessionem; eamque cum tua Sanctitate, tum a ceteris quoque Religiosissimis Episcopis, qui illic degunt, compositam asserbat: quam etiam ad verbum huic*
no-

nostræ Epistolæ inferere placuit .

Idem testatur in Epistola ad Eulogium , ubi hac de Fidei Confessione ita scribit : *Expositionem , quam Orientales fecerunt , reprehendunt nonnulli .*

Idem testatur Liberatus Diaconus cap. 8. Breviarii . *Et congregans , inquit , iterum Joannes apud Antiochiam Concilium , dictavit Fidem ita se habentem : Confitemur Dominum nostrum Jesum Christum &c. In isto ergo modo hanc Fidei Regulam interponens Joannes Epistolæ suæ , cujus est principium , &c. Dandum per sanctionem piissimorum Principum , &c. quam tradidit Paulo Episcopo Emisseno , & direxit Alexandriam Cyrillo Post hæc Cyrillus Fidem Epistolæ , quam a Paulo suscepit , Epistolæ suæ interponens , cujus principium est : Latentur cæli , & exultet terra subscripsit prædictam Fidem , & Orientalibus direxit Episcopis .*

Idem testatur Evagrius lib. 1. Historiæ Ecclesiasticæ cap. 6. Circa istam Fidei Confessionem & conditiones initæ S. Cyrillum inter & Orientales pacis hoc notandum est , scilicet altum in iis fuisse de duodecim S. Cyrilli Capitulis silentium , Cyrillo privatas injurias propriamque famam studio resarciendæ Ecclesiasticæ pacis negligente . Qua ex Economia Orientales occasionem sumpserunt spargendi in vulgus mendacii , quasi sua capitula retractasset , ac in eorum sententiam descendisset ; hisque conditionibus conciliatam pacem .

Dum porro Alexandria adhuc degeret Paulus Emissenus, duas contra Nestorii dogmata habuit in Magna Ecclesia, præsentem S. Cyrillo, Homilias summo cum plausu, tum ob integritatem Fidei, cum ob facundiam singularem.

Theodoretus impatientissime tulit negotium pacis, nec a Nestorii partibus & amicitia tam cito divulsus est, quamvis dogmata nefaria damnaret, ejus nomini parcens: quod ambiguis ipsius verbis & technis delusus eum ab impiis dogmatibus existimaret alienum. Id patet ex ipsius Theodoreti Epistolis ad Andream Monachum Constantinopolitanum, ad Andream Samosatenum Episcopum, ad Himerium Nicomediensem, quarum Excerpta Marius Mercator descripsit. Id patet maxime ex Epistola Theodoreti ad Nestorium, in qua ita scribit, *Hæc autem quæ contra tuam Venerationem injuste atque inique patrata sunt, nec si mihi utramque manum, quis abscinderet, potero præbere consensum, divina procul dubio mihi cooperante gratia, & infirmitatem animæ sublevante*. Existimavit vero Theodoretus Palinodiam a S. Cyrillo recantatam, quod naturas duas confiteretur in Christo, qui prius dixerat, *Unam Verbi naturam incarnatam*; & quod Deitatem Christi impassibilem prædicaret, & passiones ejus carni adscriberet. Id constat ex Epistola Theodoreti ad Andream Constantinopolitanum Monachum.

Viris

Viris quibufdam Eruditis videtur Epistolam Theodoretī ad Nestorium, cujus verba mox retulimus, fupposititiā eſſe, & ab Hæreticis confictā; & Leontii antiqui & graviffimi Auctoris ſuffragio nituntur lib. de Sectis, Actione 4. dicentis: *Sciendum eſt circumferri quasdam Theodoretī ac Nestorii Epistolās, in quibus ſe mutuo recipiunt: ſed fictitiæ ſunt, & fingunt eas Hæretici, ut earum ope Synodum oppugnent.*

Cyrilli ſcripta pacis initæ tempore, id eſt, Litteras ad Orientales, Fideique Confeſſionem ipsis inſertam improbare non potuit Theodoretus, & nulli obnoxia eſſe reprehenſioni, cogente veritate faſſus eſt, in Epistola ad Nestorium. *Nullus igitur tuæ perſuadeat Sanctitati, quod ego Praſul eſſe deſiderans, clauſis oculis, velut recta dogmata, Ægyptia ſcripta ſuſceperim. Nam per ipſam fateor veritatem, ſapius ea revolvens, & diligenter examinans, ab hæretica pravitate libera deprehendi, & aliquam illis imponere maculam formidavi; non tamen velut is approbetur, qui toti mundo cauſa perturbationis extiterit.* Sanctum autem Cyrillum Ægyptii nomine paſſim a Theodoreto ſugillari notum eſt.

Ex inita pace invidiam apud nonnullos Episcopos ſubiit S. Cyrillus, non minus quam Joannes Antiochenus. Theodoretus namque & alii pauci, Joanni vitio dabant, quod duodecim Capitulorum damnationem a Cy-

rillo non exegisset, iisque intactis cum ipso redisset in concordiam. Alii vero, inter quos etiam Valerianus Iconii, & Acacius Melitenus Episcopi, displicebat, quod Cyrillus duarum confessionem naturarum ab Orientalibus suscepisset, quod Nestorius dixerat & docuerat. Eo usque enim invaluerat opinio, seu potius error popularis, annitentibus Nestorianæ factionis hominibus, ut qui duas naturas fateretur, Nestorianus; qui unam, Cyrillianus haberetur. De his Liberatus cap. 8. Breviarii. Hinc in Orientalium, & sui ipsius, ac initæ pacis defensionem varias Epistolas scribere S. Cyrillus coactus est, scilicet ad Valerianum Iconiensem, Acacium Melitenum, & Eulogium Presbyterum Alexandrinum in Aula agentem. Erant enim & Constantinopoli qui nimix Economix, vel etiam ignaviæ, & levitatis Cyrillum in simulant. De his idem Liberatus cap. 9. Quin etiam Viris Sanctissimis ea de S. Cyrillo adhæsit opinio, ut S. Isidoro Pelusiota, qui ita ad ipsum scribebat Epist. 324 *Te oportet, Vir Admirande, firmum atque constantem semper manere, sic nempe ut nec metu celestia prodas, nec tecum ipse pugnare videaris. Nam si ea quæ nunc abs te scripta sunt, cum superioribus perpendas, aut adulationis obnoxius esse videberis, aut levitatis minister: ut qui inani gloriæ succumbas, non autem magnorum ac sanctorum Pugilum certamina imiteris, qui per omnem vitæ suæ cursum in externa regione pre-*

premi ac vexari potius sibi ferendum duxerunt, quam ut perversam ac falsam sententiam vel auribus tenus exciperent.

Nullum ex pace inter S. Cyrillum & Orientales inita commodum reportarunt Helladius, Himerius, Euthérius, & Dorotheus Nestoriani Episcopi, qui una cum Auctore Sectæ depositi fuerant: neque ulla eorum in conditionibus pacis facta mentio est, quamvis, quæ decreta fuerant contra ipsos, abrogari postulassent Orientales, ubi primum de pace Ecclesiarum agi cœpit. Id constat ex Epistola S. Cyrilli ad Donatum. Composita pace, S. Cyrillus & Joannes Antiochenus faustum negotii exitum ad Sixtum Pontificem Maximum retulerunt, cujus Apostolicum sinum tam auspici nuntii acceptio lætitia incredibili perfudit, quam datis ad Cyrillum Litteris testatus est. Gratulatus est etiam per Litteras Joanni Antiocheno. Extant illæ 3. p. Conc. Ephes. cap. 41. & 42.

§. IX.

Qui Nestorianam Hæresim scriptis impugnarunt vel defenderunt?

I. Nter Nestorianæ Hæreseos Impugnatores primus occurrit S. Proclus ex Constantinopolitano Presbytero Cyzicenus Episcopus. Is præsentē, ut diximus, Nestorio, ejus errores ac blasphemias coarguit & confutavit præ.

præclara illa Homilia, *In Deiparam*, habita in Feste Annuntiationis B. Virginis anno Christi 429. Idem scripsit celebrem ad Armenos de Incarnatione Epistolam, qua Theodori Mopsuesteni, adeoque & Nestorii dogmata egregie refellit. Scriptionis ea fuit occasio, quod Diodori Tarsensis, & Theodori Mopsuesteni libris, aut Collecaneis, quæ Nestorianis consona erant dogmatibus, per Armeniam sparsis, Nestorianorum arte Acacius Melitenus, & Rabulas Edessenus Episcopi, Armenos datis litteris monuerant, de cavendo Nestorianæ Hæreseos veneno, quod sibi Theodori libris erat propinatum. Illi coacta Synodo, Presbyteros duos Leontium & Abereum Constantinopolim ad Proclum misere, cum Libellis, & Theodori Volumine, doceri expetentes quæ doctrina melior. Theodori, an Acacii, atque Rabulæ. Proclus re diligenter examinata, Tomum, seu Epistolam illam de Incarnatione ad Armenos misit, quam etiam direxit ad Joannem Antiochenum, a quo probata est. Scripsit autem, Theodosio XV. & Valentiano IV. Coss. vel post ipsorum Consulatum, ut corrigendam putat notam temporis vulgatis editionibus appositam P. Garnerius S. J. *in notis ad Liberatum*.

II. Maxima pars fuit Ecclesiasticæ de hæresi Nestoriana victoriæ S. Cyrillus Alexandrinus Episcopus, quia ipsam Epistolis, Anathematismis, Homiliis, & libris quinque contra-

traditionum adversus Nestorii blasphemias, quos ante Concilium Ephesinum conscripsit, anno 431. impugnavit.

III. Partes etiam suas hac in pugna pro Fidei defensione fortiter obiit Marius Mercator, qui & Nestorii Capitula scripto confutavit, & luculentam de XII. ejus Anathematismo Dissertationem seorsim edidit, & Epistolam de collatione errorum ipsius cum dogmatibus Pauli Samosatani. Nestorii etiam sermones, & alia plurima Nestorianam causam spectantia monumenta latine vertit, & ad posteros transmisit, quæ Joannes Garnierius Societatis Jesu Theologus edidit, Notisque ac Dissertationibus illustravit.

IV. Joannes Cassianus operam quoque navavit suam in debellanda Nestorii hæresi. Rogante enim S. Leone Romanæ Ecclesiæ Archidiacono, quo Cælestinus Pontifex in regenda Ecclesia præcipuo Administro utebatur, adversus tres Nestorii Tractatus eximium Opus de Incarnatione Christi composuit, in septem distributum libros, quos ipsi Leoni dedicavit.

V. Claruit etiam in hac acie Theodotus Ancyranus Episcopus, qui Concilio Ephesino interfuit, ibique Orationem habuit adversus Nestorium. Sed & singulari libro istum confutavit Hæresiarcam, *Non ex suo (ut ait, ingenio, sed partim ex Sacra Scriptura, partim ex Fide a Sanctis Patribus Nicææ congregatis exposita.* Hunc librum Latio donavit,

vit, ac Notis illustravit Combesius.

VI. In hac etiam adversus Nestorianos Palæstra defudavit Leontius Byzantinus, cujus librum habemus insignem sic inscriptum: *De Nestorianorum impietate secreto tradita principio, & de ejus Parentibus triumphus*: ex quo discimus impiæ factionis mysteria. Quod scilicet cum Sanctos Ecclesiæ Doctores non reciperent, se non recipere Theodorum, neque Diodorum primos impietatis suæ magistros simulabant. Quod magnifice laudabant Synodum Chalcedonensem, licet illam animo rejicerent. Quod ad suos Auctores legendos hortarentur, & si quis laudaret alios Patres ipsi reponerent: *Boni sunt isti Patres, non tamen meliores quam nostrates*. Si vero simplex ille rogaret nomina, *Lege prius*, inquebant, *& tunc cognosces, quales & quanti sint, quorum miser ne nomina quidem didicisti*.

Libris alia munera & promissa ipsos addidisse refert, ut incautum quemque in suas partes traherent; pollicitos opem Aulæ, primum gradum in Magistratibus; eruditorum quos habebant convictum; nec prius illum cui virus affare suum conabantur, dimisisse, quam succumberet, siue inscitia, siue indigentia, siue aliis, quæcumque illaqueare solent eos, qui non omni custodia cor suum custodiunt. Jam vero postquam captum tenebant, & suis obsequiis obnoxium, si Monachus esset, Vitæ Monasticæ fallidium injecisse, cujus irrisores erant

erant & obrectatores , ita ut ne nomen quidem Monachorum æquo animo pati possent . Hortobantur itaque ad mutandum habitum, quod esset ad studium virtutis Politicæ , id est , quæ in civitate versatur, impedimentum, seque eum in Clericorum ordinem cooperturos spondebant. Si autem sæcularis esset ipsi accomodata munera , & auxilium factionis pollicebantur . Refert deinde Leontius , ipsos cum viderent quotidie apud fideles iustum odium contra impia dogmata , Auctoremque dogmatum augeri , ne Præsidis sui premerentur invidia , noluisse nomine sui Auctoris appellari , sed dixisse ; *Valeat Nestorius* . Atque ut Manichæi in Electos, & Indifferentes, sic ipsos in cultores , & damnatores Nestorii divisos fuisse . Refert denique , quod cum ex fidelibus non nemo coactus esset ab ipsis ut eorum communionem foveret , ac Ecclesiæ clero nihilominus adscriberetur , ubi eum inde animadverterunt pigriorem factum , his verbis ipsi animos addidisse : *Quid mæres , si Ecclesia tamquam prætorio uteris , & clero tamquam exercitu , & fidem nostram habes , & communionem nobiscum amplecteris ?* Ille autem cum fieri non posse diceret , ut cum Ecclesia & cum ipsis communionem sacrorum mysteriorum haberet , ipsi responderunt [ut refert Leontius :] *Non oportet te moleste ferre hanc æconomiam . Panis enim in typum Corporis Christi propositus non plus benedictionis participavit , quam panis qui in foro*
ven-

venditur, & quam panes quos Philomarianita offerunt in nomine Mariæ. En fontem ex quo primum prodiit Sacramentarium, error, Eucharistiam nihil aliud esse quam typum seu figuram Corporis Christi blasphemantium.

Quamquam Nestoriani illi, quorum dogmata, mores, fraudesque detegit Leontius, a Nestorio magistro suo in dogmate de Eucharistia degeneres fuerunt. Nam realem Corporis Christi in Eucharistia præsentiam Nestorius cum tota Ecclesia professus est, quod maxime probant ea quæ habet sermonibus 2. 8. & 9. Carnem scilicet Christi ait a nobis manducari, non tamen modo quo cibus invisibilis mentium Divinitas. Interrogabat enim, cum dictum illud Christi exponeret, *Qui manducat me, & ipse vivet propter me,* utrum Divinitatem manducemus, an carnem, ut ostenderet naturas per Incarnationem non esse confusas, aut conversas, quandoquidem una manducatur, nempe caro, altera non manducatur, nimirum Divinitas. Sumit ergo quasi rem concessam, Carnem Christi a nobis manducari ad Sacramentam: alioquin stulte collegisset, naturas in Christo per Incarnationem confusas minime fuisse, ex eo quod Caro Christi, non Divinitas manducetur. In promptu enim fuisset responsio, utramque ore solo mentis, neutram ore carnis manducari. Præterea Nestorium de reali Corporis Christi in Eu-

Eucharistia præsentia cum S. Cyrillo, & cum Ecclesia Catholica sensisse, inde patet, quod nusquam ipsum de contrario dogmate coarquerit S. Cyrillus: immo ex manducatione Carnis Christi, & vi illius vivificatrice quam in nos exerit, cum ejus participatione in Eucharistia fruimur, argumentum passim desumpserit contra Nestorium. Hæc notare operæ pretium fuit, ut Nestorianos, qui Leontii tempore grassabantur, idest, sexto sæculo cadente, a Nestorii doctrina circa Eucharistiam degenerasse nemo dubitet. Leontio autem eo major fides adhibenda est in his quæ de Nestorianis sui temporis scribit, quod adolescens ab ipsis deceptus sit ac in partes abductus, ac postea divino affulgente lumine, veritatem agnoverit, & amplexus sit, ut ipse testatur.

VII. Hæresim vero Nestorianam, præter Nestorium ipsum, qui eam Epistolis, Anathematismis, Sermonibus aliisque Tractatibus vindicavit, propugnavit acriter Euthérius Tyanensis Episcopus. Is ad Eustathium Parnassi Episcopum direxit Opus in Sermones viginti distributum, quos alii S. Athanasio, alii Maximo Martyri, alii ignoto alicui tribuendos putarunt, Eutherio vero asserit P. Garnerius S. J. testimonio Marii Marcatoris, qui horum Fragmentum sub nomine Eutherii Nestorianæ partis Episcopi descripsit.

Nestorianam Hæresim Scriptis etiam suis sustentarunt Andreas Samosatensis, & Theodore.

doretus Cyri Episcopus, qui adversus XII. Anathematismos S. Cyrilli, quibus illa confodiebatur, scripserunt, quasi Apollinaris, Ariique hæresim continerent. De Theodoro scripsit Agobardus Lugdunensis Archiepiscopus contra Felicem Urgelitanum: *Inventum medium locum inter Nestorium Hæreticum, & Cyrillum Catholicum, unde pugnans pro veritate, ageret contra veritatem.* Nestorii quoque causam juvit Theodoretus in Pentalogio, id est, in quinque Libris adversus S. Cyrillum, & Synodum Ephesinam editis post Anathematismos, quorum fragmenta quædam latinitate donavit Marius Mercator.

§. X.

De Imperatorum Edictis in Nestorium, & Nestorianos.

ECclesiarum pace composita, Religiosissimus Imperator Theodosius lege lata, & directa ad Leontium P. P. anno 435. Nestorii Sectatoribus publicam infamiae notam inussit, edicens *ut Simoniani*, non Christiani vocarentur: quo modo Arianos Porphyrianos appellari sanxerat Constantinus. Vetus etiam lectionem Librorum Nestorii, eosque undequaque conquisitos ultatricibus flammis devoveri iussit. Extat exemplar Sacrae legis 3. p. Concilii Ephesini, cap. 45., & in Co-

Codice Theodosiano *de Hæreticis L. ultima*
 Cum vero Nestorius e suo lecessu Monasteriū
 Eupreprii prope Antiochiam, turbare non
 desineret, atque hæresim propugnare, Joannes
 Antiochenus conversâ vetere erga ipsum
 amicitia in justam pacis fideique ultionem, ab
 Imperatore obtinuit, ut in exilium in Oa-
 sim deportaretur. Datum est deportationis
 edictum initio anni 435 Subinde propter
 Barbarorum incursiones habitationem mutare
 coactus, variis miseriis impietatis suæ pænas
 luit, quarum historiam ex ipsius epistolis
 refert Evagrius. Tandem exesa vermibus
 lingua, quæ in Christum, & Deiparam Vir-
 ginem Mariam tam horrendas evomuerat
 blasphemias, ex hac vita ad graviora, &
 sempiterna supplicia migravit. Lege Eva-
 grium lib. 1. Historiæ Ecclesiasticæ c. 7. Qui
 tamen errat graviter, cum scribit cap. 8.
 Maximianum Episcopatum Constantinopo-
 leos non suscepisse, nisi post mortem Ne-
 storii.

DISSERTATIO

ADVERSUS HÆRESIM NESTORII.

ARTICULUS PRIMUS.

Utrum una sit in Christo persona, sive unus idemque Dei, & hominis Filius?

PROPOSITIO.

Unam esse Christi personam, naturis constantem duabus, unumque Dei, & hominis Filium Scripturæ Sacræ, SS. Patrum, & Conciliorum oraculis, adversus Nestorium evincitur.



Probatnr primo ex illis verbis Joannis 1. *Verbum caro factum est, & habitavit in nobis, &c.* ex quibus S. Leo *Sermone 7. de Nativitate* ita differit: „ Quod
 „ enim Verbum caro factum est, non hoc si-
 „ gnificat quod in carnem sit Dei natura mu-
 „ tata; sed quod a Verbo in unitate personæ
 „ sit caro suscepta: cujus utique nomine ho-
 „ mo totus accipitur, cum quo intra Virgi-
 „ nis viscera, Sancto Spiritu fœcundata, &
 „ numquam virginitate caritura, tam insepa-
 „ rabiliter Dei Filius unitur, ut qui erat in-
 „ temporaliter de essentia Patris genitus, ip-
 „ se

„ se sit temporaliter de utero Virginis natus .

II. Idem probatur ex Epistola S. Pauli ad *Philippenses cap. 2.* ubi de Christo sic loquitur :

„ Qui cum in forma Dei esset , non ra-

„ pinam arbitratus est esse se æqualem Deo :

„ sed semetipsum exinanivit , formam servi

„ accipiens , in similitudinem hominum fa-

„ ctus . „ Ubi eum qui se exinanivit , illum

ipsum esse significat Apostolus , qui antea

Deo Patri erat æqualis ; & hoc natura , non

usurpatione habuit . Ex quo loco sic differit

S. Cyrillus in Epistola 1. ad Monachos : „ At-

„ qui creata res est nulla , quæ si propria in

„ natura spectetur , æqualis Patri esse possit .

„ Quonam igitur pacto exinanitus esse dicitur ,

„ si cum natura sua esset homo , itidem ut

„ nos ex muliere natus est ? Quanam porro

„ ex antiquiore præstantia , quæ humanum mo-

„ dum excederet , ad hoc delapsus est ut ho-

„ mo fieret ? Quomodo denique intelligi

„ potest formam accepisse servi , quasi antea

„ non habuisset , qui natura sua inter servos

„ censebatur , & servili jugo erat obnoxius ?

III. Idem probatur ex Epistola ad Hebræos ,

cap. 1. & 2. ubi significat Apostolus , unum

esse , qui & *Splendor sit gloriæ* , & *figura sub-*

stantiæ Patris ; per quem *Sacula facta sunt* :

qui Angelis omnibus antecellens , ab iis ado-

retur : & qui , propterea quod *pueri* , id est

homines , *communicaverunt carni* , & *sanguini* ,

& ipse similiter participavit eisdem ; ut per

mortem destrueret eum , qui habebat mortis

impe-

imperium, id est diabolus. Unum enim & eundem esse, in quem cadit utrumque, Sanctus Paulus ibi aperte demonstrat: Quippe, qui hoc sibi illa in Epistola proposuit, ut Jesum Christum, quem hominem fuisse constabat, illis ad quos scribebat, eundem Deum, Deique naturalem Filium credendum esse ostenderet, ac adorandum.

IV. Idem probant omnia Scripturæ testimonia quæ non alium, atque alium, sed unum & eundem esse ostendunt, in quem Divinæ & humanæ naturæ proprietates conveniant. Velut quod de se ipse Christus profitetur Joannis 3. *Nemo ascendit in cælum, nisi qui descendit de cælo, Filius hominis qui est in cælo*. Item illud Apostoli ad Galatas 4. *At ubi venit plenitudo temporis, misit Deus Filium suum, factum ex muliere, factum sub lege*. Et illud ad Ephesios 4. *Qui descendit, ipse est & qui ascendit super calos, ut impleret omnia*. Ex quibus locis evidens est, non duos esse, sed unum plane qui ambo illa diversa, & contraria suscepit: ut & in cælo esset, & in cælum ascensurus postea foret: & apud Patrem ex æterno manens ab eodem missus, homo factus sit, & mortem sustinuerit. Lege S. Athanasium, in *Oratione de uno Christo*, & S. Cyrillum Alexandrinum, in *Dialogo ejusdem argumenti*.

V. Id probatur e Symbolo Nicæni Concilii, ubi post assertam Filii Divinitatem, ista subjiciuntur: *Qui propter nos homines, & propter*

pter nostram salutem descendit, & incarnatus est, & homo factus est, passus est. Ex quibus Chriti in duabus naturis unitas comprobatur. Cujus vim Professionis contra Nestorium urgent S. Cyrillus *lib. de Symbolo*, & Cassianus *lib. 6. de Incarnatione*, c. 8. Idem probatur ex Synodis Ephesina, Chalcedonensi, Oecumenica 5. &c.

VI. Id probatur ex Sancto Ignatio Martyre in Epistola ad Ephesios. *Deus noster Iesus Christus*, inquit, *in utero gestatus est a Maria, secundum dispensationem Dei ex semine David*. Et ibidem: *Singuli viri communiter omnes in gratia, ex nomine. Convenite in una Fide, & in uno Iesu Christo, secundum carnem ex genere David, Filio hominis & Filio Dei*. Quæ loca laudantur a Theodoreto, *Dialogo 1*.

VII. Ex S. Irenæo *lib. 3. cap. 18.* ubi luculenter e Scripturis adstruit, *Unum & eundem esse Verbum Dei, & hunc esse unigenitum, & hunc Incarnatum esse pro salute nostra Iesum Christum Dominum nostrum*.

VII. Ex Tertulliano ad finem libri *De Carne Christi*, ubi respiciens hæc verba Apostoli 1. ad Corinthios 8. *Unus Dominus Iesus Christus*, ita scribit: *Sicut & definiens ipsum quoque Christum unum, multiformiter Christi argumentatores quatit, qui alium faciunt Christum, alium Iesum; alium elapsum de mediis turbis, alium detentum, &c.*

IX. Ex S. Dionysio Alexandrino in Epistola Synodica ad Paulum Samosatenum, ubi

Hæresiarcam illum redarguit, *Duas hypostas-
ses, & duas personas asseverantem unius Christi;
sive Christos duos, duosque Filios. Quod ube-
riori disputatione refellit.*

X. Ex S. Athanasio in libello de Incarna-
tione: *Sicut, inquit, homo persona est una,
& animal unum e spiritu & carne concretum:
ita Christus intelligi debet unus esse, & non
personæ duæ: quod recens impietas violenter
invehere conatur.*

XI. S. Gregorius Nazianzenus Oratione,
31. *Non duo factus, inquit, sed unum ex
duobus fieri sustinens. Deus enim ambo sunt,
id quod assumpsit, & quod est assumptum: Na-
turæ duæ in unum concurrentes; non duo filii.
Nolo contemperationem illam e mentita ratione
quispiam explicet.*

XII. Ex Sancto Hilario libro 19. de Tri-
nitate. „ Medi ator ipse (inquit) in se ad sa-
„ lutem Ecclesiæ constitutus, & illo ipso in-
„ ter Deum & hominem Mediatoris Sacra-
„ mento utrumque unus existens, dum ipse
„ ex unitis in idipsum naturis naturæ utrius-
„ que res eadem est, ita tamen ut neutro
„ careret in utroque, ne forte Deus esse,
„ homo nascendo desineret, & homo rur-
„ sum Deus manendo non esset.... Hinc
„ itaque fallendi simplices atque ignorantes,
„ Hæreticis occasio est, ut quæ ab eo secun-
„ dum hominem dicta sunt, dicta esse se-
„ cundum naturæ divinæ infirmitatem men-
„ tiantur; & quia unus atque idem est loquens,

„ om.

„ omnia quæ loquitur , de semetipso omnia
 „ eum locutum esse contendunt . Nec sane
 „ negamus , totum illum qui ejus manet ,
 „ naturæ suæ esse sermonem . Sed si Jesus
 „ Christus & homo & Deus est , & neque
 „ cum homo , tum primus Deus , neque cum
 „ homo , tum non etiam & Deus ; neque
 „ post hominem in Deo non totus homo , to-
 „ tus Deus , unum atque idem necesse est
 „ dictorum ejus Sacramentum esse quod ge-
 „ neris . „ Quo loco & duarum post Incar-
 nationem integritas naturarum & unitas per-
 sonæ luculenter asseritur .

XIII. Ex S. Ambrosio *lib. de Incarnatione* ,
cap. 5. dicente , adversus omnes hæreses ge-
 neralem hanc esse Fidem : „ Quia Christus
 „ est Dei Filius , & sempiternus ex Patre &
 „ natus ex Virgine . Quem quasi gigantem
 „ Sanctus David Propheta describit , eo quod
 „ biformis geminæque naturæ unus sit consors
 „ Divinitatis & corporis ; qui tamquam Spon-
 „ sus procedens de thalamo suo exultavit ut
 „ gigas ad currendam viam : Sponsus animæ
 „ secundum Verbum : Gigas terræ , quia usus
 „ nostri officia percurrens , cum Deus semper
 „ esset æternus , Incarnationis Sacramenta su-
 „ scēpit , non divisus , sed unus : quia utrumque
 „ unus & unus in utroque , hoc est , vel Divini-
 „ tate , vel corpore . Non enim alter ex Pa-
 „ tre , alter ex Virgine , sed idem aliter ex
 „ Patre , aliter ex Virgine . Generatio gene-
 „ rationi non præjudicat , nec caro Divinitati .

XIV. Ex S. Hieronymo, In cap. 1. Epistolæ ad Ephesios, ubi ait: „ Benedictus Deus
 „ ejus qui assumptus est hominis, & Pater
 „ ejus qui in principio apud Deum fuit Deus
 „ Verbum. Non quo alius assumptus homo
 „ & alius sit Sermo, qui assumpserit: sed quo
 „ unus atque idem, pro varietate causarum,
 „ nunc sublimis, nunc humilis prædicetur.

XV. Ex S. Augustino in libro de Correptione, & Gratia, cap. 11. „ Deus (inquit)
 „ naturam nostram, id est, animam rationalem,
 „ carnemque hominis Christus suscepit
 „ susceptione singulariter mirabili, vel mirabiliter
 „ singulari, ut nullis justitiæ suæ præcedentibus
 „ meritis, Filius Dei sic esset ab initio
 „ quo esse homo cœpisset, ut ipse, & Verbum
 „ quod sine initio est, una persona esset.

XVI. Id probatur ex Theodoto Ancyrano in Homiliis; ex Sancto Cyrillo, in Epistolis, Anathematismis, & Libris; ex Proclo; ex Paulo Emisseno in Homiliis duabus Alexandriæ pronuntiatis; ex Orientalium Confessione, quæ incipit, *Latentur cali*: & ex ceteris Patribus, qui Concilium Ephesinum secuti sunt, quos recensere longum esset.

Objicies. Humanitas Christi per se ac proprie subsistit: est igitur in Christo persona humana, adeoque duæ personæ.

Probatur antecedens. Si proprie ac per se non subsisteret Humanitas Christi, non esset actu substantia. Id autem asserere erroneum est.

Præ-

Præterea . Si humanitas Christi propria subsistentia destituta esset , manca foret , ac imperfecta, ut quæ ultimo careret complemento.

Respondeo ad primum , nego antecedens . Nec ideo sequitur naturam humanam Christi esse non subsistentem, neque actu substantiam, quia in alio subsistit , scilicet in Verbo, nec ipsi tamquam accidens inhæret . Reipsa enim & actu , propriaque vi subsistere non pertinet ad essentiam substantiæ ; sed solum ut sit per se subsistendi capax , si sibi relinqueretur . Fulcitur hæc responsio insigni loco S. Joannis Damasceni lib. 3. *de Fide Orthodoxa* , cap. 9.

„ Quamvis (inquit) non sit natura ulla quæ
 „ non subsistat , neque substantia , quæ non
 „ sit persona , siquidem in hypostasibus &
 „ personis substantia & natura spectatur, non
 „ tamen necesse est naturas inter se hypostasi
 „ capulatas , propriam obtinere singulas hypostasi
 „ sim concurrentes , neque non subsistentes
 „ esse , neque propriam unaquæque hypostasi
 „ sim habere : sed ambæ unam & eandem .
 „ Eadem quippe Verbi hypostasis , ambæ
 „ rum facta naturarum hypostasis, neque subsistentiæ
 „ quampiam illarum expertem esse
 „ finit : neque tamen diversa ad se invicem
 „ hypostasi patitur subsistere . Sed nec alias
 „ itius , alias illius ; sed semper ambarum ,
 „ citra divisionem ac separationem , hypostasis
 „ est, non partita , nec divisa ; neque
 „ partem suimet huic, partem alteri tribuens:

„ verum tota hujus , & tota illius , pro indi-
 „ viso est , & integre . Non enim propria vi
 „ consistens Dei Verbi caro subsistit , nec al-
 „ tera facta hypostasis , præter hypostasim
 „ Dei Verbi : sed in ipsa subsistens ad hypo-
 „ stasim magis adjuncta , quam proprio modo
 „ consistens hypostasis est facta . Ideo non
 „ diversam in Trinitatem hypostasim inducit .

Respondeo ad secundum , nego consecutionem . Illud enim cui nulla perfectio substantiva deest , sed adventitia tantum , & quæ ex proprietatum complexione , quæ extra naturam sunt rei , petitur , mancum & imperfectum dici non potest , præsertim si quæ deest perfectio , aliunde excellentius suppleatur . At subsistentia istius generis perfectio est , cum sit ultimum substantiæ jam existentis complementum . Hæc responsio colligitur ex Leontio Byzantino , in calce libri *Solutionum argumentorum Severi*, dicente : „ Sed hoc ad-
 „ vertere oportet , quod hypostasis non sim-
 „ pliciter , neque præcipue perfectum de-
 „ clarat ; sed quod per se existat : secundo
 „ autem loco , perfectum . Natura vero quod
 „ per se existit nequaquam declarat ; proprie
 „ autem perfectum . Siquidem proprietates ,
 „ quæ ad rationem hypostasis sumuntur , fa-
 „ ciunt , esse unumquemque aliquem ab ali-
 „ quibus : Quæ vero sumuntur ad rationem
 „ naturæ , non faciunt esse aliquem , sed ali-
 „ quid ab aliquo . *Addit subinde* : Hoc etiam
 „ non est ignorandum , quod ea quæ naturam
 „ „ signant ,

„ signant , constituunt substantiam ; quæ au-
 „ tem signant hypostasim , velut accidentium
 „ rationem habent , sive sint separabilia , si-
 „ ve inseparabilia . „ Actualis itaque sub-
 „ sistentia non pertinet ad perfectionem essentia-
 „ lem naturæ : unde humanitas Christi non est
 „ imperfecta , etsi propria substantia destituta
 „ sit : maxime cum naturalis inferiorque sub-
 „ stitendi modus , potiore & digniore pensetur ,
 „ scilicet substantia Verbi Divini . Hinc Theo-
 „ dorus Presbyter libro de Incarnatione : „ Qui-
 „ nam (inquit) hæc in Christo humanitas ,
 „ quæ in propria hypostasi per se ipsam num-
 „ quam fuit , sed in Deo Verbo quod eam
 „ assumpsit , esse & subsistere sortita est , sub-
 „ stitencia vocari posset umquam , aut perso-
 „ nam proprie substantem , ac per se sese &
 „ seorsim cognitam haberet ? „ Hinc & Fer-
 „ randus Diaconus in Epistola ad Severum ait :
 „ Non utique personam aliam suscepit , quia
 „ non hominem paratum invenit ; sed natu-
 „ ram potius humanam , in qua ipse Deus
 „ homo nasceretur , invenit . Habuit igitur
 „ humana natura , ex quo est creata , perso-
 „ nam sed unam cum Deo , qui eam susci-
 „ piendo creavit . Tu proinde quisquis huic
 „ Fidei contradicis , ostende mihi in Christo
 „ sine Divinitate aliquando humanitatem ;
 „ & tunc fatebor quod habuerit propriam
 „ etiam sola humana natura personam . Quia
 „ vero Divinitas quidem Verbi Dei sine hu-
 „ manitate fuit ; humanitas vero sine Divi-

, nitate numquam fuit, ideo habuit divina
 , natura personam, quam humanæ naturæ,
 , quando eam suscepit, indulgit: ut & natu-
 , ra suscepta, sine ulla confusione, ineffa-
 , biliter adunata, unius crederetur esse per-
 , sonæ.

Objicies. De eadem persona contraria enuntiarī non possunt: atqui de Christo contraria enuntiantur; dicitur enim creatus & increatus, patibilis & impatibilis, Deus & homo. Itaque non est unica in Christo persona.

Respondeo, distingo majorem: De eadem persona contraria enuntiarī non possunt, secundum eandem naturam, concedo; secundum diversas naturas, nego. Itaque ex arctissima naturarum duarum in una Verbi persona conjunctione, communicatio mutua proprietatum oritur, quam idiomatum communicationem Theologi de Schola vocant: qua fit ut & naturæ inter se, quæ cuique peculiarī sunt, tamquam propria usurpent: & uni eidem personæ, tum sigillatim, tum simul omnia tribuantur, non diversa modo, sed etiam sibi invicem contraria. Hanc idiomatum communicationem, vimque illius multis veterum Patrum testimoniis probat & exponit Petavius S. J. Theologus, *lib. 4. Dogmatum Theologicorum de Incarnatione, cap. 15. & 16.*

Objicies. Persona est rationalis naturæ individua substantia; atqui natura humana in Christo est rationalis naturæ individua substantia.

stantia : in Christo igitur est humana persona.
 • Probatur Minor . Christus enim humanam naturam communem multis & universalem non assumpsit , sed singularem .

Respondeo , in definitione personæ individuum substantiam intelligi eam quæ seorsim existat , & quæ sit prorsus incommunicabilis alteri , non solum ut universalis naturæ inferioribus , sed & eo modo quo pars toti ; aut natura supposito communicatur . Quamobrem cum humanitas Christi reipsa communicetur Verbo divino , nec in se & seorsim consistat , sui que sit juris ; sed ab aliquo digniore , scilicet a persona Filii Dei assumpta fulciatur , non est in Christo humana persona quamvis individua sit natura humana eo sensu , quo una numero natura est , & ab reliquis distincta certis proprietatibus , quas Philosophi individuantes vocant . Hinc S. Joannes Damascenus *lib. 3. cap. 11.* ait Verbum divinum assumpsisse naturam hominis , non qua universalis est , aut qua in multis inest ; „ Sed quæ in uno „ est individuum . Non enim hoc modo significare individuum , sicut hypostasim proprie ac solum , neque quod hypostasibus est „ commune ; sed communem naturam in una „ hypostaseon consideratam . „ Quamvis alio sensu Christum individuum esse neget S. Joannes Damascenus , quia scilicet non est communis species naturæ quæ sit ex Divinitate & humanitate composita , in cujus adeo individuis omnibus naturæ duæ inconfusæ in

unum aliquod singulare convenient. „ In
 „ Jesu-Christo (inquit lib. 3. cap. 3.) non
 „ potest communis accipi species . Non enim
 „ fuit , aut est , aut erit aliquando Christus
 „ alius ex Divinitate & humanitate in Divi-
 „ nitate & humanitate Deus perfectus , idem
 „ & homo perfectus . Hinc nefas est dicere
 „ unam naturam in Domino nostro Jesu Chri-
 „ sto , sicut in individuo aliquo , quod ex
 „ anima & corpore componitur : ut eodem
 „ modo in Christo ex Divinitate & humani-
 „ tate sit aliqua composita natura . Nam il-
 „ lic individuum est : Christus autem non est
 „ individuum . Non enim speciem habet hu-
 „ jusmodi Christeitis (ita ut loquar) quæ
 „ de se prædicetur .

Sanctus etiam Anselmus negat hunc ho-
 minem a Verbo assumptum , quia indivi-
 duum humanæ naturæ cum persona confun-
 dit . Sic enim habet *lib. de Incarnatione ,*
cap. 5. „ Cum profertur homo , natura tan-
 „ tum , quæ communis est omnibus homini-
 „ bus , significatur . Cum vero demonstrati-
 „ ve dicimus , istum , vel illum hominem ,
 „ vel proprio nomine Jesum , personam de-
 „ signamus : quæ cum natura collectionem
 „ habet proprietatum , quibus homo com-
 „ munis sit singularis , & ab aliis singulis di-
 „ stinguatur . Nam cum ita designatur , non
 „ quilibet homo intelligitur ; sed qui ab An-
 „ gelo nuntiatus est , qui Deus , & homo ,
 „ Filius Dei , Filius Virginis est : & quid-
 „ „ quid

„ quid de illo dicitur , aut secundum Deum ,
 „ aut secundum hominem , verum est dice-
 „ re . Non enim idem est homo , & assum-
 „ ptus a Verbo homo , id est , Jesus : quo-
 „ niam in nomine hominis sola intelligitur
 „ natura : in assumpto vero homine , vel in
 „ nomine Jesu , intelligitur cum natura , id
 „ est , cum homine , collectio proprietatum ,
 „ quæ est eadem eidem assumpto homini &
 „ Verbo . „ Non tamen dubitavit S. Augu-
 „ stinus naturam hominis assumptam dicere
 „ istum hominem , lib. *de Prædestinatione San-*
ctorum , cap. 15. „ Respondeatur , quæso
 „ (inquit) ille homo , ut a Verbo Patri coæ-
 „ terno in unitatem personæ assumptus , Fi-
 „ lius Dei unigenitus esset : unde hoc me-
 „ ruit ? „ Exorta nihilominus Hæresi Ne-
 „ storiana , major cautio circa hunc loquendi
 „ modum adhibita est : unde Sanctus Cyrillus
 „ Alexandrinus in *Epistola ad Valerianum* , re-
 „ fellit quod Nestoriani effutiebant , *Deum &*
hominem simul convenientes , unum efficisse
Christum ; His enim verbis *Utriusque salvam*
hypostasim esse significabant , minime confu-
sam , sed ratione divisam , ut idem Sanctissi-
 „ mus Pater notat .

Objicies . Si unica esset in Christo perso-
 „ na , Christus recte dici posset *Unus de Sancta*
Trinitate , & asseri *Unum de Trinitate esse*
passum . Id autem falsum est . Nam hujus-
 „ modi locutiones damnatæ sunt erroris in Mo-
 „ nachis Scythiæ ab Hormisda Pontifice Maxi-

mo. Igitur non est unica in Christo persona.

Respondeo, nego minorem. Non enim Hormisdas propositiones illas damnavit, sed Scytharum Monachorum temeritatem, ac pertinaciam, qui illas Concilii Chalcedonensis Definitioni esse necessario addendas contendebant, quæ accessione ista, quasi manca & minime absoluta perfici & compleri opus habuisset. Ceterum hanc loquendi rationem Ecclesia recepit ac approbavit, ut patet ex V. Synodo *Canone 4. & 5.* & Joanne II. Romano Pontifice in Epistola ad Justinianum, in qua illud profitentem Imperatorem collaudat, & Acæmetas Monachos contra sentientes condemnat: tum ex Epistola ejusdem Pontificis ad Senatores. Item ex Epistola Pelagii I. ad Childebertum Francorum Regem data. Has sententias esse apprimè Catholicas Sanctorum etiam Patrum testimonia probant, quibus Joannes Maxentius illas defendit, scilicet S. Procli, S. Augustini in *Enchiridio cap. 36. & lib. 2. de Trinitate, cap. 10.* His adde S. Fulgentium *lib. de Fide ad Petrum cap. 13.* Ferrandum Diaconum in *Epistola ad Anatolium*, Facundum Hermianensem *lib. 1. pro defensione Concilii Chalcedonensis.* Cum autem dixerunt *Unum de Trinitate esse passum*, nihil intellexerunt aliud, quam *Filium Dei passum esse carne*: Hacque enuntiatione caverunt, *Ne putaretur homo purus Passionis tolerasse injurias*; ut Ferrandus Diaconus exponit. Singularem de
hac

hac controversia Disputatio in Scholis instituitur .

Dices . Si unica sit in Christo persona, Filius Dei passus est , adeoque passa est Divinitas .

Respondet Vigilus Tapsensis libro 2. Passum esse Dei Filium *in unione personæ , non in proprietate naturæ . Siquidem passionis injurias etiam Divinitas pertulit , sed passionem sola ejus caro persensit : Sicuti solis radium , vel flammæ corpulentiam recte dicimus posse gladio secari , non posse tamen dirimi . Ita Verbum Dei jure dicimus passionis injurias pertulisse , non tamen passionem sensisse . Ita ergo suscipiendo passiones , & earum non cedendo affectibus , apparet Deum Verbum impassibiliter passum . Sed quia caro ejus non solum pertulit , sed & sensit , & cessit , merito ac jure dicimus , Dominum his omnibus passionum conditionibus sensibiliter affectum in carne sua , sine sensu vel mutatione Divinitatis suæ . Ergo perferre passionem , naturæ est utriusque ; sed cedere passioni , non est utriusque naturæ , cum sit unius denique personæ .*

Explicat egregie idem Auctor lib. 5. quæ ratione aliquid Christo proprium est , & aliquid commune . „ Diversum est , inquit , atque alienum , initium non habere , & ex initio subsistere ; mori , & mori non posse : & tamen sicut ipsi Christo proprium est utrumque , ita non ipsi , sed in ipso utrumque est commune . Si enim dicamus , quia

» quia ipsi est commune , necesse est ut exi-
» gatur a nobis , dare & ostendere alium ,
» cum quo ei sit hoc ipsum commune : Quæ
» professionis necessitas in Nestorii vergit
» impium dogma . Melius igitur & Catho-
» lice dicimus , in ipso & non ipsi esse com-
» mune . Ergo proprium est illi mori , pro-
» pter naturam carnis quæ mortalis est : &
» proprium est illi non mori , propter natu-
» ram Verbi , quæ mori non potest . Item
» propter ineffabile mysterium unionis , com-
» munis in ipso fuit mortalitas carnis Verbi
» naturæ quæ mori non potuit : & commu-
» nis in ipso est immortalitas Verbi natu-
» ræ carnis , quæ morti succubuit . Ergo si-
» cut illi mori , & non mori , ex utrisque
» naturis , est proprium : ita commune est
» in ipso utrisque naturis , quod illarum est
» proprium . Et ut exempli gratia dixerim :
» Proprium mihi est notam livoris cujusque
» verberis gestare in corpore meo , per na-
» turam carnis meæ : & proprium mihi est
» hanc eandem notam non gestare in spiri-
» tu meo , per naturam animæ meæ . Item
» proprium mihi est , plagam verbi , id est ,
» sermonem durum , gestare in mente mea
» per naturam animæ meæ : & proprium
» mihi est eandem plagam non portare in
» corpore meo , per naturam carnis meæ .
» Et cum sit mihi utrumque proprium ; &
» corpori , & animæ meæ utrumque alie-
» num : quia nec durum corpus , latumve
» ser-

„ sermonem intelligit , nec anima flagelli
 „ vulnere livescit : utrumque tamen com-
 „ mune est in me ipso & animæ , & corpori
 „ meo : quia nec anima extra corpus sit ,
 „ & quod ei sentire proprium fuerat , sentit ;
 „ nec corpus extra animæ consortium plaga-
 „ rum indicia gestavit .

ARTICULUS SECUNDUS.

*Utrum Beatissima Virgo Maria vere proprie-
 que dicenda sit Mater Dei ?*

PROPOSITIO.

*Mariam Virginem verissime proprieque Ma-
 trem Dei esse ac dici debere , docet
 ac tuetur contra Nestorium
 Catholica Fides .*

P Robatur primo ex Apostolo ad Romanos
 1. scribente *Filium Dei factum esse ex se-
 mine David secundum carnem* . Ex semine
 vero Davidis genitus intelligi non aliter po-
 test , nisi quatenus ex Virgine Matre natus .
 Nam si nihil ex Virginis substantia Dei Fi-
 lius sumpsit , non est factus , *ex semine* , id
 est , stirpe Davidis . Quis enim Evam de A-
 dami semine factam dixerit ? Nemo sane .
 Eccur ? Quia nempe ex semine fieri , non
 merum transitum significat , sed substantivam
 veramque generationem .

Idem

Idem probant illa ex Epistola ad Galatas , cap.4. *Misit Deus Filium suum factum muliere.* Græce habetur , *γενόμενον* , que vox generationem significat . Nam *γένεσις* est generatio .

Probatur secundo testimoniis Veterum Patrum , qui Concilium Ephesinum præcesserunt . Scilicet S. Ignatii Martyris in Epistola ad Ephesios : *Deus noster* , inquit , *Iesus Christus a Maria in utero gestatus est* . Ibidem : *Unus est Medicus carnalis & spiritalis factus & non factus* , qui in carne fuit Deus in immortali veraque vita , & ex Maria , & ex Deo .

Idem probatur ex S. Justino Martyre in Dialogo cum Tryphone , ubi ait : *Christum prius extitisse Filium Conditoris omnium , ac Deum* , qui genitus est homo per Virginem , eidem nobiscum patiendi legi subiectus , & carnem habens .

Idem ex S. Irenæo , lib.3. cap.31. „ Verbum (inquit) existens ex Maria , quæ ad-
 „ huc erat Virgo , recte accipiebat genera-
 „ tionem Adæ recapitulationis . Si igitur
 „ primus Adam habuit Patrem hominem , &
 „ ex semine viri natus est ; merito dicerent,
 „ & secundum Adam ex Joseph esse gene-
 „ ratum . Si autem ille de terra quidem sum-
 „ ptus est , & Verbo Dei plasmatus est , o-
 „ portebat idipsum Verbum recapitulatio-
 „ nem Adæ in semetipsum faciens , ejusdem
 „ generationis habere similitudinem . Quare
 „ igit-

„ igitur non iterum sumpsit limum Deus ,
 „ sed ex Maria operatus est plasmationem ?
 „ ut non alia plasmatio fieret ; neque alia
 „ esset plasmatio , quæ salvaretur , sed ea
 „ dem ipsa recapitularetur servata similitu-
 „ dine . „ Verbum æternum exitit ex Ma-
 „ ria Virgine , secundum S. Irenæum ; id est ,
 „ de illius substantia formatum est , quemad-
 „ modum de terræ substantiæ factus est Adamus .
 „ Hac enim ratione recapitulatur , id est , in-
 „ stauratur ac reficitur prior illa in vitium pro-
 „ lapsa generatio . Hunc S. Irenæi locum lau-
 „ dat Theodoretus *Dialogo* 1.

Idem suadet S. Hippolytus Martyr ab eo-
 dem Theodoro laudatus . „ Dic mihi (in-
 „ quit) o Beata Maria ; quid erat , quod a
 „ te in utero conceptum est , & quid a te in
 „ Virginea matrice gestabatur ? Verbum
 „ enim erat Dei primogenitum e cælo in te
 „ delapsum , & homo primogenitus in ute-
 „ ro formatus : ut primogenitum Dei Ver-
 „ bum primogenito homini copulatum o-
 „ stenderetur .

Idem S. Dionysius Alexandrinus in Episto-
 „ la contra Paulum Samosatenum . „ Una (in-
 „ quit) sola Virgo filia vitæ , genuit vivens
 „ Verbum , & subsistens . *Ibidem* : Quoniam
 „ tu dicis hominem eximium Christum , &
 „ non Deum verum existentem , & adora-
 „ tum ab universa creatura cum Patre & Spi-
 „ ritu Sancto , incarnatum e Sancta Virgine
 „ & Dei genitrice Maria ?

Sic

Sic Tertullianus lib. *de Præscriptionibus*, cap. 13. „ Regula autem est Fidei, ut jam „ tunc quid credamus profiteamur; illa sci. „ licet, qua creditur Unum omnino Deum „ esse, nec alium præter mundi Condito- „ rem, qui universa de nihilo produxerit, „ per Verbum suum primo omnium emis- „ sum. Id Verbum Filium ejus appellatum, „ in nomine Dei varîe visum Patriarchis, in „ Prophetis semper auditum: Postremo de- „ latum ex Spiritu Dei Patris & virtute in „ Virginem Mariam, carnem factum in u- „ tero ejus, & ex ea natum hominem, & „ esse Jesum Christum. „ Et lib. *de Carne Christi*, cap. 17. „ Ante omnia (inquit) „ commendanda erit ratio quæ præfuit, ut „ Dei Filius de Virgine nasceretur.

Sic Lactantius lib. 4. *Divinarum Institutionum*, cap. 12. „ Descendens itaque de cælo „ (inquit) Sanctus ille Spiritus Dei, San- „ ctam Virginem cujus utero se insinuaret, „ elegit. At illa divino Spiritu hausto reple- „ ta concepit, & sine ullo attactu viri, re- „ pente Virginalis uterus intumuit.

Sic S. Athanasius Oratione 4. contra Arianos: *Itaque divinæ Scripturæ scopus iste est, & formula propria, ut duplicem agnoscamus in ea de Salvatore loquendi rationem: Nimirum tum Filium fuisse semper & esse Deum; qui sit Verbum & splendor ac sapientia Patris: tum postea propter nos eundem illum assumpta carne de Virgine Dei genitrice Ma-*
ria,

ria, hominem esse factum.

Sic S. Cyrillus Hierosolymitanus Catechesi 4. *Crede hunc unigenitum Dei Filium, propter peccata nostra e caelo in terram descendisse, & assumpsisse iisdem nobiscum subiectam affectionibus humanitatem, & ex Sanctæ Virgine ac Spiritu Sancto esse genitum.*

Sic S. Basilii Homilia 25. de humana Christi generatione, B. Virginem *θεοτόκον* appellat.

Sic S. Gregorius Nazianzenus Epistola 1. ad Cledonium, a Divinitate separat eos, *Qui Dei genitricem Mariam esse non existimant.*

Sic S. Hilarius lib. 9. de Trinitate. *Natus igitur Deus ex Virgine homo, & secundum plenitudinem temporum in semetipso proventus in Deum hominem.*

Sic Julius Firmicus libro *De Errore Profanarum Religionum*, c. 26. *Ex genere Abrahæ descendens Maria Virgo Deum concipit, ut humanum genus per hominem pariter & Deum æquata societatis comparatione conjunctum, ad immortalitatis imperium obedientiæ merito perveniret.*

Sic S. Ambrosius lib. de Incarnatione c. 5. *Non enim alter ex Patre, alter ex Virgine; Generatio generationi non præjudicat.*

Sic S. Joannes Chrysostomus Homilia 2. in Matthæum: *Valde, inquit, auditu mirum & inusitatum est, Deum inaccessum, & ineffabilem, & qui mente comprehendi nequit, ac Patri æqualem, per uterum venisse Virgineum,*

neum, & ex muliere gigni voluisse; & habere stirpis auctores Davidem & Abrahamum.

Eundem titulum Θεοτόκου in Beatam Virginem conferunt Amphilocheus *Oratione* 4. Antiochus & Ammon a Sancto Cyrillo laudati in libro *De recta Fide*.

Sic Sanctus Hieronymus lib. contra Helvidium, *Natum*, inquit, *Deum esse de Virgine credimus, quia legimus.*

Sic S. Augustino adscriptus *Sermo* 15. de Tempore. *Creatorem invisibilem pro nobis visibilem factum, a quo invisibili & ipsa creata est, visceribus fecundis, & genitalibus integris Virgo mater effundit. Concipiens Virgo, pariens Virgo, Virgo gravida, Virgo facta, Virgo perpetua. Quid miraris hæc, homo? Deum sic nasci oportuit, quando esse dignatus est homo. Talem fecit illam, qui est factus ex illa. Antequam fieret enim, erat; & quia omnipotens erat, fieri potuit manens, quod erat. Fecit sibi matrem, cum esset apud Patrem, & cum fieret ex matre, mansit in Patre.*

Et infra: *Quomodo in Regula Fidei confitemur credere nos Filium Dei, qui natus est ex Virgine Maria? Quis enim Christianus negat ex illa femina Filium hominis natum, sed tamen Deum hominem factum, & ita hominem Deum factum?*

Sic rursus e Græcis S. Ephrem Syrus in *Oratione De Margarita pretiosa*, explicans illa

illa verba Gabrielis Angeli ad B. Virginem,
Lucæ 1. relata : Ideoque & quod nascetur ex
te Sanctum vocabitur Filius Dei. Non dixit,
Quod genitum fuerit, iterum gignetur : neque
dixit, Quod nascetur ex virtute, vel Spiritu
Sancto : sed, ex te, ut Virginis naturam,
ostenderet Deitati ministrantem, assumptionemque in ipsa,
& ex ipsa Deo conjunctam. Nisi enim dixisset, Quod nascetur ex te,
fortasse figuram existimatum fuisset Verbum
assumpsisse.

Sic Proclus Cyzicenus Episcopus *Oratione*
1. In Sanctam Virginem, quæ initio Ephesi-
 næ Synodi perfixa est. „ Sacra Deipara Ma-
 „ ria in unum nos coegit. Hæc illibata vir-
 „ ginitatis purus ille thesaurus, decusque &
 „ ornamentum ; hæc spiritalis secundi Ada-
 „ mi paradisus ; hæc unitarum inter se na-
 „ turarum officina : hæc salutaris reconcilia-
 „ tionis panegyris ; hæc thalamus in quo
 „ Verbum humanum carnem sibi desponsa-
 „ vit : hæc animatus naturæ rubus, quem
 „ divini partus ignis non combussit : hæc
 „ vere levis illa nubes, quæ super Cheru-
 „ bim sedentem in corpore suo gestavit : hæc
 „ vellus mundissimum cælesti pluvia ma-
 „ dens, ex quo Pastor ovem induit : hæc
 „ ancilla est & Mater, Virgo, & cælum :
 „ hæc sola pons est per quem Deus ad homi-
 „ nes descendit : hæc admirandæ illius æco-
 „ nomia tela in qua ineffabili quodam modo
 „ admirabilis illius unionis tunica confecta
 „ est,

„ est, cuius quidem textor extitit Spiritus
 „ Sanctus ; nutrix, virtus ex alto obum-
 „ brans ; lana vetusta Adami pellis ; trama,
 „ impolluta Virginis caro ; radius textorius,
 „ immensa gestantis gratia ; artifex, Verbum
 „ per auditum illapsum . Quis vidit, quis
 „ audivit alia ? Incircumscriptus Deus ute-
 „ rum inhabitat ; quem cæli non capiunt,
 „ venter non coangustavit Virginis .

Sic Theodorus Ancyranus in expositione
 Symboli Nicæni : „ Sancti Patres, post
 „ Dei cum homine unionem, non jam am-
 „ plius duas res intelligentes, merito Jesum
 „ dicentes, Deum Verbum designant, atque
 „ juxta Theologum (*id est S. Joannem*) lo-
 „ quens, Jesum oculis conspicuum, Ver-
 „ bum interpretantur : Non confundentes
 „ naturas, sed unionem ostendentes . Pro-
 „ pterea Jesum Mariæ Filium, ex Deo na-
 „ tum, & non factum ac Dominum gloriæ
 „ crucifixum Sacræ Litteræ loquuntur .

Et infra : „ Neque vero passibile aliqua
 „ ratione est passibile, quam quod natura,
 „ quæ pati potest præditum est . Nam neque
 „ Virgo ejusmodi est, quæ hominem pariat.
 „ Non enim partus capax est, quæ ipsa per-
 „ severet virginitas . Atqui Maria Deum,
 „ Verbum factum hominem peperit, inte-
 „ gra virginitate .

Sic S. Cyrillus Alexandrinus, lib. De
 Recta Fide ad Reginas. *cap. 6.* „ Illi autem
 „ qui sacram Virginem Deiparam esse im-

„ pe-

„ perite negant , huc necessario adiguntur ,
 „ ut duos Dei Filios constituent . Nam si sa-
 „ cra Virgo Deum incarnatum secundum car-
 „ nem non peperit , vel inviti concedant o-
 „ portet hominem tantum vulgarem , nobis-
 „ que excellentiorem in lucem edidisse . *Et*
 „ c. 9. Porro autem vocem hanc , *Deipara* ,
 „ vereribus Patribus quorum sanctimoniam
 „ & Fidei integritatem admiramur , nec non
 „ omnibus eos deinceps hucusque sunt secu-
 „ ti per universum (ut ita dicam) terrarum
 „ orbem , familiarem esse ostendendum exi-
 „ stimavi . „ Tum subjicit testimonia Pa-
 „ trum , quibus Catholicum istud dogma appro-
 „ batur , scilicet Sancti Athanasii , Attici Con-
 „ stantinopolitani Episcopi , Antiochi , Amphi-
 „ lochii Episcopi Iconiensis , Ammonis Epi-
 „ scopi Adrianopoleos , Joannis Chrysostomi ,
 „ Severiani Gaballorum , Vitalii Episcopi , &
 „ Theophili Alexandrini .

Eorundem Patrum auctoritatem , & totius
 Ecclesiæ Fidem urget contra Nestorium , in
 Epistola ad Acacium Episcopum Beroëensem ,
 additque : *Denique nemo , opinor ex Orthodo-*
xorum numero illam Deiparam nominare dubi-
tavit ; quandoquidem verum est , Emmanue-
lem Deum esse . Erunt itaque anathemate con-
stricti SS. Patres qui jamdudum ante ad Deum
evolarunt , ceterique omnes quotquot Chri-
stum Deum esse confessi , recta veritatis dogma
consecrantur .

Et in Epistola 3. ad Nestorium , cap. 11.

Quia

Quia vero sacra Virgo Deum carni secundum hypostasim unitum corporaliter genuit, ob id illam quoque Deiparam esse dicimus; non quod Dei Verbi natura existendi initium ex carne traxerit; sed quia humana natura secundum hypostasim sibi unita, corpoream ex utero nativitatem expertum est. Et Anathematismo 1. Si quis non confitetur, Emmanuelem verum Deum esse, & ob id Sanctam Virginem Deiparam; (genuit enim illa incarnatum Dei Verbum secundum carnem) anathema sit. Idem Fidei dogma tuetur in omnibus scriptis contra Nestorium.

Ipsi suffragatur Joannes Antiochenus in Epistola ad Nestorium. „ Etenim nomen „ hoc Θεοτόκος (inquit) nullus unquam Ec- „ clesiasticorum Doctorum repudiavit. Qui „ enim illo usi sunt, & multi reperiuntur, „ & apprime celebres: qui vero illud non „ usurparunt, numquam erroris alicujus eos „ insinularunt, qui illo usi sunt..... Et „ infra. Etenim si id quod nominis signifi- „ catione offertur non recipimus, restat ut „ in gravissimum errorem prolabamur; im- „ mo vero ut inexplicabilem illam unige- „ niti Filii Dei œconomiam abnegemus: „ quandoquidem nomine hoc sublato, vel „ hujus potius nominis notione repudiata, „ sequitur mox illum non esse Deum, qui „ admirabilem illam dispensationem nostræ „ salutis causa suscepit; tum Dei Verbum „ neque se exinanivisse, neque in servi for- „ mam

N E S T O R I A N A .

„ mam sese dimittens ineffabilem quandam
 „ benignitatis magnitudinem humano generi
 „ exhibuisse . Cum tamen Dei erga nos cle-
 „ mentiam divinæ Scripturæ hinc præcipue
 „ confirment , quod unicum illum sempiter-
 „ numque Dei Filium ante omnia sæcula na-
 „ tum , impatibili modo ex sacra quoque
 „ Virgine ortum ostendunt . Huc namque di-
 „ vinus tendit Apostolus , dum ita ait : Mi-
 „ sit Deus Filium suum factum ex muliere .
 „ Clare hic ostendit , ipsummet Dei Unige-
 „ nitum admirabili ortu ex Virgine in lu-
 „ cem prodiisse . Quod si Virgo a Sanctis
 „ Patribus propter hanc generationem Dei-
 „ para nominatur , ut vere hoc nomine ab
 „ illis nominatur , nescio quorsum attinuerit ,
 „ ut quæstionem hanc nunquam necessariam ,
 „ & contra nos ipsos & contra Ecclesiasti-
 „ cam pacem quoque agitandam suscepe-
 „ rimus .

Suffragatur & Theodoretus in reprehensio-
 ne Anatematismi primi Cyrilliani . *Quamo-
 brem , inquit , & Sanctam illam Virginem
 Dei genitricem appellamus , non quasi Deum
 natura generaverit , sed tamquam hominem
 unitum Deo qui finxit eum .* Et infra de servi-
 forma , quam Verbum assumpsit , hæc habet ;
*Quia vero non erat nudata Dei forma , sed
 templum inhabitantis Dei Verbi secundum Pau-
 li vocem : In ipso enim , inquit , complacuit
 omnem plenitudinem Divinitatis inhabitare
 corporaliter : non hominis genitricem , sed*

D,

Dei

Dei genitricem Virginem appellamus; illam quidem figmento & formationi, & conceptui, hanc autem unitioni imponentes appellationem. Propterea & natus infans Emmanuel appellatur, neque Deus ab humana natura separatus, neque homo Divinitate nudatus... Ergo infans Emmanuel dicitur propter assumentem Deum; & Dei genitrix Virgo propter unitiorem formæ Dei ad conceptam servi formam.

Suffragantur Orientales Episcopi in Confessione Fidei, quam suæ ad Joannem Antiochenum Epistolæ, quæ incipit, *Latentur Cæli*, inseruit S. Cyrillus. *Confitemur, inquit, Dominum nostrum Jesum Christum Filium Dei unigenitum, Deum esse perfectum, & hominem perfectum ex anima rationali & corpore constitutum: ante sæcula quidem ex Patre natum secundum Divinitatem, postremis vero temporibus eundem ipsum propter nos, & propter nostram salutem, ex Maria Virgine, secundum humanitatem: siquidem duarum naturarum facta est unio: & propterea unum Christum, unum Filium, unum Dominum confitemur, propterea quod Deus Verbum incarnatum sit & homo factum, & ex ipso conceptus templum ex illa sumptum sibi univerit.*

Suffragatur Paulus Emisænus Episcopus in Homilia Alexandriæ habita, cum pax inter Ecclesias inita est. *Parit, inquit, Dei Genitrix Maria Emmanuelem Qui ita non dicit, intelligit, ac sentit, anathema sit ab Ec-*

Ecclesia . Peperit proinde nobis Deipara Maria Emmanuelem , hoc est , Deum hominem factum . Nam Deus Verbum , qui ante secula arcano ineffabilique modo ex Patre genitus est , novissimis temporibus natus est ex muliere . Natura namque nostra perfecte assumpta , humanitateque ex prima conceptione sibi conjuncta , ac nostro corpore sibi in templum fabrefacto , ex Deipara Virgine Deus perfectus , & homo itidem perfectus prodiit . Legatur ejusdem Homilia secunda . Extat utraque tertia parte Concilii Ephesini cap. 31. & 32.

Suffragatur S. Leo Epistola 24. ad Flavianum . , An forte , *inquit* , ideo putavit Dominum nostrum Jesum Christum non nostræ esse naturæ , quia missus ad beatam Mariam semper Virginem Angelus ait : Spiritus Sanctus superveniet in te & virtus Altissimi obumbrabit tibi ; ideoque & quod nascetur ex te Sanctum , vocabitur Filius Dei : ut quia conceptus Virginis divini fuit operis , non de natura concipientis caro fuerit concepti ? Sed non ita nobis intelligenda est illa generatio singulariter mirabilis , & mirabiliter singularis , ut per novitatem creationis , proprietas mota sit generis . Fœcunditatem enim , Virgini Spiritus Sanctus dedit , veritas autem corporis sumpta de corpore est : & ædificante sibi Sapientia domum , Verbum caro factum est , & habitavit in no-

„ bis: hoc est, in ea carne, quam assum-
 „ pſit ex homine, & quam Spiritus vitæ ra-
 „ tionalis animavit.

Et Epistola 77. „ Nam sicut Nestorius non
 „ est toleratus, affirmans beatam Mariam,
 „ hominis tantummodo fuisse genitricem,
 „ qui postmodum sit a Verbo Deitatis susce-
 „ ptus, duabus scilicet personis distinctis
 „ atque divisus, ut non esset filius hominis,
 „ qui Filius Dei: neque unus Christus in
 „ utraque natura, sed alter sempiternus ex
 „ Patre, alter temporalis ex Matre, cum
 „ Evangelica auctoritas ita Verbum carnem
 „ prædicet factum, ut non duos Christos,
 „ nec duos Filios, sed in uno Domino Jesu
 „ Christo & Dei, & hominis nobis insinuet
 „ veritatem; ut utriusque substantiæ, id est,
 „ salvantis atque salvatæ, nec proprietas
 „ possit confundi, nec persona geminari, &c.

Suffragatur S. Fulgentius libro *de Incarna-
 tione cap. 3.* „ Si Deus Verbum, *inquit*, sic
 „ in Virgine caro fieret, ut ex ea non fie-
 „ ret, proculdubio non de carne matris idem
 „ Deus haberet substantiam carnis, esset-
 „ que ejus per Virginem transitus: atque
 „ ita nec Mediatoris Sacramentum nobis
 „ proficeret ad salutem, nec humanæ divi-
 „ næque plenam in se Christus Dei Filius in-
 „ confusibiliter uniret substantiæ veritatem...
 „ Beata igitur Maria Deum Verbum, secun-
 „ dum quod caro factum est, & concepit, &
 „ peperit: cujus utero Verbum Dei non car-
 „ nem,

„ nem, in qua conciperetur, intulit, nec
 „ ex ea materiam conceptæ sive formatæ
 „ carnis, non ipse Deus concipiendus, sed
 „ tantum nasciturus assumpsit; sed ex ea,
 „ & in eadem Virgine humanæ carnis natu-
 „ ram, secundum quam temporaliter Deus
 „ sempiternus conciperetur, & nasceretur,
 „ assumpsit.

„ *Et cap. 6.* Ita Deum Verbum, secun-
 „ dum quod caro factum est, Virgo Sancta
 „ concepit, Angelorum hominumque facto-
 „ rem, eundemque nihilominus Virgo pe-
 „ perit hominum Redemptorem. Neque
 „ enim sancta Virgo Maria Deum sine carnis
 „ assumptione, nec carnem sine unitione
 „ concepit; quia ille conceptus Virginis,
 „ Deo fuit, carniq; communis.

Suffragatur Petrus Diaconus lib. *de Incar-*
natione c. 11. dicens: „ Beatam Virginem
 „ Mariam, non propter dignitatem homi-
 „ nis illius, qui ex ipsa natus est, (quem
 „ gratia & non natura Deum quidam impie
 „ predicare non metuunt) sed proprie & se-
 „ cundum veritatem *θεοτόκος* id est, Dei
 „ genitricem, eo quod peperit vere & pro-
 „ prie Deum Verbum incarnatum & homi-
 „ nem factum, &c.

Suffragatur Ferrandus Diaconus in Episto-
 la ad Anatolium: „ Dicat ergo mihi aliquis,
 „ *inquit*, Utrum proprius Filius Dei Patris,
 „ ipse est proprius Filius Virginis matris, an
 „ forte non habuit Maria proprium Filium,

„ quem Deus habet proprium Filium? Sed
 „ & Maria habet proprium Filium, quia ge-
 „ nuit, non adoptavit; & illum habet pro-
 „ prium Filium, quem habet Deus proprium
 „ Filium, quia duos Filios numquam Fides
 „ Catholica prædicat. Restat ergo ut si Deus
 „ Dei proprius Filius, ipse est etiam Matris
 „ Virginis proprius Filius, cum proprie
 „ eum genuerit. Alioquin si illa proprie non
 „ genuit, nec ille est proprie filius. Pro-
 „ prius est autem: ergo illa proprie genuit;
 „ verumtamen secundum humanitatem, se-
 „ cundum quam potuit Deus nasci.

Suffragatur Joannes Secundus Romanus
 Pontifex in Epistola ad Avienum Senato-
 rem, & alios., „ Gloriosam vero, *inquit*,
 „ sanctam semper Virginem Mariam, &
 „ proprie & veraciter Dei genitricem, Ma-
 „ tremque Dei Verbi ex ea incarnati, ab
 „ hominibus Catholicis confiteri, recte esse,
 „ docemus, proprie & veraciter: & idem
 „ ipse ultimis temporibus incarnatus ex san-
 „ cta Virgine matre nasci dignatus est. Pro-
 „ pterea ergo quia proprie & veraciter Dei
 „ Filius ex ea incarnatus est; ideo proprie
 „ & veraciter Matrem Dei ex ea incarnati
 „ & nati esse confitemur.

Suffragatur Quinta Synodus Canone 6., „
 „ Si quis abusive, & non vere Dei genitri-
 „ cem dicit sanctam, gloriosam semper Vir-
 „ ginem Mariam: vel secundum relatio-
 „ nem, quasi homine puro nato, sed non
 „ Deo

5, Deo Verbo incarnato & nato ex ipsa, re.
 „ ferenda autem, sicut illi dicunt, hominis
 „ nativitate ad Deum Verbum, eo quod
 „ cum homine erat nascente: & calumnia-
 „ tur sanctam Chalcedonensem Synodum,
 „ tamquam secundum istum impium intelle-
 „ ctum, quem Theodorus execrandus inve-
 „ nit, Dei genitricem Virginem dicentem:
 „ vel qui hominis genitricem vocat, aut
 „ Christotocon, id est, Christi genitricem,
 „ tamquam si Christus Deus non esset; &
 „ non proprie & vere Dei genetricem ipsam
 „ confitetur, eo quod ipse qui ante sæcula
 „ ex Patre natus est Deus Verbum, in ulti-
 „ mis diebus ex ipsa incarnatus & natus est;
 „ & sic pie & sanctam Chalcedonensem Sy-
 „ nodum Dei genitricem eam esse confes-
 „ sam, talis anathema sit. „ Secuta est V.
 Synodus Chalcedonensem in Definitione
 Fidei, & Ephesinam, in qua propterea dam-
 natus est Nestorius, quod Beatam Virginem
 Deiparam negaret.

Suffragatur Facundus Hermianensis *lib. 1.*
c. 4. „ Quæ cum ita sint, *inquit*, quemad-
 „ modum nihil ex hoc metuendum est, ne
 „ cum dicitur Deus vere, & proprie Pater
 „ Filii crucifixi, sequi videatur, quod illa
 „ humanitas a Verbo Dei suscepta, & cru-
 „ cifixa in Deitatem conversa sit, & natura
 „ humana, quæ composita est, simplici na-
 „ turæ Patris consubstantialis effecta: ita
 „ non sequitur, cum dicimus vere & pro-
 „ prie

» prie Matrem Dei Mariam , ut Deitas Ver-
» bi conversa videatur in carnem , & natura
» divina , quæ simplex est , compositæ natu-
» ræ matris consubstantialis effecta . Alioqui
» si blasphemum & absurdum est , quod bea-
» ta Maria vere & proprie dicitur Mater
» Dei , sine ulla disceptatione blasphemum
» & absurdum est , quod Deus Verbum ve-
» re & proprie dicitur filius hominis . Si au-
» tem & hoc blasphemum & absurdum vi-
» detur , ut Deus Verbum vere & proprie
» dicatur filius hominis , consequenter bla-
» sphemum videbitur & absurdum , ut idem
» ipse Mediator Dei & hominum homo
» Christus Jesus , vere & proprie dicatur
» Filius Dei . Porro Scriptura divina , quæ
» nihil blasphemum loquitur , vel abiurdum ,
» pro unitate personæ verum & proprium
» Dei Filium dicit Mediatorem Dei & ho-
» minum hominem Jesum Christum , qui
» dedit semetipsum redemptionem pro om-
» nibus Recte igitur etiam beata Ma-
» ria , pro eadem unitate personæ , vere
» & proprie dicitur Mater ipsius unigeniti
» Dei Verbi .

Suffragatur S. Joannes Damascenus lib. 3.
de Fide Orthodoxa , cap. 12. » Dei gene-
» tricem , *inquit* , proprie vereque Sanctam
» Virginem prædicamus . Ut enim Deus ve-
» rus est , qui ex illa genitus est ; ita vere
» est Dei genetrix , quæ verum Deum ex
» seipsa incarnatum genuit . Non enim me-
» rum

„ rum genuit hominem Virgo sancta ; sed
 „ Deum verum ; nec ipsum nudum , sed in-
 „ carnatum , qui non e cælo corpus detulit ,
 „ ac per illam velut per carnalem transit ,
 „ sed ex ipsa consubstantialem nobis carnem
 „ assumpsit , & in seipso fecit subsistere .
 „ Nam si corpus e cælo attulit , idque non
 „ ex natura nostræ simili sumptum est , quæ
 „ utilitas fuit hominis suscepti ? Siquidem
 „ inhumanatio Dei Verbi propterea facta
 „ est , ut eadem quæ peccaverat , & ceci-
 „ derat , & corrupta erat natura , Tyran-
 „ num sibi occurrentem vinceret , atque
 „ hoc modo a corruptela liberaretur .

Obiciebat Nestorius . Quæ Divinitatem non genuit , Dei genitrix dici non potest : atqui Maria Divinitatem non genuit : Dei ergo genitrix dici non potest .

Respondeo , nego maiorem : satis enim est quod Deum genuerit Incarnatum hominemque factum . Non quod Deo initium dederit existendi absolute , sed tantum in carne , id est , in natura hominis , cui eodem quo est genita momento , copulatum est & unitum secundum hypostasim Verbum . Sicut enim quævis alia mulier hominis mater est , quamvis animam non generet ; sic Virgo sanctissima nihilominus Dei genitrix existimanda est , quamvis Divinitatem per se ipsam non genuerit , nec ei initium dederit , cum hominem Deum genuerit . Ita respondet S. Cyrillus in Epistola ad Monachos
na-

nachos . „ Simile est , *inquit* , humano
„ partui Incarnati Verbi mysterium . Et-
„ enim terrenorum hominum matres naturæ
„ ad gignendum servientes , carnem habent
„ in utero , quæ paullatim compacta , &
„ inexplicabilibus quibusdam efficientiis pro-
„ gressa in humanam speciem absolvitur .
„ Deus porro spiritum animali quibus scit
„ modis infundit Verum etsi mulieres
„ istæ nonnisi terrenorum sint corporum ma-
„ tres : nihilominus cum totum animal pe-
„ pererint ex anima & corpore compositum ,
„ non solam ejus partem peperisse dicuntur .
„ Nec aliquis dixerit , exempli causa , Eli-
„ sabetham matrem Joannis carnis esse ge-
„ nitricem , non animæ : peperit enim ani-
„ matum Baptistam , ac sic tamquam unum
„ aliquid ex ambobus , hominem , anima-
„ videlicet , ac corpore . Hujusmodi quip-
„ piam actum esse fatebimur & in Emmanue-
„ lis generatione . Quippe natum est , ut di-
„ xi , ex Dei Patris substantia Unigenitum
„ ipsius Verbum . Cum autem carnem su-
„ scipit , eamque propriam sibi fecit , ut
„ filius hominis esset , & nostri similis fie-
„ ret , tunc minime est absurdum dictu , im-
„ mo necessario profitendum , illum ex mu-
„ liere secundum carnem esse genitum ;
„ quemadmodum & hominis anima una cum
„ proprio corpore gignitur , & unum cum
„ eo reputatur : tamen si natura intelligatur ,
„ & sit ab eo diversa , secundum propriam
„ rationem .

Con-

Contra . Si Maria Dei genitrix esset , sequeretur ipsam Deum esse . Matri enim filius consubstantialis est .

Respondeo , nego consecutionem . Ut enim ait Ferrandus in Epistola ad Anatolium : „ Frustra expavescit quisquis æstimat „ consubstantialem Divinitati Matrem futuram , si veraciter & proprie Maria Mater „ fuerit Dei . Profecto enim quia veraciter „ & proprie generanti semper est consubstantialis ille qui nascitur , accipit ab ea Deus „ unde ei fieret consubstantialis , & sic ex „ ea nasci dignatus est . Ita igitur proprie , „ sicut veraciter , Maria Divinitatem Filii „ genuit , sed incarnatam : sine carne enim „ Divinitatem sempiternam generare non „ posset homo mortalis .

Obijciebant rursus Nestoriani . Ex una substantia generari nullatenus possunt substantiæ duæ : atqui Deus & homo sunt substantiæ duæ : ergo Maria non est hominis Deiue genitrix .

Resp. distinguo majorem . Si separatim generentur , concedo : Si una per se non generetur , sed ratione alterius , in unamque hypostasim concurrant , nego . Ita respondet Ferrandus Diaconus in Epistola ad Anatolium „ Nunc vero (*inquit*) in magno illo , & mirabili Sacramento , quod manifestatum est „ in carne , divina substantia secundum humanam substantiam proprie nata est , quia „ non separatim nata est ; nec humanitatem „ pro-

„ proprie natam sibi Divinitas adunavit , sed
 „ adunando eam sibi , proprie nata est . Di-
 „ cam adhuc planius pro captu infirmitatis
 „ meæ . Proprie est nata de Patre Divinitas
 „ pura : proprie est nata de Matre eadem in-
 „ carnata Divinitas . Et hoc distat inter unius
 „ Filii Dei duas generationes ; quod in divi-
 „ na generatione nulla fuit humanitas ; in
 „ humana generatione adunata fuit humani-
 „ tati proprie nascenti Divinitas . Si enim di-
 „ xero , vel dicere voluero , Maria semper
 „ Virgo proprie genuit humanitatem ; vide-
 „ bitur sub aliquo modo hominem purum ge-
 „ nuisse , quem nullo modo ita genuit , quia
 „ Verbum carnem factum proprie genuit ,

Objicies verba S. Hilarii *lib. 10. de Trini-
 tate* dicentis , Mariam Corpori Christi origi-
 nem non dedisse . „ Non enim (inquit) ex
 „ se Corpori Maria originem dedit : Licet
 „ ad incrementa partumque corporis omne
 „ quod sexus sui naturale est contulerit .
 „ Quod vero hominis filius est , susceptæ in
 „ Virgine carnis est partus .

Respondet Hunaldus in Epistola ad Joannem
 Præpositum , quæ extat inter Epistolas Phi-
 lippi Abbatis Bonæ Spei , nihil aliud S. Hila-
 rium velle , nisi Christi Corpus naturaliter , &
 usitato modo non fuisse conceptum , ac geni-
 tum : Quod iis verbis indicat „ Corpus non
 „ terrenæ conceptionis elementis susceptum ,
 „ non terrenis elementis inchoatum . *Quæ*
 „ *Hilarii verba Hunaldus sic exponit* : Ele-
 „ men-

„ menta rerum principia vocat , id est , caus-
 „ fas illas , quæ divina providentia guber-
 „ nante , conceptionem corporum operan-
 „ tur . Quæ videlicet causæ sive naturæ in-
 „ procreandis corporibus numeros illos ex-
 „ plicant , quos Deus , cum omnia crearet ,
 „ simul creavit , & eis attribuit , & in istu
 „ condendi seminaliter eas sparsit , non ta-
 „ men suam eis potentiam alligavit ... Cau-
 „ sâ ergo illâ communes , ut dicere cape-
 „ ram , in congignendis corporibus operantur
 „ velut cum sêges , vel arbor ex semine suo
 „ nascuntur . In conceptione vero virginali
 „ non solus naturæ cursus , sed alia penitus
 „ causâ primum operata est , licet aliæ sint
 „ subsequutæ . Alia causa non creata superve-
 „ nit , quæ carnem Verbo Dei personaliter
 „ uniendam de carne Virginis sequestravit ,
 „ & eandem a peccato originali mundavit .
 „ De hac , ut arbitror , causâ , sive initio
 „ Corporis Christi loquebatur Hilarius , cum
 „ diceret , non habuit Christus initium ex
 „ Maria . Illud enim revera ex Maria non
 „ habuit , habuit vero aliud . Nam Virgo ex
 „ se genuit . Hoc Hilarius fideliter intellexit ,
 „ a qua Fide , qui recte sentiat , non dissen-
 „ tit . Cum de rebus constat , disputare ad no-
 „ men , Viris non convenit eruditis .

FINIS.

E



A P P E N D I X I

NONNULLARUM QUÆSTIONUM

AD DISSERTATIONEM

D E

HÆRESI NESTORIANA

QUÆSTIO PRIMA

D E

*Communicatione Idiomatum
in Christo .*



COMMunicatio Idiomatum quam Myſterio Incarnationis nexam, eſſe Scripturæ, & tota traditio demonſtrant, definiri ſolet Prædicatio, ſeu Attributio mutua, & reciproca in concreto nominum, attributorum, & proprietatum Naturæ Divinæ, & Humanæ ratione unius Chriſti Perſonæ: Sic v. g. dicitur: *Chriſtus eſt Homo, Chriſtus eſt Deus: Hic Homo eſt Deus, Deus eſt Homo: Deus natus eſt, paſſus, mortuus: Homo eſt æternus, impaſſibilis, immortalis &c.*

Hæc communicatio ex unionē hypostatice neceſſario conſequens eſt; nam nominum, attributorumque utriuſque Naturæ communio in Chriſto, nonniſi negata Unitate Chriſti Perſonæ rejici poteſt; Quandoquidem ſi humana Natura Verbo Divino

A

unita

unita est in Personæ unitatem, sequitur, Christum esse ipsummet Verbum, tum Naturam Divinam, tum Naturam humanam habens. Si autem Christus est Deus Verbum Naturam humanam sibi personaliter unitam habens, manifestissimum est in Christo Deum esse Hominem, & Hominem esse Deum, idest Personam, quæ habet Naturam Divinam, esse Personam, quæ habet & Naturam humanam, & vice versa; Ac proinde quum actiones sint Personarum, seu Personis tribuantur, posse prædicari in concreto, ut ajunt, de Deo Verbo quæcumque ipsi secundum carnem contigerant, nempe quod natum sit, passum, mortuum: & vicissim de Homine, seu de Persona Verbi habente humanitatem, posse prædicari quæ Dei sunt. Hanc communicationem Idiomatum, seu Attributorum utriusque Naturæ, quod est consecrarium Mysterio Unitatis Personæ in Christo necessario connexum, & quod PP. definitione est constantissime stabilitum, sæpius, & perfractè Nestorius rejecit. E contra major Lutheranorum pars communionem illam etiam respectu Naturæ, saltem quantum ad aliqua Divinitatis attributa, communicata Humanitati agnoscendam censuerunt. Itaque communicationem Idiomatum sub duplici illa ratione singillatim spectabimus.

ARTÍCULUS I.

*De Communicatione Idiomatum in Christo
ratione Personæ adversus
Nestorianos .*

UT definitio communicationis Idioma-
tum superius exposita intelligatur,
observandum est, nomina alia esse abstracta,
alia concreta. Nomen abstractum, seu ter-
minus abstractus formam tantum significat,
non subiectum. Hujusmodi sunt hæ voces,
divinitas, humanitas, æternitas, mortali-
tas. Nomen concretum significat tum for-
mam, tum subiectum ejus, ut Deus, idest,
ille qui habet Naturam Divinam: Homo,
idest, habens Naturam humanam; immor-
talis, id est, habens immortalitatem &c.

Prædicatio igitur, seu Attributio nomi-
num utriusque Naturæ si fieret in abstracto,
coincideret cum communicatione, quæ fieret
ratione Naturæ, de qua communicatione
mox locuti sumus, daretque istas propositio-
nes insulas, & fidei contrarias, ut videbi-
mus: *Divinitas, seu Natura Divina in
Christo est humanitas; natura humana est
Natura Divina: Divinitas est mortalis;
Humanitas est Deus &c.* Prædicatio vero,
seu attributio reciproca eorundem nominum
& attributorum in concreto, & ratione
unius Christi Personæ istas loquendi formu-
las

APPEN. AD DISSERT.

las exhibet: *Christus est Homo, Christus est Deus: Deus est Homo &c.* Hæ sunt locutiones, quæ ex unionem hypostatica necessario consequuntur. Nempe quemadmodum propter unionem physicam animæ, & corporis, ex qua unica hominis persona resultat, dici potest, homo est corporeus, homo est rationalis; nec non rationalis est corporeus, & vice versa: quia nempe hæc unitatem Personæ hominis duas substantias diversas complectentis dumtaxat supponunt, ut patet ex eo quod illæ propositiones sic resolvendæ sint: qui habet humanitatem, habet tum Corpus, tum Animam rationalem: hæc Persona, quæ habet Animam rationalem, habet etiam Corpus; ita propter unionem hypostaticam Naturæ humanæ ad Verbum, qua fit ut in Christo natura sit duplex, & una Verbi Dei Persona, dici debet Christum esse Deum, & esse Hominem, Deum esse Hominem, Hominem Deum &c.

In comprobanda autem ex Sacris Litteris & ex Sanctorum Patrum, & Conciliorum auctoritatibus hac Idiomatum communicatione hic non immorabimur, quippe quum jam a nobis id confectum sit, cum in Dissertatione adversus Hæresim Nestorianam demonstravimus, unicam esse in Christo Personam ex Scripturis, & tota Traditione, cujus unitatis Personæ in Christo est necessaria appendix, & confectarium hæc Idiomatum communicatio.

Vc.

Verum tradendæ sunt Regulæ, juxta quas illa communicatio idiomatum adhibenda sit; ad quarum intelligentiam præterea advertendum ex nominibus concretis, alia appellari substantiva, alia adjectiva. Inter quæ illud discrimen intercedit, quod concreta substantiva rei Naturam tamquam formam cum subjecto exprimant, ut Deus, id est, habens Divinitatem, seu Naturam Divinam: Homo, id est, habens Naturam humanam; contra vero adjectiva cum subjecto non significant naturam ipsam, sed tantum formam aliquam seu necessario, seu accidentaliter naturæ adjacentem, vel ejusdem Naturæ actionem aliquam, aut passionem, aut participationem, ut immortalis, natus, mortuus, humanus.

Rursus nomina concreta adjectiva, vel sunt derivata, vel absoluta. Derivata participationem aliquam substantiæ, seu naturæ designant, ut humanus, Divinus. Absoluta vel proprietates, vel actiones, vel passiones naturæ denotant, ut mortalis, natus, passus &c. His præmissis sit

Regula I. Nomina concreta substantiva, id est, quæ Naturam ipsam seu Dei, seu Hominis tamquam formam cum subjecto exprimunt, ut *Deus*, & *Homo*, de Christo, & de se invicem possunt prædicari. Itaque dicendum est: *Christus est Homo*, *Christus est Deus*, & pariter cum de Christo agitur, *Deus est Homo*, & *Homo est Deus*.

Ratio est, quia nomina concreta subjectum ipsum cum forma ei conveniente exprimunt; ergo quum unum sit in Christo subjectum, seu suppositum, evidens est, ubi nomina concreta substantiva, utriusque Naturæ de Christo, & de se invicem prædicantur, iis, hoc unum significari, nempe idem suppositum, seu Personam quæ in Christo Divinitatem habet, habere etiam humanitatem, quod verissimum est, & ad fidem Catholicam pertinet, juxta quam una est Christi Persona, & Natura duplex, Divina, & humana. Triplicem tamen volunt Theologi adhiberi cautionem. Prima, ut nomen substantivum personam creatam non designet. Sic v. g. demonstrato Christo, dici nequit, *Hic homo factus est Deus*, licet dici possit, *Deus factus est homo*. Posterior enim propositio solum significat Deum, seu Personam Divinam factam esse Personam, quæ humanitatem habeat; quod ipsam dogmatis sacri substantiam exhibet. Prior autem indigiteret Personam aliquam, quæ prius fuisset Persona creata, & humana, factam esse decursu temporis Personam Divinam; quod fidei penitus adversum est. Ob eandem causam abstinendum est quoque ab illa locutione, *Homo factus est Deus*, quamquam aliquo sensu Catholico accipi potest, quo eam usurparunt S. Athanasius lib 1. de *Natura humana*, S. Greg. Naz. *Orat.* 36. S. Augustinus Lib. 4. *De Prædestinatione*
San-

Sanctorum cap. 16. , & Synodus Lateranensis sub Martino I.

Secunda cautio est , ut nulla reduplicatio fiat . Namque dici non potest , Deus, quatenus Deus, est homo . Reduplicatio in formam cadit , & sensus ejusmodi propositionis foret, Deum , quatenus habet Divinitatem , habere Naturam humanam ; quod tam insulsum est , quam fidei adversum .

Tertia , ut illæ vitentur loquendi rationes , quæ etsi veræ in se , hæresi tamen promovendæ adjumento esse possent . Sic licet Christus , ut homo, revera sit creatus , & creatura , atque ideo eum creaturam veritatis non sint appellare SS. Ambros. *Serm. 5. in Psalm. 118. aliàs 57. ad Dardanum.* Joannes Damasc. l. 3. cap. 3. &c. attamen hæc propositio , *Christus est creatura* simpliciter pronuncianda non est , ut S. Thomas animadvertit 3. p. q. 16. a. 8. , & post eum Petavius lib. 7. *de Incarn.* cap. 6. , quia scilicet hæresim Arianorum adjuvaret ; sed dicendum , *Christus secundum quod homo , est creatura.*

Regula II. Nomina concreta adjectiva quæ absoluta sunt , seu quæ proprietates , actiones , passionis significant , de Christo dici possunt , & de se invicem . Sic verbi gratia , dicendum est : *Christum esse mortalem , & immortalem : Eum , qui est immortalis , factum esse mortalem* &c. Pariter dicendum est, Deum esse in terris visum,

esse natum, passum, crucifixum &c.

Ratio est, quia illa omnia suppositum sonant, & ad illud referuntur. Immortalis enim idem est ac habens immortalitatem, mortalis vero idem ac qui naturam mortalem habet; proindeque quum Natura Divina sit immortalis, & Natura humana, morti obnoxia, sequitur, I. illum qui habet utramque, dici posse mortalem simul & immortalem. II. de eodem agendo, dicendum quoque, immortalem esse mortalem &c. seu eundem qui habet immortalem naturam, habere etiam naturam mortalem.

Observa autem neque hic apponendam esse reduplicationem. Scilicet dici nequit: Christus ut Deus est mortalis, est natus, passus &c. non enim hæc competunt Christo sub eo respectu quo Deus est, sed tantum propter naturam creatam quam assumpsit.

Regula III. Nomina concreta adjectiva, quæ derivata appellantur, seu quæ participationem aliquam naturarum sonant, ut *Divinus, humanus*, minus accurate dicuntur de Christo, & de se invicem. Sic. v. g. minus recte diceretur, Christum esse Divinum, dominicum, deiferum, vel humanum.

Ratio est, quia is minus accurate naturam Divinam, aut humanam participare solum dicitur, qui utramque revera habet, & complectitur: atqui Christus naturam Divinam, & humanam non modo participat, sed utramque

que habet, & complectitur; ergo minus accurate &c.

Id porro unum in hac Regula pronunciamus, quod hæc *minus accurate* dicerentur. Scilicet locutiones ejusmodi errorem Fidei adversum necessario non involvunt, nec difficulter ad significationem Catholicam possunt inflecti. Unde a veteribus quibusdam hæresis Nestorianæ non suspectis, & fidem unius in Christo personæ aliàs diserte exprimentibus, citra omnem erroris notam adhiberi potuerunt. Unum igitur harumce propositionum vitium est, quod maneat, & imperfectæ dogmatis Catholici expositiones sint, sensui hæretico per se non oppositæ, illique animis instillando valde idoneæ, si nempe qui eas adhibere amat, simul voces alias facro dogmati plenius declarando notas abijciat, ut Nestorio contigit.

Allatam Regulam S. Augustinus totam confirmat lib. 1. *Retractionum* cap. 19. n. 8. ubi postquam dixit: *Non video utrum recte dicatur Homo Dominicus, qui est mediator Dei, & hominum, homo Christus Jesus, cum sit utique Dominus sed ubicumque hoc dixi, dixisse me nollem. Postea quippe vidi non esse dicendum*; continenter addit: *quamvis nonnulla possit ratione defendi.*

S. Thomas 3. parte q. 16. n. 3. ab ejusmodi Regula excipiendam ducit propositionem istam: *Christus est Homo Divinus*: quod, inquit, *nomen illud divinum consuevit*

prædicari etiam de his, de quibus prædicatur essentialiter nomen Deus. Dicimus enim quod Divina essentia est Deus . . . & quod essentia est Dei, sive Divina . . . & Verbum Divinum, cum tamen Verbum sit Deus. Hæc S. Doctor. Attamen, si ad exactioris dialectices amussim dictam propositionem expendamus, satius videbitur ea abstinendum, ne forte cum diceretur Christus homo Divinus, dotibus dumtaxat præcellentissimis ornatus intelligeretur, ut cum Plato homo Divinus fuisse perhibetur. Cæterum caro, & anima Christi accurate dicuntur deificatæ, namque id tantum significat, humanitatem Christi Deo Verbo esse hypostatice unitam.

Regula IV. Nomina abstracta Naturæ Divinæ possunt de Persona Christi in sensu reali prædicari, non vero nomina abstracta naturæ humanæ. Sic v. g. dici potest personam Christi, seu Christum esse Divinitatem, omnipotentiam, veritatem &c. Non vero potest dici, Christum esse humanitatem, vel humanitatis proprietates.

Ratio est, quia Divinitas, & omnia Divinitatis attributa identificantur realiter cum persona Christi, nempe Verbo Divino; contra vero Natura humana, & ejus proprietates, etsi uniantur Verbo, ab ipso tamen realiter distinguuntur.

Regula V. Quæ competunt Naturæ Divinæ, & Naturæ humanæ, de se invicem non possunt in abstracto prædicari. Sic
dici

dici non potest: Natura Divina est natura humana, vel humanitas est æternitas.

Ratio est, quia ambæ naturæ unione hypostatica non confunduntur, sed distinctæ manent, & inconfusæ.

Regula VI. Nomina concreta, seu substantiva, seu adjectiva unius naturæ non possunt de alia natura prædicari, aut de ejus partibus. Sic dici nequit: *Divinitas est homo, humanitas est Deus, Divinitas est nata, passa &c.*

Ratio est, quia, cum Naturæ distinguantur, necesse est, ut quæ propria sunt uni, non possint de altera prædicari.

Regula ultima. Nomina adjectiva, quibus unio hypostatica, seu assumptio Naturæ humanæ asseritur de Christo Deo, & Homine non possunt promiscue dici. Nimirum v. g. licet optime dicatur *Deus incarnatus, vel caro factus*, non tamen dici potest *homo incarnatus*.

Ratio est, quia communicatio idiomatum supponit unionem hypostaticam, cujus est necessaria appendix, non proinde ad ea quæ ejusmodi unionis sunt, seu quæ eam constituunt, se extendit.

ARTICULUS II.

*De Communicatione Idiomatum in abstracto
adversus Lutheranos.*

A Ttributa Divinitatis, nempe omnipotentiam, omniscientiam, ac præsertim omnipræsentiam humanitati Christi communicatam fuisse, docet Lutherus in Libro seu sermone: *Quod verba Christi: Hoc est Corpus meum: adhuc sentit*: quem anno 1527. edidit, tum in Confessione de cœna Domini, ubi vult Christi carnem tam longe extra creaturas esse collocandam, quam Deus ipse extra creaturas est: eoque progreditur, ut Zuinglianos vehementer reprehendat, quod Christi passiones soli humanitati attribuant, non etiam Deitati. Dogma istud, Christi carnem vi unionis hypostaticæ esse ubique præsentem, appellatum est Ubiquismus. Illud vero commentus est Lutherus, vel potius a Jacobo Fabro Stapulensi ad cap. 14. Joann. & ad 12. primæ ad Cor. jam antea traditum, idcirco suum fecit, quia Christi Corporis præsentia realis in Eucharistia defendendæ ipsi idoneum visum est.

Philippum Melanctonem discipulorum Lutheri doctissimum, & celeberrimum, doctrinam ubiquitatis detestatum fuisse, constat. At eam amplexi sunt Joannes Brentius, qui hanc ita locupletavit,
ut

ut dictus fuerit Ubiquitatis parens, Flaccus Illyricus, David Chytraus, Joannes Windingus, Nicolaus Selneccerus, Jacobus Andreas Smidelinus, Martinus Kemnitius qui cautius ceteris loqui affectat &c. Atque is error in Libro Concordiæ, quem fere universi in Germania Lutherani receperunt, tamquam fidei dogma asseritur pag. 572. 731., & 745. edit. 1580.

Duplex autem apud Lutheranos Scriptores deprehenditur ubiquitatis explicandę ratio; nam alii, ut Brentius, Smidelinus &c. sentiunt, omnipræsentia communicationem factam humanitati Christi, ut & aliorum saltem plurimorum Attributorum, ad essentiam unionis hypostaticæ pertinere, seu hanc unionem formaliter constituere: alii vero ut Kemnitius, hanc communicationem solum docent esse unionis hypostaticæ necessarium consecrarium, adeo ut, hac unione posita, consequens sit naturam humanam, Christi vere esse omniscientem, omnipotentem, & omnipræsentem.

CONCLUSIO

Communicatio idiomatum in abstracto, seu respectu Naturarum, nulla in Christo admittenda est, neque unio hypostatica postulat, ut Christi corpus sit ubique præsens.

P Robatur prima pars, nempe communicationem idiomatum in Christo respectu naturarum admittendam non esse, ac proinde dici non posse naturam humanam Christi esse immensam, esse omnipotentem, esse scientia infinita præditam &c. Probat, inquam, I. quia nec in Scripturis, nec in Conciliis, nec apud Sanctos Patres ullum reperire est ejusmodi Locutionum exemplum. II. quia si natura humana Christi vere, & reipsa esset immensa, omnipotens, omniscia &c. quocumque modo id explicetur, jam desineret habere humanitatis proprietates, Divinisque Attributis constaret: atqui humanam Christi Naturam sui cum Verbo unione, humanitatis proprietatibus spoliata fuisse, & Attributis Divinis constitutam, ipsa est, Eutychianorum hæresis in Concilio Chalcedonensi proscripta, ubi definitum est Incarnationem peractam esse, *salva utriusque naturæ proprietate, & in unam Personam, atque subsistentiam concurrente.* Quod quidem Dogma fidei ex Scriptu-

pturis , & ex traditione probabimus in Dissertatione de Hæresi Eutychiana . III. Quia absurdissimum est, Attributa Divinitatis vere , & in conceptu suo formali communicari naturæ creatæ & finitæ , qualis est Christi humanitas . Quod enim finitum est , in se vere , & formaliter Attributum , seu proprietatem infinitam non potest recipere . Deinde naturam humanam Christi a Divinitate esse distinctam de fide est , & Lutherani profitentur . Si igitur naturæ Christi humanæ vere tribuatur omnipotentia Divina , & immensitas , jam duæ erunt omnipotentia Divinæ , & duæ immensitates in Christo , siquidem , repugnat unicum Attributum in duplici Natura , ut in subiecto inhæ- sionis simul existere . Atqui duas naturas omnipotentes , immensas &c. admittere , impium , & absurdum ; ergo &c. Denique Anima , & Corpus in homine personam unicam constituunt : atqui tamen corpori non communicantur Animæ Attributa , & proprietates , nec vice versa . Neque enim Corpus dici potest intelligere , judicare , dubitare , velle &c. quæ Animæ propria sunt ; neque ex adverso quis dixerit Animam ambulare , sedere &c. quæ sunt propria Corporis ; ergo ut Christi humanitas Divinitati uniatur in una Verbi persona necesse non est illi humanitati Divina attributa adscribi .

Ajunt Concordiæ auctores , nec non Kemi-

mnitius, & alii proprietates divinas juxta se non fieri proprietates humanitatis Christi, sed illi tantum esse communicatas per gratiam, sicut principale agens virtutem suam instrumento communicat.

Sed hæc male cohærent. Nulla vera communicatio idiomatum inter instrumentum, & agens principale admitti potest. Quis Scriptoris scientiam, & eloquentiam attribuet calamo quo is Scriptor utitur? Quocumque igitur modo scientia, omnipotentia, immensitas, & alia Dei attributa humanæ Christi naturæ communicata dicantur, seu essentialiter, seu per gratiam tantum, necesse est, hanc communicationem realem esse, & veram, adeo ut humanæ Christi naturæ vere hujusmodi attributa inhæreant; aliàs dici non poterit quod volunt Lutherani, nempe Christi humanitatem vere esse omnipotentem, immensam &c. neque ex ea communicatione colligi poterit, hanc Naturam humanam revera ubique existere.

Probatur secunda pars, nempe unionem hypostaticam non postulare, ut Christi corpus ubique sit præsens.

I. Ex Scripturis, ex quibus patet Christi corpus sive ante mortem, sive post mortem non fuisse ubique, sed contra, loco finito circumscriptum. Matth. 28. v. 6. *Jesum, qui crucifixus est, queritis? non est hic.* Joann. 11. v. 15. *Lazarus mortuus est, & gaudeo propter vos, ut credatis, quia*

quia non eram ibi. Ibid. v. 21. *Domine, ait Martha, si fuisses hîc, frater meus non esset mortuus* : quibus alia innumera addi possunt, ubi exhibetur Christus iter faciens, ex uno loco in alium locum se conferens, modo in deserto &c. consistens. Addenda etiam testimonia, in quibus Christus dicitur natus, crucifixus, sepultus, descendisse ad inferos, resurrexisse, ascendisse in Cælum, & inde cum gloria venturus. Enim vero natus intelligitur, cum e sinu Beatæ Virginis exivit, cruci affixus, cum in ea pendit, sepultus, cum e cruce in tumulum corpus ejus translatum est, descendisse ad inferos, cum ejus Anima a corpore evulsa eo permeavit, resurrexisse, cum e Sepulchro redivivus egressus est, ascendisse in Cælum, cum illuc e Terris fuit sublatus, & e Cælo venturus, cum ad judicandos homines inde descendet : ergo cum Christus, si secundum humanitatem ubique sit, locum non potuerit mutare, sequitur &c.

Respondent Lutherani hæc omnia dicta esse de Christo, quia etsi locum revera non mutaret, tamen apparenter, & secundum formam visibilem mutare locum videbatur.

Sed licet ne ad libitum cunfingere tot Scripturæ Sacræ testimoniorum expositiones metaphoricæ, ubi quid simile ne minimum innuitur?

II. ex Symbolis, quæ Christum post Scripturas exhibent etiam natum, sepultum, ad
Cælum

Cælum sublatum &c. quæ cum omnipræsentia corporis ejus ubique, stare non possunt.

III. ex SS. Patribus. Multa eorum Loca in hanc rem proferunt Bellarminus lib. 3. de Christo cap. 14. Petavius lib. 10. de Incarn. cap. 7. & alii. Unum satis sit S. Augustini testimonium, quo cæterorum mens præclare exhibetur. *Secundum hanc formam (naturam humanam) inquit Epist. 187. aliàs 57. ad Dardanum num. 10. non est putandus (Christus) ubique diffusus. Cavendum enim est, ne ita Divinitatem astruamus hominis, ut veritatem corporis auferamus. Non est autem consequens, ut quod in Deo est, ita sit ubique ut Deus. . . . Aliter homo ille in Deo quoniam aliter, & Deus ille in homine proprio quodam & singulari modo. Una enim persona Deus & homo est, & utrumque est unus Christus Jesus, ubique per id quod Deus est, in Cælo autem per id quod est homo.*

IV. ex triplici ratione Theologica.

Prima est, ubiquitate destrui ipsum præsentix realis dogma propter quod excogitata est. Namque si eatenus Christi Corpus est in Eucharistia, quatenus est ubique, ergo nulla speciali ratione est in Eucharistia, quam in re alia qualibet; neque ex institutione sua in ordine ad præsentiam realem quidquam habet Eucharistia quod cuilibet rei alteri non competat. Immo repugnabit Christi corpus accipi, & manducari in Eucharistia,

stia; quia quod ubique est, non potest ex ore in stomachum transmitti. Dicent ne cum Brentio in Eucharistiam Christum esse specialiter præsentem, propter specialem efficaciam, quam in hoc Sacramento exercet? Verum hac Responsione nihil speciale in Eucharistia agnosceretur, nisi virtus quædam, quod ipsum est Sacramentarium dogma a Lutheranis tanto studio rejectum.

Secunda est, ubiquitatis dogmate Eutychianismum invehiri. Nam si humanæ Christi naturæ, ipsique ejus corpori propter unionem hypostaticam divina competat immensitas, adeo ut de ipso vere prædicari possit: cum unum attributum singulare non possit esse commune duabus naturis, necesse est duas Christi naturas in unam confundi, & commisceri. Præterea cur immensitas humanæ Christi naturæ communicata vi unionis hypostaticæ prædicabitur, nec non omnipotentia, & omniscentia, non vero æternitas, & alia ejusmodi Attributa? Numquid omnipotentia, & immensitas, subiecti inhesionis finitudine, & limitatione minus excluduntur, quam æternitas, & aliud quodlibet Divinum attributum? Denique, cum Attributa Divina absoluta inter se realiter identificentur, evidentissimum est unum non posse alicui naturæ attribui, quia & reliqua eidem Naturæ adscribantur.

Tertia est, nullum afferri posse a Lutheranis momentum seu ex Scripturis, seu extra

ratione depromptum, quo probent, si vi-
unionis hypostaticæ saltem aliqua Attributa
Divina vere, & reipsa naturæ assumptæ com-
municantur, inde non sequi aliquas pariter
ejusdem naturæ assumptæ proprietates de
Natura Divina prædicari posse. Dicent pro-
prietatibus naturæ humanæ sibi reipsa com-
municatis Divinam naturam, destructum iri.
Fatemur, sed si fieri posset naturam huma-
nam sibi reipsa communicatis, & in se rece-
ptis quibusdam Attributis Divinis in Divi-
nitatem non converti, quidni Divinitas pos-
set quasdam humanitatis proprietates in se
ut in subjecto inhæsionis recipere, quin in hu-
manam naturam mutaretur? Par utrobique
ratio: non magis proprietates humanæ na-
turæ Divinitati repugnant, quam proprietates
Naturæ Divinæ repugnant humanitati: er-
go &c.

Dices I. Christus, ut homo, sedet ad dexte-
ram Patris: atqui dextera Patris est ubique;
ergo Christus ut homo est ubique.

Dist. maj. Christus, ut homo, sedet ad de-
xteram Patris ratione suppositi, & personæ,
concedo majorem: ratione naturæ humanæ
præcise, nego. Sedere ad dexteram Patris
æqualitatem honoris significat: cum ergo
Christus, ut homo, dicitur ad dexteram Patris
sedens, sensus est, personam quæ Christi hu-
manitatem habet, esse æqualem Patri, quod
verissimum est, siquidem illa Persona ipsum
est Verbum Divinum. Sed sensus non est,
natu-

naturam humanam Christi esse Divinitati æqualem. Id tam impium, quam absurdum foret. Jam vero persona habens humanitatem Christi, cum sit Patri æqualis, ubique consistat necesse est, sed nihil probat de humanitate assumpta idem esse statuendum. Immo ex Scripturis, & ex ratione evidentissimum est, hanc naturam non posse esse immensam.

Dices II. Quæ uniuntur intime, eorum unum non potest esse sine alio: atqui Natura humana, & persona Verbi in Christo uniuntur intime; ergo ubicumque est Verbum, ibi humana Christi natura esse debet.

Distinguo maj. quæ intime uniuntur localiter, & adæquate, eorum unum non potest existere alicubi, quin & ibidem aliud existat, concedo: quæ uniuntur personaliter: ea scilicet unione, quæ nihil habeat cum unione locali commune, nego. Itaque natura humana non unitur Verbo localiter, & adæquate, itaut tantum pateat, quantum Deus diffunditur, & ipsi, si ita loqui fas est, commensuretur. Quippe in commensuratione, & spatii ejusdem communionē unio hypostatica nequaquam consistit. Quemadmodum igitur in hypothēsi Philoſophorum qui animam humanam toto corpore diffusam ponunt, oculus v. g. etsi exigua tantum sit corporis pars, toti animæ conjungitur, ita Persona Verbi immensa cum natura humana alicubi solum existente uniri potest; aut saltem

tem non demonstraveris, Verbum ejusmodi naturam hocce modo sibi non posse hypostatice conjungere.

Addé, Verbi Divini immensitatem in eo esse positam, quod totum ubique, & in singulis loci partibus sine divisione idem existat: proindeque, etsi ad unionis hypostaticæ rationem formalem id pertineret, nempe humanam Christi naturam aliquo esse in loco, in quo Verbum totum esset præsens, non inde sequeretur, hanc non posse hypostatice toti Verbo uniri, quin ejus immensitate donaretur: quippe cum, quocumque in loco existat Christi humanitas, ibi totum Verbum substantia sua necessario præsens existat.

Dices III. Juxta fidem Catholicam Christus homo est ubique; ergo &c.

Dist. ant. Christus homo est ubique ut Deus, concedo: Christus homo reduplicative ut homo, idest, quantum ad naturam humanam, nego. *Neque enim Deus, inquit S. Ambrosius lib. 2. de Fide cap. 8. n. 60. de loco ad locum transit, qui ubique semper est. Ut homo, est qui vadit, ipse qui venit. Denique & alibi dicit: Surgite, eamus. In eo ergo vadit, & venit, quod est commune nobiscum. Et S. Fulgentius lib. 2. ad Trasimundum cap. 17. Unus idemque secundum humanam substantiam absens Calo, cum esset in Terra, & derelinquens terram cum ascendisset in Calum; secundum Divinam vero, immensamque substantiam nec Calum dimittens,*
cum

*cum de Cælo descendit , nec Terram deferens
cum ascendit in Cælum . Similia habent Ru-
finus In Symbolum , S. Augustinus Tracta-
tu 78. In Joan. S. Gregorius Magnus Homi-
lia 29. Vigilus lib. 1. contra Eutychem &c-*



QUA

QUÆSTIO I I.

De Uno ex Trinitate passo.

Diuturniori Schismate, quo Orientalis Ecclesia ab Apostolica Romana Sede sejuncta fuerat, Hormidæ Pontificis Maximi opera, ac Justinii Imperatoris pietate composito, veteres potius discordias desisse, quam pacem cœpisse, nova rursus suborta controversia monstravit. Illa quidem in angulo Scythiæ Europææ apud Tomos a paucis Monachis excitata, Orientem, simulque Occidentem, ac Meridiem uno veluti momento instar incendii pervagata, per quinque fere lustra Orthodoxos varias in partes distraxit. Damnato in Synodo Ephesina Nestorio, Theodosius Imperator impios ejusdem Libros igne absumendos, emissio edicto, decrevit, *ita ut*, inquit, *nemo in Religionis disputatione aliquam supradicti nominis mentionem faciat* L. 66. de Hæret. Cod. Theodos. At Nestorianæ Hæreseos sectatores, quo damnatæ a Synodo doctrinæ majorem aliunde auctoritatem adjicerent, id consilii cœperunt, ut eandem a Theodoro Episcopo Mopsuestiæ Cilicia dudum traditam publicarent Nam Theodoretus in ore famæ toto passim Oriente versabatur, quippe qui decem millium voluminum scriptor

ptor laudaretur, ac quindecim præsertim Libros contra Appollinarium exarasset, in quibus universa Nestorii ipsius quondam discipuli doctrina tradebatur. Hac fraude Nestoriani usi sunt, ut recens dejecta hæresis sub magni nominis umbra vires resumeret, ac sub Theodori larva incautis illuderet. Verum Orthodoxi Episcopi, ac Abbates majoris Armeniæ, quo præsentissimo malo statim occurrerent, syllabum errorum ex Theodori libris colligentes; eosdem S. Proclo Patriarchæ Constantinopolitano damnandos per Legatos obtulere. Proclus Cypriaci nomine tenus Episcopus, omnium primus, tum sedente in Regia Urbe Nestorio, in celebri ibidem Ecclesia contra ipsius adversus Deiparam voces classicum cecinerat in elegantissima, quæ extat homilia. Erant duo veluti fulmina belli contra Nestorium, Cyrillus Alexandriæ, & Proclus Constantinopoli. Hic ergo legens delata sibi capitula, eadem uti Nestoriana peste infecta damnavit, datis ea de re litteris, tum ad Armenos, tum ad Joannem Patriarcham Antiochiæ; utrique scripto subjiciens anathemata contra singulas Theodori propositiones. Proclus in sua Epistola ad Armenos, ut scribit Liberatus Diaconus cap. 10. *Brevia, Posuit ad interimendas Nestorianorum versutias qui duas in Christo inducunt Personas, unum de Trinitate incarnatum*. Sententia Procli, interprete Dionysio Exiguo, in hæc verba

concupitur. *Nec enim dicentes Filium passum, ratione Deitatis eum passum sentimus, sed consentientes Dei verbum unum ex Trinitate incarnatum, tribuimus intelligendi materiam iis, qui fideliter sciscitantur, cur incarnari dignatus sit.* Idem in Epist. ad Joan. Antiochenum ait: *Dicentes autem iterum passibilem Deum, idest, Christum, consistemus eum non eo passum, quod erat; sed quod factum est, idest, propria carne, & ita prædicantes nullo modo fallimur, quoniam quidem & unum ex Trinitate secundum carnem crucifixum fatemur, & Divinitatem passibilem minime blasphemamus.*

Ex hæcenus laudati S. Procli testimoniis duæ istæ propositiones ab eodem contra Theodori, ac Nestorii Sectatores statutz colliguntur: *Unus de Trinitate est incarnatus, & altera: Unus de Trinitate crucifixus est carne; de quibus thæsis Catholici postea accerrime secum invicem disputarunt.*

Eutychiani vero Nestorianam hæresim impugnantes, quodam veluti pugnz furore abrepti, in extremos Errores deciderunt, dum in mysterio Incarnationis Dominicæ utrique ea dogmata renovarunt, quæ dudum Ecclesia in Sabellio, atque Ario, in arcano Trinitatis exponendo, damnaverat. Etenim Nestorius ex duplici natura Christo inexistente, duas quoque in eodem personas obtruderat. Ex adverso Eutyches ex unitate Personæ in Christo, unam quoque naturam

turam commentus est. Equidem Eutychiani in Synodo Chalcedonenſi proſcripti, quo damnatæ hæreſi Fidem facerent, binas propoſitiones a SS. Patribus contra Neſtorianos ſtatutas, magno apud Sectarios plauſu Catholicis objectabant. Prior erat mutuata ex S. Cyrilli Libris: *una Dei Verbi natura incarnata*, Alteram ex Procli Epistolis deſumpſerant. *Unus è Trinitate eſt paſſus*. De hoc Procli pronuntiato juxta ſuſceptum argumentum ſermonem tantum inſtituam. Petrus Fullo Eutychianus, qui Antiochenam Sedem invaſerat, cum unicam eamque Divinam in Chriſto Naturam adſtrueret, eamdem quoque paſſam fuiſſe affirmabat, ea ſe tradere teſtatus, quæ magni in univerſa Eccleſia nominis Proclus paulo ante docuerat. Ita homo vaſer, & perditus ſub pulchriori larva hæreſis turpitudinem occultare tentabat. Nam S. Patriarcha hæc diſerte in Epistoſa ad Armenios ſcribit: *Nec enim dicentes Filium paſſum, ratione Deitatis eum paſſum ſentimus: divina ſiquidem natura nullam prorsus recipit paſſionem; ſed conſistentes Deum verbum unum ex Trinitate incarnatum &c.* Ubi docet, ideo Verbum hominem factum, ut qui Deus nulli poterat paſſioni ſubjectus eſſe, homo factus paſſionem ſubiret. Idem autem Fullo, quo ſuam cunctis hæreſim inſillaret, ſacro hymno Triſagii: *Sanctus Deus, Sanctus fortis, Sanctus immortalis* appendicem inſeruit: *qui paſſus eſ pro nobis, ſperans ſce-*

leratæ adjectionis cantilena Clerum, ac Populum ad impiæ blasphemæ professionem compellere. Cum vero passim argueretur, quod Trinitatem, quæ eo hymno invocabatur, passam mentiretur, novo errore priorem commutans, Trisagium soli Verbo Deo cani autumavit, qui solus passus est pro nobis, ac proinde non tota Trinitas; sed *unus è Trinitate passus* sæpius ab eodem pro concione dicebatur. Horum testis est idem, qui supremus Ecclesiæ iudex sententiam contra eundem Fullonem pronuntiavit Felix III. hæc illimet exprobrans Epist. 3. *At vero tu in Ecclesia ausus es dicere, quod unus increata atque individua Trinitatis passionem subiit: & per hoc consubstantialem quoque solvere niteris, ac Deum subicere numero.* Etenim cum in Christo uno ex Trinitate unicam naturam Divinam statueret, consubstantialem Dei Naturam negabat, unaque tres Deos impie inducebat; siquidem Fullo dicebat: *Unum de Trinitate passionem pro nobis pertulisse in substantia Deitatis*, teste eodem Felice Epist. 5. ad Zenonem Augustum. Nam substantia passibilis non est idem cum substantia intrinsece impassibili; unde cum substantia, seu natura Filii, juxta Fullonem, esset passibilis, natura vero Patris, ac Spiritus Sancti impassibilis, una eademque natura esse nequibant, ac proinde Divinæ Personæ non poterant dici consubstantiales, sed distinctæ naturæ, atque adeo plures Deos indu-

inducentes juxta Fullonis errorem .

Hæc est origo celeberrimæ controversiæ circa orthodoxiam propositionis de uno ex Trinitate passo , de qua nunc disceptamus , & circa quam quatuor animadvertimus notatu digna , & tenenda .

Primum est duplicem olim fuisse Catholicis de Sententia S. Procli admittenda , aut rejicienda concertationem . Prior , imperantibus Zenone , ac deinde Anastasio , mota est adversus Hæreticos , prædictum nempe Fullonem Sedis Antiochenæ invasorem , & alios Eutychianos Theopaschitas , qui in Sententia S. Procli nomen carnis qua passus est Christus , & aliud quodcumque naturarum in Christo diversitatem indicans , consulto resécantes , idcirco profitebantur unum de Trinitate passum , ut significarent Naturam Divinam , qua putabant humanitatem Christi esse absorptam , & consumptam , dolores passionis sustinuisse . Igitur vocem *unus* in mutilata Sententia S. Procli sumebant essentialiter , vel saltem , propositionem hanc , *unus de Trinitate passus est* , propugnabant reduplicative , nolebantque ea enuntiari subiectum duplex , aliud denominationis , nempe persona Verbi , cui tribuitur passio propter naturam humanam , quam hypostatice assumpsit & in qua sola dolores passionis recepti sunt , aliud inhæsionis , nempe humanitas qua Christus passus est , quamque unitione facta superslitem non

manſiſſe Theopafchitæ contendebant . E contra vero idem Felix III. in dicta *Epiftola* 3. ad eundem Petrum Fullonem , quamvis graviter eum objurget , eique in crimen maximum merito vertat , quod unum de Trinitate paſſum dicens , Trinitatem conſubſtantialem in tres Deos dividat ex evidenti ratione , quam mox innuimus , quod qui Deum Filium in propria natura paſſum dicit , Divinam ejus naturam neceſſario diſtinguit a Divinitate impaſſibili Patris , & Spiritus Sancti ; attamen manifeſte apparet , Summum hunc Pontificem , qui in eadem *Epift.* Filium appellare non dubitat *unum individua Trinitatis* , minime reje- ciſſe hanc propoſitionem in ſe ſumptam , ſcilicet , *unus de Trinitate paſſus eſt* , ſed ſolummodo eam damnaſſe , prout ab Hæ- reticis obtrudebatur , ad errorem ſuum callide mentibus infundendum .

Altera controverſia , quæ de hac propoſi- tione olim mota eſt , ipſoſmet Catholicos diviſit , cœpit anno 519. Conſtantinopoli , auctoribus Monachis quibuſdam Scythis , hujuſce Sententiæ , unus de Trinitate paſſus , profeſſionem nimio ſtudio urgentibus , Juſtino imperante , & Hormiſda Romano Pon- tifice . Tunc in regia Urbe verſabantur Se- dis Apoſtolicæ Legati , quos pacis Eccleſia- rum diuturno Acacii Schiſmate interruptæ redintegrandæ cauſa , Hormiſdas ad Juſtinum Principem Catholicum miſerat . li conten-
tio.

tionem a Monachis Scythis excitatam compescere frustra conati, de ea Hormisdam certiores faciunt, quem etiam ut adirent Monachi, Romam profecti sunt. Hormisdas ex prudenti œconomia quæstionem, ut modo probabimus, solemni iudicio dirimere noluit, adeout adiaphoris liberæ Catholicorum disputationi relictis hæc controversia annumerata fuerit, donec anno 534. morte Hormisdæ decimo, Joannes II. hanc Justiniani Augusti professionem, nempe unum de Trinitate esse Christum, qui pro nobis crucifixus est, auctoritate sua confirmaverit.

Secundum, quod hic observandum, & tenendum ducimus, istud est, eos Scythas Monachos, qui tanto studio pro Sententia S. Procli, Constantinopoli primum, ac deinde Romæ decertarunt, ab omni hæreseos Nestorianismo oppositæ, nempe ab Euty-chiana pravitate fuisse prorsus immunes. Baronius ad annum 520. Binius in notis ad Epist. 70. Hormisdæ, Labbæus in observationibus ad Epistolam eandem, & alii complures, Monachos Scythas Euty-chiana saltem fuligine tinctos putant. Vasquesius vero in 3. S. Th. Disp. 15. cap. 3. Petavius Lib. 5. *De Incarn.* cap. 2. Thomassinus *Disser.* 18. in Synodos num. 10. & lib. 3. *De Incarn.* cap. 13. Christianus Lupus in *Notis ad Epist.* variorum Patrum t. 2. p. 452. Duhamelius lib. 2. *De Incarn.* cap. 3. Diony-

sius a Sancta Martha in *vita Cassiodori* Gallice scripta, Norisius in *Dissertatione de uno ex Trinitate passo*, & in *Apologia* Monachorum Scytharum &c. quam sequimur opinionem propugnant. Probatur autem quia, ut ait Petavius loco citato num. 2. *Qui professiones Fidei ab illis (Monachis Scythis) editas, ac cetera eorundem scripta, quæ extant, diligenter expenderit, nullum ibi deprehendet vestigium heresis illius.* videlicet Eutychianæ. Quod quidem doctissimi Petavii iudicium nemo theologus non approbaverit, si accurate legat ejusmodi scripta, nempe Apologiam quam illi Monachi Legatis obtulerunt, & quæ habetur tom. 9. Bibl. PP. Lugd. p. 534. Capitula quæ ejusmodi Apologiæ adjunxerant ibid. pag. 537. Professionem fidei Maxentii horumce Monachorum doctissimi, quæ iisdem fere verbis concipitur, quibus definitio fidei Concilii Chalcedonensis: ibid. pag. 534. ac denique reliqua hujusce Maxentii opera, in quibus vehementius aliquando studium, & alios hujus generis nævos nonnunquam, deprehendes, nihil vero prorsus quod eum Eutychianæ hæreseos suspectum efficiat.

Tertium est, nec Legatos Hormisdæ, neque Hormisdam ipsum, Monachorum Scytharum propositionem, ut hæreticam damnassee.

Et quidem Legati eam ut hæreticam non proscripserunt. Tametsi enim in suis ad
Hor-

Hormisdam suggestionibus, illorum Monachorum intempestivam iniquititudinem maxime vituperant, fidem eorum suspectam habent, atque illorum propositionem novam, & hæresibus, multisque malis in Ecclesia fovendis idoneam esse scribunt, attamen I. non suggerunt Hormisdæ ut Monachorum propositionem tamquam hereticam proscribat, sed tantum ut eam dogmati Catholico contra Nestorianorum versutias declarando non esse necessariam doceat. *Sanum mihi videtur, & utile, & ad pacem Ecclesiarum conveniens*, inquit Dioscorus Diaconus in una e suis ad Hormisdam de hoc negotio suggestionibus, *nihil aliud responsum dari, nisi: Sufficit sanctum Chalcedonense Concilium, in quo, & aliæ Synodi continentur: sufficiunt Epistolæ Papæ Leonis, quas Synodus confirmavit. Novitatem in Ecclesia introducere nec volumus, nec debemus.* II. Quod a S. Pontifice respondendum arbitrabantur Legati, illud ipsum quod coram Imperatore, & Senatu de illa quæstione responderant. *Modo hoc dicimus*, inquit in suggestionem ad Hormisdam cunctorum nominibus inscripta, *ut nulla novitas a Sede Apostolica scribatur: quia & nos ante Imperatorem, & ante Senatum hæc indicavimus, dicentes: Extra Synodos quatuor, extra Epistolas Papæ Leonis nec dicimus, nec admittimus quidquid non continetur in prædictis Synodis, aut quod non est*

scriptum a Papa Leone non suscipimus; quia si voluerit Dominus noster qualemvis novitatem scribere, pejus erit istud initium (vitiū) quam illud quod factum est per Eutychetem. Similia quoque iidem Legati ad Monachos, coram se, & coram Episcopo Constantinopolitano, adversus Victorem, Diaconum volentes, ut Concilio Chalcedonensi, nec non S. Leonis, & S. Cyrilli dogmaticis Litteris adderetur *unus de Trinitate*, responderunt, teste Dioscoro Diacono in alia sua suggestione ad Hormisdam t. 4. Conc. pag. 519.

Itaque Sententia, quam Monachi tanto æstu propugnabant, non visa est Legatis, ut hæretica damnanda; nempe eos minime latere poterat ejusmodi propositioni in se, sumptæ significationem inesse Catholicam; sed I. quia nova erat, idest, neque a Conciliis, neque a S. Leone conceptis verbis adhibita; II. quia in sensum perversum a Petro Fullone, & ab Anastasio Imperatore fuerit usurpata; ideo volebant eam Synodorum definitionibus non adjici, immo maxime necessariam declarari, atque ejusmodi Synodos, & Epistolas S. Leonis plenæ dogmatis expositioni sufficere.

Votis Legatorum suorum annuit Hormisdas. In sex Epistolis, quas de Monachorum Scytharum dissidio scripsit, hanc propositionem, *Unus de Trinitate passus est*; non modo non condemnat, sed ne quidem con-

conceptis verbis exprimit . In prima quæ est ad Iustinianum numero 66. solum rescribit , Monachos illos Romæ mansuros, donec Legatis suis reducibus inquirere possit, *quæ revera facienti causa inter eos fuerit commota discordia*. Secundæ ejus Epistolæ quæ est 67. idem est argumentum . In tertia, quæ est 70. ad Possessorem in Scythas Monachos Roma profugos vehementer quidem invehitur, illos rixandi libidinis accusat, temeritatisque, novitatis, superbiæ, et contumaciæ notas iis impingit . At nullam hæreseos accusacionem in ipsos instruit, nullamque propositionis, *Unus de Trinitate passus*, expressam mentionem facit . In quarta quæ est 77. ad Iustinianum, promissam sibi a Justiniano circa hoc negocium legationem a se expectari dicit . Interim, ut excludat sensus perversos, qui propositioni famosæ, quam tamen expresse non commemorat, poterant ab hæreticis alligari, hæc de Sancta Trinitate docet : *Sancta Trinitas, Pater, Filius, & Spiritus Sanctus unus est Deus, hanc Israel jussus adorare; cujus inseparabilis, & indiscreta substantia non potest dividi, non potest sacrilega distinctione separari, servata tamen proprietate unicuique Personæ*. In quinta, quæ est 78. ad Iustinum Augustum, constitutis a Concilio Chalcedonensi, et a S. Leone inhærendum statuit, et quamvis ab Imperatore rogatus, quæstionem definire, vitandæ tamen discordiæ

causa nihil de ea pronunciandum putat . In sexta demum quæ est 79. ad eundem Justinum Augustum , Trinitatis , et Incarnationis mysteria accurate exponit , divisionem in Trinitate , et passionem in Divinitate admittendam negat ; sicque eos proscribit pravos errores quos propositioni , Unus de Trinitate passus , Theopaschitæ præposere annexuerant . Ceterum de hac propositione idem silentium servare pergit . Ergo propositionem Monachorum Scytharum Hormisdas ut hæreticam non damnavit .

Id ipsum testimoniis Auctorum coætaneorum maxime confirmatur . Maxentius in *Responsione* ad Epistolam Hormisdæ cunctis notum esse affirmat, quod Monachis responsum quærentibus Romanus Episcopus dare omnibus distulerit . Ferrandus Diaconus in *Epistola* ad Severum scribit nihil ante Pontificatum Joannis II. fuisse ab Ecclesia Romana in hac Causa definitum . Denique Anatholius Ecclesiæ Romanæ Diaconus post Hormisdæ mortem de hac propositione eundem consulit Ferrandum Diaconum Carthaginensem ; quod certo indicio est, quæstionem a Sede Apostolica nondum solemnè judicio definitam fuisse .

Itaque Hormisdas S. P. ex una parte prospiciens Sententiam *de uno ex Trinitate passio* , non fuisse antiquis Patribus usitatam , tum Latinis prorsus ignotam esse, eandemque apud Græcos a Petro Fullone Pseudo- Patriar-

Patriarcha Antiocheno, et ab Anastasio Imperatore sensu Eutychiano usurpatam; ex alia vero parte sibi non dissimulans, hac propositione in se sumpta sensum Catholicum referri, de cætero apud se merito statuens eam plenæ declarationi fidei minime esse necessariam, prudenter œconomia usus est, atque ab ejusmodi approbanda vel reprobanda Sententia caute abstinuit, juraveritus ne in iis, in quibus res Christiana versabatur circumstantiis, definitio quæstionis ejusmodi quoquomodo fieret, novarum dissensionum in Ecclesia occasionem daret.

Quartum est, controversiam de uno ex Trinitate passo meram fuisse inter Catholicos *Logomathiam*, seu quæstionem de nomine. Quod probatur I, quia hoc ipsum annotarunt Justinianus in tertia quam de ejusmodi argumento ad Hormisdam scripsit *Epistola* T. 4. Conc. Lab. col. 1517. Ferrandus in *Epistola* ad Anatholium cap. 18. et in *Epistola* ad Severum cap. 9. nec non Facundus Hermianensis Lib. 1. de tribus capitulis.

Probatur II. quia omnes Catholici quidquid in hoc negotio fide erat tenendum, aperte, & unanimiter profitebantur. Etenim agebant universi, Secundam Sanctissimæ Trinitatis Personam, seu Filium Dei Unigenitum pro nobis esse incarnatum, & secundum Carnem Cruci affixum, seu, quod eodem recidit, Christum, qui pro nobis passus

passus est, unam esse Trinitatis Personam. Cuncti in Christo duas admittebant naturas, Divinam, secundum quam eum prædicabant esse impassibilem, humanam, secundum quam eum esse passum, & crucifixum credebant. Hæc erat fides imprimis Legatorum Hormisdæ, ut patet ex jam laudata *suggestione* secunda Dioscori Diaconi ad Hormisdam, tum Hormisdæ ipsius, qui in Epistola sua ad Justinum, quæ est 79. hanc diserte exponit, tum denique Monachorum Scytharum, ut videre est in eorum Apologia, & Capitulis, & in Maxentii lucubrationibus. Qui igitur unum de Trinitate passum nolebant dicere, vocem *Unum*, accipiebant essentialiter, & absolute, id est, sine relatione ad Personas; unde inferebant hac locutione vel divinitati, ac proinde toti Trinitati passionem adscribi, vel Sanctam, et individuum Trinitatem in tres Deos dividi. Sane ex *Epistolis* 77. et 79. Hormisdæ manifestissime colligitur hunc esse veritum Pontificem, ne propositio, quæ de agimus, ejusmodi pravo, et hæretico sensu quo a Fullone propugnata fuerat, adhiberetur. Aliqui etiam, ut Trifolius vocem *Unus* pro *uno* Patre, aut *uno* Filio, aut *uno* Spiritu Sancto in laudata propositione sumi posse contendebant, quasi ea unus Pater de Trinitate, aut unus de Trinitate Filius etc. passus significaretur. Quapropter inepte postulabant quis ex tribus Patribus,

aut

aut ex tribus Filiis etc. hac Sententia passus exprimeretur? Jam vero qui inter Catholicos exadverso unum Trinitatis esse passum profitebantur, ut Dionysius Exiguus, Ferrandus, Rusticus, ipsique Monachi Scythæ, ii omnes S. Proclum Sententiæ hujus auctorem secuti, vocem *unus* accipiebant ut in ea propositione revera sumi debet, rationaliter scilicet, seu personaliter non pro uno Patre, aut uno Filio etc. ut ridicule Trifolius, sed generalius pro uno subsistente, seu una è Trinitatis personis, adeo ut sensus sit: Unus subsistens de Trinitate, seu una de Trinitate Persona carnem assumpsit, et in Natura assumpta dolores passionis, et ipsam crucifixionem sustinuit. Atque non aliam fuisse ejusmodi Catholicorum mentem ex eorum scriptis adhuc superstitibus liquidissime constat. Ergo, licet Maxentius in responsione ad Epistolam, Hormisdæ, et alibi Adversarios suos non sine magna tameritate hæreticos nuncupet, quamvis Legatis Hormisdæ suspecta visa, fuerit Monachorum Scytharum fides, istorumque propositione hæresim Arianam propinari senserit Trifolius, attamen quod ad fidem attinet, et substantiam dogmatis, nullum hos inter et illos discrimen intercessit.

His prænotatis, quæritur utrum vera sit, et Catholica hæc propositio, *Unus de Trinitate passus est*, nec non ista: *Unus de Trinitate*

40 APPEN. AD DISSERT.
tate incarnatus est, seu, Christus, aut Ver-
bum est unus de Trinitate, quam Sententiam
altera supponit.

Respondeo: Has propositiones esse verissimas, et Catholicas. Hoc unum inter eas discrimen intercedit, quod ista: *Unus de Trinitate incarnatus est*: vera sit etiam reduplicative, seu quatenus est *unus de Trinitate*; altera vero, quæ ex ea deducitur, nempe *unus de Trinitate passus est*, non sit vera nisi ratione humanitatis assumptæ, in qua sola Christus passus est, & propter communicationem idiomatum, quam jam explicavimus.

Probatur Responsio I. ex Conciliis. Synodus V. generalis can. 10. sic habet: *Si quis non confitetur Dominum Jesum Christum, qui crucifixus est Carne, Deum esse verum, & Dominum gloria & unum de Sancta Trinitate, talis anathema sit.* Vide etiam can. 4. & 5.

Concil. Lateran. a Martino I. anno 649. contra Monothelitas celebratum can. 2. sic statuit: *Si quis... non confitetur proprie, & secundum veritatem ipsam, unum sanctæ & consubstantialis, & venerandæ Trinitatis Deum Verbum à Cælo descendisse, & incarnatum ex Spiritu Sancto ex Maria semper Virgine, & hominem factum, crucifixum carne &c. condemnatus sit.*

Patres Concilii VI. tum in definitione fidei t. 6. Conc. pag. 1095. tum in sermone

acclamatorio ad Imperatorem pag. 1052. tum etiam plerique Actione VIII. suffragia singuli proferentes, Christum unum de Trinitate prædicant.

Probatur II. auctoritate Summorum Pontificum.

Joannes II. in *Epistola* ad Justinianum Imperatorem data Romæ VIII. Kal. Aprilis anni 534. primus quæstionem definivit, confirmans quæcumque ad eum de fidei doctrina Justinianus scripserat in Literis, quas suæ *Epistolæ* inserit, inter quæ illud erat imprimis, *Christum crucifixum, unum esse sanctæ, & consubstantialis Trinitatis*; Et in *Epistola* 3. ad Senatores, *Justinianus Imperator filius noster*, inquit, *De his tribus quæstionibus orta certamina fuisse significavit, utrum unus ex Trinitate Christus, & Deus noster dici possit: hoc est una de tribus Personis Sanctæ Trinitatis sancta Persona &c. Probavimus in his Catholicam Imperatoris fidem &c. Unum enim ex Sancta Trinitate Christum esse, hoc est, unam de tribus Sanctæ Trinitatis personis Sanctam esse Personam; sive subsistentiam, quam Græci ὑπόστασις dicunt evidentur ostendimus.*

Eandem Justiniani fidem de uno ex Trinitate passo approbavit etiam Agapetus Joannis secundi Successor, in *Epistola* ad Justin. his verbis: *Huic quisquis contradicere præsumpserit, a Catholica communione se noverit alienum.* Dedit hanc *Epistolam* Agape-

gapetus die 18. Martii Constantinopoli , quo a Senatu Romano exoratus , belli ab Italia avertendi causa se contulerat . De anno vero quo exarata est , scite observat doctissimus , & eminentissimus Norisius in dissertatione : *De uno ex Trinitate passo* cap. 10. Pontificem non nisi die 23. Februarii anni 536. Constantinopolim pervenisse , ac proinde ejusmodi Epistolam in edit. Binii , & Labbæi male legi datam *Flavio Belisano V. C. Consule* id est anno 635. Legendum cum Codice Vaticano : *Post Consulatum Belisarii V. C.* id est anno 536.

Vigilius Papa in constituto quod eidem Justiniano inscripsit , dato Constantinopoli die 14. Maii anni 553. hunc laudat , quod *orthodoxa professione unum de Sancta Trinitate Christum Deum , & Dominam nostrum confitendum astruxerit .*

Tandem S. Agatho in Epistola ad Imperatorem Constantinum Pogonatum , quæ Actione 4. Concilii sexti recitata est , fidei quam Justinianus Imperator suis edictis professus est , *restitutionem* laudat . Is porro maxime inculcarat , unum de Trinitate esse Christum qui pro nobis crucifixus est .

Probatur III. ex Sanctis Patribus . Dissimulandum non est , propositionem de qua agimus , licet quantum ad sensum in Scripturis , & in tota Traditione sæpius exprimat , iisdem tamen terminis , & vocibus non fuisse adhibitam ante quintum Sæculum

lum. Primus omnium sit S. Proclus fidei Catholicæ adversus Nestorium strenuus defensor, qui *Ad interimendas*, juvat hic ex Liberato Breviarii cap. 10. repetere, *Nestorianorum versutias qui duas in Christo inducunt personas, unum de Trinitate incarnatum posuit*. Extat hæc Epistola S. Procli tum Græce, tum ex versione Dionysii Exigui, qui Hormisda Pontificatum gerente, occasione dissidii a Monachis Scythis excitati, hanc Latine reddidit. Non modo autem unum de Trinitate incarnatum, sed etiam Christum pro nobis carne passum unum esse ex Trinitate, tradidit S. Proclus in Epistola ad Joannem Antiochenum, cui tomum suum ad Armenos approbandum miserat. Cujus quidem Epistolæ fragmenta leguntur apud Liberatum loco mox citato, apud Facundum Hermianensem lib. 1. & Collatione 5. Concilii V. generalis. Laudat enim in hanc rem Joannes Papa II. in Epistola 3. quæ est ad Senatores, duo testimonia S. Procli, ut excerpta ex ejus Epistola ad Occidentales. Horumce vero textuum posteriorem, ut & alia plura Maxentius in Professione Fidei tom. 9. Bibl. PP. Lugd. p. 535. tamquam ex Epistola Procli ad Armenos desumpta recitat, in qua tamen non reperiuntur. Censet Petavius lib. 5. de Incarn. cap. 3. in Epistola Joannis II. mendum irrepsisse, & legendum *ad Orientales*, quibus S. Proclum revera scripsisse ex S. Cyrillo

rillo colligitur; Maxentium vero, quæ in hac S. Procli Epistola ad Orientales continebantur, præ inconsiderentia, ut e tomo ad Armenos excerpta, exhibuisse. Contra Norisius Maxentium interpretatur de refutatione capitulorum Theod. Mopsuesteni Epistolæ ad Armenos adjecta. Quæ refutatio periit quidem, sed extitisse colligitur tum ex fragmentis Epistolæ ad Joan. Antioch. Collat. 5. Synodi V. insertis, tum ex altera S. Procli ad eundem Epistola apud Facundum l. 8. c. 2.

Testis porro est Liberatus loco mox citato, Epistolam S. Procli ad Armenos a Joanne Antioch. & ab Episcopis cum eo congregatis approbatam fuisse, & subscriptam.

Cyrillus Schytopolitanus scribit, S. Euthymium celebrem Mouachorum in Palæstina institutorem, qui anno 473. obiit, nec non S. Sabam Abbatem adversus Nestorianos prædicasse, unum de Trinitate esse Christum.

Constat quoque tum ex Libello, quem Legatis Anastasii Papæ Apocrisarii Ecclesiæ Alexandrinæ versus initia Imperatoris Anastasii obtulerunt, cum maxime ex supplicatione, seu deprecatione Clericorum, & Abbatum Diocesium Antiochiæ, Hierosolymorum, & secundæ Syriæ ad Justinum Imperatorem Anastasii Successorem, constat, inquam, famosam Sancti Procli sententiam de Christo uno ex Trinitate, genuino, & Catholico sensu intellectam, etiam quo tempore ea mutilata, ut deinde dice-

dicemus, abutebantur Eutychiani, a Catholicis pluribus Orientis in professione Fidei contra Nestorianos recitatam. Latinis quidem serius cognita, & usitata fuit eadem Sententia. Nec mirum, siquidem 1. ad eorum notitiam non antea pervenit Epistola S. Procli ad Armenos, quam a Dionysio Exiguo temporibus Hormisdæ S. P. Latinitate donaretur. 2. Contra Nestorianos, quibus coercendis nata erat illa locutio, concertationes Occidentalibus erant pauciores: Orientalibus vero frequentissimæ. 3. Henoticum Zenonis datum anno 482. Procli sententiam his verbis conceptam continebat: *Trinitas enim mansit Trinitas, & incarnato uno de Sancta Trinitate Deo Verbo*. Illud autem edictum in Occidente rejectum est unanimi cum Ecclesia Rumana consensu, a pluribus vero in Oriente receptum fuit. Facile ergo intelligitur, quæ fuerit causa, cur sententia de qua agimus, etsi plane Catholica, & quoad rem ipsam ab Occidentalibus admissa, non statim quoad verba, ab iis recepta fuerit, quandoquidem nova iis videri debuit, & ea insuper abusi fuerant Eutychiani. Sed ex eo maxime elucescit veritas hujusce locutionis, quod eam esse Catholicam, Dionysius Exiguus in *præfatione* ad Epistolam S. Procli, Ferrandus Diaconus in *Epistola* ad Anatolium, & alii præstantes Viri apud Latinos statim agnoverint; quodque post aliquam ejus ventilationem,

& dis-

& discussionem, anno a morte Hormisdæ Papæ, qui de ea nihil statuere voluerat, decimo, Joannes II. S. P. hanc solemniter approbandam duxerit, nemine reclamante præter solos fere Monachos Acœmetas, quos idem Pontifex propter Eutychianum errorem ab Ecclesiæ communione expellendos censuit.

Probatur ultimo ratione Theologica. Omnes Catholici semper fassi sunt, atque etiam dum inter ipsos de uno ex Trinitate passo disputatum est, alte profitebantur, quod ex Scripturis, & ex Traditione certissimum est, Christum scilicet, qui pro nobis secundum humanitatem passus, & crucifixus est, esse Verbum ipsum, seu Filium Dei pro nostra salute incarnatum, unam e personis Sanctissimæ Trinitatis. Atqui hæc propositiones, unus de Trinitate incarnatus est, & pro nobis secundum carnem est passus, hoc ipsum significant, non aliud quidquam. Enim vero planum est hanc esse ejusmodi propositionum significationem, modo vox *unus* in hac locutione, *unus de Trinitate*, accipienda sit *personaliter*, seu *notionaliter*, non vero *essentialiter*, & *substantialiter*, adeout sensus sit, una Trinitatis persona, non vero una Divinitas Trinitatis, vel unus e Trinitate Deus: atqui cum dicitur, *unus e Trinitate*, vox *unus* sumitur, personaliter non essentialiter, & sensus est, una Persona SS. Trinitatis, non una Divinitas, seu
unus

unus Deus Trinitatis. Nam I. illud Dei dictum Genes. 3. 3. 22. *unus ex nobis*, juxta genuinam, & omnibus probatam interpretationem, idem sonat ac una persona ex tribus SS. Trinitatis personis. Atqui eadem plane vis est vocis *unus*, in hac locutione, *unus de Trinitate*, ac in illa Dei de se loquentis sententia *unus ex nobis*; ergo &c. Hoc argumento utuntur Joann. II. in *Epist.* 3. ad Senatores, Facundus Hermianensis lib. 1. &c. II. S. August. *Enchiridii* cap. 38. ait: *Unus trium*, ut designaret unam SS. Trinitatis personam: atqui hæ voces *unus de Trinitate* idem manifeste exprimunt, ac illæ *unus trium*, quando agitur de Trinitate; ergo &c. III. Quandocumque vox *unus* sine adjuncto *Deus*, aut alio æquivalenti, de Trinitate agendo pronuntiatur, numquam concipitur, essentiam, seu Naturam Divinam, quæ cum suo concreto Deus identificatur, significare. Si velis unica voce unitatem substantiæ, seu naturæ tribus Personis communis designare, adhibe vocem *unum*, ut dixit Christus: *Ego, & Pater UNUM sumus*; non dicas *unus*, aliàs in Sabellianismi notam incurres. Pater enim, Filius, & Spiritus Sanctus sunt *unum*, idest, una substantia, & Divinitas, seu unus Deus, at non sunt *unus*, seu *unus* subsistens, ut ajunt, seu *una* Persona. Hanc rationem premit Ferrandus Diaconus cap. 15. *Epistolæ* ad Anatolium. III. Cum dicitur, *unus*
de

de Trinitate, nonne ipsa vi sermonis, & indole vox *unus* ad aliquem ex iis tribus quibus Sancta Trinitas constat, refertur? Certe id confirmant omnes loquendi modi, quibus unus de pluribus numero designatur. Atque unus ex tribus, quibus Sancta Trinitas constituitur, idem plane est ac una Sanctæ Trinitatis persona. Unde merito Joannes II. in *Epistola* 3. ad Senatores jam non semel laudata, unum de Sancta Trinitate Christum esse ita explicat: *Hoc est unam de tribus Sanctæ Trinitatis Personis sanctam esse Personam; ergo &c.*



Q U Æ S T I O III.

*An Trisagio, idest invocationi, qua Deus
ter dicitur Sanctus in hunc modum,
Sanctus Deus, Sanctus fortis,
Sanctus immortalis, addi
possit, qui crucifixus est
pro nobis.*

PROCLO Patriarcha Constantinopolitanam
Sedem obtinente (in quam translatus
e Cyzicena fuerat, Maximiano mortuo, qui
Nestotio hæretico damnato, ac deposito suc-
cesserat) magnus terræ motus, non in illa
tantum urbe, sed per vicinas Regionēs,
adeoque maximam Orientis, & Occidentis
partem, ingenti tum Urbium, hominum-
que strage, tum superstitum horrore, ac mo-
tu grassatus est. Constantinopolitani crebris
ædium ruinis coacti Urbe cedere, extra
hanc in Campo commorati sunt cum Im-
peratore Theodosio Juniore, ac Patriarcha.
Ibi dum precibus, ac litiis assidue propi-
tium sibi numen facere student, forte vehe-
mentius solito succussa terra, & imminentis
tum maxime publicæ cladis terrore percul-
sis omnibus, puer quidam e media turba vi
abreptus subita, & in aerem elatus, ut jam
amplius non appareret, cæleste ibi carmen,
quo Divinas laudes Angeli canebant, exau-
diit; quod erat hujusmodi, *Sanctus Deus;*

C

San-

*Sanctus fortis, Sanctus immortalis, misere-
re nobis.* Hoc ipsum docere ceteros iussus,
in terram aliquanto post depositus est. Pro-
clus hoc audito, publice ab omnibus canta-
ri præcepit, quod cum alacritate summa fa-
ctum esset, moveri statim terra desuit. Im-
perator cum Sorore Pulcheria edictum fecit,
ut hymnus ille deinceps toto orbe caneretur.
Ex quo per universas Ecclesias usus invaluit,
ut ab hoc carmine Divinæ ubique laudes in-
choarentur. Puer mandato sibi munere per-
functus expiravit illico, & in magna Basili-
ca, quæ Irenes appellatur, est sepultus. Locus,
unde in altum sublatus erat, *eleva-
tio Divina* nominatus est. Hæc anno circiter
Christi 448. gesta refert Nicephorus Callisti
F. quæ & ab antiquioribus traduntur, ut
Felice tertio Papa in Epistola, quam ad Pe-
trum Fullonem scripsit anno 483., & Aca-
cio Constantinopolitano, aliisque Episcopis,
qui ad eundem Petrum acres litteras mise-
runt, quæ inter Zonaræ commentaria in Ca-
nones leguntur. Meminit, & Joannes Da-
mascenus libro tertio de fide, capite deci-
mo: qui & Librum de Trisagio hymno pe-
culiarem edidit, in quo eandem historiam
memorat.

Hunc hymnum porro Joannes idem Da-
mascenus prodidit, in quarta Synodo Oecu-
menica Chalcedonensi decantatum fuisse,
cujus rei fideni faciunt acta Synodi ejusdem,
inter quæ sub finem Actionis primæ legitur,
Orien.

Orientales Episcopos in solemnibus acclamationibus, illum hymnum pronuntiasse.

Postea Petrus cognomento *Fullo*, in Antiochenam Sedem intrusus, ex Eutychiana Secta, ad cælestem hunc hymnum addere istud ausus est: *qui crucifixus es pro nobis, miserere nobis*. Hoc addito Theopaschitarum, qua imbutus erat, hæresim corroborare studebat; ut ipsummet Deum non carne, sed Divinitate passum esse monstraret. Quod dupliciter potest intelligi. Nam aut Trinitatem ipsam totam perpeffioni, ac morti subiciebat; aut unam tantummodo Filii personam. Utrumque Petro Fulloni tribuitur: quorum prius cum Sabellianis commune habuit qui unam dumtaxat in Deo Personam confitentes, hanc ipsam includebant corpore. Atque huiusmodi erroris in illo suspicio statim ex ipsa Trisagii corruptela, proditur: cum post triplex totidem Personarum elogium, appendix ista subjicitur: *qui crucifixus es pro nobis, miserere nobis*. Posterius vero ab Arianis expresserat, qui Divinitatem Filii eandem, atque est in Patre negabant; eamque vice animæ cum carne conjunctam passam esse, mortuamque dicebant. Huic porro suffragabatur altera illa, quæ publice pronuntiata est ab Fullone, Sententia: *Unum de Trinitate, passum esse*. Quod illi exprobrat tum Felix Papa in Epistola ad eum scripta; tum Aca-cius Constantinopolitanus Episcopus. Ac

Felix in altera Epistola, quæ damnationis in Petrum Sententiam continet, quatuor ab eo diversis temporibus prædicatas hæreses nefarias, & sub illa Sententia comprehensas, intellectasque scribit. *Etenim aliàs, inquit, dixisti, Trinitatem pro nobis esse crucifixam, non autem Christum; aliàs immortalem Spiritum, Manichæi secutus errorem; aliàs vero hujusmodi liberatus opinionibus, postquam admonitionibus nostris, ac sermonibus convictus es, Christum, post immortalem Spiritum, passionem sustinuisse; dixisti, non aliter ac Paulus Samosatenus, & Nestorius, qui unum filium in duos partuntur. Addit his, aliàs eundem Petrum Cherubicum hymnum, idest, Trisagium, quem in Trinitatis laudem cælestes illi cecinerunt spiritus, ad solum redigisse Filium.*

Hæc in Trisagii appendice notata, reprehensaque ab Catholicis errorum semina, magis ad corruptoris mentem venenis istis, aut omnibus, aut quibusdam imbutam referenda sunt, quam ad ipsam verborum conceptionem, quæ vindicari per se facile posset ab multiplici hac invidia dissidentium invicem hærescon, quas simul complexi dicitur, uti postea constabit.

Illud vero minime tacendum est, quod Asclepiades Trallensis Episcopus notavit initio epistolæ: Petrum Fullonem hac ratione facinus suum excusasse, quod adversus Nestorium necessariam sibi visam clausulam

lam istam diceret, qui ab Christi passione, ac morte Divinam naturam segregasset.

Hinc Catholici nonnulli formulam istam, Trisagii hymni ab Fullone mala mente, velut mangoniō quodam, interpolatam, partim ad veræ professionem Fidei, paucis insertis voculis, deflexerunt; partim commodè interpretati sunt. Calandio Antiochenæ Ecclesiæ a Petro Fullone tertius Episcopus, ante hujus clausulam interposuit. *Christe Rex*: ut post Trisagium, ita reliqua per-texterentur: *Christe Rex, qui crucifixus es pro nobis, miserere nobis*, ac nefaria illa, in Deum blasphemia vitaretur, ut scribit Nicephorus Callisti.

Ephræmius autem Antiochenus item, Episcopus, vir egregius, & Catholicæ Fidei ardentissimus propugnator, scribit apud Photium, hymnum illum ab quibusdam, Catholicis de solo intelligi Filio, ideoque sine ullo piaculo, Fullonis eos appendicem adjicere, quod ab Orientalibus fieri dicit. Byzantinos vero, & Occidentales, quod Trisagium hymnum in totius honorem Trinitatis concini putent, abhorrere ab illa, Petri Fullonis clausula, ac recte utrosque facere, quum ex mente, ac sensu, quem quisque adhibet, probanda, vel repudianda sit ista Sententia. Subjicit tamen istud Photius, quandoquidem Acephali ad corroborandam impiam suam hæresim plurimum appendice ista Fullonis utebantur,

alios Patres penitus abrogandam censuisse . Sed de trisagio hætenus , de quo legendus , ut jam dixi , Joannes Damascenus . Confer Henrici Valesii *de Petro Antiocheno Episcopo qui Fullo cognominatus est, & de Synodis adversus eum collectis*, Dissertationem ad Evagrii hist. Eccles. & Pagium in Critica Tom. I.

His quoad historiam prænotatis ; quoad Dogma nunc I. est observandum ; quod si primum Trisagii usum spectes , juxta quem ad totam SS. Trinitatem refertur , illi non nisi impie , & hæretice adjici posse hæc verba : *qui crucifixus est pro nobis* . Ratio est quia hac additione , vel toti Trinitati adscriberetur passio , vel saltem Spiritui Sancto , qui , ut observat Felix III. S. P. in Epistola tertia ad Petrum Fullonem , his verbis , *Sanctus immortalis* in Trisagio ad totam Trinitatem relato designatur . Atqui sive toti Trinitati , sive Spiritui sancto , ac proinde divinitati passionem adscribere impium , absurdum , & hæreticum est . Solus Filius pati potuit , quia solus naturam passibilem assumpsit , nempe naturam humanam in qua , non in Divinitate , dolores passionis suslinere dignatus est . Hinc Petrus Fullo Sedis Antiochenæ invasor , graviter a Felice III. mox laudata ejus Epistola tertia , nec non in duabus sequentibus reprehensus est , quod sacro Trisagii hymno additionem , de qua agimus , adjungere ausus esset .

Quas

Quas Epistolas, etsi Valesius in observat. de Petro Antiocheno ad Evagrium cap. 5. pag. 178. Tillemontius in Acacio Constantinopolit. art. 49., & alii spurias existiment, merito tamen retinendas censet Norisius in Historia controversiæ de uno Trinitatis passo cap. 2., & genuinas esse colligit ex Anastasio Bibliot. in Epistola ad Joan. Diaconum Tom. XII. Bibliot. PP. Lugd. p. 834. col. 2. Tanti vero Constantinopolitum tumultus occasione ejusdem additamenti jussu Anastasii Imperatoris in Ecclesia solemniter decantati, anno 512. exorti sunt, tantaque seditio adversus impium principem, tamquam in Trinitatis inimicum mota, ut ipse ne e solio ejiceretur metuens, se deinceps in Ecclesiæ ritibus nihil innovaturum polliceri, & jurare coactus fuerit. Factum referunt Evagrius lib. 3. *Hist. Eccles.* c. 44. Marcellinus Comes in *Chronico*, Theophanes, Cedrenus, Victor Tununensis, Zonaras &c. quorum in enarrandis quibusdam rei circumstantiis dissimilitudines hæc annotare nihil necesse est.

II. Christum utpote natura Deum, revera dignum esse qui ter Sanctus, Deus, fortis, & immortalis nuncupetur: nihil proinde in eo usu reprehendi posse, juxta quem Trisagion ad solum Christum referretur: atque demum, ubi ad solum Christum hymnus ter Sanctus dirigitur, nihil nisi Fidei maxime consentanei in additione crucifixio-

fixionis illi assuta reperiri, siquidem Christus secundum humanitatem vere crucem subiit. Quapropter laudanda fuit prudens dispensatio, & œconomia Calendionis viri adprime Catholici, qui in locum Petri Fullonis, quem Zeno Imperator in exilium amandarat, canonice suffectus, Ecclesiam Antiochenam aliquandiu rexit. Is ut diximus, & tellatur Theodorus lector Hist. Eccles. lib. 1. sacro hymno inseruit, memorataque additioni, *qui crucifixus es pro nobis*, præfixit has voces *Rex Christe*, quibus eam invocationem soli Christo applicans, errorem a Fullone propinatum amovit. Verum Calendione paulo post jussu ejusdem Zenonis ejecto *reversus* iterum Petrus Fullo, *sustulit verba Rex Christe*, inquit Theophanes in Chronographia.

III. Hunc olim in Ecclesiis Orientalibus, non vero in Ecclesia Constantinopolitana, neque apud Latinos obtinuisse usum, ut Trisagion cum additione *qui crucifixus est pro nobis*, etiam Christi nomine non appellato usurparetur, sine ullo Fidei detrimento. Nempe ejusmodi Ecclesiæ Orientis, etsi mentionem Christi expressam in Trisagio non facerent, attamen ad ipsum solum, illum invocationem cum additione dirigebant, ut ex eo facile intelligere erat, quod solum Filium esse incarnatum alte profiterentur, & in eo duas esse Naturas, alteram impassibilem nempe Divinam, alteram qua passus

passus est, nempe humanitatem. Cujus quidem usus, & interpretationis habetur imprimis Testis locupletissimus Ephrem Patriarcha Antiochenus, qui Sæculo sexto floruit. Vide plura de hoc argumento apud doctum Assemani Tomo 1. Biblioth. Orient. pag. 518. & apud Michaellem le Quien in *Oriente Christiano* tom. 3. pag. 22.

IV. De usu hodiernarum Christianorum Societatum in Oriente, quæ Trisagium cum additamento, *qui crucifixus &c.* etiam tacito Christi nomine adhibent, esse judicandum præsertim ex ejusmodi Societatum professione, & fide. Enim vero constat ex dictis, hunc hymnum secundum Analogiam fidei, & secundum usum veteris Ecclesiæ Orientalis cum additione de qua agitur sensu orthodoxo ad Christum solum referri. Quæ ergo Societates Orientales fidem Catholicam de Christo, de duplici in eo natura, de Divinitatis impassibilitate profitentur, necessario censendæ sunt Trisagium cum mentione crucifixionis usurpatum ad solum Christum dirigere, sicque hoc suo usu doctrinam orthodoxam nihil lædere. Secus sentiendum esset de Eutychianis, qui humanitatem a Divinitate absorptam, & consumptam putarent. Ii, si sibi consent, non alio sensu possunt in Trisagio passionem & cruci affixionem commemorare, quam ut passionem Divinitati, ac proinde toti Trinitati attribuant.


Docet

Docet, probatque prædictus Assemanus Bibliothecæ Orient. tomo 1. pag. 158. *Monophysitas antiquiores, recentioresque Jacobitas circa Trisagium cum Catholicis (illum ad solum Christum referentibus) sensisse & modo sentire.*

De Maronitarum vero circa Hymnum eundem usu, quos Catholicæ Fidei additos, & Romanæ Sedi communione conjunctos esse nemo nescit, hæc scribit Faustus Naironus Baiensis Maromita Romæ sæculo proxime elapso linguæ Syriacæ professor, in sua de origine, nomine, & religione Maronitarum Dissertatione num. 85. *Id fieri quidem (nempe crucifixionem Trisagio addi) etiamnum a Maronitis fateor, sed sensu Catholico, & ab Ecclesia Romana non improbo, quum illud in recognitis ipsorum Ecclesiasticis Libris Romæ impressis reliquerit; sed tunc non refertur Trisagium ad Trinitatem Sanctissimam, sed ad Christum unum, qui ter Sanctus, idest, infinite Sanctus, omnium confessione dicendus est. Nam apud Maronitas Trisagium dupliciter accipitur, aliquando enim tribus applicatur Personis, & tunc crucifixionem addere impium blasphemumque arbitrantur; ac propterea nunquam in hoc sensu penes eos legitur hic hymnus cum additione Crucis, ut videre est in ipsorum Missali post lectionem Evangelii, ubi sic: Sanctus Deus, Sanctus fortis, Sanctus immortalis miserere nobis. Aliquando vero soli tribuitur*

buitur Filio, & tunc additur Crucifixio, quia vere crucifixus est Christus, immo in multis locis Breviarii Maronitarum manifeste declaratur, & præsertim ad Matutinum Officii Nativitatis Domini, sic: Sanctus Deus, qui Nativitate tua sancta liberaſti nos a ſeductionibus: Sanctus fortis, qui fortificaſti gregem tuam, ut canat tibi gloriam: Sanctus immortalis, quoniam mortales Filii Adam vixerunt Nativitate tua vivificante omnes. Qui crucifixus es Domine noſter pro Eccleſia tua, & liberaſti eam die Nativitatis tuæ ex ſeductione, & peccato. Haſtenus Naironus, cui conſonant Aſſemanus Bibliot. Orientalis tom. 1. pag. 520. nec non eruditus Michael le Quien Ordinis Prædicatorum Orientis Chriſtiani tomo 3. De Eccleſia Maronitarum n. 9. pag. 24. Atque hanc ipſam a Nairono traditam de duplici apud Maronitas Triſagii acceptione diſtinctionem attulerunt quoque Maronitæ Præſules anno 1596. menſe Septembris in Synodo congregati coram R. P. Hieronymo Dandino, quem eorum doctrinæ cognoscendæ cauſa Clemens VIII. in Syriam miſerat. Cujus quidem Concilii Acta capite 34. hystoriæ itineris eiufdem P. Dandini ad Montem Libanum inſerta habentur.

F I N I S.





DE HÆRESI EUTYCHIANA
EXPOSITIO HISTORICA.

§. I.

*Quis Eutyches ? Quis ejus error ?
Et quando exortus ?*



ON longo temporis intervallo, Catholica Fides, quæ est singularis, & vera, cuique nihil addi, nihilve minui potest, a duobus est hostibus appetita: quorum prior Nestorius, Eutyches secundus emerfit, qui Ecclesiæ Dei duas hæreses subimet contrarias inferre voluerunt, ut uterque a Prædicatoribus veritatis merito damnetur, inquit S. Leo Epistola 97. ad Leonem Augustum data.

Presbyter erat Eutyches, & Archimandrita, id est Abbas prædens celeberrimo

A

Con-

Constantinopolitanæ Civitatis Monasterio , teste Liberato cap 11. Breviarii. Adversus Nestorium zelo pugnavit ardentissimo , ut constat ex Epistola 6. S. Leonis ad ipsum data , & ex Interlocutione Flaviani Constantinopolitani Archiepiscopi in Concilio Constantinopolitano I. in causâ Eutychetis celebrato , Actione 4. Sed Eutychetis Nestorianam in Hæresim zelus secundum scientiam , non fuit . Ipsum enim extremum in errorem abripuit imperitia , quo utramque naturam in Christo miscuit , coalitamque in unam asseruit ; sive Christum esse ex duabus naturis , sed non in duabus , id est , duas fuisse ante unionem naturas , unicam postea : unde illud confectarium , Christum consubstantialem nobis non esse secundum carnem . Ita ejus errorem exponit Liberatus , quem Dissertatione singulari inferius refellemus . Eutychetis imperitiâ prodit Sanctus Leo Epistola decimatercia ad Pulcheriam Augustam data , ubi ejus errorem *de imperitia magis , quam de versutia natum* asserit . Et Epistola 15. ait ipsum *Nulla maturitate cordis ornasse cunctiam senectutis* . Et Epistola 19. vocat ipsum *Indoctum antiquæ Fidei Impugnatorem* .

Cum Hæresim inter familiares Monachos , aliosque sibi amicitia conjunctos furtim docere cœpisset , Eusebius Dorylæi in Phrygia Episcopus , cui cum Eutychete amicitia intercedebat , ipsum privatis monitionibus corrigere tentavit , quod cum frustra fecisset , rem
detu-

detulit ad Flavianum Constantinopolitanum Episcopum. Id constat ex Liberato, & ex Breviculo Historiæ Eutychianistarum, quod edidit Sirmondus post appendicem Codicis Theodosiani. Exorta est Eutychetis Hæresis anno Christi 448. Sancti Leonis Pontificis Maximi 9. Theodosii Junioris 42. & Valentiniani 24. anno post Ephesinum Concilium 18.

§. II.

Quomodo Eutyches ad Concilium I. Constantinopolitanum velut Hæreseos reus delatus fuerit; & quid gestum Actione I.

ANno Christi 449. Flavio Zenone, & Posthumiano Coss. Synodum Constantino- poli Flavianus celebrabat ad dirimendam litem Florentii Sardorum Episcopi, Lydiæ Metropolitanæ, adversus duos Episcopos suæ Provinciæ, Joannem & Cassinium; cum Eusebius Dorylæi libellum Patribus obtulit adversus Eutychetem Archimandritam. Id constat ex istius Concilii Actione I. ex Evagriolib. I. Historiæ Ecclesiasticæ, cap. 9. & ex Liberato in Breviario cap. 11. Libellus ab Eusebio datus habetur Actione I. Concilii Chalcedonensis, & incipit: *Optaveram quidem*. Ejus singularem aliquem errorem non prodit; sed vaga quadam querimonia accusat quod ausus sit adversus Salvatorem omnium

nostrum Christum blasphemam linguam movere, & SS. Patres Hæreticos nominare, & ipsum Eusebium Hæreticis semper repugnantem, Patrum Sectatorem, in Fide Nicæna permanentem, Ephesinæ Synodo, & Cyrilli Anathematismis religiose consentientem. Addit, ipsum effræni lingua negare piissimam rectæ Religionis doctrinam. Obtestatur denique Patres Sanctam & ὁμοούσιον Trinitatem & per salutem & incolumitatem piissimorum Imperatorum, ut jubeant Eutychetem coram Concilio se sistere, mox enim se illum Hæreseos & impietatis convicturum.

Libelli audita lectione, Patres Eusebium rogarunt, ut pro jure amicitiae adiret Eutychem, ipsique persuaderet meliora. Renuit Eusebius, se nihil neglexisse asserens, ut eum ad rectam Fidem revocaret, monuisse, docuisse, increpuisse, quod multorum testimoniis se pollicitus est probaturum, & omne adversus ipsum oleum operamque perdidisse. Quamobrem Patres Joannem Presbyterum & Defensorem & Andream Diaconum ad Eutychem miserunt, qui in ejus impietatem inquirerent, eumque ad Synodum vocarent.

§. III.

*Quid gestum sequentibus Actionibus Concilii
Constantinopolitani I. adversus
Eutychem usque ad VII.*

Actione 2. pridie Idus Novembris habita,
lectæ ac probatæ sunt S. Cyrilli Episto-
læ duæ, una ad Nestorium, altera ad Syno-
dum Orientalem & Joannem Antiochenum,
tempore initæ pacis data: quarum approba-
tione, Eutychetis error anticipato judicio
proscriptus est. Notanda est inter alias Fla-
viani Sententia. „ Lectæ sunt (inquit) E-
„ pistolæ sanctæ memoriæ inter Sanctos Pa-
„ tris nostri Cyrilli, diligenter SS. Patrum,
„ qui in Nicæna convenerunt, sensum inter-
„ pretantis, docentis ea quæ nos sapiamus
„ semper & sapimus; quia Dominus noster
„ Jesus Christus Filius Dei unigenitus, Deus
„ perfectus, & homo perfectus est, ex ani-
„ ma rationali & corpore, ante omnia qui-
„ dem sæcula ex Patre sine initio genitus se-
„ cundum Deitatem: in fine autem & in-
„ vissimis temporibus idem ipse propter nos
„ & propter nostram salutem de matre Virgi-
„ ne natus secundum humanitatem: Consub-
„ stantialis Patri secundum Deitatem, & con-
„ substantialis matri secundum humanitatem.
„ Etenim ex duabus naturis confitemur Chri-
„ stum esse post Incarnationem in una subsi-

A 3

„ sten-

„ ſtentia , & in una perſona unum Chriſtum ,
 „ unum Filium , unum Dominum confiten-
 „ tes . Volentes autem præter hæc ſapere ,
 „ abdicamus a ſancta Sacerdotali Synodo , &
 „ Eccleſiæ plenitudine ,

Tandem ubi Patres ſinguli ſententiam di-
 xiſſent , interceſſit Euſebius Dorylæi , ut
 Epiſcopi Conſtantinopoli degentes , ſed ab-
 ſentes a Synodo , ſive infirmitatis ratione ,
 ſive quod illos convocatio Synodi lateret ,
 per Notarios monerentur , qui perlegentes
 Acta hucusque in Concilio , eorum ſenten-
 tiam exciperent . Annuit Euſebio Flavianus
 Concilii Præſes .

Actiões 3. Euſebio Dorylæi interceden-
 te , Joannes Presbyter & Andreas Diaconus ,
 qui ad Eutychem directi fuerant a S. Synodo ,
 referunt , Flaviano jubente , quid reſponſi de-
 derit Archimandrita : nempe quod Libellos
 ei cum legiſſent , dediſſent exemplaria , pa-
 teſeciſſent accuſatorem , juſſiſſent Flaviani
 & Patrum nomine ut Synodo ſe ſiſteret , ip-
 ſum renuiſſe hoc prætextu , quod e Mona-
 ſterio numquam exire ſuo decreviſſet , quo
 velut ſepulchro eſſet incluſus . Euſebii accu-
 ſationem detractiōis & injuriæ loco haben-
 dam a Patribus , tamquam ab homine veteres
 ſecum inimicitias fovente fabricatam . Para-
 tum ſe eſſe Decretis Nicænorum ac Epheſi-
 norum Patrum ſubſcribere ; neque tamen
 ſubſcribere ſe Patrum placitis , ſi in aliquo i-
 pſos erraſſe contigiſſet : ſolas autem Scripturas
 ſecta-

sectari, tamquam firmiores Patrum expositionibus. Unam se agnoscere naturam Dei Incarnati, & humanati. Innoxium se esse a Valentini errore, nec dixisse usquam: Quod Deus Verbum carnem de cælo detulisset.

His Synodo renuntiatis, placuit Patribus ut secundo vocaretur Eutyches ad Concilium per Mamam & Theophilum Presbyteros: quam citationem sicut & priorem elusit, sibi constitutum asserens, non egredi e Monasterio citra mortis necessitatem. Tertio tandem vocatus est per Memnonem Presbyterum & sacrorum vasorum Custodem, Epiphanium item Presbyterum, & Germanum Diaconum.

Actiōe 4. Abraamius Presbyter & Monachus cum aliis Monachis, Eutychetis nomine ad Concilium venit, qui ægrotare Archimandritam mentiti sunt, & habere se ab ipso dixerunt in mandatis, quæ Synodo exponerent interrogati. Flavianus Concilii Præses responsum dedit charitatis plenum: „ Et inter-
 „ mittimus nos (inquit) non urgemus. Dei
 „ enim est dare sanitatem; nostrum autem
 „ expectare sospitatem ipsius. Neque enim
 „ in abscissionem inspicimus, sed ad incrementum. Nec enim Deus delectatur in
 „ perditione vivorum: nec sumus filii inhumanitatis, sed clementiæ Dei. Ad misericordi-
 „ diæ enim opera a Deo facti sumus. „ *Rur-*
sus Abraamium allocutus est Flavianus his ver-
 „ bis: „ Quomodo rogo te, est possibile alte-
 „ ro accusato, pro eo alterum dicere? Sed

„ magis intermittimus, & non urgemus ; ad-
„ veniat huc, ad Patres veniat, & ad fratres.
„ Accusator ejus instat ; & debet satisfacere .
„ Homines sumus . Multi & magni scanda-
„ lizati sunt , & per imprudentiam , & im-
„ peritiam decepti sunt , putantes se recta
„ sapere . Pœnitentia non affert confusio-
„ nem , sed permanere in peccato oppro-
„ brium est . Sed magis adveniat , & confi-
„ tenti ei delictum , & anathematizanti , da-
„ bimus pro præcedentibus veniam : & de
„ futuris nos & Sanctam Synodum muniat ,
„ quod similia expositionibus SS. Patrum
„ sapiat , & præter has postmodum neque
„ doceat aliquos , neque in aliquorum præ-
„ sentia disputet ,

Die 17. Novembris , dum quintus agere-
tur Synodi confessus , Memnon , Epiphanius
& Germanus ad Concilium redierunt, quid
cum Eutychete egissent exposituri . Respon-
derat ipsis Eutyches, missum a se Abraa-
mum , qui ejus nomine confetiret omnibus
Nicænorum Patrum & Ephesinorum Decre-
tis, necnon S. Cyrilli Capitulis & Epistolis .
Ceterum cum ab ipsis urgeretur , petierat se-
ptem dierum inducias ut affectam valetudi-
nem confirmaret , pollicitus se sequentis heb-
domadis feria secunda Concilio præsto futu-
rum . Hæc vix retulerant Deputati , cum Eu-
sebius Dorylæi zelo abreptus exposulat ne
magnifica illa promissa Eutychetis aliquate-
nus derogent causæ non tam suæ , quam reli-
gio-

gionis ; non satis esse ut subscribat Eutyches veritati ; damnandum , ni pro iis quorum accusatus , & mox convincendus est satisfaciatur : non dimitti furem e carcere , etsi spondeat se nusquam furta perpetraturum , sed patibulo damnari pro furtis ante admissis : ita non dimittendam Eutychetis causam , quidquid in posterum polliceatur , ni revocet prolatos & jam disseminatos errores , ac Ecclesiæ satisfaciat .

Interim eodem Eusebio intercedente , qui ad Monasteria missi fuerant Presbyteri , ut de seditiosis ausibus Eutychetis inquirerent , ad Synodum retulerunt , se didicisse ab Archimandrita Martino , perlatam fuisse ad ejus Monasterium Eutychetis nomine chartulam a Constantino quodam Diacono , cui ut subscriberet enixe rogabat , asserens non aliam in ea Fidem contineri , quam quæ in Nicæna Synodo jurata , & quæ a Sancto Cyrillo recepta traditaque esset , necnor ab Ephesino Concilio approbata . Respondisse vero Archimandritam Martinum : *Non est meum subscribere , sed Episcoporum tantum est .*

His & aliis testimoniis cum Eutychetem turbas in Monasteriis excitare ac hæreseos virus diffundere constitisset , Eusebius Dory'ei ejus accusator intercessit ut canonicæ vindictæ subjaceret , & Sacerdotio exutus , Monasterii deturbaretur principatu , ceu hæreseos , seditionis , perjuriique reus : perjuri quidem , quia venturum se ad Concilium

spondebat, quamvis fidem suam (ut dixerat) obstrinxisset, quod e Monasterio nusquam exiret. Visum est Flaviano & Patribus, ferri quidem sententiam posse adversus Eutychem secundum Canones: ipsi nihilominus concedendas, quas rogaverat inducias, propter pleniorē causæ discussionem, & accuratius examen. Ni vero sistat se Synodo statuta die, Sacerdotio & Monasterii Præfectura spoliandum.

Die 20. Novembris Patribus sexto confidentibus, jussit Flavianus, postulante Eusebio Dorylæi, ut testes ad convincendum Eutychem necessarij stata die Synodum vocarentur. Audita est deinde Mamæ & Theophili relatio, qui ad Eutychem nomine Concilii conveniendum perrexerant. Exposuerunt illi Patribus, quas audiverant ab errone Archimandrita blasphemias, & quod dixisset: Numquam duas in Christo naturas se agniturum.

§. IV.

Quid gestum Actione septima?

Induciis sibi a Concilio datis abusus Eutyches ad Theodosium Imperatorem confugit, eique per Chrysaphium Eunuchum, quem de sacro Fonte sulceperat, commendatus, ab eo obtinuit ut cum Patritio Florentio, & Magno Silentario Concilium illud
Fla.

Flaviani ingrederetur. Timere enim se dicebat Flaviani calumnias. Fuit autem Chrysaphius inter Imperiales Cubicularios Primarius apud Theodosium potentissimus, Flaviano infensissimus. Odii quo in Sanctissimum Archiepiscopum exarsit, ea fuit causa. Consecrato Flaviano, Chrysaphius munus benedictionis ab ipso postulavit, quod Imperatori, electionis gratia, offerret. Flavianus panes puros misit. Aureum benedictionis donum mittendum dixit Chrysaphius. Flavianus respondit: Non esse sibi auri copiam, nisi ad hoc sacris Templorum donariis uteretur: Ipsum Chrysaphium optime nosse, sacra vasa Deo & pauperibus esse consecrata. Chrysaphius ob repulsam invidia percitus, omnem funem movit, ut Flavianum Sede sua deturbaret. Hæc tot malorum origo. Eunuchus enim, cum se optatis frui non posse intelligeret, Pulcheria Theodosii sorore summam rerum administrante, Eudoxiam adversus ipsam concitavit, eique auctor fuit, primo ut Præpositum omnia pro ejus nutu gerentem, illi ademptum, sibi adscisceret. Id ut obtineret Eudoxia, frustra Theodosii tentavit animum. Id consilii cum fauste non cessisset Chrysaphio, aliud molitus est. Suasit nimirum Eudoxiæ, ut Imperatorem instigaret, quo ille secreto Pulcheriam Diaconissam ordinaret. Inflexit Imperatoris animum importunis precibus Eudoxia. Theodosius indicavit arcanum Flaviano. Flavianus consilium

omne detexit Pulcheriæ, monens ne in conspectum suum veniret, ne forte Imperatoris mandata sibi illique parum grata exequi cogeretur. Ex Aula secessit Pulcheria, missa ad Eudoxiam Præposito, & privatam aliquandiu vitam egit. Ex hoc magis infensus Flaviano fuit Chrysaphius, qui ipsum Theodosio & Eudoxiæ suspectum fecit ac invisum, quod arcanum Imperatoris patefecisset. Hæc refert Nicephorus lib. 14. Historiæ Ecclesiasticæ, cap. 46.

Chrysaphius igitur Eutychetem adversus Flavianum tueri ac fovere aggressus persuasit Imperatori, ut Florentium Patricium cum imperio, Synodo interesse juberet, ne quid detrimenti pateretur Ecclesia. Ea de re Mandatum Principis ad Concilium per Magnum Silentiarium perlatum est, quod incipit: *Nos pacem cogitamus sanctarum Ecclesiarum.* Theodosii Mandatum festivis acclamationibus Patres excepere: *Magna fides Imperatorum. Orthodoxis Imperatoribus multos annos. Pio & orthodoxo Imperatori &c.*

Interim venit ad Concilium & Eutyches cum turbulenta Monachorum phalange, Prætorianorumque Militum manu. Florentio Patritio, & Magno Silentario præsentibus relecta sunt Acta Concilii. Ubi ad illam partem secundæ Sancti Cyrilli Epistolæ ventum est, quæ duarum in Christo naturarum inconfusam unionem asserit, jussus est Eutyches exponere, an unionem ex duabus naturis

con-

confiteretur? An assensum iis præberet quæ a Sancto Cyrillo scripta erant? An post Incarnationem, Christum nobis consubstantialem agnosceret? Errorem dissimulare suum conatus est perfidus Archimandrita, cavillis interrogationes Patrum eludere. Primo, confiteri se dixit unionem ex duabus naturis. Secundo, Fidem de Trinitatis Mysterio suam exposuit. Tertio, factus est, se huc usque Christum nobis consubstantialem non dixisse. Quarto, se consubstantialem nobis Christum dicere jubente Synodo. Quinto hæresim prodit duas quidem asserens naturas ante unionem: unam vero post unionem. Urget illum Sancta Synodus. „ Oportet (inquit) te cla-
 „ re confiteri & anathematizare omne dog-
 „ ma, quod contrarium est his, quæ modo
 „ lecta sunt. *Tergiversatur Eutyches*: Di-
 „ co (inquit) quia iussistis, licet huc usque
 „ non dixerim: sed Patres non anathemati-
 „ zo. Ego legi scripta B. Cyrilli, & SS. Pa-
 „ trum, & S. Athanasii. Quoniam ex dua-
 „ bus quidem naturis dixerunt ante aduna-
 „ tionem: post Incarnationem autem &
 „ adunationem, non jam duas, sed unam
 „ naturam dixerunt.

Sancta Synodus hæreticum comperiens Eutychetem; & necessitate quadam ac Patrum imperio adductum ut consubstantialem nobis Christum fateretur, exclamavit: *Quæ ex necessitate est, fides non est*. Tum ore Flaviani Præsidis sui sententiam dixit in Eutychem

chem hoc tenore : „ Per omnia Eutyches
 „ quondam Presbyter & Archimandrita, Va.
 „ lentini & Apollinaris perversitatibus com-
 „ pertus est ægrotare , & eorum blasphemias
 „ incommutabiliter sequi : qui nec no-
 „ stram reveritus persuasionem atque doctrinam,
 „ rectis noluit consentire dogmatibus .
 „ Unde illacrymati & gementes perfectam
 „ ejus perditionem decrevimus per Dominum
 „ nostrum Jesum Christum quem blasphematus
 „ est , extraneum eum esse ab omni Officio
 „ Sacerdotali , & a nostra communione &
 „ primatu Monasterii ; scientibus hoc omnibus ,
 „ qui cum eo exinde colloquentur , aut eum
 „ convenerint , quoniam rei erunt & ipsi
 „ pœnæ excommunicationis .

Huic Synodo subscripserunt Episcopi 32.
 Abbates vero 23. sed notandus est longe
 diversus subscribendi modus Episcoporum , &
 Abbatum . Illi enim subscribunt hac
 formula : *Basilii Episcopus N. judicans subscripsi .*
 Hi vero sic : *N. Presbyter & Archimandrita
 subscripsi in depositione Eutychetis .* Quo
 ex discrimine colligitur Episcopos Conciliis
 adesse ut Judices , Abbates vero ut honorifi-
 cos spectatores : illos sententiam dicere ;
 istos sententiæ ab Episcopis latæ assensum
 præbere .

Hujus Concilii Historia deprompta est ex
 Actis ipsius Actione prima Concilii Chalce-
 donensis relatis : ex *Liberato in Breviar. capi-
 te*

te undecimo : ex Evagrio libro primo *Historiæ Ecclesiasticæ*, capite nono : & ex *Breviculo Historiæ Eutychianistarum*.

§. V.

Eutyches S. Petri Chrysologi patrociniū imploravit . Quid responderit Episcopus Ravennas ?

E Utychem patrociniū Sancti Petri Chrysologi Ravennatis Episcopi implorasse, ut ipsi faveret apud Sanctum Leonem Romanum Pontificem, vel ut causæ ipsius etiam Iudex esse vellet, constat ex Epistola Sancti Petri Chrysologi ad Eutychetem ipsum data, quæ incipit : *Tristis legi tristes litteras tuas*. Ea in Epistola tria præstat Sanctus Episcopus. Primo, luget nimiam de Mysteriis Fidei disputandi pruriginem. „ Triginta an-
 „ nis (*inquit*) humanæ leges humanas adi-
 „ munt quæstiones, & Christi Generatio,
 „ quæ divina Lege scribitur inenarrabilis,
 „ post tot sæcula disputatione temeraria ven-
 „ tilatur, „ Secundo scribit, se Mediatorem ipsum inter & Flavianum esse non posse, cum nihil hacce de causa scripserit ad ipsum Flavianus. Justum quippe Mediatorem esse non posse, qui partem utramque non audit. „ His omnibus respondi, Frater,
 „ Litteras tuis (*inquit*) plura rescripturus,
 „ si ad me Frater & Coepiscopus noster Fla-
 „ via-

„ vianus aliqua de hac causa scripta misisset.
 „ Si enim tibi displicet, quoniam scripsisti
 „ electum iudicium, nos quomodo de his
 „ iudicare poterimus, quos neque vidimus
 „ propter assentiam, & quid intellexerunt
 „ eorum taciturnitate nescimus? Justus Me-
 „ diator non est, qui sic unam partem audit,
 „ ut nihil alteri parti reservet. „ Tertio,
 Eutychetem hortatur, ut morem gerat Pon-
 tifici Romano, cuius auctoritatem luculen-
 ter asserit his verbis: „ In omnibus autem
 „ hortamur te, ut his quæ a Beatissimo Pa-
 „ pa Romanæ Civitatis scripta sunt obedi-
 „ ter attendas: quoniam Beatus Petrus, qui
 „ in propria Sede vivit, & præsidet, præ-
 „ stat quærentibus Fidei veritatem. Nos
 „ enim pro studio pacis, & Fidei extra con-
 „ sensum Romanæ Civitatis Episcopi, caus-
 „ sas Fidei audire non possumus. „ Caus-
 sas Fidei Summi Pontificis iudicio peculia-
 riter dirimendas, scribit Ravennas Episcopus.

§. VI.

*Quid post Synodum Constantinopolitanam
 gestum sit in causa Eutychetis.*

DAmnatus a Flaviano & Constantinopo-
 litana Synodo Eutyches, ad Roma-
 num Pontificem confugit, seu appellavit,
 ipsumque circumvenire aggressus est. Con-
 questus est, quod immerito accusatus esset hæ-

hæreseos ab Eusebio; quod nihil in ejus Fide reprehensione dignum expresse & evidenter ostendisset accusator; quod vocatus ad iudicium; se sistere non denegasset; quod privatus Communione esset, quamvis Nicænam Fidem profiteretur; quod denique Libellus appellationis, quem obtulerat, non fuisset susceptus. S. Leo de his quæ Constantinopoli gerebantur, non admonitus a Flaviano, ne vel innocentem condemnaret, vel reum absolveret, ad Theodosium, Flavianumque scripsit. (Epistolis 7. sive 20. in editione P. Quenellii, & 21.) Protinus rescripsit ad Summum Pontificem Flavianus & acta Constantinopolitanæ Synodi in causâ Eutychetis, simul cum Epistola, ad eum misit. Acceptis Litteris Flaviani, Leo opem operamque suam adversus Eutychem pollicetur; & per illustrem Virum Rhodanum Epistolam misit, quam ex Codice Cardinalis Grimani primum edidit P. Quenellius ordine 22. quam & alia secuta est ad Theodosium, in qua Nicænæ Fidei se inhærere professus Nestorii & Eutychetis dogmata condemnat, postulatque Synodum intra Italiam congregari (Epistola 23.) In ea ampliores Litteras promittit, per Flaviani Nuntium, perferendas; fuitque illa celebrata adeo ad Flavianum Epistola 24. sive alias 10. quam laudavit, probavitque Chalcedonenſis Synodus.

Interea novas turbas Constantinopoli excitavit

citabat Eutyches , publicis palamque propo-
 sitis scriptis contestatus , se injuriam passum ,
 Actaque Concilii Constantinopolitani per No-
 tarios diminuta falsataque arguens . Hac de
 causa oblato Libello Imperatori , Acta Sy-
 nodi retractari obtinuit , favente Chrysaphio
 Eunuchō . Edixit itaque Theodosius , ut ii-
 dem Episcopi Constantinopolim convenirent,
 Præsede Thalassio Cæsareæ in Cappadocia
 Episcopo , & Florentio Patritio præsente ,
 Acta prioris Synodi ad amussim examinaren-
 tur . Ista patent ex Epistola Flaviani ad San-
 ctum Leonem , quæ extat 1. p. Concilii Chal-
 cedonensis , cap. 4. ex Liberato cap. 11. Bre-
 viarii , & ex Libello Eutychetis porrecto Im-
 peratori , cujus exordium est : *In omnibus*
mibi post Deum : Qui insertus est Actioni 1.
 Concilii Constantinopolitani II. relectæ A-
 ctione 1. Concilii Chalcedonensis .

§. VII.

*De secundo Concilio , seu Conventu Constanti-
 nopolitano in causa Eutychetis .*

ANno Christi 449. ineunte Aprili , Con-
 ventus Episcoporum Constantinopoli
 ea , qua dixi , de causa , celebratus est . In
 eo ut causam per Procuratorem ageret Euty-
 ches , ab Imperatore concessum ; nec valuit
 Eusebii Dorylæi exceptio : Non licere de
 ejusmodi causis alterum pro altero decerta-
 re .

re. Admissi sunt igitur in Concilium Constantinus, Eleusinius, & Constantius Monachi, Eutychetis Procuratores. Macedonius Tribunus & Notarius, nomine Imperatoris, ab Episcopis postulavit, ut juramenti religionem confirmarent veritatem vel falsitatem Actorum ab utraque parte prolatorum. Conditionem recusarunt Episcopi, & Basilus Seleuciensis intercessione sua obtinuit ne jurare cogerentur. *Hactenus*, inquit, *juramentum Episcopis nescimus oblatum*. Recitato deinde Eutychetis Libello & Mandato Imperatoris jussi sunt adesse Notarii Flaviani, qui Acta Synodalia exceperant, Asterius, Aetius, Asclepiades, Nonnus, atque Procopius. Hi, jubentibus Episcopis, Acta a se conscripta protulere. Ediderunt & alia Eutychetis Procuratores, sed non autographa. Examinata sunt accurate, nec in iis immutatum aliquid, aut depravatum inventum est. Tum de Eutychetis appellatione disceptatum, cujus mentionem ingessit Constantinus Diaconus, dicens: *Eutyches, dum legeretur damnatio, appellavit sanctum Concilium sanctissimi Episcopi Romani, Alexandrini, & Hierosolymitani, & Thessalonicensis*; hæcque Actis non contineri conquerebantur Eutychetis Procuratores. Id confirmabat Florentius Patricius, dicens: „ Turba facta, & dissoluto Conventu, dixit ad me silenter, Appellans Romanum, & Ægyptium, & Hierosolymitanum Concilium. Et ego arbi-
„ tra-

„ tratus indecens esse hoc latere Sanctissi-
 „ mum & Reverendissimum Archiepisco-
 „ pum Flavianum, abscedens dixi ei &c. *Ba-*
silius Episcopus dixit : „ Jam in veritate di-
 „ co, adhuc ipso Conventu sedente, & pro-
 „ ponente hoc sancta Synodo, ut diceret
 „ iste duas naturas inseparabiles & inconfu-
 „ sas in uno Domino, idque post adunatio-
 „ nem, scio quia dixit Religiosus Archi-
 „ mandrita Eutyches : Si præceperint mihi
 „ Patres Romanus & Alexandrinus, dico
 „ hoc ipsum; hoc autem non quasi appellans
 „ dixit, sed dicens : Non sum ausus dicere
 „ propter Patres. „ *Rogati Patres de appella-*
tione, nihil auditum omnes responderunt.
 „ Dum esset Concilium, & interrogatio pro-
 „ veniret, (*inquit Seleucus Episcopus*) ni-
 „ hil tale cognovimus dictum ab Archiman-
 „ drita Eutychete de appellatione. A Reve-
 „ rendissimis Episcopis dictum est, Et nos
 „ eadem confitemur. „ *Itaque vere scripserat*
Flavianus ad Leonem de Eutychete : „ Li-
 „ bellos direxit vobis plenos omni fallacia,
 „ atque calliditate, dicens, Judicii tempo-
 „ re Libellos se dedisse appellationis & no-
 „ bis, & hic convenienti sancto Concilio,
 „ & appellasse vestram Sanctitatem, quod
 „ nequaquam ab eodem factum est. „ Sed
 „ etsi judicii tempore, sive dum legeretur
 „ damnatio, aut ipso Conventu adhuc seden-
 „ te, Romanum Pontificem non appellaverit,
 „ ex quo factum est ut Actis inserta non fuerit
 hu.

hujusmodi appellatio ; inde tamen perperam colligitur, Eutychetem dissoluto Concilio non appellasse majorum Sedium Episcopos , & Romanum præcipue , apud cujus Apostolicam Sedem persecutus Appellationem suam est , accusatorio Eusebii Dorylæi Libello , & mediis suæ defensionis ad Sanctum Leonem transmissis , ut constat ex Epistola Sancti Leonis ad Flavianum . (Epistola octava.) Hinc est quod Eutychetis causa coram Sede Apostolica pendente , Flavianus Sanctum Leonem rogabat , ut sententiam in ipsum latam Constantinopoli confirmaret : „ Conven-
 „ tus itaque , Sanctissime Pater , in his om-
 „ nibus quæ ab eo præsumpta sunt , pro con-
 „ sueta fiducia fiducialiter age , secundum
 „ quod Sacerdotio competit , propriamque
 „ faciens communem causam , & sancta-
 „ rum Ecclesiarum disciplinam , simul de-
 „ cernere damnationem adversus eum regu-
 „ lariter factam per propria scripta digna-
 „ re . „ Id præstitit, causa cognita, Sanctus Leo . Unde Chalcedonenses Patres in Synodica ad ipsum ita scribunt de Dioscori Alexandrini nefariis ausibus : *Eutychem pro impietate damnatum , suæ tyrannidis decretis innoxium statuit , & dignitatem, quæ a vestra illi ablata fuerat Sanctitate , restituit .*

Quæri potest, cur Eutyches appellando majorum Sedium Episcopos , aut eorum Concilia , Domni Antiocheni Episcopi non meminerit ? Respondeo rationem hujus silentii mul-

multiplicem proferri posse. Præcipuæ sunt, quod Orientalis Diœceseos Episcopi Nestorianismi apud ipsum suspecti essent: quod Domnus contra 12. sancti Cyrilli Capitula scripsisset olim, teste Liberato, cap. 12. Breviarii: quod Joannis Antiocheni ex sorore nepos esset: quod Theodoreto Cyri Episcopo, & Flaviano Constantinopolitano, studiis & partibus conjunctus esset, adversus quos jam conspiraverant Eutyches & Dioscorus Alexandrinus: tum denique, quod Domnus, cum sua Synodo, primus omnium Eutychem ejusque infandam Hæresim oppugnaverat, ut testatur Facundus Hermianensis lib. 12. cap. ultimo, & lib. 8. cap. 5. ubi & Synodicam ejusdem Patriarchæ ad Theodosium Augustum Epistolam contra Eutychem refert.

Quæri secundo potest, cur Thessalonicensem Episcopum inter majorum Sedium Antistites appellaverit Eutyches? Respondeo, quia etsi Diœcesis Illyrici Orientalis, cujus caput erat Thessalonicensis Episcopus, Occidentis Patriarchæ subdita esset; quia tamen iis temporibus ab Occidentali Imperio recisa erat, par erat singularem ejus mentionem fieri, cujus scilicet Episcopi Occidentalis Patriarchæ Concilio se sistere non solebant, nec poterant sine Orientalis Imperatoris Edicto. Præterea hæc Diœcesis amplissima erat, magnique prærogativis decorata; a suo peculiari Præfecto Prætorio regebatur, Thessalo-

salonicensis Episcopus confessus honorem, præ ceteris obtinebat in Conciliis, ut patet ex Ephesino, ubi post Hierosolymitanum & Ephesinum Episcopos, & ex Chalcedonensi, ubi post Patriarchas locum suum habuit. Denique sperabat Eutyches ex Illyricianis Episcopis plurimos sibi indulgentiores futuros, ut revera fuerunt: Dioscoro enim adhærentes in Latrocinio Ephesino, Eutychetem suo suffragio absolverunt, damnarunt Flavianum, aliosque Catholici dogmatis defensores. Unde in Concilio Chalcedonensi præ omnibus *Illyriciani, & qui cum ipsis Reverendissimi Episcopi, clamaverunt: Omnes peccavimus, omnium miseremini.*

Die 27. Aprilis ejusdem anni 449. habita est altera Sessio Conventus Constantinopolitani. Lectus in ea est alter Eutychetis Libellus supplex Imperatori porrectus, quo rogabat, ut Magnus Silentarius scriptis profiteretur, quæ audiverat & viderat. Annuit Eutychetis supplicationi Theodosius. Testatus est Silentarius, se accepisse a Flaviano, antequam de Eutychetis damnatione in Synodo ageretur, jam Eutychetem esse damnatum, scriptum scilicet damnationis Libellum, quem Synodo porrecturus esset. Sed & Asterii Presbyteri testimonio assertum est & monimentis commendatum, prioris Synodi Acta fuisse a Notariis immutata. His cavillis illusum est legitimo prioris Synodi de Eutychete iudicio, faventibus perfido Hæresiarchæ Magistr-

stratibus, in gratiam Chrysaphii. Hæc videre est Actio 1. Concilii Chalcedonenſis, & apud Liberatum cap. 11.

Postea expetivit Imperator a Flaviano Fidei Professionem manu ejus exaratam & subscriptam. Paruit Mandatis Flavianus, misitque ad Theodosium Professionem illam, quæ incipit: *Nihil ita convenit Sacerdoti Dei*, &c. Extat. 1. part. Concilii Chalcedonenſis, & refertur a Liberato cap. 11.

§. VIII.

Indicitur a Theodosio Imperatore Ephesina II. Synodus, quæ vulgo Prædatoria dicitur.

CUm Eutyches communionem a S. Leone extorquere non potuisset inaudito Flaviano, Sinodum a Theodosio impetravit, ope Chrysaphii Eunuchi, & Dioscori Alexandrini malis artibus: ac ne præſidentibus Legatis, quos a Sancto Leone Pontifice Maximo mittendos prævidebat, confirmaretur sententia damnationis in se lata in Synodo Flaviani, curavit Chrysaphii opera, ut Synodi Primatus Dioscoro Alexandrino deferretur speciali Rescripto Theodosii. Edictum ad Dioscorum extat Actio 1. Concilii Chalcedonenſis. Incipit: *Cunctis constitit manifestum*. Alias direxit litteras ad eundem Dioscorum, quæ incipiunt: *Antehac quidem*. Utrisque litteris cavet, ne Theodoretus intersit Synodo; utrif

utrisque Primatum Dioscoro defert in causa Eutychetis judicanda. Nominatim rejectus est Theodoretus a Concilio, hoc quidem prætextu, quod in Anathematismos Sancti Cyrilli scripserat, reipsa vero quia Eutychianæ doctrinæ erat aperte contrarius. Quoad Primatum vero & præsidendi honorem Dioscoro delatum, hæc ad ipsum Theodosius scribit: „Necessarium duximus his sacris Lit-
„teris uti ad tuam Reverentiam, per quas
„manifestum facimus tuæ Beatitudini, &
„universæ Sanctæ Synodo, quod nos regulas
„Sanctorum Patrum sequuti, non solum
„propter Theodoretum, sed etiam alios om-
„nes qui ad congregatam Sanctam Syno-
„dum pertinent, auctoritatem & primatum
„tuæ præbemus Beatitudini.

Jussit Theodosius adesse Concilio & Barsumam, e Syria Archimandritam, scelere & perfidia notum, & vices agere omnium Monachorum Orientales Episcopos accusantium, ut refert Liberatus cap. 12. Extant Epistolæ hac de causa scriptæ tum ad Dioscorum, tum ad Barsumam ipsum, a Theodosio Imperatore, Actione 1. Concilii Chalcedonenfis, quibus constat, facinorosissimum illum Abbatem directum fuisse ad Concilium, nedum ut accusatorem Episcoporum Orientalium, quos Nestorianæ hæreseos fuligine infuscos calumniantur Monachi nequissimi, Eutychetis sectatores, verum etiam ut Judicem futurum cum Episcopis. „Placuit eum consedere

B.

„ tam

„ tam tuæ Sanctitati , quam universis Sanctis-
 „ simis Patribus ibidem convenientibus ;
 „ quatenus Deo placita de omnibus sententia
 „ proferatur : (*inquit Theodosius ad Diosco-*
 „ *rum scribens.*) *Et in Epistola ad ipsum Barsu-*
 „ *sumam* ; „ Justum esse duximus tuam San-
 „ ctitatem ad Ephesinam civitatem pergere,
 „ & locum tenentem omnium Religiosissi-
 „ morum Archimandritarum Orientalium ,
 „ considerare sanctæ Synodo quæ ibidem di-
 „ sposta est , & cum aliis Sanctissimis Patri-
 „ bus & Episcopis , quæ sunt Domino placi-
 „ ta ordinare . „ Duo tentavit contra Cano-
 nes Theodosius . Primo detulit præsidendi
 munus Dioscoro Alexandrino , quod Roma-
 ni Episcopi erat singulare . Secundo , Barsu-
 mam flagitiosum Archimandritam suffragandi
 jure donavit , summa in Ecclesiasticas Regu-
 las injuria .

Subreptum fuisse Principi quoad utrumque
 caput , recte observat Illustrissimus & Doctis-
 simus Antistes Petrus de Marca . Primo
 quoad munus præsidendi Dioscoro adjudica-
 tum . Primatum enim in futura Synodo ipsi de-
 crevit Theodosius *secundum Canones* . Sugge-
 stum scilicet fuit Imperatori , primum a Ro-
 mano Episcopo locum , juxta Nicænos Ca-
 nones , Alexandrino deberi . Quare absente
 Leone Romano , primas deberi Dioscoro A-
 lexandrino , præ Legatis etiam Sedis Apo-
 stolicæ . Quod præjudicio etiam Synodi Ephe-
 sinæ prioris confirmabatur , cui Cyrillus Ale-
 xan-

xandrinus præfuerat . Facile autem fuit ob-
reperere Theodosio forsan ignorantī Cyrillum
vice Romani Pontificis Cælestini Ephesino
Concilio præfuisse . Eadem facilitate subre-
ptum fuit Principi quoad Barsumam ; tum
quia Ecclesiæ regulas ignorabat, solis Epi-
scopis suffragandi jus in Conciliis Œcumeni-
cis tribuentes : tum quia ipsi fuerat a Chrysa-
phio Eunuchō insusurratum , Barsumam pu-
ritate vitæ, & Catholica Fide esse probatissi-
mum, & Nestorianorum Episcoporum in O-
rientis partibus hostem acerrimum ; uti ipse
ad Dioscorum scribit .

Sanctum Leonem ad Concilium invitavit
Imperator, Ephesi ad Kalendas Augusti ejus-
dem anni 449. celebrandum, missa per Epi-
phanium Tribunum Epistola . Excusavit se
apud Theodosium Pontifex, tum propter
temporis angustias ; tum propter imminens
Romæ ab Hunnis periculum ; tum quod con-
suetudo non esset Romanum Pontificem extra
Italiam Synodo interesse ; quæ tamen, si ce-
lebranda videretur, convenientius esse ut con-
gregaretur in Italia . Hæc habentur ex Epi-
stola 13. S. Leonis ad Pulcheriam Augustam,
& ex Epistola 9. ad Theodosium Imperato-
rem .

§. IX.

*Sanctus Leo misit Legatos ad
Ephesinam Synodum II.*

CUm obtinere non petuisset Sanctus Pontifex a Theodosio, ut vel Synodum omnino revocaret, vel in aliquam Italiæ urbem transferret, decrevit Legatos mittere Ephesum, qui suo nomine Concilio interfessent, & auctoritate sua cuncta peragerent. De his scribit ad Pulcheriam Augustam, Epistola quæ extat 1. part. Concilii Chalcedonensis. „ Quia igitur ad publicam utilitatem pertinuisse cognoscitis, ut salva clementiæ vestræ venia, caritati me & precibus civium non negarem: in his fratribus meis, quos vice mea misi, me quoque adesse cum ceteris qui adfuerint, estimare: quibus secundum causam satis mihi & gestorum serie, & ipsius, de quo agitur, professione patefactam, evidenter & plane quid servandum esset ostendi. Non enim de portiuncula aliqua Fidei nostræ, quæ minus lucide declarata sit, quaritur; sed hoc stolidissima insultatio audeat incescere, quod Dominus noster in Ecclesia sua neminem utriusque sexus voluit ignorare: siquidem ipsa Catholici symboli brevis & perfecta confessio, quæ duodecim Apostolorum totidem est signata sententia

» tentiis , tam instructa sit munitione cælesti,
 » ut omnes hæreticorum opiniones solo ip-
 » sus possint gladio detruncari .

De iisdem Legatis scribit ad Theodosium ,
 Epistola decimaseptima . „ Quamvis (inquit)
 » ad diem Concilii Episcopalis , quem Pie-
 » tas vestra constituit, occurrere me ratio nul-
 » la permittat, cum nec aliqua ex hoc exem-
 » pla præcesserint , & temporalis necessitas
 » me non patiatur deserere civitatem ; præ-
 » sertim cum tam evidens Fidei causa sit ,
 » ut rationabilibus causis ab indicenda Syn-
 » do fuisset abstinendum ; tamen in quantum
 » Dominus juvare dignatur , meum studium
 » commodavi ut Clementiæ vestræ decretis
 » aliquatenus pareatur , ordinatis hinc fratri-
 » bus meis , qui amputandis scandalis pro
 » causæ æquitate sufficiant , quique præsen-
 » tiæ meæ impleant vicem : quia non talis
 » quæstio orta est , unde aut possit , aut de-
 » beat dubitari .

Et Epistola decimanona , quæ est secunda
 ad Ephesinam Synodum , Legatos illos no-
 minibus suis designat ; quibus & condiciones
 præscribit , quibus Eutychetem , si forte resi-
 piscat , recipere debeant . „ Quia (inquit)
 » pie ac religiose Christianissimus Imperator
 » haberi voluit Episcopale Concilium , ut
 » pleniori judicio omnis possit error aboleri :
 » fratres meos Julium Episcopum , Renatum
 » Presbyterum , & filium meum Hilarium ,
 » Diaconum , cumque his Dulcitum Nota-
 » rium

„ rium probatæ nobis fidei misi, qui vice mea
 „ sancto conventui vestræ Fraternitatis inter-
 „ sint, & communi nobiscum sententia, quæ
 „ Domino sint placitura, constituent. Hoc
 „ est, ut primitus pestifero errore damnato,
 „ etiam de ipsius, qui imprudenter erravit,
 „ restitutione tractetur; si tamen doctrinam
 „ veritatis amplectens, sensus hæreticos,
 „ quibus imperitia ejus fuerat irretita, ple-
 „ ne aperteque, propria voce, & subscri-
 „ ptione damnaverit.

De his etiam scribit in celebri Epistola ad
 Flavianum, quæ in antiquis editionibus or-
 dine decima est, in editione vero Quenellii
 24. „ Ad omnem vero causam (inquit) pie
 „ ac fideliter exequendam, fratres nostros,
 „ Julium Episcopum, & Renatum Presbyte-
 „ rum Tituli S. Clementis, sed & filium
 „ meum Hilarium Diaconum vice nostra di-
 „ reximus. Quibus Dulcitum Notarium no-
 „ strum, cujus fides nobis est probata, so-
 „ ciavimus.

Julium Episcopum Puteolanum, non Ju-
 lianum Coensem ad Synodum Ephesinam se-
 cundam, ut Apostolicæ legationis caput mis-
 sum esse, constat ex MSS. optimæ notæ co-
 dicibus Epistolæ S. Leonis ad Flavianum,
 aliarumque Epistolarum, in quibus legatos a
 se missos nominat. Constat etiam ex Evagrio
 lib. 1. cap. 10. ex Chronico Prosperi, ex
 Breviculo Historiæ Eutychianistarum, quem
 edidit P. Sirmondus, ex Nicephoro Callisto
 lib.

lib. 14. cap. 47. ex lib. de Romanis Pontificibus, ex Mariano Scoto &c. Id præterea probat Quenellius, in notis ad Epistolam 24. S. Leonis, duplici argumento. Primum ex eo petitur, quod Julianus Coensis Episcopus interfuerit & subscripserit tam Concilio Constantinopolitano, in quo primum damnatus est Eutyches a Flaviano, quam Conventui Episcoporum, qui anno sequenti in eadem urbe jussu Imperatoris habitus est: qui cum sit habitus mense Aprili, vix sibi facile quis persuadeat, eundem Episcopum Roma missum esse Junio ejusdem anni, quo datæ leguntur laudatæ S. Leonis Epistolæ.

Secundum argumentum ex eo petitur, quod S. Leo scripserit ad Julianum Coensem in Oriente versantem Epistolas 11. & 19. sive 25. & 31. eodem die scriptas, quo & aliæ in quibus legatos missos recenset. Immo in posteriori eisdem nominatim; & inter eos Julianum Episcopum. Caput itaque istius legationis fuit Julius Puteolanus Episcopus, non Julianus Coensis.

Licet porro missus fuerit a S. Leone Julius Puteolanus, qui legationem Apostolicam in Synodo obiret, non ipse tamen interfuit Synodo, nec legationem in ea obiit, sed Julianus Coensis: quod non levibus conjecturis asserit Quenellius, quia quoties de Legato Sedis Apostolicæ mentio habetur in Synodo Ephesina, Julianus appellatur, etiam in Græco textu: quod argumento est de alio sermo-

nem esse , quam de illo Roma misso , qui in Epistolarum S. Leonis Græca Versione , P. I. Concilii Chalcedonensis , semper Ιωλιος dicitur . Verisimile est igitur Julium vita functum esse , antequam Synodus inchoaretur , vel aliquo impedimento detentum ne Ephesum accederet ; Julianum vero Coensem in ejus locum substitutum esse , qui vices Romani Pontificis in Synodo gereret . Et certe Julianum S. Leonis aliquo modo personam gessisse , colligitur ex Epistola 61. in qua eum exhortans ut ,, contra falsitatis astutias perse-
 ,, verantem diligentiam teneret; *addit*: Cum
 ,, ad hoc & tuus animus , & nostra auctoritas
 ,, suffragetur . *Et postea* : Ad quam rem no-
 ,, stros post diem venerabilem Paschæ dirige-
 ,, mus , qui tecum participato consilio , ea
 ,, quæ a nobis constituta fuerint , exequan-
 ,, tur . „ Lege eruditas Quenellii Notas loco laudato .

§. X.

Legati S. Leonis in Ephesini Latrocinii confessum non sunt admissi .

INtromissos in Concilium constat S. Leonis Legatos , sed ipsos confedisse Dioscoro inficiamur . Adfuere quidem ut Fidei , quæ deferenda non erat , prospicerent : Non confedere , ut Sedis Apostolicæ consulerent dignitati . Id testatur Liberatus in Breviario ,
 cap. 12.

cap. 12. „ Et sedentibus (inquit) in Basili-
 „ ca Dei Genitricis Mariæ illis Episcopis ,
 „ Ecclesiæ Romanæ Legatis , vices habent-
 „ tes Papæ Leonis , assidere non passi sunt ,
 „ eo quod non fuerit data præsessio Sanctæ
 „ Sedi eorum . Insuper etiam , quod non
 „ lecta fuerat ad Flavianum Epistola in Eu-
 „ tychetis damnatione a Papa Leone scri-
 „ pta , & occultata fuerat Epistola ejus , per
 „ supra memoratos Legatos ad ipsam Syno-
 „ dum directa .

Sane nullum poterant occupare locum Ro-
 mani Legati , donec Litteræ ad Synodum ,
 Ephesinam a Leone Papa directæ , quibus
 eorum Legatio continebatur , recitatæ essent ,
 & in Acta relatæ . Quare in ipso Synodi in-
 gressu recitatis Litteris convocatoriis Impe-
 ratoris , Hilarius Diaconus postulavit , ut San-
 cti Leonis Litteræ ad Synodum per Legatos
 missæ legerentur . Ac Dioscorus quidem in-
 terlocutus est , earumque lectionem se pro-
 curaturum sollemni juramento spondit : sed
 non stetit promissis , elusitque iteratam Le-
 gatorum petitionem . Qua de re graviter
 conquesti sunt Orientales Episcopi , & Ae-
 tius Archidiaconus in Concilio Chalcedo-
 nensi Actione I. & Magistratus severissime
 exposulaverunt cum Dioscoro , & ceteris
 Concilii Præsidibus , Juvenali Hierosolymo-
 rum , & Thalassio Cæsareæ Episcopo , eo
 quod Litteræ illæ relectæ non essent . Quæ
 Dioscori lectionem illam prohibentis impu-

dentia, inter præcipua crimina, ob quæ damnatus fuit, recensita est a Paschasino Legato in Concilio Chalcedonensi. „ Super hæc „ vero (inquit) neque Epistolam legi permisit Beatissimi Papæ Leonis, scriptam „ ad Sanctæ memoriæ Flavianum, & hoc „ frequenter rogatus a portitoribus recitare „ eam, & cum juramento legendam promittens: qua non lecta, scandalum & lationem sanctæ Dei Ecclesiæ per totum „ mundum pertulerunt. „ Denique cur Legati S. Leonis in ipso statim Concilii Chalcedonensis exordio Dioscoro exprobrassent, „ quod, „ Cum judicandi personam non „ haberet, præsumpsit, & Synodum ausus „ est facere sine auctoritate Sedis Apostolicæ, quod numquam factum est, nec fieri licet? „ Falso enim istud objecissent Dioscoro, si cum ipso Legati S. Leonis in Ephesina Synodo confedissent.

Objiciet aliquis hæc verba Prædicatoriæ Synodi: *Residentibus Dioscoro Alexandrino, & Juliano Episcopo, vices agente & tenente locum Sanctissimi, & Beatissimi Romanæ Ecclesiæ Episcopi Leonis: Confederunt igitur illa in Synodo S. Leonis Legati.*

Respondeo purum putumque mendacium his Synodi Prædicatoriæ verbis contineri. Unde cum relegerentur Actiōne I. Concilii Chalcedonensis, Orientales Episcopi reclamant, & mendacii Acta illa redarguerunt, his verbis: *Ejectus est, nullus suscepit nomen*

men Léonis . Viden ut Leonem a Synodo in Legatis suis expulsum quærunt Patres ? Tentavit quidem Dioscorus a Juliano suffragium extorquere ; sed ipse per Florentium Lydorum Episcopum Interpretem suum respondit : Hac ratione volumus gesta relegi, ut prius Papæ legatur Epistola . Similiter Hilarius Diaconus S. R. E. Legatus respondit : Quoniam & Sanctissimus Episcopus Romana Ecclesiæ , relictis sibi istis monimentis , quorum nunc quæritis lectionem , transmisit Epistolam , quam scripsit , eam legi iubete . Tum Eutyches , Legatos sibi suspectos esse contestatus est , quod a Flaviano , & domo , & convivio , laute excepti essent . „ Directi „ (inquit) Religiosissimi Viri a Sanctissimo , & Deo amantissimo Leone Archiepiscopo R. E. in Sanctam vestram Synodum , suspecti mihi facti sunt . Manserunt enim apud Religiosissimum Flavianum Episcopum , & pransi sunt apud eum , & munerati sunt , & omne obsequium eis præbuit . Postulo ergo Sanctitatem vestram , si quid ab eis injuste factum fuerit , contra me , id præjudicium mihi non generare . „ His verbis vaferrimus Hæresiarcha ad Romanæ Sedis Legatos rejiciendos grassatus est .

§. XI.

*Soli Dioscoro præsidendi jus tribue-
rat Imperator.*

Difficultatem movet Dioscori ipsius interlocutio Actione I. Concilii Chalcedonensis. „ Comperit vestra Clementia (inquit) quia non mihi soli Sacratissimus noster Imperator commisit judicium, sed & beatissimo Juvenali, & Sanctissimo Episcopo Thalassio auctoritatem Synodi dedit... Quare in me solum ista extenduntur, quando auctoritas & ex æquo tribus data est, & judicatis a nobis consensit universa Synodus? „ His consona est appendix quæ Epistolæ Theodosii ad Dioscorum adjecta est, quæ sic habet: *Eodem tenore scriptum est etiam Juvenali Reverendissimo Episcopo Hierosolymorum.*

At licet hæc probare videantur præsidendi auctoritatem Sacra Jussione his tribus Episcopis commissam, Dioscoro nempe, Juvenali, & Thalassio, vix tamen adduci possum ut existimem Imperatorem tot Præsides Concilii designasse, ex quorum multitudine confusio oriri posset. Duo sunt momenta quæ id mihi persuadeant. Primum, quia Theodosius ad Dioscorum scribens de ipso quidem ait: „ Auctoritatem & Primatum tuæ præbemus Beatitudini. *De aliis vero: Scien-*

tes

„ tes diligentius quod , & Reverendissimus
 „ Archiepiscopus Hierosolymorum Juvena-
 „ lis , & Beatissimus Archiepiscopus Thalas-
 „ sius , & omnis talis fervens amator , & æmu-
 „ lator orthodoxæ Fidei consentanei erunt
 „ tuæ Beatitudini radianti per Dei gratiam
 „ honestate vitæ , & Catholica Fide . , Ex
 quibus patet , soli Dioscoro a Theodosio fa-
 ctam præsidendi potestatem .

Unde ad interlocutionem Dioscori dicen-
 dum est , tribus ex æquo datam esse auctori-
 tatem judicandi , non præsidendi . Itaque
 tres illi Episcopi velut Commissarii fuere ad
 cognitionem & iudicium causæ Eutychianæ
 a Theodosio singulariter delegati , ita tamen
 ut præsideret Dioscorus .

Alterum momentum eruitur ex interlocu-
 tione Judicum , & Senatus Actione I. Con-
 cilio Chalcedonensis . „ Videtur nobis (in-
 „ quunt) iustum esse , si placuerit divinissi-
 „ mo & piissimo Domino nostro , eidem
 „ pænæ Dioscorum Reverendissimum Epi-
 „ scopum Alexandrinum , & Juvenalem Re-
 „ verendissimum Episcopum Hierosolymo-
 „ rum , & Thalasium Reverendissimum
 „ Episcopum Cæsareæ , & Eusebium Reve-
 „ rendissimum Episcopum Ancyra , & Eu-
 „ stathium Reverendissimum Episcopum
 „ Beryti , & Basilium Reverendissimum
 „ Episcopum Seleuciæ Isauriæ , qui tunc po-
 „ testatem , & Principatum Synodi tenuerunt ,
 subiacere : & a Sancto Concilio se-

„ CUR-

„ cundum Canones , ab Episcopali dignitate
 „ fieri alienos . „ Viden ut hi omnes pote-
 statem , & Principatum Synodi tenuisse di-
 cuntur ? Nec tamen omnes a Theodosio pari
 auctoritate donati sunt , cum eorum omnium
 non meminerit in sua ad Dioscorum Episto-
 la , sed trium duntaxat priorum . Unde nec
 hi parem censendi sunt cum Dioscoro aucto-
 ritatem habuisse , licet ad eos eodem tenore
 scripserit , id est , eadem de causa , ut nimi-
 rum Concilio adessent cum suis Episcopis , &
 causam Eutychianam judicarent .

§. XII.

*Theodosius Magistratus mittit ad Concilium ,
 ac decernit ut Flavianus , Julianus ,
 & alii , a suffragandi jure
 excludantur .*

ID probatur ex Commonitorio Theodosii
 ad Elpidium Comitem Sacri Consistorii ,
 quod Actione I. Concilii Chalcedonen-
 sis perlectum est . Incipit : *Sancta quidem Sy-*
nodi . Hoc auctoritatem dat omnem tum El-
 pidio , tum Eulogio Tribuno , & Notario
 Prætoriano , ut tumultus prohibeant , ut au-
 ctiores turbarum , si qui extiterint , carceri
 mancipent , ut omnia ordine discuti jubeant
 ac decerni , ut intersint judicio , & celerem
 curent ac circumspectam discussionem a Sy-
 nodo fieri , ac tandem omnia ad ipsum re-
 fe-

ferant. Insuper ut Fidei causa ante aliud quidvis expendatur. Vult præterea Theodosius hoc Rescripto, exclusos a suffragii jure Flavianum, & ceteros Antilitas, quotquot Eutychetem Constantinopoli damnarunt. Scribit denique, se nominatis Magistratibus, & civile, & militare auxilium delegasse, ut sua Mandata facilius executioni mandarent. Extat Epistola eam ob rem data ab Imperatore ad Proclum Asiæ Proconsulem, Actione I. Concilii Chalcedonensis; quæ incipit: *Sanctæ quidem Synodi*. Extat ibidem Epistola Theodosii ad Synodum Ephesinam, quæ incipit: *Vellemus quidem*. Illa Flavianum notabat velut totius tumultus auctorem; Chrysaphii scilicet mendaciis deceptus.

§. XIII.

De Gestis Prædatoriae Synodi.

Coepta est illa Synodus 4. Idus Augusti anno Christi 449. Leonis Papæ X. Theodosii XLII. Valentiniani XXV. Adfuere CXXX. Episcopi. Locus Synodi fuit Basilica Sanctæ Dei Genitricis Mariæ. Flavianus suo loco sedere non est permittus, sed quinto loco, post Episcopum scilicet Hierosolymorum Juvenalem: qua de injuria graviter conquesti sunt Orientales Episcopi Actione I. Concilii Chalcedonensis. *Flavianus*, in-
quiunt.

quiunt , *in proprio loco quare non sedit ? Constantinopolitanum Episcopum quare quintum posuerunt ?* Legati Sedis Apostolicæ legationem suam exposuere , excusaveruntque , S. Leonem quod Synodo per se non interesset , eo quod non esset moris , nisi per Legatos , extra Urbem Romanos Pontifices Synodis interesse . Illud patet ex Hilarii Diaconi , & Legati interlocutione . Sancti Leonis Epistolam suscipi quidem iussit vasserrimus Dioscorus , sed ejus lectionem , aliarumque Litterarum , ad diversos causa Synodi scriptarum , semper elusit . Prius de controversiis Flavianum inter & Eutychetem exortis , quam de Fide agendum dixit ex Imperatoris Mandato . Eutyches introductus , continuo cœpit diluere labem hæreseos , Confessionemque Fidei proponere simulationis plenam , & ambage verborum perplexam . Extat Actio I. Concilii Chalcedonensis . Incipit : *Gratias ago per omnia Sancto Deo* . Profitetur eo Libello Eutyches Nicænam Fidem , quam Ephesini Patres , & Sanctus Cyrillus confirmarunt , cui & aliquid addere vel minuere prohibuerunt . Nicænam Fidem professus est , quæ Incarnationis mysterium non explicuit , nullis tunc Hæresibus impugnatum : prætermisit vero additiones factas Nicæno Symbolo propter hæresim Apollinaris , quod ipse in Apollinaris errores versaretur . Id Gravi-ter urgebat Diogenes Cyzicenus Actio I. Concilii Chalcedonensis .

Le-

Leſto Eutychetis Libello, interceſſit Flavianus, ut Euſebius Dorylæi, accuſator Eutychetis, in Synodum admitteretur. Id vetuit Elpidius Comes Mandatum Imperatoris obtrudens. Releſta deinde ſunt acta Synodi Conſtantinopolitanæ ſub Flaviano. In iis Catholicam Fidem egregie propugnâſſe adverſus Eutychetem celebrabatur Baſilius Seleucienſis Epicoſopus. Cujus gloriæ Dioſcorus invidens, inſigne mendacium a ſuis Notariis ſcribi juſſit in Actis Latrocinii, quod nimirum palinodiam Ephēſi recantâſſet, duarumque naturarum vocabulum proſcripiſſet. Hæc enina ejus interlocutio legebatur: „ Eos
„ qui contraria ſentiunt his, quæ in Nicæa,
„ vel in Ephēſo ordinata ſunt, averſor anathematizans dividentes poſt unionem,
„ in duas naturas, vel ſubſtantias, vel
„ perſonas unum Dominum noſtrum Jeſum Chriſtum, accuſans & reprehendens
„ propriam vocem, quam de duabus naturis profeſſus ſum in geſtis apud Regiam
„ Civitatem; & adoro unam naturam Deitatis Unigeniti humanati, & incarnati. „
Dioſcorum & ejus Notarios falſi poſtulavit Baſilius in Chalcedonenſi Concilio: teſtes appellavit Auxonium, & Athanaſium, quod palam dixiſſet Dioſcoro in Ephēſino Conventu: „ Noli Domine, noli ſolvere totius
„ orbis opinionem. „ Faſſus eſt ſe dixiſſe quidem Eutycheti: „ Confuſionem inducis, &
„ commixtionem, ſi unam naturam dicis ab
„ ſo-

„ solute post adunationem. Si vero dicas unam
„ naturam incarnatam & inhumanatam, ea-
„ dem cum Patribus dicis: „ Seque id dixisse,
ut Eutychetem blande ad officium revocaret.

Perlectis omnibus monumentis gestorum
in Constantinopolitana Flaviani Synodo, in
Sacerdotii gradum, & Monasterii principatum
restitutus est Eutyches, lata Sententia de-
positionis in Flavianum, & Eusebium Dory-
læi, cui ceteri Episcopi alioqui orthodoxi,
metu fracti, vique adacti subscripsere, ut
ipsi contestati sunt Actione I. Concilii Chal-
cedonenfis. Quidam venerabiles Episcopi,
quod in gratiam Flaviani ad pedes Dioscori
accidentes, ejus iracundiam frangere tenta-
verint, a Militibus & Monachis Eutychetis,
qui cum gladiis & fustibus ad fores adstabant,
jubente Dioscoro, sunt repulsi. Plurimi cum
Flaviano condemnati sunt Episcopi, quos
inter Ibas Edessenus, Theodoretus Cyrensis,
& Domnus Antiochenus, & quicumque ju-
rare in verba Hæretici renuerunt. Absentes
damnati sunt Ibas & Theodoretus: ille qui-
dem propter Epistolam ad Marim Persam &
propter sacrilegas voces, quas evomuisse ab
adversariis asserebatur, *Non invideo Christo
facto Deo, quoniam si volo, & ego fio*. Hic
vero propter Scripta contra Capitula Sancti
Cyrilli, & propter scriptam Epistolam contra
Sanctam Synodum Ephesinam ante Ecclesiæ
pacem. Quamquam illud Dioscori in Theo-
doretum judicium, non tam nova Sententia
fuit,

fuit, quam Sententiæ in eum & alios Nestorii fautores latæ a Synodo prima Ephesina, ni resipisceret, quædam confirmatio. Illum itaque habens pro damnato Dioscorus, tamquam Nestorianæ hereſeos fautorem, declaravit coram Synodo, curaturum se ut Ephesini canones adversus illum custodirentur, eumque velut Nestorianum ab Ecclesia sua expulit. Huc enim alluisse videntur Ægyptii Episcopi in Concilio Chalcedonensi: *Cyryllum*, inquit, *ejicimus, si Theodoretum acceperimus. Canones istum ejecerunt.* Unde constat verba hæc eorundem Ægyptiorum: *Coram universa Synodo damnatus est*, significare eum fuisse damnatum omissis judiciorum sollemnibus, in consequentiam sententiæ a Concilio I. Ephesino in ipsum latæ: ut notat Illustrissimus & doctissimus Dominus de Marca *lib. 7. de concordia Sacerdotii & Imperii, cap. 9.*

§. XIV.

*De tyrannica Dioscoris in Flavianum,
& Legatos Apostolicos crudelitate.*

Flavianus a judicio Prædatoris Synodi Sedem Apostolicam appellavit. Post appellationem, indigne exceptum, ac multis injuriis verberibusque affectum, ita ut dolore plagarum efflaverit animam, atque pro Fide mortem oppetierit, testatur Liberatus *cap. 12. Breviarii.* Immanis adeo sceleris
au-

auctor fuit Barsumas Archimandrita, ut plures Episcopi in Concilio Chalcedonensi affirmarunt, Actione 4. Diogenes Episcopus Cyzicenus dixit: *Barsumas qui inter alios intravit, occidit B. Flavianum. Ipse enim instabat, & dicebat, Occide.* Episcopi vero Syriæ exclamaverunt; *Omnem Syriam Barsumas evertit: duxit super nos mille Monachos. . . . Homicidam Barsumam mitte foras: homicidam in arena: anathema Barsumæ: Barsumam in exilium.* Ceterum illa cædes licet per Barsumam & Monachos ejus perpetrata, impio Dioscoro malorum omnium auctori tributa est. Unde in Concilio Chalcedonensi Quintus Phocensis Episcopus ipsum vocat interfectorem Flaviani. *Quando: inquit, Sanctum Virum Flavianum Catholicæ Fidei Custodem interfecit, neque Canonis protulit, neque lecti sunt, neque aliquo Ecclesiastico ordine usus est, sed propria usus auctoritate eum damnavit.* Hinc etiam Sabas Episcopus Palti vocavit eum *Novum Cain*, Actione 3. Concilii Chalcedonensis. Denique Evagrius lib. 2. cap. 2. scribit: *Flavianum miserandum in modum a Dioscoro interfectum per vim ab eo Ecclesia extrusum, & calcibus verberatum.* Verum Flaviani mortem non eodem modo narrant Auctores. Prosper in Chronico prolixiori ait, quod *Inter manus eorum, a quibus in exilium ducebatur, glorioso ad Christum sine transiit.* Nicephorus refert, triduo post decessisse. Marcellinus Comes

mes & Menologium Græcorum ajunt, ipsum ad Epypam Lydiæ relegatum, ibique tædio, dolore, & tormentis confectum & exanimatum; quibus similia habet Breviculus Causæ Euthychianistarum: *Ducitur, inquit, in exilium Flavianus, & apud Epypam, quæ est Lydiæ Civitas, seu superveniente, seu ingesta morte defunctus est.*

In Legatos etiam Apostolicos damnationi Flaviani obfirmate resistentes defævit impotens Dioscori furor, quos violata Fide publica in custodiam detruxit. Unus Hilarius fuga elapsus, post varias circuitiones & fortunas Romam tandem adnavigavit, & S. Leonem de omnibus Ephesi gestis fecit certior, ut testantur S. Leo in Epistola ad Clerum Plebemque Constantinopolitanam, quæ extat 1. p. Concilii Chalcedonensis, cap. 2. & Hilarius ipse in Epistola ad Pulcheriam Augustam.

N O T A .

DE Flaviani appellatione interjecta ad Leonem, velut si Romanus Pontifex jure gauderet excipiendi Orbis Christiani appellationes in Causis Ecclesiasticis, non satis constare opponunt nonnulli, quorum argumenta iterum urgens Basnagius ad A. 449. contendit provocatum quidem ad S. Leonem, sed non ut Romanum Episcopum, quin potius ad ipsum cum universali Sy-

Synodo ex Italis colligenda. Verba tamen Liberati provocationem ad Leonem apertissime docent: Flavianus per legatos Sedem Apostolicam appellavit libello; idque confirmat Valentinianus Imp. ad Theodosium, scribens: Flavianus per libellos appellavit; quos libellos legatis Apostolicis datos in iisdem litteris Imperator tradit: quod sane Imperatoris testimonium testimonio Liberati fidei adstruit. Neque his opponas factum Leonis, qui his acceptis libellis Synodum ad ejus causæ discussionem indicendam censuit. Id enim ab eo præstitum pro sollemni Romanorum Pontificum more, ut quoties de causis majoribus ageretur, numquam nisi re prius in Synodo discussa judicandum sibi de illis sumerent, ut sæpe aliàs est a me in rem præsentem animadversum. Numquid igitur quia in re gravissima Romani Pontifices judicium ferre recusarunt, nisi causa prius mature discussa in Concilio; ideo in causis illis non ad eosdem Pontifices, sed ad Synodos ab eo cogendas provocatum jure diceretur? Donatistæ ad Constantinum Imperatorem, provocasse agnoscuntur in causa Cæciliani, quamvis Imperator de illa per se cognoscere recusans ad Synodum retulerit.

At enim, teste Galla Placidia, Flavianus libellum ad Apostolicam Sedem & ad omnes Episcopos earum partium misit. Admitto libellum ad omnes missum, utpote quos omnes consultores adfuturos norat Leoni in eo judi-

judicio ferendo ; sed provocatio ad unum Leonem facta est ; id asserit Liberatus , & Valentinianus confirmat . Repones : Valentinianus in suo rescripto ad Theodosium ; & Eudoxia Augusta in suis litteris judicium flagitant Synodi generalis . Nihil hic quæro de Valentiniano & Eudoxia ; de Flaviano disputo , num ad Leonem , vel potius ad generalem Synodum provocaverit . Quamquam Valentinianus & Eudoxia nihil contra Flaviani mentem voluisse censendi sunt ; volebant enim causam ad Leonem deferri , sed probe scientes futurum ut Leo numquam commissurum fuisset ut gravem adeo causam absque judicio Synodi terminaret ; Synodum voluerunt : cum præsertim tunc nonnisi assentiente , vel etiam invitante Augusto cogi Concilia solerent . Hæc satis de appellatione Flaviani .

§. XV.

Theodosius lege lata Ephesinum Latracinium firmavit , quam rescidit Marcianus Imperator .

Licet Valentinianus Occidentis Imperator , Galla Placidia Valentiniani mater , & Licinia Eudoxia Theodosii filia , ad ipsum scripsissent pro causa Ecclesiæ , ac obsecrassent , ut S. Leonis votis annueret , jubendo Generale Concilium in Italia celebrari ,
ad-

adduci tamen non potuit Theodosius, ut res semel judicatas adversus Flavianum refricari sineret. Quod patet ex ejus ad Liciniam Augustam Epistola: *Tuæ vero Dulcedini*, inquit, *hoc solum approbavimus intimandum, quia memoratus Flavianus sacro judicio ab Ecclesiasticis rebus ablatu est, quatenus totius dubietatis contentio a sacris removeretur Ecclesiis: & nihil ulterius post hæc definire possibile est, cum jam ista semel decisa sint.*

Id confirmat Liberatus in Breviario cap. 12. „ Sed fortissimus Leo (inquit) audiens „ Legatorum suorum suggestionem, & Theo. „ doreti querelas suscipiens, litteris suis „ Theodosium Imperatorem & Pulcheriam „ Augustam petit, ut fieret intra Italiam „ generale Concilium, & aboleretur error „ Fidei per violentiam Dioscori factus. Va. „ lentinianum autem Imperatorem, & Eu. „ doxiani uxorem ejus, ad memoriam „ B. Petri, cum multis Episcoporum, ge. „ nibus provolutus Romanus Pontifex de. „ precatus est, ut Theodosium hortarentur „ aliam fieri Synodum, ad retractandum „ illa quæ a Dioscoro male acta atque per. „ petrata fuerant in damnatione Flaviani „ Episcopi, & Orthodoxorum depositione. „ Rescripsit Theodosius, Flavianum læsibi. „ lis novitatis reum, dignum mortis debi. „ tum suscepisse, & ideo omnis pax & concor. „ dia in Ecclesiis regnaret, Principe con. „ tentionis ablato, &c.

Nec

Nec vero negavit solum Theodosius eorum quæ in Ephesino latrocinio gesta erant retractationem; sed etiam lege lata illud firmavit, quæ extat 3. p. Concilii Chalcedonensis, cap. 10. „ Et nos igitur (inquit) ejusdem Sanctæ Synodi, *Ephesinæ scilicet*, „ decreta laudamus, atque confirmamus, „ hanc Orthodoxam Fidem putantes atque „ nominantes, quæ a trecentis decem & „ octo Patribus exposita est & firmata in „ Sanctis Conciliis, quæ Ephesi congregata sunt. *Et post pauca*: Omnino autem „ nullus, qui Nestorii ac Flaviani, & eorum qui ejusdem hæresis sententia detinentur, ullo modo Episcopus ordinetur.

Concilii Chalcedonensis Patres, secundum Paschasini Legati Apostolici sententiam, Marciano Imperatori supplicarunt, ut Ephesini latrocinii vires lege lata infringeret. Qua in petitione, S. Leonis exemplum secuti sunt, qui hoc a pietate Marciani beneficium expectabat, sic ad ipsum scribens Epistola 43. *Non potest vocari Concilium, quod in eversionem Fidei fuisse constat agitatum, quodque vestra Clementia amore veritatis, Catholicis adfutura, aliud statuendo cassabit.*

Leonis ergo & Synodi Chalcedonensis votis annuit Marcianus Imperator, & Theodosii Constitutionem rescidit lege lata, his verbis: „ Cum falsa invidia, & improbe concinnata calumnia, Religiosæ ac venera-

„ bilis recordationis Flavianus hujus almæ
„ Urbis Episcopatu fuisset expulsus . . . Ta-
„ men ita ejus Reliquias & expetiit hæc re-
„ gia civitas , & recepit , ut beator omni
„ vivente videretur : ut exitus ille qui pu-
„ tabatur acerbus , optandus credatur fuif-
„ fe , quo illam immortalem mercatus est
„ laudem , secutumque est illud quod meri-
„ tis ejus Divinitas præstitit , ut venerabi-
„ lis Synodus innumerabilium pene Sacer-
„ dotum Chalcedonem conveniret , quæ
„ dum Fidem diligenter inquirat , auctori-
„ tate Beatissimi Leonis Episcopi æternæ
„ Urbis Romæ & Religionis fundamenta
„ confirmat : Flaviano & antea actæ vitæ pal-
„ mam , & mortis tribuit gloriosæ . Ergo
„ quoniam venerabilis recordationis Flaviana-
„ nus tanto , ac tali decoratus est testimonio ,
„ aboleatur illa constitutio , quæ scelerato-
„ rum subreptione , post obitum sanctæ me-
„ moriæ Flaviani adversus eum lata cogno-
„ scitur , cessentque in totum ea , quorum
„ initium fuit iniquum ; & injusta sententia
„ nihil obsit Eusebio quoque , & Theodore-
„ to Religiosis Episcopis , qui eadem Lege
„ continentur : quoniam non possunt Sacer-
„ dotes Constitutione damnari , quos Syno-
„ dicum ornat Decretum .

§. XVI.

Quid actum a S. Leone cum Anatolio Constantinopolitano Archiepiscopo ante Concilii Chalcedonenfis celebrationem .

Purimis a S. Leone acceptis litteris , quibus Concilii Ephesini II. verius Latrocinii , rescissione postulabat , Theodosius Imperator litteras ad ipsum dedit , quibus diserte professus est , se curaturum ne Fides Nicæna injuriam pateretur . Monuit insuper , Flavianum vita functum , eique Anatolium successisse in Ecclesiæ Constantinopolitanæ regimine , cujus ordinationem a Dioscoro Ephesi factam , a Romano Pontifice ratam haberi cupiebat . Data ad Theodosium Epistola respondit S. Leo , sibi gratam fuisse Concilii Nicæni commendationem : de Ordinatione vero Anatolii nihil in alterutram partem a se temere rescribendum , donec exploratum sibi sit , an sinceram Fidem teneat Anatholius : se nihil ab eo vel arduum petere , vel ambiguum , sed ut relegat quæ a Patribus Incarnationis Dominicæ Fides fuerit custodita ; Cyrilli Alexandrini Epistolam , & quæ inserta sunt Ephesinæ I. Synodi Gestis , Catholicorum Sacerdotum testimonia recenscat : suam denique ad Flavianum Epistolam de Incarnationis Dominicæ Sacramento perspiciat ; atque ad horum omnium normam

edat Professionem Fidei, cui absolutissima
 subscriptione, id est, absque ulla restrictione,
 aut tergiversatione subscribat. „ Non
 „ aspernetur etiam (inquit) meam Episto-
 „ lam recensere, quam pietati Patrum per
 „ omnia concordare reperiet. Cumque a se
 „ hoc quod eidem profuturum sit, expeti,
 „ desiderarique cognoverit, Catholicorum
 „ sententiis toto corde consentiat: ita ut
 „ sinceram communionis Fidei Professio-
 „ nem absolutissima subscriptione, coram
 „ omni Clero & universa plebe declaret,
 „ Apostolicæ Sedi & universis Domini Sa-
 „ cerdotibus atque Ecclesiis publicandam, ut
 „ pacificato per unam Fidem mundo, possi-
 „ mus omnes dicere, quod Angeli nato de
 „ Maria Virgine Salvatore cecinerunt: Glo-
 „ ria in Excelsis Deo, &c. Quia vero, &
 „ nos, & Beati Patres nostri, quorum do-
 „ ctrinam veneramur, & sequimur, in unius
 „ Fidei concordia sumus, sicut Provincia-
 „ rum omnium protestantur Antistites: agat
 „ Clementiæ vestræ devotissima Fides, ut
 „ quamprimum ad nos Constantinopolitani
 „ Episcopi, qualia debent probati & Catho-
 „ lici Sacerdotis Scripta perveniant, aperte
 „ scilicet atque dilucide protestantia, quod
 „ si quis de Incarnatione Verbi Dei aliud ali-
 „ quid credat, aut asserat, quam Catholi-
 „ corum omnium & mea professio protestan-
 „ tur, hunc a sua communione secernat,
 „ ut ei fraternam in Christo charitatem possi-
 „ mus impendere.

Ut

Ut autem velocior pleniorque effectus his curis præstaretur, Legatos quatuor Constantinopolim Sanctus Leo misit, Abundium scilicet, & Asterium Episcopos, Basilium & Senatorem Presbyteros, per quos veram Fidei formulam Princeps edoceretur: ut si in eandem Confessionem Constantinopolitanus Antistes toto corde consentiret, pax Ecclesiæ firmaretur, omnisque de eo aboleretur suspicio., Sin vero aliqui a puritate atque, Patrum auctoritate dissentirent, Concilium Universale intra Italiam cogeretur, ut in unum convenientibus his, qui aut ignorantia, aut terrore prolapsi essent, correctionis remediis consuleretur., Hæc totidem verbis excerpta sunt ex Epistola 33. S. Leonis ad Theodosium data anno Christi 450. 17. Kal. Augusti.

Ejusdem argumenti Epistolam direxit ad Pulcheriam Augustam, quæ est inter ejus Epistolas 35. in ea exponit cur Fidei professionem, & singularem quidem exposcat. *Quia nimirum, inquit, in Ordinatione ejus plura præcesserint, taliaque ad nos debuerit Scripta dirigere, quæ illum a contagione hujus, qui nuper emerfit, erroris, alienum ostenderent.* Ordinatus scilicet a Dioscoro fuerat Anatolius, cujus & fuerat Apocrisarius, eique semper conjunctissimus, unde vir dubiæ Fidei habebatur.

Subdit deinde quid ab illo exigit, ut scilicet S. Cyrilli Epistolæ ad Nestorium acquiescat,

scat, & suæ ad Flavianum Epistolæ: *Et Epistola mea*, inquit, *quæ ad sanctæ recordationis Flavianum est directæ, consentiat*. Tum denique Imperatricem rogat, ut si qui a Confessione Fidei, quam ipse explicuerat, dissentiant, Synodum Generalem cogi procuret: *A qua*, inquit, *si forsitan ab aliquibus discrepatur, Universale Concilium Sacerdotum haberi intra Italiam, Clementia vestra annuente, jubeatur: quo remota arte fallendi, tandem pateat quid altiore tractatu aut coerceri debeat; aut sanari*.

Cum Leonis Epistolam ad Flavianum sibi a Legatis Pontificis oblatam legisset Anatholius, eam reverenti animo suscepit; retulitque Pontifici una cum Legatis, plures in Oriente Episcopos Romanæ communionis cupidos dolere, quod adversus terrores Dioscori non tenuissent constantiam: qua de re plena auctoritate S. Leo decernit quid agendum esset. *Sed cum Legatis nostris*, inquit, *participata tecum sollicitudine volumus disponatur: quatenus hi qui plenis satisfactionibus mala gesta condemnant, & accusare magis se eligunt quam tueri, pacis & communionis nostræ unitate latentur: ita ut digno prius anathemate quæ contra Fidem Catholicam sunt recepta, damnentur.... Neque enim potest in aliquo benignitas nostra reprehendi, cum satisfaciētes recipimus, quos dolumus esse deceptos. Nec aspere igitur communionis nostræ gratia deneganda est, nec temere largien-*
da:

da: quia sicut plenum pietatis est oppressis charitatem Dominicam redhiberi, ita justum est omnia perturbationis Auctoribus imputari. Quod autem attinet ad Dioscorum, Juvenalem, & Eustathium Berytensem, Anatolio jubet S. Leo ut ea custodiat, quæ sui Legati facienda esse dixerint, nempe ut eorum nomina ad Altare non recitentur, nec Sanctorum nominibus sine discretionem misceantur; cum damnatam impietatem non deferentes, ipsi se sua pravitate condemnent, quos convenit aut percelli pro perfidia, aut laborare pro venia.

Commendat denique Anatolio S. Leo Julianum Coensem Episcopum, & Clericos qui S. Flaviano adhæserunt: nec non Eusebii Dorylæi secum Romæ degentis, & in sua communione persistentis Ecclesiam: Hæc excerpta sunt ex Epistola 40. S. Leonis, sive 60. in P. Quenellii Editione.

§. XVII.

De Concilio Chalcedonensi.

CUm Theodosius fato functus esset, antequam Legati S. Leonis Constantinopolim pervenissent, Marcianus qui ipsi in Imperii administrationem successerat, ducta in conjugem Pulcheria, sanctissimi Pontificis Legatos benigne suscepit. Sed & existimavit se Christianæ Religioni ac Fidei Catholi-

cæ consulturum, si Generalem Synodum, quæ Imperatore Theodosio tantopere fuerat expetita, & a dicto Principe tam pertinaciter recusata, celebrari quantocyus curaret. Quæ de re litteras dedit ad S. Leonem, quæ extant I. P. Concilii Chalcedonensis c. 34. Dedit quoque Pulcheria Augusta litteras ad S. Leonem, quæ I. P. ejusdem Concilii leguntur, quibus scripsit primo, Anatholium Regiæ Urbis Episcopum in eadem Fide permansisse, & litterarum Apostolicarum confessionem complexum esse: similiter ipsum sine dilatione subscripsisse Epistolæ Catholicæ Fidei, quam ad S. Flavianum ipse Leo direxerat. Secundo scribit, S. Flaviani corpus Marciani conjugis sui præcepto, & suo, Constantinopolim allatum esse, & in Basilica Apostolorum honorifice sepultum. Tertio, Episcopos, qui ob Fidei causam, & Flaviani defensionem in exilium erant amandati, Imperatoria Sanctione revocatos, quatenus per approbationem Synodi, atque sententiam omnium Episcoporum convenientium, Episcopatum & Ecclesias proprias recipere decernantur. Quarto, scribit de cogendo Concilio, secundum Imperatoris placitum.

Acceptis per Tatianum Urbis Præfectum Marciani litteris, ad ipsum protinus rescripsit S. Leo; gratias egit ob illud, quo fervebat, pacis Ecclesiasticæ studium: non esse reparata dilceptatione tractandum scripsit, utrum Euty-

tyches impie senſerit, & utrum Dioſcorus impie judicarit, ſed qualiter annuendum ſit lapſorum precibus, veniam de inconfanti trepidatione poſcentium. Tandem quod Synodum ſpectat, ait ſe plenius ad ejus Majeltatem ſcripturum per Legatos, conſellim Conſtantinopolim mittendos. Hæc S. Leo Epiſtola 42.

Miſit itaque Sanctus Pontifex Legatos ſuos ad Marcianum cum Epiſtola, qua declarat primo ſe annuere ejus votis de Synodo celebranda, licet ipſam in aliud tempus ob imminentes undique hoſtes diſferri peroptaſſet. *Proſceram quidem, inquit, a glorioſiſſima Clementia veſtra ut Synodum, quam ad reparandam Eccleſiæ Orientalis pacem, a nobis etiam petitam neceſſariam judicaſtis, aliquantiſper diſferri ad tempus opportunius juberetis: ut liberioribus ab omni perturbatione animis, hi quoque Epiſcopi quos hoſtilitatis metus detinet, convenirent. Sed quia pio ſtudio humanis negotiis divina præponitis, &c. Ego etiam veſtris diſpoſitionibus non renitor.*

Obſecrat deinde Imperatorem, ne in Synodo quæ habenda eſt, Fidem quam Patres ab Apoſtolis ſibi tradita prædicarunt, quaſi dubiam retractari patiatur; & quæ olim Majorum ſunt auctoritate damnata, redivivis excitari permittat conatibus. Tandem monet ſe Concilio adfuturum per Legatos, quos mittit Conſtantinopolim. (Epiſtola 43. data 6. Kalend. Junii ſub Adelphii Conſulatu.)

Dedit etiam litteras ad Pulcheriam Augustam, Idibus Junii eodem Consule. Quibus inter alia obsecrabat, ut Eutychetem longius deportari, & Catholicum Abbatem ejus Monasterio præfici juberet. (Epistola 45.)

Interea Marcianus Imperator Metropolitæ omnes ad Concilium proximis Kalendis Septemb. Nicææ in Bythinia celebrandum convocavit. Quin etiam spondit se adfuturum Synodo. Qua de re speciales direxit litteras ad Anatolium Constantinopolitanum Antistitem. Extant I. P. Concilii Chalcedonenfis c. 36. & 37. Legitur ibidem c. 38. Epistola Pulcheriæ Augustæ sub idem tempus data ad Strategium Bythiniæ Consularem, ut Clericos Monachos, & Laicos, qui forte Nicæam superventuri essent, ibidemque tumultus excitaturi, de Civitate vicinisque locis expelleret, quos nempe nulla ratio ad Concilium vocabat.

Cum autem inter hæc preturbari Illyricum ob metum Barbarorum imminentium Imperator ex Litteris Præfectorum accepisset, neque Nicæam posset se conferre, Concilium Nicæa transtulit Chalcedonem, illucque Episcopos omnes suis Litteris convocavit. Transferendi porro Concilii etiam occasionem dedit obsecratio Legatorum Apostolicæ Sedis, qui Imperatorem enixe rogaverant, ut adesset Sancto Concilio, protestantes se ipso absente illuc non venturos. Ista patent ex Epistolis Marciani Imperatoris ad Synodum quæ

quæ Nicæam convenerat relatis 1. p. Concilii Chalcedonenſis, Num. 41. & 42. ex Liberato cap. 13. Breviarii, & ex Evagrio lib. 2. cap. 1.

Synodo Chalcedonenſi præfuit S. Leo per Legatos Paſchaſinum Lilybæi in Sicilia Episcopum, Lucentium Aſculanum Episcopum, Bonifacium & Baſilium Presbyteros; quibus & Julianum Coenſem Episcopum adjunxit.

Incepta eſt Synodus anno Chriſti 451. Leonis XII. Marciani Imperatoris II. Valentiniani Imperatoris XXXVII. Marciano & Adelphio Coſſ. menſe Octobri. Celebratum eſt in ſuburbiiſ Civitatis, in ampliffima S. Virginis & Martyris Euphemie Baſilica, cujus extat egregia deſcriptio apud Evagrium lib. 2. Hiſtoriæ Eccleſiaſticæ, cap. 3. Episcopi interfuere ferme ſexcenti, teſte S. Leone Episto-
la 52. Triginta ſupra ſexcentos ſcribit Liberatus cap. 13. Breviarii: cui conſentit Marcellinus in Chronico. Nicephorus ſexcentos triginta ſex fuiſſe ſcribit, ut major duplo fuerit numerus Chalcedonenſium, quam Nicænorum Patrum. Dimidie partis ſubſcriptiones in Actis, quæ extant, deſiderantur. Illic vocatum etiam Neſtorium mentitur Zacharias Rhetor, quem refellit Evagrius lib. 2. Hiſtoriæ Eccleſiaſticæ, cap. 2. ex eo quod Neſtorius in illa Synodo paſſim anathemate damnatus ſit, ut diſerte etiam teſtatur Euſtathius Berytenſis in Episto-
la ad Joannem Episcopum. Secundo quod jampridem

e vivis Nostorius excessisset , ut constat ex eadem Epistola . Adfuere seculares Magistratus , ut tumultus prohiberent , ut judiciorum ordinem servarent , utque secundum Canones omnia geri curarent . Quæ octavo Idus Octobris inceperat Synodus , Kalendis Novembris est absoluta . Quo tempore Actiones fuerunt decem & octo . Liberatus in *Breviario* quindécim numerat . Sexdecim in *Actis* reperiuntur , pluribus sub eodem numero collocatis .

Actione I. petentibus Legatis , Dioscorus in Synodo sedere prohibitus est ut iudex , iussus in medio sedere ut reus . Actorem egit Eusebius Dorylæi . Relecta sunt Acta Pseudo-Synodi Ephesinæ . Itemque Acta Synodi Constantinopolitanæ sub Flaviano . Flavianus , & Eusebius Dorylæi , a labe Hæreseos vindicati sunt , & præter jus æquumque exautoratos , privatosque Communione , pronuntiatum est . Decretum , Dioscorum Alexandrinum , Juvenalem Hierosolymitanum , Thalassium Casariensem Cappadociæ , Eusebium Ancyranum , Eustathium Berytensem , Basilum Seleuciensem , auctores Latrocinii Ephesini , eadem pœna plectendos , qua immerito Flavianum aliosque affecerant , Actum quoque est de Theodoreto , quem Iudices in Synodum introduci petierunt , ut , esset particeps Synodi : *Quia* , inquebant , & restituit ei Episcopatum Sanctissimus Archiepiscopus Leo , & sacratissimus & piissimus

mus Imperator sanxit eum adesse sanctæ Synodo . Illyriciani, Palæstini & præcipue Ægyptii Episcopi intercessere , & clamoribus tumultuariis petiere , ut non admitteretur : Misere mini , inquebant , Fides perit : Istum Canones ejiciunt : hunc foras mittite , Magistrum Nestorii foras mittite . Judices hanc componendis animis viam iniere , ut interim tamquam accusator sederet , nullumque ex ejus receptione fieret aliis præjudicium . Clamarunt Orientales , *Dignus , Dignus . Orthodoxum Synodo , seditiosos foras mittite , homicidas foras mittite .* Contra Ægyptii : *Cyrillum ejicimus : si Theodoretum acceperimus , Canones istum ejiciunt .* Tumultuarios hujusmodi clamores auctoritate & prudentia sua Judices compescuerunt , sic Episcopos allocuti ; *Acclamationes istæ populares , neque Episcopos decent , neque partes juvant .*

Actiōne secunda de Fide agi cœptum . Nullam aliam Regulam Fidei recipiendam a Nicæna , in secunda Synodo Oecumenica , probata & exposita , Patribus visum est . Cum enim Judices interlocuti essent , ut Fidei expositio a Patriarchis , Metropolitibus , & singulis , aut binis ex unaquaque Provincia Episcopis fieret , Patres responderunt : *In scriptis expositionem non facimus . Regula est quæ prædicat sufficere quæ sunt exposita . Regula vult aliam expositionem non fieri . Ea quæ sunt Patrum teneantur .* Spectabat prohibitionem factam in Ephesino Concilio , ne conderetur aliud

aliud Fidei Symbolum . Lectum deinde Symbolum Nicænum & Constantinopolitanum , Synodicæ Epistolæ duæ S. Cyrilli, una ad Nestorium , altera ad Joannem Antiochenum data , cum pax inter eos inita est , & Epistola S. Leonis ad Flavianum . Prolata etiam SS. Patrum testimonia , quibus duæ in Christo naturæ post unionem asseruntur , Hilarii scilicet Episcopi , Gregorii Nazianzeni , Ambrosii , Joannis Chrysostomi , Augustini , Cyrilli , quæ in Acta relata sunt . Tum probata est a Synodo S. Leonis ad Flavianum Epistola . Syriæ & Palæstinæ Episcopis difficultatem aliqua illius loca faceiebant , sed prolatis Sancti Cyrilli similibus testimoniis , omnis ambigendi sublata est occasio . Tandem hæc Actio absoluta est Orientalium & Illyricianorum Episcoporum contrariis clamoribus . Illi Dioscorum in exilium mitti postulabant , *Ægyptium exilio , Dioscorum exilio , Hæreticum exilio , Dioscorum Christus damnavit : Qui communicat Dioscoro Judæus est .* Reclamabant isti , ut quoniam omnes peccaverant , omnibus parceretur , adeoque & ipsi Dioscoro . *Omnes peccavimus , inqueiebant , omnibus indulge . Dioscorum Synodo , Dioscorum Ecclesiis .*

Actiōe 3. Dioscori cāssa ventilata est , jubente Paschasino S. Leonis Legato , lectus Eusebii Dorylæi in ipsum Libellus accusationis . Semel & iterum vocatus ad judicium , se sistere coram Synodo renuit , modo detentionem , nunc ægrotationem , tum absentiam
Judi-

Judicum caussatus. Cui respondit apposite Cecropius Episcopus: *Quando quædam regularia examinantur, neque Judices, neque aliquos Laicos inesse oportet, nisi tantummodo tuam Sanctitatem, quæ in propria accusatur persona.* Lecti post hæc Libelli Ischorionis & Theodori Diaconorum Alexandria, & Athanasii Presbyteri, qui S. Cyrilli nepos erat, & Sophronii Laici, in Dioscorum, quibus eum variis flagitiis accusabant coram sancta Synodo. Verum cum ille tertio vocatus venire contemneret, Legati Sancti Leonis, consentiente Synodo, sententiam depositionis in eum tulerunt, quod Eutychem canonice excommunicatum a proprio Episcopo irregulariter in communionem suscepisset, etiam ante Pseudo-Synodum Ephesinam: quod Epistolam S. Leonis legi prohibuisset in Synodo Ephesina: quod Sanct. Leonem abscindere a communione ausus esset: quod ter ad Synodum vocatus venire contempsisset. „ Unde „ (inquiunt) Sanctissimus & Beatissimus Archiepiscopus magnæ & senioris Romæ Leo „ per nos & per præsentem sanctam Synodum, una cum ter beatissimo & omni laude digno Petro Apostolo, qui est petra „ & crepido Catholicæ Ecclesiæ, & rectæ „ Fidei fundamentum, nudavit eum tam Episcopatus dignitate, quam etiam & ab „ omni Sacerdotali alienavit ministerio. „ Secundum sententiam Legatorum pronuntiaverunt ceteri Patres, & subscriptione sua Dioscori

scori depositionem approbarunt . Sententia Synodi Dioscoro denunciata est , in qua solius contumaciæ fit mentio , alia flagitia generatim significantur : scriptum de ejus depositione ad Clericos Alexandrinos . Missa etiam ea de re Relatio ad Imperatores , & ad Pulcheriam Augustam . Et quia Dioscorus se Sedi suæ restitutum iri jactabat , Edictum a Concilio propositum est Chalcedonensibus ac Constantinopolitanis , quo Dioscorum omni spe recuperandæ Sedis ablata, exhaustoratum fuisse inotesceret .

Actiōne 4. accuratiorem de Fide inquisitionem esse faciendam , Judicibus visum est. Quinque dierum datæ induciæ , ut Anatholius cum selectis Episcopis , qui jam S. Leonis Epistolæ subscripsissent , eos , qui difficultatem circa nonnulla ejus loca patiebantur, doceret , ac communi consilio de Fide tractaretur . Tum rogati Patres quid laudata de Epistola censerent , suo singuli ordine responderunt , Symbolis Nicæno & Constantinopolitano contentaneam esse , nec non Fideiæ S. Cyrillo in Epistolis expositæ , ideoque se illi subscripsisse . Ex Episcopis nonnulli perplexa quædam atque dubia sibi visa esse significarunt , quod ex linguæ obscuritate ortum : sed omnem a Legatis Apostolicis difficultatem absterfam , qui nullam partitionem & separationem in Christo his Epistolæ locis indicari , professi sunt ; ideoque se illi ultro subscribere .

Post .

Post hæc Judices Patribus significarunt, Imperatorem ipsis permittere ut de fautoribus Dioscori statuerent quod ipsis æquum videretur, scilicet de Juvenali, Thalassio, Eusebio Ancyrano, Basilio Seleuciensi, & Eutlachio Berythenfi. li vero Epistolam S. Leonis sua subscriptione approbantes, in Synodum sunt admissi.

Sed cum illi subscriptione sua promeriti fuissent inter Patres confessum, parum abfuit quin Ægyptii Episcopi subscribere recusantes, hæreseos notam, & sententiam damnationis incurrerent. Sibi licitum non esse subscribere causabantur, nisi ex sententia Alexandrini Episcopi Patriarchæ sui, & ipso præeunte. Se statim atque ordinatus esset Alexandriæ Episcopus, ultro subscripturos. Magnis contentionibus res acta est. Synodus ipsorum dilationem contumaciæ & hæresi tribuebat: illi contra, eamque se Fidem profiteri, & Eutychetis doctrinam execrari contestabantur: sed vitam suam in tuto non fore, si contra consuetudinem Ægyptiacæ regionis præter sententiam Alexandrini Archiepiscopi subscriberent. Interlocuti Judices obtinuerunt, ut eorum subscriptio post Ordinationem Episcopi Alexandrini differretur, & Fidejussoribus datis, aut præstito juramento se de civitate interim non exituros, dimitterentur.

Eadem actione, Carosi, Dorothei, aliorumque Archimandritarum, & Monachorum Eutychianorum libellus Marciano Imperatori obla-

oblatus, ex mandato Judicum lectus est, cum illum ipsi recognovissent. Varia complectebatur capita. Primo obsecrabant Imperatorem, ut universalem Synodum fieri præciperet, quam sanxerat convenire. Chalcodonense enim Concilium non agnoscebant Oecumenicum, nisi ibi Dioscorus cum partium suarum Episcopis inter Patres sederet. Secundo rogabant, ne subscriptiones per vim exigenterentur, Quia enim ab ipsis merito postulabatur, ut Epistolæ S. Leonis, & Dioscori damnationi subscriberent, id contumaciter abnuentes, illam subscriptionem & tam justam exactionem persecutioni, quam clerici semper exercerent in Monachos, tribuebant. Tertio postulabant, ut Archimandritarum & Monachorum nemo ejiceretur e monasterio suo, Ecclesia, aut Basilica Martyris, usque ad justum ac legitimum Synodi judicium. Iniquum enim plane fuisse, quod in Dioscorum latum erat, contendebant. Invitati a iudicibus ut amplecterentur Synodi de Fide decreta, ipsorum dicta nova petitione eluserunt, ut scilicet recitaretur libellus, quem pro Dioscori restitutione in communionem & Episcopatum Synodo porrigebant. Eo libello minabantur, se communionem Concilii discessuros, si quid petitionibus suis contrarium decerneretur, aut fieret: *Non enim patimur*, inquebant, *Symbolo Fidei trecentorum decem & octo recusato communicatores fieri eorum qui hoc respuunt*. Vide insignem perfido-

fidorum Monachorum calumniam. Chalcedonenses Patres Nicænum respuere Symbolum mentiuntur, quia Constantinopolitanum etiam vindicabant. Illud vero execrabantur perduelles Monachi, quod illud velut mucrone jugularetur Eutychiana perfidia. Unde & Symbolum Nicænum, & Decretum Ephesini Concilii, quo ipsi aliquid addi vetat, vafro & hæretico animo libellis suis attexuerunt.

Vix dum lecta erant hæc libelli supplicis verba: *Ad hoc Concilium conveniat sanctissimus Archiepiscopus Dioscorus*, cum una voce clamarunt omnes Episcopi: *Anathema Dioscoro: Dioscorum Christus deposuit. Istos mitte foras. Tolle injuriam a Synodo. Tolle violentiam a Synodo.* Cumque vicissim clamarant perfidi Archimandritæ: *Tolle injuriam a monasteriis*: Patres dixerunt: *Petitiones istas audire non licet. Illum qui damnatus est ab omni Synodo, Episcopum nominare ausi sunt. Regulae quare calcantur?* Quia vero minati fuerant Monachi se a communione sanctissimi Concilii discessuros, Aetius Ecclesiæ Constantinopolitanæ Archidiaconus relegit ex codice Ecclesiæ canonem quintum Concilii Antiocheni, de Clericis & Monachis qui seipso a communione suspendunt: quo sancitum est eum qui semetipsum a communione suspenderit Ecclesiæ, & noluerit evocanti Episcopo obedire, omnino damnandum absque ulla spe curationis aut restitutionis. Si vero turbas aut seditiones in Ecclesiâ movere non de-

si-

stiterit; illum per extraneam, id est, sæcularem potestatem coercendum. Quo prelecto Canone, Patres conclamarunt. *Hæc iusta regula: hæc regula Patrum.*

Jubente deinde Senatu, lectus est libellus Supplex a Fauto, aliisque Archimandritis Orthodoxis Marciano Imperatori porrectus, quo adversus Monachos Eutychianos expostulabant, quod nollent piæ & Orthodoxæ Fidei subscribere, & parere monitis Anatolii Archiepiscopi sui, aliorumque Antistitum & clericorum. Secundo rogabant Imperatorem, ut sibi potestas fieret sacro ejus mandato subjundendi Monachos pertinaces & hæreticos pœnis in monasticis constitutionibus latis: & disponendi de spelunca, in qua more bestiarum degebant. Perlecto libello Catholicorum Archimandritarum, Dorotheus Monachus Apologiam Eutychetis suscepit, eum integerrimæ Fidei virum esse, & calumniam pati, impudenter effutens. Hæc vix dixerat, cum ipsum his verbis Judices compellarunt: *Eutyches ait, quod Corpus Salvatoris nostri Jesu Christi non fuit nostræ substantiæ: Tu de hoc quomodo confiteris?* Ille Fidei professionem statim edidit: multis ambagibus involutam, qua nec Eutychianam hæresim damnaret, nec Epistolam S. Leonis susceperet. Qua de causa Patres acclamarunt: *Subscribis Epistolæ, an non?* Respondit pertinax Monachus; *In Baptisma credo: Epistolæ autem non subscribo.*

Inte-

Interea Alexander Presbyter & Ecclesiarum Visitator, qui Monachorum Eutychianorum causa a Sancta Synodo & clarissimis Judicibus ad Imperatorem missus fuerat, Mandata retulit, quibus ipsis jubebatur ut Synodi Decretis parerent, ac illius judicio acquiescerent. Rogantibus Magistratibus, datæ sunt pertinacibus Monachis triginta dierum induciæ, quibus elapsis, ad eos mitterentur Clerici, monituri ut recte ambularent in veritate, cederent placitis Concilii (Ecumenici ad hæreseos destructionem, alioqui omni gradu, dignitate, & communione privandos. Quod si subterfugia solita quærent, pœnam eandem in illos valituram: externa videlicet auctoritate, juxta divinas sacrasque regulas corroborante Sententiam in contumaces latam.

Huic Actioni inserta est altera, qua dirempta est Controversia inter Photium Episcopum Tyri, & Eustathium Berytensem, intercedens de jure Metropolitico in primam Phœniciam, quo exutus est Eustathius: id vero Photio assertum & confirmatum.

Actione 5. Constitutio, seu Definitio Fidei lecta est, quæ omnibus Patribus non placuit. Legati Sedis Apostolicæ, & aliquot Orientis Episcopi, multa deesse ad profligandam hæresim Eutychianam contestati sunt. Ad id enim satis non esse, ut Christus *Ex duabus naturis* diceretur; sed necesse esse ut *In duabus naturis inconfuse, immutabiliter &*
indi-

indivise subsistere diceretur . Hinc non levis inter Patres orta est dissensio , quam Senatores compresserunt , decernentes ut ex Dicecesi Orientis sex Episcopi , ex qualibet alia tres seligerentur , qui cum Anatolio & Legatis de Definitione scribenda statuerent . Repugnantibus aliis , & tumultuatim vociferantibus , nihil Definitioni deesse , nil penitus addendum : urgente tandem Imperatore id perfectum est ; & conscripta receptaque Fidei Definitio , quæ Symbolum Nicænum & Constantinopolitanum , Epistolas Synodicas S. Cyrilli , & memoratam S. Leonis Epistolam , & illa verba diserte continebat , propter quæ tanta fuerat contentio : *Unum eundemque Christum , Filium , Dominum , Unigenitum , in duabus naturis inconfuse , immutabiliter , indivise , inseparabiliter agnoscendum , &c.*

Actiōne 6. cui Marcianus Imperator interfuit , & in qua Sermonem ad Concilium habuit , relecta est definitio Fidei , & omnium subscriptione Episcoporum approbata . Gratulatoriis acclamationibus Marcianum , & Pulcheriam Augustam prosecuti sunt Patres . Imperator in Clericos depositionem , ut executor Canonum , in Milites exauktionem , in Laicos exilium decrevit , si Ecclesiam , disputando de Fide , turbarent .

Post hæc , Capitula quædam Synodo proposuit approbanda Marcianus . Primum interdicit Monachis , ne præter voluntatem ,
Epi-

Episcopi Monasteria ædificent, & ne servos in Monasteriis absque Dominorum consensu recipiant. Secundum Clericis prohibet ne possessiones conducant, aut procurationem suscipiant. Tertium iisdem vetat, ne ex sua Ecclesia in aliam transeant, & cum in eos, tum in illos, a quibus suscepti fuerint, excommunicationem decernit. Notanda sunt verba Marciani ista Capitula proponentis: *Quædam Capitula sunt, quæ ad honorem vestræ Reverentiæ vobis servavimus, decorum esse judicantes a vobis hæc regulariter potius firmari per Synodum, quam Lege sanciri.* Quibus verbis significavit religiosissimus Imperator, se ex reverentia in Synodum, non ex officio, hæc tria Disciplinam Ecclesiasticam spectantia capita Patribus statuenda reservasse. Nec tamen ex hoc quis inferat Principem posse condere Canones, sed solum urgere Legum Divinarum & Ecclesiasticarum observantiam, Canonumque executionem promovere, & eadem Legibus statuere suis, quæ divina Lex vel Ecclesiastica jubet. Nec aliud sibi tribuit Marcianus Augustus, cui Facundus Hermianensis hoc appendit elogium, lib. 12. cap. 3., Sciens igitur ille, „modestissimus Princeps Oziæ Regi non, „impune cessisse, quia sacrificare præsum- „psit, quod licitum est singulo cuique etiam „secundi Ordinis Sacerdoti: multo magis „sibi impune cedere non posse cognovit, „vel, quæ jam de Fide Christiana rite fue-
rant

„ rant constituta , discutere , quod nullatenus licet : vel novos constituere Canones ;
 „ quod nonnisi multis , & in unum congregatis primi Ordinis Sacerdotibus licet .
 „ Ob hoc itaque vir temperans , & suo contentus Officio , Ecclesiasticorum Canonum
 „ executor esse voluit , non conditor , non exactor . „ Hinc Patres Chalcedonenses gratias agentes Marciano , acclamaverunt :
Sacerdoti Imperatori multos annos .

Denique Marcianus Augustus in honorem S. Martyris Euphemie , & in S. Synodi memoriam , Chalcedonensem Civitatem Metropoleos nomine adauxit , salva Nicomedie propria dignitate .

Actione 7. causa Juvenalis Hierosolymitani , & Maximi Antiocheni composita est , cum judicio Synodi , tum mutuo partium consensu . De Provinciis inter illos erat contentio : duæ Phœnicie & Arabie attributæ Antiochenæ Ecclesiæ , tres Palæstinæ vero Hierosolymitanæ .

Actione 8. sancta Synodus Theodoretum jussit dicere in Nestorium anathema . Cum autem Fidem antea suam exponere vellet , clamoribus Episcoporum pene oppressus est vociferantium : *Iste hæreticus est : iste Nestorianus est : Hæreticum foras mitte .* An æque cum Theodoro hac in parte actum , ad rem modo non spectat . Satis sit in præsentiarum nosse , ipsum dicto in Nestorium anathemate , Ecclesiæ suæ restitutum esse ,

ex qua Latrocinii Ephesini Decreto fuerat dejectus & expulsus ; sive potius approbatam ejus restitutionem a S. Leone factam .

Actiōe 9. & 10. causa Ibæ Edeffeni Episcopi acta est . Relecta sunt quæ de eo Antiochiæ , Tyri , & Beryti acta fuerunt . Is depositus a Dioscoro in Pseudo-Synodo Ephesina , Libellum Imperatori obtulerat : sed re delata ad Synodum Chalcedonensem , probatæ vitæ , & integræ Fidei compertus est , & dicto in Nettorium & Eutychetem anathemate , Sedi suæ restitutus . Nonni , qui in ejus locum intrusus fuerat , causa ad Maximum Antiochenum remissa est ; qui statuit ut honore Episcopatus frueretur , donec cum Episcopis suæ Diœceseos , si videretur , aliter judicaret . Abolendam esse penitus Pseudo-Synodi Ephesinæ memoriam decretum est , & pro ea re Imperatori supplicandum . Ordinationem Maximi Antiocheni Episcopi ad illius Synodi Acta non pertinere pronuntiatum est , adeoque nihil ex iis approbatum esse , quamvis Maximi Ordinatio a S. Leone fuisset approbata , & a Patribus rata haberetur . Sic Legati Apostolici censuerunt : *Si ergo & a Beatissimo & Apostolico Romano Urbis Episcopo , omnia quæ ibi gesta sunt , vana sunt habita ; (claret quia & sanctissimus Episcopus Antiochenæ Civitatis extra hæc est , quem post hæc Beatissimus Episcopus in propria communione suscepit ,) necessarium est ut rursus eundem tranquillissimum & Chri-*

stianissimum Principem adeamus, quatenus illud Concilium sacra & propria Lege neque nominari præcipiat.

Actio de Domno Antiocheno Maximi Decessore, quæ post decimam Actionem inserta est Concilio Chalcedonensi, commentitia est: in qua videlicet Maximus inducitur Domno quasi post exauktionem suam superliti alimenta de suæ Ecclesiæ redditibus impertiens, ex indulgentia Concilii. Hanc autem Actionem esse ex Concilii Chalcedonensis Actis expungendam, omnes facile conveniunt.

Actione 11. & 12. Bassiani & Stephani controversia dirempta est. Ille ex Sede Ephesina depositus, iste subrogatus. Judicatum fuit, ut neuter federet, tertius ordinaretur; utrique sumptus ex ærario Ecclesiæ subministrarentur. Lapsus est Evagrius lib. 2. Historiæ cap. ultimo, ubi scripsit: *In altero Conventu causa Bassiani Episcopi Ephesi examinata fuit, & decretum, ut Bassianus de eo dignitatis gradu dimoveretur, inque ejus locum sufficeretur Stephanus.* Tantum enim abest ut Stephanus substitutus sit Bassiano, quin potius uterque sit abdicatus Synodica Sententia, ut ex Actis Chalcedonensibus compertum est. Recte igitur Valesius supplendum esse monet Evagrii locum hoc modo: *Sequenti Actione, discussa est causa Bassiani Ephesiorum Episcopi: statutumque est ut tam ille, quam Stephanus deponerentur, & alius in eorum locum*

tum substitueretur : & Græcum textum emendandum esse ac restituendum .

Actione 13. Eunomii Nicomediensis , & Anastasii Nicæni lis cognita est . Querebatur Eunomius , ex Edicto Valentiniani Nicænum Episcopum jus Metropolitanum sibi tribuere , & Basilinopolitanorum Ordinationes usurpare , Nicomediamque truncare velle in duas Metropoles , quæ Canonum erat manifesta violatio . Respondit Anastasius , nihil se contra Canones tentasse : primum & alterum Episcopum Basilinopoleos consecratos fuisse a Nicæno : extare Epistolam S. Joannis Constantinopolitani , vulgo Chrysostomi , ad Proclum Nicænum Episcopum , qua ipsi suavit ut Nicæam se conferret , Ecclesiæ viduæ pro jure suo provisurus . Excepit Eunomius , Ordinationes Basilinopolitanorum Episcoporum a Nicænis semel aut iterum factas , sed subreptitæ , vel quod Nicomedia Bythinæ Metropolis Episcopum non haberet : ideo sibi juribusque Ecclesiæ suæ non obesse . Lectus est deinde Nicæni Concilii Canon 4. quo sancitur Ordinationum in singulis Provinciis potestatem penes Metropolitam esse . Lectæ etiam Leges Valentiniani , quibus recensitis , æquissimi Judices pronuntiarunt , ipsas civilibus dumtaxat rebus , non Ecclesiasticis prospexisse : Metropoleos nomen & honorem Nicæne Civitati delatum , jus vero Metropolitanum Nicæno Episcopo non concessum : immo iis Legibus cautum esse , ne alia-

rum Civitatum juribus detraheretur . Sancitum vero esse Canonibus , ut unus una in Provincia Metropolita esset . Quapropter Patres a Judicibus rogati , ut Sententiam ea de Controversia dicerent , uno ore clamarunt : *Canones teneant ; Canonibus satisfiat .*

Actiōe 14. de Perrhænorum Episcopatu contentio fuit . Athanasius Perrhænorum in Provincia Eufratesia Episcopus , apud Domnum Antiochenum Patriarcham variorum criminum accusatus , ejus Synodo sistere se veniens , ob contumaciam , e Sede sua rejectus est ; in ejusque locum a Stephano Hierapoleos Metropolita ordinatus Sabinianus . Contigit porro ut convocata non longe post Ephesina Synodo secunda , Latrocinii notissima nomine , Dioscorus illius Synodi Præses Sabinianum non vocatum , inauditumque deponeret , legitimeque depositum Athanasium Sedi restitueret . Hac de causa Marciano Imperatori Libellum supplicem obtulit Sabinianus ; & alterum Synodo Chalcedonensi , cui causæ illius cognitio ab Imperatore permissa fuerat . Interrogatus Athanasius quid ad hæc responderet , dixit : Causam suam a longo jam tempore agitari cœptam : innotuisse Cyrillo & Proclo persecutionem in se motam : eos ad Domnum Antiochenum ea de re Litteras dedisse ac certam formam , seu agendi modum præscripsisse : Domnum vero spretis tantorum Antistitum consiliis , quibus se adhæsurum sponderat , ipsum

ipsum vocasse ad iudicium, atque e Sede deturbasse. Lectæ sunt itaque ex Decreto Judicum Litteræ Cyrilli & Procli ad Dominum, quibus ipsum rogaverant ut injuriæ a Clericis Parrhensibus irrogatæ Athanasio vindex esset, & probatos quosdam Episcopos ad audiendam ipsius causam deligeret, quia ipsi merito suspectus erat Hierapolitanus Metropolitæ, ob veteres inimicitias. Post hæc, postulante Sabiniano, lecta sunt Acta Antiochenæ Synodi sub Domino in causâ memorati Athanasii, ex quibus probatum est illum Panolbii Metropolitæ, amicique in primis sui tribunal declinasse: tertio ab illo vocatum non paruisse: BB. Cyrillo & Proclo fecisse fucum: peregre profectum sponte abdicato Episcopatu: denique canonice vocatum a Domino Antiocheno, & Synodo illius Patriarchica, examen & iudicium fugisse; ac proinde merito Episcopatu exutum ut contumacem & canonum contemptorem. Quapropter Iudices censuerunt, Sabinianum Episcopatu frui debere: Athanasium vero ut merito depositum, & a Dioscoro perperam restitutum quiescere. Litem vero ipsi intentatam, examinandam esse ab Antiocheno Patriarcha Maximo, Synodoque illius, eam tamen lege, ut infra octo menses causâ disceptaretur: utque (si criminum sibi impositorum reus probatus esset) non solum ab Episcopatu alienus, sed publicis etiam legibus subdendus esset. Si vero infra tempus

constitutum non convinceretur Athanasius; restitueretur in Sedem Perrhensis Ecclesiæ a Maximo Antiocheno: Sabinianus vero dignitatem Episcopatus eo casu retineret, & substitutus esset, id est, Coadjutor, Ecclesiæque Perrhensis sumptibus aleretur. Hanc judicii formam cum Synodo probandam, si luberet, proposuissent Judices, Patres ipsam plausibus gratulatoriis exceperunt: *Nihil justius, dixerunt, nihil integrins. Quæ disposita sunt, effectui mancipentur, quia cum Deo vos judicatis.* Ne quis vero existimet sæculares magistratus aliquam sibi auctoritatem in Judiciis Episcoporum arrogasse, audi quibus verbis huic Actioni finem imponant: *Ea, inquit, quæ a nobis quidem approbata sunt, disposita vero a S. Concilio, firma consistent.*

Actione 15. absentibus Sedis Apostolicæ Legatis, atque etiam Judicibus, plures Canones a Patribus conditi sunt. Græci Codices habent 30. Latini 28. ex quibus vigesimus octavus Sedi Constantinopolitanæ confirmat Patriarchica Privilegia, quæ centum quinquaginta Patres Constantinopoli sub Nestario congregati olim ipsi contulerant: ut scilicet primo post Romanam Ecclesiam honore frueretur, ejusque & potestatem haberet in Thraciæ, Ponti, & Asiæ Diœceses, earumque Metropolitas, & Barbarorum insuper Episcopos ordinaret.

Actio 16. postularunt Legati Apostolici, ut relegeretur Canon de Sede Constantinopolita-

litana, ipsis absentibus constitutus: quo recensito, cum omnium ferme Patrum subscriptionibus, Lucentius Sedis Apostolicæ Legatus, Judices interpellans dixit: *Primo Gloria vestra perpendat, qua circumventionem cum Sanctis Episcopis gestum sit, ut non conscriptis Canonibus, quorum mentionem fecerunt, subscribere sint coacti.* Ultimam illam vocem excidere passi non sunt Patres. Unde conclamarunt: *Nemo coactus est: Resumpsit Lucentius; Accedit ad cumulum, quod trecentorum decem & octo Constitutionibus postpositis, centum quinquaginta, qui in Synodicis Canonibus non habentur, mentionem tantum fecisse noscuntur, quæ dicunt ante octoginta prope annos constituta fuisse. Si ergo his temporibus hoc beneficio usi sunt, quid nunc requirunt? Si numquam usi sunt, quare requirunt.*

Aetius Ecclesiæ Constantinopolitanæ Archidiaconus Legatorum oppositiones eludere conatus, ipsos convenit, ut Synodo coram exponerent, an id acceperint in mandatis, quod tam acri pertinacia præstabant. Legit Bonifacius hæc verba ex Diplomate Legationis: „Sanctorum quoque Patrum Constitutionem prolatam, nulla patiamini temeritate violari, vel imminui, servantes omnibus modis personæ nostræ in vobis, quos vice nostra transmisiimus, dignitatem: ac si qui forte Civitatum suarum splendorem confisi, aliquid sibi tentaverint usurpare

„ hoc , qua dignum est constantia retunda-
 „ tis : „ Hæc scilicet Legatis suis præcepe-
 rat S. Leo , ne Sedis Apostolicæ Majestatem
 ullatenus lædi , ne Canones ullatenus violari
 quorundam ambitu paterentur .

Quia vero de Canonibus erat controversia,
 jusserunt Judices , ut Canones ab utraque
 parte proferrentur . Prolatus est a Paschassi-
 no Canon 6. Nicæni Concilii : ab Aetio vero
 Canon 3. Concilii Constantinopolitani . Tum
 accurato examine disquisitum est , an Patres
 ad illius Canonis (ut Legati contendebant)
 subscriptionem coacti essent . Acclamave-
 runt universi : *Sponte subscripsimus* .

Post hæc , Judices Canonem iterum recen-
 situm firmarunt Patribus acclamantibus : *Hæc*
justa sententia . Hæc omnes dicimus , hæc om-
nibus placent . Quæ constituta sunt , valeant ,
omnia ordinate decreta sunt . Reclamavit Lu-
 centius Apostolicæ Sedis Legatus : „ Sedes
 „ Apostolica (inquit) præcepit nobis præ-
 „ sentibus omnia fieri & ideo quæcumque
 „ in præjudicium Canonum hesternæ die ge-
 „ sta sunt nobis absentibus , a Sublimitate
 „ vestra petimus ut circumduci jubeatis : sin
 „ aliàs contradictio nostra his Gestis inhæ-
 „ ret , ut noverimus quid Apostolico , & to-
 „ tius Ecclesiæ præcipuo Episcopo referre
 „ debeamus : ut ipse aut de Sedis suæ inju-
 „ ria , aut de Canonum eversione possit ferre
 „ Sententiam .

Canonem 28. Concilii Chalcedonenfis
 im-

E U T Y C H I A N A . 81
improbavit S. Leo , & e numero Canonum
expunctus est a Græcis ipsis . Canones vero
ceteros ejusdem Concilii Sanctissimus Ponti-
fex tacito saltem consensu approbavit , eos-
que Ecclesia recepit universa .



D I S S E R T A T I O

ADVERSUS HÆRESIM EUTYCHETIS.

Error præcipuus Eutychetis in eo positus erat, quod duas in Christo naturas post Incarnationem negaret, unam dumtaxat assereret ex humanæ divinæque velut mixtione, & confusione resultantem; vel unius in alteram naturæ conversione, id est, aut Divinitatis in carnem, aut carnis potius in Divinitatem.

P Robatur I. ex Actione 3. Concilii Constantinopolitani sub Flaviano, relecta in Concilio Chalcedonensi Actione 1. ubi Joannes Presbyter, & Defensor, qui ad Eutychetem directus fuerat a Synodo, ejus errorem sic exponit quod nempe dixerit: „ Se „ post Incarnationem Dei Verbi, hoc est post „ Nativitatem Domini Nostri Jesu Christi „ unam Naturam adorare, & hanc Dei In- „ carnati, & inhumanati: & Librum aliquem „ hujusmodi proferens, perlegabat: Adjicie- „ bat vero contumelias adversus se ab aliqui- „ bus dictas, quasi dixerit: Verbum carnem „ secum e cælo detulisse: Se innoxium ab „ ejusmodi contumelia. Ex duabas autem „ naturis unitis secundum subsistentiam fa- „ ctum

„ Cum fuisse Dominum nostrum Jesum Chri-
 „ stum , neque didicisse in expositionibus
 „ SS. Patrum , neque suscipere , si contige-
 „ ret ei ab aliquo tale quid legi : quia divi-
 „ næ Scripturæ (ut dicebat) meliores sunt
 „ Patrum doctrinis . Et hæc dicens confite-
 „ batur perfectum Deum esse , & perfectum
 „ hominem , qui natus est de Maria Virgi-
 „ ne , non habentem carnem consubstantia-
 „ lem nobis .

Et Actione 6. ibidem relecta , Theophi-
 lus , & Mammas Præbyteri a Synodo missi
 ad Eutychetem tertia citatione convenien-
 dum , referunt , hæc ipsum dixisse , multis
 coram testibus : „ In qua Scriptura habentur
 „ duæ naturæ ? Deinde vero quis SS. PP. ex-
 „ posuit , Deum verbum habere duas natu-
 „ ras ? Cui cum Theophylus respondisset
 „ *ὁμοούσιον* in Scripturis non contineri , &
 „ tamen ab Ecclesiasticis usurpari tractatori-
 „ bus , quia a SS. Patribus expositum est ;
 „ ita de duabus naturis dicendum esse . *Rur-*
 „ *sus cum Eutyches Theophilo concessisset ,*
 „ Christum esse perfectum Deum , & perfe-
 „ ctum etiam hominem : *reposuit Theophi-*
 „ *lus : Si ergo Deus perfectus , duo perfecta*
 „ *unum perficiunt Filium , quid igitur pro-*
 „ *hibet nos dicere , ex duabus naturis unum*
 „ *Filium ? Tum respondit ignarus Archiman-*
 „ *drita : Absit a me dicere , ex duabus na-*
 „ *turis esse Christum , aut de natura loqui ,*
 „ *aut disputare Dei mei . Ibidem respondisse*

„ dicitur Theophilo : Si permiserit Deus me
 „ pati aliquid , libenter patior : ego tamen
 „ duas naturas non confiteor .

Et Actione 7. ejusdem Concilii Florentio Patritio interroganti , Christumne consubstantialiorem nobis , & ex duabus naturis diceret , post Incarnationem ? Respondit Eutyches : *Confiteor ex duabus naturis fuisse Dominum nostrum ante adunationem : post adunationem vero unam naturam confiteor .* Ibidem iterum interroganti Florentio : *Duas naturas dicis , & consubstantialiorem Christum nobis esse ?* Dic : Respondit Eutyches : *Ego legi scripta B. Cyrilli , & SS. Patrum , & S. Athanasii : quoniam ex duabus quidem naturis dixerunt ante adunationem : post adunationem autem & Incarnationem , non jam duas naturas , sed unam naturam dixerunt .*

Eutychetis id prodit imperitiam , quod cum B. Virginem consubstantialiorem nobis esse ultro fateretur , Filium ejus Christum nobis esse consubstantialiorem negaret , unde Basilii Seleuciæ Isauriæ Episcopus demonstrationem istam in illum intorsit . *Si Mater nobis est consubstantialis , & ipse , quoniam Filius hominis vocatus est . Si ergo Mater ejus consubstantialis est nobis ; & ipse secundum carnem consubstantialis est nobis .*

Probatur 2. ex Epistola S. Flaviani Constantinopolitani Archiepiscopi ad S. Leonem , quæ extat 1. p. Concilii Chalcedonensis , c. 4.

„ Iste Eutyches (inquit) absconditum in se
 „ lan-

„ languorem malæ sectæ retinens , invere-
 „ cunde & impudenter in multos impietatem
 „ propriam præsumpsit inferre , dicens : An-
 „ te inhumanationem quidem Salvatoris no-
 „ stri Jesu Christi duas naturas esse Divinita-
 „ tis & humanitatis : post unionem vero ,
 „ unam naturam factam : neque sciens quod
 „ dicit , neque de quibus affirmat . Adjecit
 „ autem & aliam impietatem , dicens : Cor-
 „ pus Domini , quod ex Maria factum est ,
 „ non esse nostræ substantiæ , neque humanæ
 „ conspersionis : sed humanum quidem illud
 „ vocat , non tamen nobis consubstantiale ,
 „ neque Genetricis ejus , secundum carnem .

Probatur 3. ex Ephesino Latrocinio ; ubi
 cum recitata essent illa Eusebii Dorilæi verba
 ad Eutychem : *Confiteris duas naturas , Do-
 mine Archimandrita , post Incarnationem ; &
 consubstantialem nobis esse dicis Christum secun-
 dum carnem , an non ?* Dixit Prædatoria Sy-
 nodus : *Tolle , incende Eusebium : iste vivus
 ardeat , iste in duo fiat : sicut partitus est , par-
 tiatur .* Deinde cum Dioscorus dixisset : *To-
 lerabilis est vobis iste sermo , post inhumana-
 tionem duas naturas dicere ?* Synodus Præda-
 toria dixit : *Anathema ei qui dixerit .* Idem
 patet ex illis Eutychianorum Episcoporum tu-
 multuariis vocibus , Actione 1. Concilii Chal-
 cedonensis relatis : *In duo separate eos , qui
 dicunt duas naturas . Qui dicunt duas , dividi-
 te , interficite , ejicite .*

Probatur 4. ex S. Leone Epistola 45. ad
 Pul-

Pulcheriam Augustam data ., Sicut (*inquit*)

„ Nestoriana impietas, ita & Eutychiana
„ blasphemia, ab omnium est Catholicorum
„ eliminanda consortio, quia tam impium
„ est, consubstantialem & consempiternam
„ Patri Filii Deitatem, etiam ex utero Vir-
„ ginis Matris partu editam negare corporeo,
„ quam unam in Dei Filio, post Incarnatio-
„ nis Sacramentum, affirmare naturam: ut
„ scilicet aut humanitas ejus refutetur, aut
„ Deitas: cum unitione utriusque essentiae
„ nec altera sit in alteram versa, nec assum-
„ pta in assumente finita.

Et in Epistola ad Flavianum, quæ a Con-
cilio Chalcedonensi approbata est, ait: „

„ Christum, post Resurrectionem, Aposto-
„ lis recentissimæ Passionis signa demonstra-
„ se, ut agnosceretur in eo proprietates divi-
„ næ humanæque naturæ individua permane-
„ re; & ita sciremus Verbum hoc non esse
„ quod carnem, & unum Dei Filium & Ver-
„ bum confiteremur, & carnem. Quo Fidei
„ Sacramento Eutyches iste nimium æstimā-
„ dus est vacuus, qui naturam nostram in-
„ Unigenito Dei, nec per humilitatem mor-
„ talitatis, nec per gloriam resurrectionis
„ agnovit. Nec sententiam B. Joannis Apo-
„ stoli & Evangelistæ expavit, dicentis:
„ Omnis Spiritus qui confitetur Jesum Chri-
„ stum in carne venisse, ex Deo est, & om-
„ nis spiritus, qui solvit Jesum, ex Deo non
„ est, & hic est Antichristus. Quid autem
„ est

„ est solvere Jesum , nisi humanam ab eo le-
 „ parare naturam, & Sacramentum, per quod
 „ unum salvati sumus , impudentissimis eva-
 „ cuare figmentis ?

„ *Et cap. 6.* Cum autem ad interlocutio-
 „ nem examinis vestri Eutyches responderit
 „ dicens : Confiteor ex duabas naturis fuisse
 „ Dominum nostrum ante adunationem ; post
 „ adunationem vero unam naturam confiteor ;
 „ miror tam absurdam , tamque perversam
 „ ejus professionem , nulla judicantium in-
 „ crepatione reprehensam , & sermonem ni-
 „ mis insipientem , nimisque blasphemum ,
 „ ita omissum , quasi nihil quod offenderet ,
 „ esset auditum : cum tam impie duarum na-
 „ turarum ante Incarnationem Unigenitus
 „ Dei Filius fuisse dicatur , quam nefarie ,
 „ postquam Verbum caro factum est , natura
 „ in eo singularis asseritur .

Et in Epistola ad Leonem Augustum : „ Et
 „ Eutyches quoque (*inquit*) eodem percel-
 „ latur anathemate , qui per impios veterum
 „ Hæreticorum volutatus errores , tertium
 „ Apollinaris dogma delegit , ut negata hu-
 „ manæ carnis atque animæ veritate , totum
 „ Dominum nostrum Jesum Christum unius
 „ assereret esse naturæ , tamquam Verbi
 „ Deitas ipsa se in carnem animamque con-
 „ verterit ; & concipi ac nasci , nutrirī & cre-
 „ scere , crucifigi ac mori , sepeliri ac resur-
 „ gere , & ascendere in cælum , & ad Patris
 „ dexteram confedere , divinæ tantum-
 „ „ essen-

„ essentia fuerit , quæ nihil horum in se
 „ sine carnis recipit veritate . . . Unde si ab
 „ Apollinaris perversitate Eutychianus quis-
 „ que desciscit , ne vincatur Deitatem ,
 „ passibilem sentire atque mortalem , & ta-
 „ men Verbi Incarnati , id est , Verbi &
 „ carnis unam audet pronuntiare naturam ,
 „ manifeste in Valentini & Manichæi transit
 „ insaniam , & Mediatorem Dei & hominum
 „ hominem Jesum Christum simulatorie cre-
 „ dit omnia egisse , nec verum in ipso cor-
 „ pus , sed phantasticam corporis speciem o-
 „ culis apparuisse credentium .

Ex quibus evidenter probatur , Eutyche-
 tem non admisisse in Christo unam naturam
 ex duabus in sua integritate manentibus com-
 positam , quemadmodum hominis una dicitur
 natura , licet ex anima & corpore , quæ di-
 versæ quodammodo naturæ sunt , coalescat
 (quod contendit Valquezius .) Sequeretur
 enim S. Leonem , & alios Patres , vel Euty-
 chis errorem non intellexisse , vel rationibus
 nugatoriis , & nihil adversus ipsum conclu-
 dentibus , Catholicæ veritatis causam propu-
 gnasse . Et sane qui Eutychis hæresim ita ex-
 plicat , ipsam ad quæstionem nominis reducit
 totam , ut ille humanam quidem in Christo
 naturam , post Incarnationem , agnoverit ; sed
 non esse nominandam naturam contenderit ,
 quia in illa ineffabili compositione minus præ-
 cipua est .

Probatur 5. ex Gelasio lib. de duabus in
 Chri.

Christo naturis adversus Eutychetem , & Nestorium . , Eutychiani (*inquit*) dicunt unam , esse naturam , idest divinam . *Et rursus* : „ Contra Eutychem , qui unam , id est so- „ lam divinam conatur asserere , humanam „ competenter addentes , ut duas ex quibus „ illud singulare Sacramentum constat , illic „ permanere monstremus . *Et infra* : Sed „ jam diligentius vestigemus , si Eutychiani „ qui se Nestorium refutare prætendunt , & „ propter hunc , Catholicis sensibus unam co- „ nantur subintroducere naturam : (quamvis „ hoc jam manifesta sit ratione destructum .) „ Si non ipsi quodam circuitu , & occultis „ ambagibus , ad eundem Nestorium volen- „ tes nolentesque rediguntur . Dicunt enim : „ Ante adunationem duæ naturæ fuerunt : post „ adunationem , una facta est . *Et infra* : Jam „ vero , si (ut ipsi delirant) adunatione una „ facta natura est ; aut unius abolitio est , „ aut utriusque confusio . , His Gelasii testi- „ moniis refellitur Vasquezii figmentum , Euty- „ chetis hæresim nova plane ratione explicantis .

Probatur 6. ex Vigilio Tapsensi , lib. 2. adversus Nestorium & Eutychetem . , Nunc videamus (*inquit*) quo fuerint Nestorius & „ Eutyches errore decepti . Nestorius duas „ putavit esse personas Eutyches re- „ spiciens unam personam , unam censuit „ esse naturam ; & ob hoc humanam ausus „ est denegare . Et quia est in Christo & na- „ turarum proprietas , & personæ unio , Ne- „ sto-

„ storius proprietatem attendendo naturarum,
 „ a personæ excidit unione , & duos putavit
 „ Christos , unum passibilem , alterum im-
 „ passibilem esse . Et Eutyches unam in-
 „ tuendo personam , a naturarum proprietate
 „ descivit , & ipsam Divinitatem asseruit
 „ passam , &c.

Probatur 7. ex Theodoro *lib. 4. Hæreticarum Fabularum cap. 13.* ubi de Eutyche sic loquitur : *Dicebat , Deum Verbum nihil humanum ex Virgine sumpsisse : sed ipsum immutabiliter conversum , & carnem factum , per Virginem tantummodo transiisse , crucique affixam fuisse incircumscriptam Unigeniti Divinitatem.*

Et in Dialogo *Inconfusus* , Eranistes Euty-
 chianorum causam agens , ait : *Ex duabus na-*
turis dico Christum , duas vero non dico . Et
 cum interrogasset Orthodoxus : *Nempe tu na-*
turæ utriusque propria non fateris ? Respon-
 det Eranistes : *Post unionem haudquaquam .*

Et cum dixisset Orthodoxus : *Doce nos quo-*
modo unam post unionem dicas naturam : an
quod una ex ambabus facta sit ? An quod alte-
ra deleta , altera remanserit ? Respondet Era-
 nistes : *Ego dico mansisse Divinitatem , ab hac*
vero absorptam esse humanitatem . Et statim
 id explicat exemplo maris : *Ut mare mellis*
guttam si accipiat , inquit , statim enim gutta
illa evanescit , aquæ maris permixta .

Probatur 8. ex Liberato , in Breviario Causæ Nestorianæ & Eutychianæ , c. 11. *Eutyches*
inquit , urgente Satana , prædicabat Domi-
num

num nostrum Iesum Christum consubstantiallem nobis non esse secundum carnem, sed de cælo corpus habuisse: rursusque varians dicebat; *Ante adunationem duas in Christo fuisse naturas, post adunationem vero unam factam esse.*

Objicies, Eutychem asseruisse unam carnis & Verbi in Christo esse naturam, & hanc carnem non de B. Virgine sumptam, sed de cælo advectam. At non potuisse dicere unam carnis Verbique naturam, nisi caro in Christo mansisset: Agnovit itaque Eutyches in Christo naturam carnis.

Probatur major ex Vigilio Tapsensi lib. 3. *Quoniam*, inquit, *Eulychiana hæresis in id impietatis prolapsa est errore, ut non solum Verbi & carnis unam credat esse naturam; verum etiam hanc eandem carnem non de sacro Mariæ Virginis corpore assumptam, sed de cælo dicat, juxta infandum Valentini & Marcionis errorem fuisse deductam; ita pertinaciter asserens Verbum carnem factum, ut per Virginem, ac si aqua per fistulam transiisse videatur: non tamen ut de Virgine aliquid quod nostri sit generis, assumpsisse credatur: optimum duxi etiam hanc impietatis partem, Veritatis assertionem destruere.*

Respondeo, Eutychem unam carnis Verbique naturam dixisse, non compositione, quasi carnis integra substantia maneret, sed conversione, vel commixtione. Unde carnis quidem naturam integram agnovit ante unionem, non vero post unionem. Id habere

bemus ex Vigilio lib. 2. ubi sic Eutychianos alloquitur. *Olim opperiebamur, diutius præstolati sumus, unde erroris vestri rivulus originem trahat, & quo discursum faciat, tandem reperimus Eutychianam amarissimam hæresim ex Apollinaris amarissimo fonte derivatam, usque ad cænulentam Arii voraginem turbidis ferri mentibus; quibus in tantum perfidiæ copula jungitur, ut omnia ad Divinitatis copulam referat, quæ Christus secundum dispensationem carnis aut locutus est, aut peregit: dum unam tantummodo Divinitatis contendunt esse naturam. Et post hæc. Vasquezius Vigiliū figmento suo favere gloriatur?*

Objicies secundo Gelasii testimonium lib. de duabus in Christo naturis, ubi Eutychianorum errores referens hæc habet: *Adhuc autem illud adjiciunt, ut sicut ex duabus rebus constat homo; id est, ex anima, & corpore, quamvis utriusque rei sit diversa natura: usus tamen loquendi, singulariter pronuntiet, simul utrumque complectens, ut humanam dicat naturam, non humanas naturas: sic potentiam in Christi mysterio, & unitiōem Divinitatis atque humanitatis unam dici, vel debere, vel posse naturam. At quamvis natura hominis sit una, tamen ex duabus naturis composita dici potest, ex natura scilicet corporis & animæ in sua integritate manentibus. Igitur Eutyches unam agnovit id Christo naturam, per compositionem ex duabus in propria substantia manentibus, non per*
con.

conversionem unius in alteram.

Confirmatur ex Facundo Hermianensi lib. 1. c. ultim. ubi de Eutychanis sic loquitur. *In hoc autem quod putantes unam ex duabus factam esse naturam a fundatissima Patrum auctoritate discedunt, videamus si, quemadmodum fidunt, vel secundum sapientiam Mundi constare illis sua ratio potest. Dicunt igitur: Sicut ex duabus naturis, id est, ex anima & carne una composita est Christi natura: & ideo ex duabus quidem, sed non in duabus naturis Christum confitemur. Compositione igitur, non commixtione, aut confusione, unam in Christo factam esse naturam Eutyches asseruit.*

Respondeo, Eutychianos istud unionis animæ & corporis in una hominis natura exemplum attulisse, ut suum loquendi modum aliqua ratione tuerentur: sed illos ultra progressos, asseruisse non solum unam hoc sensu dici posse naturam, sed ita unam esse ut humana non remaneret. Unde Gelasius ait; *Aliud est, quod usitato loquendi compendio, saepe de qualibet rei parte dicimus, & totum quod est sine dubio profitemur. Aliud cum prorumpit humanæ temeritatis audacia, quæ sic aliquam partem nuncupare contendit, ut quod totum est negare moliatur.*

Idem ex Facundo colligitur asserente, Eutychianos creatricem naturam creatamque confundere. Unde cum ait, ipsos affirmasse Dei Verbi unitatem incommutabiliter simplicem,
cum

cum suscepta humanitate , in unam componi potuisse naturam : ibi compositionis nomen usurpat , quatenus mixtioni etiam convenit : Mixta enim ex naturis eorum quæ miscentur , dicimus composita : quamvis miscibilium naturæ destruantur , & ex iis tertia quædam natura resultet. Duas igitur ante Incarnationem fatebatur naturas Eutyches , sed post Incarnationem , nonnisi unam agnoscebat ex illarum mixtione & confusione resultantem ; sicut quoddam ex utraque temperamentum . Hinc Facundus cap. 5. lib. 1. ait : Jam illud tertium Eutychianis contrarium rectum esse , monstremus , quod Dominum nostrum Jesum Christum confitemur in duabus naturis , idest , in Divinitate atque humanitate perfectum . Hinc etiam lib. 8. cap. 5. hæc verba refert ex Synodica Domni Antiocheni Epistola ad Theodosium : Apollinaris hæresiarchæ impietatem Eutyches Presbyter renovare pertentat , & Apostolicas labefactare doctrinas , mysterii Incarnationis dogma corrumpens , & Divinitatem Unigeniti & humanitatem , unam naturam vocans , commixtionemque , confusionemque asserens factam , & salutarem passionem ipsi incontaminabili Deitati adnectens .

Denique quamvis illa Eutychiani commenti explicandi ratio , qua ex duabus naturis una quædam facta dicebatur , eoque composita , sicut ex anima & corpore hominis natura conflatur , inventa sit ac usurpata ab aliquibus ex Eutychiano grege : qui Catholi-

corum disputationibus irretiti ad ista subtilius enucleanda compulsi sunt: non tamen ab Eutyche ipso stupidi ingenii sene reperta est.

Objicies tertio: Eutyches Verbum incarnatum confessus est. Verbum autem incarnatum non fuisset, si carnis extincta fuisset natura commixtione aut conversione. Igitur Eutyches non asseruit carnem mixtione, aut conversione in Divinitatem desisse, sed integram post unionem manere.

R. Eutychem Incarnationem verbo tenus confessum fuisse: sed adorandum illud mysterium reipsa evertisse, ut passim ipsi exprobrant SS. Patres, ac unus præ omnibus Leo: & duo hac adeo pugnantia propugnasse, Verbum scilicet fuisse Incarnatum, & in eo carnis non fuisse naturam post unionem. Quod mirum Vasquezio videri non debet, cujus objecto male supponit Hæresiarcham illum consequenter locutum & aliqua saltem rationis specie commenta sua obduxisse, cum ejus imperitiam, & vecordiam S. Leo passim sugillet. Audire præstat, quæ de ipso scribit in celeberrima ad Flavianum Epistola: *Eutyches, inquit, qui Presbyterii nomine honorabilis videbatur, multum imprudens, & nimis imperitus ostenditur, ut etiam de ipso dictum sit a Propheta: Noluit intelligere ut bene ageret; iniquitatem meditatus est in cubili suo. Quid autem iniquius, quam impia sapere, & sapientioribus, doctioribusque non cedere? Sed in hanc insipientiam*

tiam cadunt , qui cum ad cognoscendam veritatem aliquo impediuntur obscuro ; non ad Propheticas voces , non ad Apostolicas litteras , nec ad Evangelicas auctoritates , sed ad semetipsos recurrunt : & ideo Magistri erroris existunt , quia veritatis discipuli non fuere . Quam enim eruditionem de sacris novi & veteris Testamenti paginis acquisivit , qui ne ipsius quidem Symboli initia comprehendit ? Et quod per totum mundum omnium regenerandorum voce depromitur , istius adhuc senis corde non capitur .

Denique Eutychem humanitatis in Christo veritatem negasse , adeoque Incarnationis evertisse mysterium , constat ex Gennadio in appendice ad librum S. Augustini de Hæresibus : *Humanitatis* , inquit , *in Christo dene-gans veritatem* , quidquid a Verbo nostræ proprietatis receptum est divinæ tantummodo ad-scribit essentiæ , ut Sacramentum salutis humanæ , quod nonnisi in utraque substantia est , nostram in Christo naturam negando dissolveret insulsa impietate , non inspiciens universo corpori auferri , quod capiti defuisset .

*Producuntur Argumenta , quibus
Hæresis Eutychiana re-
fellitur .*

- I. **H** Anc Hæresim confodiunt Scripturæ Sacræ loca plurima , scilicet cap. 1. S. Evangelistæ Joannis , in quo duplex Verbi

bi divini Nativitas diserte exprimitur æterna ex Patre , his verbis : *In principio erat Verbum , & Verbum erat apud Deum , & Deus erat Verbum .* Temporalis ex matre , his verbis : *Et Verbum caro factum est .* Duplex autem Nativitas naturam probat duplicem . Idem probat ille locus 1. Joannis 5. *Quod fuit ab initio , quod audivimus , quod vidimus oculis nostris , quod perspeximus , & manus nostræ contrectaverunt de Verbo vitæ : Et vita manifestata est , & vidimus , & testamur , & annuntiamus vobis vitam æternam , quæ erat apud Patrem , & apparuit nobis .* Certe Verbum nisi in assumpta carne tractari non potest . Duplicem pariter Filii Dei naturam Apostolus ad Romanos 1. indicat , ita scribens : *De Filio suo , qui factus est ei ex semine David secundum carnem : qui prædestinatus est Filius Dei in virtute .* Et cap. 9. ubi de populi Judaici prærogativa loquens ait : *Quorum Patres , & ex quibus est Christus ; qui est super omnia benedictus Deus in sæcula .* Et ad Philippenses 11. *Qui cum in forma Dei esset , non rapinam arbitratus est esse se æqualem Deo : sed semetipsum exinaniavit , formam servi accipiens , & habitu inventus ut homo .* Ibi formam pro natura sumi , perspicuum est .

II. Eam Hæresim Conciliorum definitiones elidunt . Symbolum Nicænum , quod asserta Filii Divinitate , mox de suscepta hominis natura subjicit : *Qui propter nos homines , & propter nostram salutem descendit ,*

E

& in

& incarnatus est, & homo factus est, passus est. Chalcedonense Concilium in definitione Fidei pronuntiat, Christum Dominum nostrum, eundem perfectum in Deitate, & eundem perfectum in humanitate, Deum verum, & hominem verum, eundem ex anima rationali & corpore: consubstantialem Patri secundum Deitatem, consubstantialem nobis secundum humanitatem: ante sæcula quidem de Patre genitum secundum Deitatem: in novissimis autem diebus eundem propter nos, & propter nostram salutem, ex Maria Virgine Dei genitrice, secundum humanitatem, unum eundemque Christum, Filium, Dominum Dni. genitum, duabus naturis inconfuse, immutabiliter, indivise, inseparabiliter agnoscendum. Nusquam sublata differentia naturarum propter unionem, magisque salva proprietate utriusque naturæ, & in unam personam atque subsistentiam concurrente.

Synodus 5. Oecumenica cap. 7. & 8. anathemate confodit eos, qui duas in Christo manentes naturas confessi non fuerint. Legatur Concilii Hispalensis II. Canon 13. quo duarum naturarum Fides contra Acephalos diserte asseritur.

III. SS. Patres Concilio Chalcedonensi antiquiores Eutychianam Hæresim prædam. narunt, & Catholicæ Fidei dogma de duabus in Christo manentibus naturis docuerunt.

S. Ignatius in Epistola ad Ephesios: „ U. „ nus (inquit) Medicus est, carnalis, &
„ spi.

„ spiritualis , factus , & non factus ; in ho-
 „ mine Deus , in morte vita æterna ; ex Ma-
 „ ria , & ex Deo : primum passibilis , &
 „ tunc impassibilis , Dominus noster Jesus
 „ Christus .

S. Justinus Martyr in Apologia 2. „ Prin-
 „ ceptum autem virtutis post Patrem omnium &
 „ Dominus ac Filius , est Verbum : quod
 „ quemadmodum incarnatum homo factum
 „ sit , dicemus postea .

S. Iræneus lib. 5. cap. 14. „ Si non haberet
 „ caro salvari , nequaquam Verbum Dei ca-
 „ ro factum esset : & si non haberet sanguis
 „ Iustorum inquiri , nequaquam sanguinem
 „ habuisset Dominus .

Origenes Homilia 1. in Ezechielem . „
 „ Respondeant mihi Hæretici , qui nativita-
 „ tem illius ut phantasma eludunt : Quare
 „ Christus Filius hominis appellatur ? Ego
 „ affirmo Filium hominis ipsum fuisse , nam
 „ qui passiones assumpsit humanas , necesse
 „ est ut ante passionem suscepit nativita-
 „ tem .

S. Dionysius Alexandrinus in Epistola Sy-
 „ nodica ad Paulum Samosatenum . „ Deus ap-
 „ paruit in carne , factus ex muliere ; qui
 „ ex Deo Patre natus est ex utero ante Lu-
 „ ciferum , tamquam ex corde Verbum , edi-
 „ tum ex Patre ; & simplex atque impartibi-
 „ le Verbum caro factum est .

Antiochenæ Synodi contra Paulum Samo-
 „ satenum celebratæ Patres in Epistola ad eum

scripta . „ Idcirco corpus ex Maria natum ,
 „ cum totam Divinitatis plenitudinem ce-
 „ pisset , corporaliter Divinitati , sine con-
 „ versione , unitum est , & deificatum .

S. Hippolytus Martyr in Oratione de di-
 stributione talentorum, *Hæreticos impugnatur* . „
 „ Qui vel nudum hominem confitentur ap-
 „ paruisse Christum in vita , Divinitatis ejus
 „ talentum negantes : vel Deum confiten-
 „ tes , hominem rursus negant , docentes
 „ eum fallaci specie spectantium oculis illu-
 „ sisse velut hominem , cum hominem non
 „ gestaverit , sed inane potius spectrum fue-
 „ rit , sicut Marcion , & Valentinus , &
 „ Gnostici , Verbum a carne divellentes ,
 „ talentum unum , hoc est , Incarnationem
 „ objiciunt . „ Idud & alia plura ejusdem
 sanctissimi Episcopi & Martyris testimonia
 contra Eutyckianos profert Theodoretus Dia-
 logo 11. pag. 88. & 89.

S. Athanasius in Epistola ad Epictetum . „
 „ Audiant quod si creatura erat Verbum ,
 „ non assumpsisset creatura corpus , ut illud
 „ vivificaret . Quodnam enim Creatori a
 „ creatura auxilium esse potest , quæ ipsa
 „ quibque auxilio indiget ? Sed quia Ver-
 „ bum cum esset Creator , ipse creaturarum
 „ conditor fuit , ideo in consummatione sæ-
 „ culorum creaturam ipse sibi adjunxit ut
 „ eam tamquam conditor renovaret ac re-
 „ crearet . *Ibidem* : Quomodo autem vel
 „ dubitare ausi sunt , qui dicuntur Christia-
 „ ni ,

„ ni, si Dominus qui ex Maria processit,
 „ Filius quidem de substantia naturæ Dei est;
 „ quod autem secundum carnem, ex semi-
 „ ne David est & carne Sanctæ Mariæ. „
 Plura alia S. Athanasii testimonia profert
 Theodoretus *Dialogo* 11. ad dogma de du-
 bus Christi naturis confirmandum.

S. Basilius a Leone laudatus in Epistola ad
 Leonem Augustum. „ Cum ergo quædam
 „ in Christo ita videmus humana, ut nihil a
 „ communi mortalium fragilitate distare vi-
 „ deantur; quædam ita divina, quæ nulli
 „ alii, nisi illi ineffabili naturæ convenient
 „ Deitatis: hæret humani intellectus angus-
 „ tia, & quo se convertat, ignorat. Si ho-
 „ minem putet, devicto mortis regno cum
 „ spoliis redeuntem a mortuis cernit. Pro-
 „ pter quod cum omni metu & reverentia
 „ contemplandum est, ut in uno eodemque
 „ ita utriusque naturæ veritas demonstretur,
 „ ut neque aliquid indignum & indecens de
 „ divina illa & ineffabili substantia sentiatur:
 „ neque rursus, quæ humanitus gesta sunt,
 „ falsis illusa imaginibus æstimentur. „ Alia
 S. Basilii loca laudat Theodoretus *Dialo-
 go* 11.

S. Gregorius Nazianzenus in Epistola ad
 Cledonium: „ Naturæ quidem duæ Deus &
 „ homo, quia & anima & corpus: Filii ve-
 „ ro nequaquam duo. Neque enim hîc duo
 „ sunt homines; etiam si Paulus sic loquitur,
 „ cum appellat interiorem hominem & ex-

„ teriorem . At ut summatim dicam ; aliud
 „ quidem & aliud sunt ea ex quibus Salva-
 „ tor ; quia non idem est visibile cum invi-
 „ sibili , & temporis expers cum tempora-
 „ neo . Non est tamen alius & alius , absit .
 „ *Et in oratione in Theophania :* Cum ergo
 „ processisset ex Virgine Deus , in ea , quam
 „ assumpserat , humana natura , unum e-
 „ duobus sibi invicem contrariis existens ,
 „ carne & spiritu , aliud in Deum assumi-
 „ tur , aliud Deitatis gratia Missus est
 „ quidem , sed ut homo . Duplex enim erat
 „ in eo natura . Inde denique & laboravit ex
 „ itinere , inde & esuriit , & sitivit , & con-
 „ tristatus est , & flevit , humani corporis
 „ lege . „ Alia ejusdem Patris testimonia
 profert Theodoretus , *Dialogo* 11 .

S. Gregorius Nyssenus in *Oratione ad Euno-
 mium* , a Theodoreto laudata ibidem , ex-
 plicans illa verba Actorum 2. *Dextera Dei
 exaltatus* , ait : *Quis ergo exaltatus est , hu-
 milisne , an Altissimus ? Quid est autem humi-
 le , nisi humanitas ? Quid aliud præter Deum
 est Altissimus ? Atqui Deus exaltatione non
 indiget , cum sit altissimus . Humanam igitur
 naturam exaltatam fuisse dicit Apostolus : e-
 xaltatam vero , eo quod Dominus & Christus
 facta sit . Alia ejusdem testimonia Theodo-
 retus ibidem profert . His suffragatur Amphi-
 lochius Iconii Episcopus , cujus insignia te-
 stimonia ibidem legere potes .*

Theophilus Alexandrinus in *Epistola Pa-
 scha-*

schali contra Origenem ; *Unus Filius Patris, nostrique Mediator, nec aequalitatem ejus amisit, nec a nostro consortio separatus est: invisibilis Deus, & visibilis homo forma servi absconditus & Dominus gloriae confessione credentium comprobatus. Neque enim privavit eum Pater naturæ suæ nomine, postquam pro nobis homo, & pauper effectus est, nec in Jordane fluvio baptizatum altero appellavit vocabulo, sed Filium unigenitum: Tu es Filius meus dilectus, Nec similitudo nostra in Divinitatis est mutata naturam, nec Divinitas in nostræ naturæ versa est similitudinem. Aliæ ejusdem testimonia referunt Theodoretus Dialogo 12. & S. Leo in Epistola ad Leonem Augustum.*

S. Cyrillus Hierosolymitanus Catechesi 4. Si phantasia esset incarnatio, spectrum quoque esset salus. Duplicis naturæ fuit Christus: homo quidem, quod videbatur; Deus autem, quod non apparebat: comedens quidem ut homo vere, sicut nos, habebat enim carnis similes nobis affectiones: quinque autem panibus quinque millia pascens ut Deus: dormiens in navi ut homo, & ambulans per aquas ut Deus.

S. Joannes Chrysostomus in Homilia de Ascensione Domini: Nam sicut duobus jurgio separatis unus in medio positus altercantium litem discordiamque dissolvit: ita & Christus nobis fecit. Deus nobis juste irascebatur, & nos contemnebamus iratum, & clementem.

Dominum declinabamus : & se medium Christus ingessit , & sociavit utramque naturam , & nobis quod imminebat a Patre supplicium , ipse sustinuit , Alia ejusdem testimonia legi possunt apud Theodoretum *Dialogo 2.* & apud S. Leonem in Epistola ad Leonem Augustum .

S. Cyrillus Alexandrinus in Epistola ad Nestorium . „ Non enim dicimus quod Dei natura conversa vel immutata , facta sit caro ; nec quod in totum hominem , qui est „ ex anima & corpore , transformata sit ; sed „ illud magis , quod carnem animatam anima rationalis sibi copulaverit , Verbum substantialiter , & ineffabiliter factus sit homo , & nuncupatus sit etiam filius hominis , non nuda tantummodo voluntate , sed „ nec assumptione sola personæ ; sed quod „ diversæ quidem naturæ in unum convenirent , unus tamen ex ambabus Christus & „ Filius , non evacuata aut sublata diversitate naturarum per conjunctionem , sed quia „ simul nobis effecerunt unum Dominum , & „ Christum , & Filium , id est , Divinitas & „ humanitas , per arcanam illam ineffabilem „ que copulationem ad unitatem . *Et infra :* „ Ita Christum unum & Dominum confitemur , non tamquam hominem cum Verbo „ coadorantes , ne divisionis quædam species inducatur ; sed unum jam & eundem „ adorantes : quia non est alienum a Verbo „ corpus suum , cum quo ipsi etiam assidet „ Pa-

„ Patri . „ Alia ejusdem Sanctissimi Docto-
ris testimonia lege apud S. Leonem & Theo-
doretum locis laudatis .

S. Hilarius lib. 9. de Trinitate . „ Nescit
„ plane , vitam suam nescit , qui Jesum
„ Christum ut verum Deum , ita & verum
„ hominem ignorat : & ejusdem periculi res
„ est , Christum Jesum vel Spiritum Deum ,
„ vel carnem nostri corporis denegare
„ Mediator ipse in se ad salutem Ecclesiæ
„ constitutus , ipso illo inter Deum & homi-
„ nes Mediatoris Sacramento utrumque unus
„ existens , dum ipse ex unitis in idipsum
„ naturis , naturæ utriusque res eadem est :
„ ita tamen ut neutro careret in utroque ne
„ forte Deus esse homo nascendo desineret ,
„ & homo rursus Deus manendo non esset .
„ Hæc itaque humanæ beatitudinis Fides ve-
„ ra est , Deum & hominem prædicare , ver-
„ bum & carnem confiteri : Neque Deum
„ nescire , quod homo sit , neque carnem
„ ignorare , quod Verbum sit . „ Alia ejus-
dem Patris insignia testimonia legantur apud
Theodoretum & S. Leonem locis laudatis .

Idem dogma Fidei asserunt S. Hieronymus
in Matthæi cap. ult. Rufinus in Symbolum ,
S. Paulinus Epist. 4. & 24.

S. Ambrosius lib. 2. de Fide ad Gratia-
num . „ Sileant igitur inanes de sermopibus
„ quæstiones , quia regnum Dei , sicut scri-
„ ptum est , non in persuasione verbi est , sed
„ in ostensione virtutis : servemus distinctio-

„ nem Divinitatis & carnis . Unus in utro-
 „ que loquitur Dei Filius , quia in eodem ,
 „ utraque natura est . Et si idem loquitur ,
 „ non uno semper loquitur modo . Intende
 „ in eo nunc gloriam Dei , nunc hominis
 „ passiones . Quasi Deus loquitur quæ sunt
 „ divina , quia Verbum est : quasi homo di-
 „ cit quæ sunt humana , quia in mea substan-
 „ tia loquitur .

Et lib. *de Incarnatione Domini* contra Apol-
 linearistas . „ Sed dum hos redarguimus , e-
 „ mergunt alii , qui carnem Domini dicant
 „ & Divinitatem unius esse naturæ . Quæ
 „ tantum sacrilegium inferna vomuerunt ?
 „ Jam tolerabiliore sunt Ariani , quorum
 „ per istos perfidiæ robur adolescit , ut ma-
 „ jore contentione asserant Patrem , & Fi-
 „ lium , & Spiritum Sanctum , unius non
 „ esse substantiæ , quia isti Divinitatem Do-
 „ mini & carnem substantiæ unius dicere
 „ tentaverunt . „ Plura alia non minus lucu-
 lenta S. Ambrosii testimonia Theodoretus &
 S. Leo contra Eutychianos proferunt , locis
 laudatis .

S. Augustinus in Epistola ad Volusianum .
Nunc vero ita inter Deum & homines Media-
tor apparuit , ut in unitate personæ copulans
utramque naturam , & solita sublimaret inso-
litis ; & insolita solitis temperaret .

Leporius in Libello Emendationis , quem
 sub nomine S. Augustini Theodoretus &
 S. Leo laudant . „ Confitemur Dominum ac
 „ Deum

„ Deum nostrum Jesum Christum , unicum
 „ Filium Dei , qui ante sæcula natus ex Pa-
 „ tre est , novissimo tempore de Spiritu S. &
 „ Maria semper Virgine factum , hominem
 „ Deum natum: & confitentes utramque sub-
 „ stantiam carnis & Verbi , unum eundem-
 „ que Deum atque hominem pia Fidei cre-
 „ dulitate suscipimus: & ex tempore susce-
 „ ptæ carnis , sic omnia dicimus , quæ erant
 „ Dei , transisse in hominem , ut omnia quæ
 „ erant hominis in Deum venirent; & hac in-
 „ telligentia Verbum factum sit caro , non ut
 „ conversione , aut mutabilitate aliqua cœ-
 „ perit esse quod non erat; sed ut potentia
 „ divinæ dispensationis Verbum Patris, num-
 „ quam a Patre discedens , homo proprie
 „ fieri dignaretur; incarnatusque sit Unigeni-
 „ tus secreto illo mysterio , quod ipse novit .
 „ Novit enim sine sui corruptione misceri .
 „ Absit ita credere , ut constatili quodam ge-
 „ nere duas naturas in unam arbitremur reda-
 „ ctas esse substantiam . Hujusmodi enim
 „ commixtio , partis utriusque corruptio est .
 „ Nascitur ergo nobis proprie de Spiritu
 „ Sancto , & Maria semper Virgine Deus
 „ homo Jesus Christus Filius Dei , ac sic in
 „ alterutrum unum sit Verbum & caro , ut
 „ manente in sua perfectione naturaliter ut-
 „ traque substantia , sine sui præjudicio , &
 „ humanitati divina communicent ; & Divi-
 „ nitati humana participant ; nec alter Deus,
 „ alter homo; sed idem ipse Deus , qui &

„ homo , & vicissim homo , qui & Deus Je-
 „ sus Christus , unus Dei Filius & nuncupe-
 „ tur , & vere sit .

Ejusdem Catholici dogmatis de duabus
 Christi naturis in unam personam convenien-
 tibus , & post unionem sine ulla confusione
 remanentibus , Fidem confirmant Capreolus
 Carthaginensis in *Epistola ad Vitalem & Con-*
stantium , & Cassianus passim in *Opere de*
Incarnatione , & præsertim *lib. 3. cap. 5.*

S. Leonem appellasse satis est , qui Chalce-
 donense Concilium in causa Fidei confirma-
 vit & duarum in Christo naturarum confes-
 sionem scriptis doctissimis exposuit . Ex variis
 ejus Epistolis & Sermonibus , illam tantum
 laudo celeberrimam Epistolam ad Flavianum ,
 quæ a Synodo Chalcedonensi , ut diximus , ap-
 probata est . Unum ex ea locum proferre sit
 satis . „ Salva igitur proprietate utriusque
 „ naturæ & substantiæ (*inquit*) & in unam
 „ coeunte personam , suscepta est a majesta-
 „ te humilitas , a virtute infirmitas , ab æter-
 „ nitate mortalitas : & ad resolvendum con-
 „ ditionis nostræ debitum , natura inviolabi-
 „ lis naturæ est unita passibili : ut quod nostris
 „ remediis congruebat , unus atque idem
 „ Mediator Dei & hominum , homo Jesus
 „ Christus , & mori posset ex uno , & mori
 „ non posset ex altero . In integra ergo veri
 „ hominis perfectæque natura verus natus est
 „ Deus , totus in suis , totus in nostris . No-
 „ stra autem dicimus , quæ in nobis ab initio
 „ Crea-

„ Creator condidit, & quæ reparanda suscepit .

„ *Et infra* : Sicut Deus non mutatur miseratione , ita homo non consumitur dignitate . Agit enim utraque forma cum alterius communione quod proprium est ; Verbo scilicet operante quod Verbi est , & carne exequente quod carnis est . Unum horum coruscat miraculis , aliud succumbit injuriis ,

IV. Multiplici ratione ex Incarnationis Dominicæ veritate petita Eutychianos impugnarunt SS. Patres . Primam ex ipsa unitionis voce arcessiverunt . *Unitio enim est duarum naturarum ; non cujuslibet alterius abolitio* (inquit Gelasius *lib. contra Eutychem*) Unitio autem Verbi cum carne ex hoc Scripturæ Sacræ oraculo habetur ; *Verbum Caro factum est* .

Secunda ratio hæc est . Si ex duabus naturis unica in Christo facta esset , nec humana illa esset , nec divina ; adeoque Christus nec Deus esset nec homo ; nec Patri , nec Matri consubstantialis . Sic ratiocinatur Leontius apud Euthymium in *Panoplia* part. 2. tit. 15. „ Simplex natura compositæ naturæ non consubstantialis . Quare si simplex natura „ Patris est , Filii vero composita , non erit „ consubstantialis Patris natura naturæ Filii , „ Atqui consubstantialem Patri Christum , & „ eundem nobis consubstantialem profiteri „ se simulant . Dicant igitur an fieri possit , „ ut una & composita natura Christi ex toto „ sit

„ sit Patri consubstantialis , & sit eadem tota
„ nobis : & an non istud ad eandem nos cum
„ Patre substantiam evehat .

Tertia ratio hæc est, quod nec Divinitas in
carnem mutari potuerit , nec humana in
Deitatem transire natura . Ita ratiocinatur .
Geladius : „ Etenim si aliquid , quod absit ,
„ vel Divinitatis , vel humanitatis inde de-
„ cesserit , sequitur ineffabilis resolutio Sa-
„ cramenti ; & quod dictu audituque fugien-
„ dum est , vel homo Deus esse jam desinat ,
„ si sola illic humanitas , non etiam Deitas
„ perseverat : vel Deus homo consequenter
„ esse desistat , si sola illic Divinitas , non
„ etiam humanitas unita permaneat . Nec
„ glorificata videatur nostra conditio unitio-
„ ne Deitatis , sed potius esse consumpta , si
„ non eadem subsistit in gloria ; sed sola exi-
„ stente Deitate , humanitas illic esse jam
„ destitit . Videtur autem Divinitas in utro-
„ que mutabilis , si vel in carnem est ipsa
„ conversa ; vel sic est in Deitatem humani-
„ tatis transfusa conditio , ut proprietas ejus
„ esse desierit . Si enim ex seipsa ex toto
„ jam non est , restat ut accesserit , accreve-
„ ritque Deitati , sic in Deitatis naturam
„ transeundo , ut esse destiterit prorsus huma-
„ nitas : ubi modis omnibus divina substantia
„ mutabilitatem recipere judicetur ; quæ cum
„ nec minui possit omnino , nec crescere , tran-
„ sfusionem humanitatis adjectæ velut aucta
„ videatur .

Quar-

Quarta ratio hæc est, quod naturæ uni simpliciter contrariæ proprietates non conveniunt; cuiusmodi insunt Christo Domino. Ita Ephraemius, in Bibliotheca Photii, Cod. 229. *Si in contrariis proprietatibus horum utriusvis natura spectatur, carnis, inquam, & Divinitatis, quinam duæ sunt una natura?* Quod ratiocinium laudat ex S. Gregorio Nysseno adversus Apollinarem scribente.

Obiciebant Eutychiani effatum illud evangelicum: *Verbum caro factum est*: & ex eo Verbum in carnem conversum, vel carnem ipsam a Verbo fuisse consumptam colligebant.

Respondent SS. Patres, Verbum carnem factum esse, non conversione in carnem, non commixtione, & confusione; sed unitione & assumptione; sicut Christus in Scriptura, dicitur factus pro nobis maledictum & peccatum, quia maledictum in se suscepit, & peccata nostra pertulit non quod in execrationem & peccatum sit conversus. Ita locum illum ex S. Athanasio explicat Theodoretus, *Dialogo* 11. Ita S. Gregorius Nazianzenus in Epistola ad Cledonium. Ita S. Ambrosius lib. de Incarnatione, cap. 6. *Desinat, inquit, dicere naturam Verbi in corporis naturam esse mutatam; ne pari interpretatione videatur natura Verbi in in contagium mutata peccati.*

Addunt Patres, cavisse Spiritus Sancti providentiam, ne verba illa Sancti Joannis mixtionis confusionisque falsam quamdam speciem imperitorum animis ingererent, subie-

ctis

Ais illis vocibus , *Et habitavit in nobis* . Ita
 S. Chrysostomus Homilia 11. in Joannem .
 „ Ut intelligas (*inquit*) ob id unum scriptum
 „ esse , Factum est , ne apparentem speciem
 „ suspiceris , audi ut in sequentibus orationem
 „ suam repurgat , ac pravam illam suspicio-
 „ nem evertit . Quid enim subjicit ? Et ha-
 „ bitavit in nobis , tamquam sic te alloquere-
 „ tur : Vide ne quid absurdi suspiceris ex il-
 „ la voce Factum est . Non enim mutationem
 „ illa immutabilis illius naturæ significat :
 „ sed habitationem & commorationem . Por-
 „ ro id quod habitat , non est idem cum eo
 „ quod habitatur , sed diversum . Non alte-
 „ rum habitat in altero , alioqui non esset
 „ habitatio . Nihil enim in seipso habitat .
 „ Ceterum alterum dixi substantia . Quippe
 „ unitione & copulatione unum est Deus
 „ Verbum & caro : ita ut non confusio , vel
 „ extinctio ulla substantiarum acciderit : sed
 „ inexplicabilis quædam & omnem dicendi
 „ facultatem superans unitio ,

Verbum ita carnem factum esse ut ne levissi-
 ma quidem perstringeretur mutationis aura ,
 eleganti exemplo S. Augustinus explicat
 Sermone 23. de Tempore . „ Nemo ergo cre-
 „ dat Dei Filium coæternum & coæqualem
 „ conversum & commutatum esse in hominis
 „ Filium : sed potius credamus , & non con-
 „ sumpta divina , & perfecte assumpta huma-
 „ na substantia , manentem Dei Filium , fa-
 „ ctum hominis filium . Neque enim quia
 „ di-

„ dictum est. Deus erat Verbum, & Ver-
 „ bum caro factum est; sic Verbum caro fa-
 „ ctum est, ut esse desineret Deus, quando
 „ in ipsa carne, quod Verbum caro factum
 „ est Emmanuel natum est, nobiscum Deus.
 „ Sicut verbum quod corde gestamus, fit vox,
 „ cum id ore proferimus; non tamen illud in
 „ hanc commutatur, sed illo integro ista in
 „ qua procedat, assumitur, ut & intus ma-
 „ neat quod intelligatur, & foris sonet quod
 „ audiatur: hoc idem tamen profertur in so-
 „ no quod ante sonuerat in silentio; atque ita
 „ verbum cum fit vox, non mutatur in vo-
 „ cem, sed manens in mentis luce & assum-
 „ pta carnis voce, procedit ad audientem,
 „ & non deserit cogitantem.

Obiciebant Eutychiani auctoritatem Julii
 Romani Episcopi duarum naturarum profes-
 sionem convellentis in Epistola ad Dionisium
 Corinthiorum Episcopum his verbis: *Necesse*
est eos, cum duas naturas dicunt, unam adora-
re, alteram non adorare; ac in divinam quidem
baptizari; in humanam vero non baptizari.

Respondet Leontius *lib. de Sedis Actione 8.*
 Illam Epistolam non esse Julii Romani Epi-
 scopi; quod ex multis evincit. Primo, quia
 „ Si quis eam subtiliter consideret, nihil Ju-
 „ lii nomine dignum habeat. Deinde quod
 „ in eadem Epistola, corporis mentione fa-
 „ cta, nusquam id mente præditum, vel ani-
 „ matum dixerit. Erat autem in more Pa-
 „ trum illius sæculi, ut sicubi corporis men-
 „ tio-

„ tionem facerent , idipsum mente prædi-
 „ tum , animatumque dicerent . Quod qui-
 „ dem usque adeo verum est , ut reformidan-
 „ tibus eis hoc crimen , ideoque deinceps
 „ illas voces , mente præditum , & anima-
 „ tum adjicientibus , nulli posteriorum libri
 „ reperiantur , qui hanc Veterum appendi-
 „ cem non habeant . Præterea inde etiam
 „ non B. Julii , sed Apollinaris esse demon-
 „ stratur , quod Nyssenus ille Gregorius in
 „ Opere contra Apollinarem , aperte multa
 „ recitet , quæ hac Epistola continentur , ea-
 „ que velut prava refutet . Potest & aliunde
 „ convinci quod B. Julii non sit . Ajunt enim
 „ Actis Synodi Ephesinæ sub B. Cyrillo in-
 „ sertam : quod quidem aperte mentiuntur .
 „ Nam ibi nihil tale in textu reperitur : sed
 „ alia quædam inserta est Epistola velut a Ju-
 „ lio scripta , nec ipsa Julii , sed Timothei
 „ (*Apollinaristæ*) quemadmodum de multis
 „ exemplaribus intelligi potest .

Et in alio Fragmento adversus Apollinari-
 stas Patrum depravatores ; „ Quidam (inquit)
 „ ex hæresi Apollinaris , vel Eutychis , vel
 „ Dioscori , cum vellent suam hæresim con-
 „ firmare , quasdam Orationes Apollinaris
 „ Gregorio Thaumaturgo , aut Athanasio ,
 „ aut Julio inscripserunt , ut simpliciores fal-
 „ lerent Et apud multos ex recte creden-
 „ tibus , reperire poteris librum Apollinaris
 „ cui titulus , Fides particularis , inscriptum
 „ Gregorio , & quasdam ejus Epistolas inscri-
 „ ptas

„ ptas Julio, &c. „ Perperam vero Gennadius
in Catalogo Virorum Illustrum, laudatam Epi-
 stolam Julio tribuit.

Secundo responderunt Patres, si hæc Epi-
 stola Julii esset, par esse credere, ipsum
 naturæ nomen pro persona usurpasse, cum
 duas in Christo negavit esse naturas. Ita
 Eulogius Alexandrinus Patriarcha apud
 Photium Codice 230. „ Si vero quis con-
 „ tendat Julium in Christo unam naturam
 „ dicere: Primum quidem numquam clarum
 „ si genuinus hic sermo. Secundum par est
 „ cognoscere, ut posterius Julio apud Roma-
 „ nos, naturæ & hypostaseos studiose nomen
 „ indicavit, & frustra hæretica zizania semen
 „ ibidem student suffocare. In indicatis enim
 „ vocibus manentibus non obviam ivit impie-
 „ tas, potius valde consequens, pro hypō-
 „ staseos, voce naturæ uti.

Objiciebant Eutychiani S. Cyrilli Alexan-
 drini auctoritatem, dicentis, Post adunatio-
 nem non esse duas naturas, sed *Unam naturam*
Verbi incarnatam, vel unam naturam Filii
 Incarnati, quod & Sanctus Athanasius ante
 Cyrillum scripsit. Cyrilli sententia legitur in
 ejus Epistola ad Acacium Melitinensem.
 „ Quamobrem (inquit) dum ea, ex quibus
 „ unus est, & solus Filius ac Dominus Jesus
 „ Christus, cogitatione, intelligentiaque con-
 „ cipimus, naturas duas unitas esse dicimus;
 „ post unionem vero, tamquam sublata jam
 „ in duo partitione, unam esse credimus Fi-

„ *lii naturam; verum inhumanati & incarna-*
 „ *ti. Et in Epistola 1. ad Successum. Post*
 „ *unionem (inquit) non dividimus naturas*
 „ *a se mutuo, neque in duos secamus filios*
 „ *illum, qui unus est & individuus. Sed unum*
 „ *dicimus Filium, & quemadmodum locu-*
 „ *ti sunt Patres, unam naturam Dei Verbi*
 „ *incarnatam.*

Respondetur, hanc loquendi formulam a S. Cyrillo usurpatam, Eutychianis minime favere. immo aptissimam esse ad Eutychetis ac Nestorii confodiendas hæreses. Cum enim *Unam* dicit *naturam Verbi*, personæ in Christo significatur; *φύσις* enim vocabulum, pro natura usurpat ibi S. Cyrillus, & naturas post unionem divisas esse negat, sive separatim subsistentes, ut Nestorius contendebat: cum autem addit, *Incarnatam*, significat carnem unitam esse hypostatice Verbo, adeoque a Verbo distinctam, quo loquendi modo perimitur Eutychianus error confusionem asserens naturarum. Præstat audire S. Cyrillum, qui in 2. ad Successum Epistola, calumniam omnem a suis illis vocibus amolitur. „ Si „ enim (inquit) unam naturam dicentes, „ Verbi Dei tacuissimus, non inferentes in- „ carnatam, sed velut abicientes dispensa- „ tionem, erat illis forsitan non improbabili- „ lis sermo simulantibus interrogare; Ubi „ est in humanitate perfectio, aut quomodo „ substantia nostra subsistit? Quoniam vero, „ & perfectio quæ in humanitate est, & es- „ sen-

„ sentię nostrę manifestatio, illata est per
 „ id quod dictum est, Incarnati, jam desi-
 „ nant, arundineam virgam sibi supponen-
 „ tes.

Hanc quoque S. Cyrilli sententiam ad Euty-
 chianos refellendos valere plurimum osten-
 dunt Gelasius lib. contra Eutychem, S. Ma-
 ximus Martyr in Tractatu, *De Expositione*
vocum quarundam, quibus utitur Ecclesia,
cum de Christo agitur: Eulogius Alexandri-
 nus Patriarcha apud Photium Cod. 230. &
 Ephræmius Antiochenus apud eundem Co-
 dice 29. quorum testimonia descripta sunt su-
 perius.

Joannes Maxentius in libro contra Acepha-
 los, eandem loquendi formulam ab errore
 vindicat his verbis. „ At si voluerint dice-
 „ re, Verbum Incarnatum, sive unam na-
 „ turam Dei Verbi Incarnatam, eo ipso quo
 „ hoc dicunt, duas proculdubio dicere con-
 „ vincuntur in Christo naturas, duarumque,
 „ non unius nomina naturarum, ejus videlicet
 „ qui incarnatus est, id est, Verbi Dei; &
 „ ejus quæ ab ipso assumpta est; id est, car-
 „ nis Quemadmodum si dicatur anima
 „ incarnata, sive una natura animæ incarna-
 „ tæ, *duæ naturæ diversæ significantur, in*
 „ *quibus homo subsistit. Et Anathematismo*
 „ 1. Si quis non confitetur in Domino nostro
 „ Jesu Christo duas naturas unitas, hoc est,
 „ Divinitatis & humanitatis; ac sic unam na-
 „ turam Dei Verbi incarnatam, sicut duas
 „ uni-

„ unitas in una substantia atque persona , se-
 „ cundum quod nobis tradidit veneranda Sy-
 „ nodus Chalcedonenſis , anathema ſit .

His concinit Petrus Ciaconus lib. *de Incarnatione* , cap. 2. „ Nec illis (inquit) acquie-
 „ ſcentes , qui unam Dei Verbi naturam in-
 „ carnatam prædicantes , venerabiliq. Chal-
 „ cedonenſis Concilii Fidem refugium : nec
 „ illos admittentes , qui duas naturas doſe
 „ pronuntiantes , unam Dei Verbi naturam
 „ Incarnatam minime conſitentur , æſtiman-
 „ tes hoc duarum naturarum profeſſioni con-
 „ trarium : quaſi aliquid aliud quam duas na-
 „ turas ineffabiliter unitas , una Dei Verbi
 „ natura incarnata ſignificet .

Objici poſſunt Patrum teſtimonia , qui mix-
 tionis nomen uſurparunt , agendo de Incar-
 natione . Sic enim Tertullianus Apologetici
 cap. 12. *Nāſcitur* , inquit , *homo Deo mix-*
tus . S. Auguſtinus in *Epistoſa ad Voluſianum* ,
 ait , *perſonam Chriſti Mixturam eſſe Dei &*
hominis , ſicut *perſona hominis Mixtura eſt*
animæ & corporis . Leporius Presbyter in
 Libello ſuæ emendationis ab Eccleſia Africa-
 na probato , ait *Filium Dei incarnatum eſſe* ,
 & *immixtum* . S. Leo Sermone 3. in Natali
 Domini : *Non ſic* , inquit , *natura humana*
in ſocietatem ſui Creatoris eſt aſſumpta , *ut il-*
le habitator , & *illa habitaculum eſſet* ; *ſed*
ita ut naturæ alteri altera miſceretur . Si-
 cut ergo mixtione liquorum fit unus liquor ,
 ita mixtione naturarum , una natura facta eſt .

Re-

Respondeo cum S. Cyrillo *lib. I. adversus Nestorium, cap. 3.* Mixtionis nomen Patres quosdam usurpasse, cum de naturarum duarum unionione in Christo sermonem fecerunt, non eo quod sumitur sensu, cum liquores dicuntur misceri, ut scilicet eorum destruaturnatura, & unus in alterum, vel ambo in tertium quemdam transmutentur: *Sed ea voce sunt abusi, cum summam unionem ostenderunt,* inquit S. Cyrillus.

Resp. 2. iisdem verbis quibus Photius Eulogii testimonio respondet, easdem voces usurpanti. „ Utitur (inquit) Verbo mixtionis, pie quidem, sed non utitur secundum insanum Apollinarem, quomodo hac voce sit utendum testatus, neque secundum audacem Eutychem, sed ut lex pietatis permittit: ut qui nosset unum Filium Dominum nostrum Jesum Christum, declarare duabus naturis indivisis & inconfusis constare in perfecta humanitate, & perfecta Divinitate: ut permixtio, secundum illum, confusionem non significet, neque inducat divisionem vocis in duo.

Tertullianus mixtionis nomen pio etiam sensu usurpat, ut summam duorum in sua integritate manentium unionem significat, non quatenus confusionem indicat. Præstat ipsum audire *lib. contra Praxeam, cap. 27.* dicentem: „ Ceterum Deum immutabilem, & informabilem credi necesse est, ut æternum. Transfiguratio autem interemptio est
„ pri-

„ pristini : omne enim quod transfiguratur
„ in aliud , desinit esse quod fuerat , & in-
„ cipit esse quod non erat . Deus autem ne-
„ que desinit esse , neque aliud potest esse .
„ *Et infra* : Si enim Sermo ex transfigura-
„ tione & demutatione substantiæ caro factus
„ est , una jam substantia Jesu ex duabus ,
„ ex carne & spiritu mixtura quædam , ut
„ electrum ex auro & argento . Et incipit
„ nec aurum esse , id est Spiritus ; nec ar-
„ gentum , id est , caro , dum alterum
„ altero mutatur , & tertium quid effici-
„ tur . Neque ergo Deus homo . Caro enim
„ non proprie est , qui Sermo fuit . Ita ex
„ utroque neutrum est . Aliud longe tertium
„ est quam utrumque . Sed enim invenimus
„ illum directo & Deum & hominem expo-
„ situm , ipso hoc Psalmo suggerente : Quo-
„ niam Deus homo natus est in illa , ædifi-
„ cavit eam voluntate Patris . Certe usque-
„ quaque Filium Dei & filium hominis ,
„ cum Deum & hominem sine dubio , se-
„ cundum utramque substantiam , in sua
„ proprietate distantem : quia neque sermo
„ aliud quam Deus , neque caro aliud quam
„ homo . Sic & Apostolus de utraque ejus
„ substantia docet : qui factus est , inquit ,
„ ex semine David , hic erit homo & filius
„ hominis , qui desinitus est Filius Dei se-
„ cundum spiritum . Hic erit Deus & ser-
„ mo Dei Filius . Videmus duplicem statum ,
„ non confusum , sed conjunctum in una per-
„ sona

„ sona Deum & hominem Jesum . Et adeo
 „ salva est utriusque proprietas substantiæ , ut
 „ & spiritus res suas egerit in illo , id est, vir-
 „ tutes , & opera , & signa : & caro passio-
 „ nes suas functa sit , esuriens sub Diabolo ,
 „ sitiens sub Samaritide , flens Lazarum , an-
 „ xiusque ob mortem : denique & mortuus
 „ est . Quod si tertium quid esset ex utroque
 „ confusum , ut electrum , non tam distin-
 „ cta documenta paterent utriusque substan-
 „ tiæ .

S. Augustinus mentem satis explicat suam
 loco laudato . „ Sicut (inquit) in unitate
 „ personæ anima unitur corpori , ut homo
 „ sit : ita in unitate personæ Deus unitur ho-
 „ mini , ut Christus sit . In illa ergo perso-
 „ na mixtura est animæ & corporis : in hac
 „ persona mixtura est Dei & hominis : si ta-
 „ men recedat auditor a consuetudine cor-
 „ porum , qua solent duo liquores ita com-
 „ misceri , ut neuter servet integritatem
 „ suam : quamquam & in ipsis corporibus
 „ aeris lux incorrupta misceatur . *Et infra :*
 „ Si tamen (inquit) mixtionis vel mixturæ
 „ nomen non indigne ad ista admittitur , pro-
 „ pter consuetudinem corporalium rerum
 „ longe aliter se habentium , aliterque no-
 „ tarum .

Seipsum etiam explicat Leporius , post ver-
 ba laudata statim addens : „ Non tamen quia
 „ Incarnatus dicitur & immixtus , diminu-
 „ tio ejus est accipienda substantiæ . Novis

„ enim sine sui corruptione misceri , & ta-
 „ men in veritate misceri . Novit in se ita
 „ suscipere , ut nihil ei crescat augmenti :
 „ sicut scriptum novit totum infundere , ut
 „ nihil accadat detrimenti . Non ergo ad in-
 „ telligentiam imbecillitatis nostræ , secun-
 „ dum experimentorum visibilia documen-
 „ ta , facientes conjecturam de æqualibus
 „ se invicem ingredientibus creaturis , pu-
 „ temus Deum hominemque commixtum ,
 „ & tali confusione carnis & Verbi quasi ali-
 „ quod corpus effectum , &c. „ Lege insi-
 „ gne Leporii testimonium inter probationes .

Denique mixtionis nomen intimam unio-
 nem significat apud S. Leonem , non confu-
 sionem naturarum , & ad personarum dum-
 taxat diversitatem excludendam usurpatur ,
 ut integer illius loci contextus ostendit . „
 „ Hic enim (inquit) mirabilis sacræ Virgi-
 „ ginis partus , vere humanam , vere divi-
 „ nam una edidit prole naturam : quia non
 „ ita proprietates suas tenuit utraque substan-
 „ tia , ut personarum in eis possit esse discre-
 „ tio : nec sic natura in societatem sui Crea-
 „ toris est assumpta , ut ille habitator , & illa
 „ habitaculum esset : sed ita ut naturæ alteri
 „ altera misceretur . Et quamvis alia sit quæ
 „ suscipitur , alia vero quæ suscipit ; in tan-
 „ tam tamen unitatem convenit utriusque
 „ diversitas , ut unus idemque sit Filius , qui
 „ se , & secundum quod verus est homo , Pa-
 „ tre dicit minorem ; & secundum quod ve-

„ rus est Deus , Patri profitetur æqualem .

Objiciebant Eutychiani verba S.Cyrilli in secunda ad Successum Epistola dicentis , Naturarum differentiam post unionem , sola cogitatione dividi .

Respondeo , hæc Eutychianis non favere . Non enim significat his verbis S. Cyrillus ita misceri & confundi proprietates naturarum , ut nonnisi una quæpiam esset in Christo , vel composita natura : sed separatas , & a se mutuo distractas non subsistere , ut affectione sola , vel habitudine , non substantivo aliquo , & unum per se faciente nexu , ac vinculo , secum invicem hærerent : quæ fuit Nestorii hæresis . Hinc animæ & corporis exemplum profert S.Cyrillus , quæ pariter sola ratione divisa post unionem asserit , quia seorsim non subsistunt , quamvis compertum sit distinctam esse reipsa corporis , animæque substantiam : sed longe aliud est distinctio , aliud divisio , & sectio . En S.Cyrilli verba : „
 „ Sed ignorant , quæcumque non sola mentis
 „ consideratione distingui solent , ea prorsus
 „ etiam in diversitatem distinctam omnifa-
 „ riam , ac privatim a se mutuo segregari .
 „ Sit rursus nobis in exemplum homo nostri
 „ similis . Duas namque in eo naturas intel-
 „ ligimus , unam animæ , alteram corporis .
 „ Sed cum sola discreverimus intelligentia ,
 „ & differentiam subtili contemplatione ,
 „ seu mentis imaginatione conceperimus ,
 „ non tamen seorsim ponimus naturas , ne-

„ que illis in totum per divisionem virtutem
 „ immittimus , sed unius hominis esse intel-
 „ ligimus , ita ut illæ duæ jam non sint duo,
 „ sed utraque animal unum absolvatur .
 „ Quamvis igitur in Emmanuel humanitatis
 „ naturam ac Divinitatis dicant : ipsa tamen
 „ humanitas propria facta est Verbi , unus-
 „ que cum ipsa Filius intelligitur .

„ *Et infra :* Igitur ea ex quibus est unus ,
 „ & solus Filius , & Dominus Jesus Christus
 „ tamquam intelligentia concipientes , duas
 „ quidem naturas unitas asserimus : post unio-
 „ nem vero tamquam sublata jam illa in duo
 „ divisione , unam esse credimus Filii natu-
 „ ram , tamquam unius , sed hominis facti ,
 „ & incarnati .

Objiciebant Eutychiani duos esse Christos,
 seu duas in Christo personas , si duæ sint na-
 turæ .

Respondet Gelasius : „ Grandem esse eo-
 „ rum cæcitatem , qua non vident , non duos
 „ Christos per hæc posse depromi , ex quibus
 „ integer Christus existit , & sine quarum-
 „ unaquaque substantia integer non possit o-
 „ stendi : sed ipsi potius (inquit) se non in-
 „ tegrum Christum consentur adstruere ,
 „ cum in eodem Sacramento aliquid de iis ,
 „ quibus integer constat , conantur abstrahe-
 „ re Numquidnam cum homo ex anima
 „ constet & corpore , quorum duas naturas esse
 „ non dubium est , non adunatione naturali una
 „ persona , & unus est homo ? Amplius dici-

„ mus ;

mus; certe & interiorem hominem, & exterioriorem Scripturæ divinæ sæpe testatur autoritas: & tamen non ideo duo homines in uno, sed una persona, & unus est homo: Unde interior, & exterior ad significantiam dicitur qualitatum, non ad evidentiam personarum duarum. Quanto magis in illa ineffabili adunatione, indivisibili numquamque solvenda, sicut salva proprietate utriusque naturæ, ex quibus hoc mysterium constare non dubium est, & sine quibus constare non posse manifestum est: sicut una eademque persona est Domini nostri Jesu Christi, sic integer, sic unus, sic verus Christus est? Et magis unus non est, si integer non est: quia sublata parte ex iis quibus integer approbatur, dimidius videbitur esse, non integer. Et sicut integer non est, sic verus non est: si verus non est, falsus apud eos Christus esse convincitur.


Eidem objectioni subtiliter Vigilus Tapensis respondet lib. 1. exemplo adducto trium Sanctissimæ Trinitatis Personarum: sunt enim quædam propria Patris, quæ nec ad Filium, neque ad Spiritum Sanctum pertinent. Et ita de aliis personis. Si ergo hæ tres personæ habentes singulæ proprietates suas, quibus distinguantur, non quibus separentur, unus est Deus: quomodo Filius, salva naturæ utriusque proprietate, non unus est Christus?

Secundo profert exemplum hominis, in quo

quo proprietatum distinctio duplicem personam non infert. Exempli gratia, constat homo quinque sensibus, qui ita officii sui proprietatem naturaliter obtinent, ut nihil secum habeant commune, nihil sibi alterius valeant vindicare. Visus ita ministerii sui proprium gerit officium, ut nec audire nec odorari, nec gustare, nec contrectare possit, & ita de aliis. Et cum sint hæ omnes membrorum species tam diversa, tam discretæ, ita naturalibus proprietatibus substitutæ, nihil communionis, nihil Societatis ad se invicem habeant, sed privato quodam, & solitario jure, propriæ functionis ministerium impleant: unus tamen idemque est homo, qui quomodo quinque corporalibus sensibus, varia proprietate a se invicem differentibus constat; ita quinque, secundum istorum deliramenta, personas habere debuerat: ut quantæ sunt proprietates sensuum, tanta esset numerositas personarum. Hæc Vigilius.

F I N I S.








DISSERTATIO

DE MONOTHELITARUM HÆRESI.

CAPUT I.

I. Hæresis Monothelitarum initium, & origo ab Heraclio, & Sergio Patriarcha. 2. Cyrus Alexandrinus illius propagator, novem edidit capita; 3. Is Sophronius Hierosolymitanus resistit. 4. Honorius pacis causa suppressendam hanc questionem judicavit. 5. Eutheſis impia ab Heraclio, & Sergio promulgata, & ab Romano Pontifice, atque Occidentali Ecclesia damnata. 7. Maximi Monachi cum Pyrrho Monothelita disputatio, & Typus hæreticus a Constante Imperatore publicatus. 8. Marinus Papa typum eundem, & hæreticos fautores anathemate percellit, ob idque exilio multatus sanctissime moritur: nec non Maximus insigni martyrio afficitur. 9. Demum sub Constantino Pogonato, generali habita Synodo sexta, hæresis ista damnatur.

I.  Utychianorum, ac Monophysitarum sectæ appendicula, fuit Monothelitarum hæresis, quæ unicam in Christo voluntatem, & ἐνέργειαν, idest actionem constituit. Cujus in primis ortum,

A

at-

atque progressionem ex historia repetere oportet, tum ejus arcana, & mysteria per-
scrutabimus.

Levi ex re, ac propemodum ridicula initium illi esse datum, Græci Annales perhibent. Heraclius Imperator anno Imperii vigesimo, Christi DCXXX. dum bello confecto Persico, Orientem peragrans, provincias, & Civitates longo intervallo recuperatas constituit, Hierapolim venit. Ibi eum Athanasius quidam adiit Patriarcha Jacobitarum; (erat hæc Eutychianæ sectæ portio, de qua supra dixi) Syrus genere, &, ut captus est gentis, vaser, & subdolos.

Quo cum sermone de fide habito, Imperator inter cetera, se eum Patriarcham facturum Antiochenum ostendit, si Chalcedonense Concilium approbaret. Hac spe illectus Athanasius, morem illi gessit, ac duas in Christo naturas profiteri cœpit. Tum astute questionem illi vicissim posuit de voluntate, & actione Christi, duplicemne credere deberet, an unicam.

Ad hanc percontationem hæsitans Imperator, Sergium Patriarcham Constantinopolitanum per litteras consulit. Qui & ipse Syrus, ac Jacobitis ortus parentibus, atque ejusdem clanculum defensor hæresis, quæ unam in Christo naturam, adeoque voluntatem, & actionem agnoscebat unam; consensaneum errori suo responsum dedit. Antiochus in Homilia 130. Athanasii istius memi-

nit, quem & Antiochenam Sedem affectare scribit.

Vide de Monothelitis auctores a Fabricio appellatos *T. X. Biblioth. Græcæ p. 205. seqq.* quibus adde Feltriensis Episcopi Jo: Baptistæ Bartoli Apologiam pro Honorio I. Romano Pontifice.

II. Sub idem tempus, Cyrus Phasidis, quæ est Lazicæ, sive Calchidis Metropolis, Episcopus, non *Phaselidis*, ut mendose habet Miscella, ab Heraclio accitus, ad eum venit. Cui cum Imperator epistolam ostendisset, quam ad Arcadium Cypri Archiepiscopum, adversus Paulum hæreticorum primum scripserat, in qua duas operationes fuisse Christi negabat, hac novitate percussus se non nihil addubitasse, ac restitisse, Cyrus ipse refert. Verum ubi Sergii litteras idem asseverantes ab Heraclio accepit, tum vero se ad Sergium scripsisse. Quod etiam Sergius testatur in litteris, quas ad Papam Honorium misit. Sed jocus fuit, ac mimus iste colludentium inter se perditorum hæreticorum, ab quibus deceptus Heraclius in foedissimam impegit hæresim, in quam consentire cum Athanasio Jacobita primarios illos Antislites animadvertit.

Paullo post, Gregorio Alexandrino Patriarcha mortuo, in ejus locum Cyrus e Lazica transfertur; ubi cum Theodoro quodam Pharanis Episcopo (est hoc Arabiæ oppidum Ægypto vicinum) simili labe contacto,

communicatis consiliis , robur hæresi illi , & incrementum attulit . Nec longe postea , quam Alexandrinum thronum obtinuit , unius operationis , ac voluntatis publice proposito dogmate , Theodosianos hæreticos Acephalos , quorum ingens erat in illa urbe numerus , ad ineundam concordiam adduxit . Ad quam stabiliendam , novem capita cum anathematismis palam exposuit , in quæ illi facile consenserunt . Horum septimum unam in Christo theandricam operationem asseribat . Extant illa capita in Actione 13. Sextæ Synodi , cum epistola , quam una cum iis misit ad Sergium Cyrus , ubi & concordia illa sancita dicitur quarto die mensis Payni , qui vigesimo nono respondet Maii Romani , Indictione 6. qui est annus Christi 100XXXIII.

III. In Lateranensi Synodo Martino Pontifice habita , anno , ut postea dicam , 100XLIX. in Secretario primo, Martinus Papa Synodum alloquens , affirmavit , *ante annos octodecim , Cyrum unam operationem in Christo Divinitatis , & humanitatis in Alexandria urbe definientem , ad similitudinem Acephalorum ordinasse capitula numero novem in ambone prædicantem , cum anathemate qui sic non sentiret , impie promulgasse .* Si octodecim annos de sexcentis & quadraginta novem detrahas , reliquus erit annus Christi 100XXXI. quo anno , vel sequente Cyrus hæresim suam prædicare cœperit , sub initium aditæ illius Sedis , ac postea Synodo habita , novem capitula.

pitula, five anathematismos, promulgarit, an. IOCXXXIII. cum jam Theodosiani ad Ecclesiæ communionem admissi essent.

Erat tunc Alexandria Sophronius Monachus, vir peræque doctus, & sanctus. Hic apud Cyrum vehementer insistit, ne unam in Christo operationem decerneret, atque ut septimum illud capitulum induceret. Quod cum ab illo non impetraret, Constantinopolim ad Sergium accurrit, ut ejus adversus Cyrum imploraret auctoritatem. Tandem eo deducta res est, ut inter illos conveniret, utriusque supprimendam esse mentionem: ac nec unam, nec duas actiones, aut voluntates esse nominandas. Ita Sergius in epistola ad Honorium Papam, quæ actis inserta est Synodi sextæ.

IV. Idem porro Sophronius, paullo post, id est anno IOCXXXIII. Hierosolymorum factus Episcopus, celebrata Synodo bene longam epistolam scripsit ad Sergium, quæ lecta, & approbata est in Synodo sexta Oecumenica, in qua duas operationes distincte adstruit. Quin etiam Romam ad Honorium litteras misit per Stephanum Dorensem Episcopum, quibus de nova Monothelitarum hæresi certiore illum reddidit; paulloque post obiit, anno Heraclii 26. Christi IOCXXXVI.

Eodem, quo Sophronius, anno, scripsit etiam Sergius ad Honorium, & ea, quæ ab Cyro, & Sophronio gesta scriptaque fuerant,

exposuit ; non sine maligna interpretatione mentis eorum , & sententiæ , qui duas operationes asserabant ; tamquam inde consequens esset , duas esse voluntates contrarias , & confligentes invicem . Quare consultius videri sibi , ut nec una , nec duæ operationes in Christo nominarentur ; sed unus dumtaxat operans . Ad hæc Honorius respondens , illud Sergii consilium probavit , retinendæ concordiæ gratia , alioqui non duas esse voluntates professus in Christo contrarias inter se , sed unam tantummodo , ut pugnam illam , ac discordiam voluntatum intercluderet . De quo postea .

Moritur post hæc Honorius Papa anno Christi 100XXXVIII. cui Severinus successit . Sed ejus ordinatio dilata est , quod nondum ab Imperatore , uti mos erat , rata esset habita illius electio . Itaque cessasse dicitur Episcopatus ab Anastasio annum unum , menses septem , dies septemdecim . Qua ratione consecratus est anno 100XL. & eodem obiit , cum post coronationem sedisset menses duos , dies quatuor : sepultusque dicitur 4. Non. August.

V. Sub hoc Pontifice , Heraclius Imperator , auctore Sergio , Fidei *Ecthesim* , id est *expositionem* , promulgavit , Indictione XII. hoc est anno Christi 100XXXIX. qua unicam Christi operationem , & voluntatem asseveravit quidem , sed quasi aliud agendo , cum diserte , ac palam constitueret , ne quis
tam

tam unam, quam duas operationes, & voluntates nominaret in Christo; quemadmodum a Sergio, & aliis constitutum esse antea meminimus. De qua re agemus postea. Sergius Patriarcha Constantinopoli habita Synodo, *Ecthesim* probavit, eaque publice proposita est. Severini Papæ Apocrisarii, qui Constantinopoli tunc erant, ut ab Imperatore electi Pontificis confirmationem impetrarent, variis modis tentati, ut illi assentirentur, adduci non potuerunt.

Eodem anno, quo hæretica *Ecthesis* prodit, mortuus est Sergius, inque locum illius subrogatus est Pyrrus Chrysopolitanus Monachus, & Presbyter, ejusdem cum Sergio particeps hæresis, & Heraclianæ *Ecthesis* propugnator. Interim Severino mortuo, anno exeunte DCCXL. succedit Joannes IV. qui apud Pyrrhum insitit, ut *Ecthesis* illa, sive charta, publicis in locis suspensâ detrâheretur, ac damnaretur.

Heraclius, ubi comperit *Ecthesim* suam ab Occidentali Ecclesia & Rom. Pontifice rejectam, invidiam non ferens, scripta ad Jo: Papam epistola professus est, non se auctorem illius fuisse, sed Sergium, ex quo *Ecthesis* Sergii appellari cœpit.

VI. Biennio post promulgatam *Ecthesim*, obiit Heraclius ex intercute morbo anno Christi DCCXLI. Martii 11. Imperii 31. Cui successit Constantinus ejus filius, princeps Catholicus. Ad hunc Joannes Papa apolo-

geticam pro Honorio scripsit epistolam, quæ in Collectaneis Anastasii legitur. Constantino vero post menses quatuor mortuo, non sine veneni suspitione ab noverca Martina, dati, cujus particeps consilii Pyrrhus fuisse ferebatur; imperavit Heraclius, qui & Heracleonas, Heraclii F. cum Martina matre. Sed in ordinem subinde redacti sunt & exilio damnati; naribus Heracleone, Martinæ lingua Senatus decreto resectis. Quorum in locum susceptus est Imperator Heraclius alter Constantini F. Heraclii, a quo victus est Chosroes, nepos. Quem quidem in Imperii societatem accipere Martina genitum Heraclium coegit populus, eumque Constantinum nominavit, ut in Breviario scriptum est a Nicephoro: appellari tamen passim Constans solet. Hic avum potius quam patrem æmulatus, Monothelitarum hæresim accerrime propugnavit; ac non minoribus Ecclesiam, quam rempublicam calamitatibus affecit.

Eodem, quo Heraclius senior, & ejus filius Constantinus exceſſerunt, anno, Pyrrhus seditione populari ob Constantini necem exagitatus, Constantinopoli profugit, & successorem habuit Paulum hæreticum ex Oeconomo majoris Ecclesiæ, Octobri mense, Indictione 15. ut ait Nicephori Breviarum, qui est annus 10CXLI.

VII. Anno 10CXLII. Joanni IV. Papæ successit Theodorus; qui annos sex, menses quinque, dies octodecim sedit. Hic de
Ethe.

Ecclésiæ abolenda plurimum laboravit, datis ad Paulum Patriarcham Constantinopolitanum Synodicis litteris, quibus & Pyrrhi causam examinari iussit. Idem scripsit ad Constantem Imperatorem de Pyrrho Romam mittendo ad causam dicendam.

Anno Christi 100XLV. Indictione tertia, mense Julio, Maximus Monachus sanctissimus, & doctissimus, in Africa cum Pyrrho qui Constantinopoli profugus eo se receperat, celebrem collationem habuit, quam Grece primus edidit Baronius in calce Tomi Annalium octavi. In ea Pyrrhus convictus veritatis manus dedit; ac Romam veniens Theodoro Papæ libellum obtulit, quo damnata hæresi sua, Catholicæ Fidei subscripsit, atque ita in communionem receptus est. Verum postea, Constantis Imperatoris iussu, Olympius Exarchus Ravennam exitum Pyrrhum ad resumendam professionem hæresis adduxit; cuius rei gratia Theodorus Pyrrhum deposuit, & anathemate notavit. Eandem depositionis sententiam tulit in Paulum Patriarcham Constantinopolitanum. Quo suadente Constantis Imperator Edictum promulgavit, quem Typum vocant: in quo, ad faciendam concordiam, prohibuit ne quis tam unam, quam duas in Christo voluntates, & actiones usurparet. Extat in Synodi Lateranensis Actis sub Martino celebrati.

VIII. Post Theodori Papæ obitum, anno Christi 100XLIX. creatus est Romæ Pontifex

Martinus I. qui sedit annos 6, & 2. mense septimi excessit e vita. Hic adversus Orientalem hæresim Romæ Lateranensem coegit Synodum Episcoporum 105. in qua Heraclii, sive Sergii Ecthesim, & typum Constantis; ac præterea fautores hæresis illius, Theodorum Pharanitem, Cyrum Alexandrinum, Sergium, Pyrrhum, & Paulum Constantinopolitanos Patriarchas damnavit. Ea Synodus inchoata est tertio Non. Octob. Indict. 8. ac Secretariis, sive Consultationibus quinque est absoluta; quarum postrema pridie Cal. Novemb. est habita.

Quibus commotus Imperator, primum Olympio Cubiculario, & Exarcho mandavit, ut Martinum in Typi damnatione perseverantem comprehenderet, ad seque mitteret. Quod cum frustra tentasset, atque etiam Spatharius, cui per Missarum solemniam Martini interficiendi negotium datum erat, repente in ipso conatu obcæcatus esset, cum Pontifice Olympius in gratiam rediit. Id anno IOCLI. contigit.

Anno vero IOCLIII. Theodorus cognomento Calliopas, Exarchus, jussu Imperatoris, Martinum I. abductum, Junii 19. die, feria 4. in navem imposuit. Qui in Naxo insula annum integrum detentus, demum anno IOCLIV. Septembris 17. die Constantinopolim perductus est. Quo etiam anno, Paulo Patriarcha mortuo, Pyrrhus ei subrogatus, menses quatuor sedem illam obtinuit, atque in

in hæresi mortuus est . Martinus indigne , ac crudeliter habitus , anno DCCLV. Cherſonam relegatur , eoꝛque Conſtanti-
nopolim proficiſcitur ipſo die Cœnæ Dominicæ , id eſt Mar-
tii 26: pervenit autem Idibus Majis . Ubi & eodem anno , Indiſtione decimaquarta , 16.
Septembris obiit , ipſo die S. Euphemix .

Per idem tempus Maximus Monachus in-
gens Orientalis columen Eccleſiæ , glorioſis
contra Monothelitarum hæreſim perfunctus
laboribus , ab hæretico Imperatore diſſime
vexatus eſt . Nam diuturno exilio , & ſqua-
lore maceratur , tandem verberibus conciſus
eſt & lingua , dextraque manu abſciſſa , in
Lazicam deportatus , ibidem beatam animam
Deo per martyrium reddidit , anno DCCLXV.
Indiſtione 5. Auguſti die 13. Sabbato , ut
ipſe prædixerat .

IX. Demum Conſtante Imperatore Syra-
cuſis in Sicilia , quo ſe ante annos ſex re-
ceperat , per inſidias occiſo anno Chriſti
DCCLXVIII. Conſtantineſis ejus filius cogno-
mento Pogonatus , id eſt *Barbatus* , in Augu-
ſtam dignitatem ſucceſſit , pius & Catholicus
princeps . Qui conſtituta imperii tranquillita-
te , ad recuperandam Eccleſiæ pacem conſi-
lia ſua convertit . Itaque Concilium generale
anno Chriſti DCCLXXX. celebratum eſt Con-
ſtantiopolim , Agathone Papa : qui legatos
tam Romanæ Sedis , quam Synodi , id eſt diœ-
ceſis privatim eidem Sedi contributæ nomine
ad illud deſtinavit . Cœptum eſt Novembris

7. Indictione 9. in Secreto Palatii, qui Trullus vocabatur, & actione octavadecima, terminatum anno DCCLXXXI. die 16. Sept. Indict. 10. In eo Concilio, quinque prioribus Synodis approbatis, Monothelitarum hæresis damnata: decretumque factum est, duas in Christo voluntates, totidem naturales actiones inesse: & nominatim notati illius principes hæresis. Hæc est Constantinopolitana tertia, sexta ordine post Nicænam, œcumenica Synodus, ab Leone II. Rom. Pontifice, probata; quæ teterrimam illam bestiam variis in Italia præsertim, & Africa, sed & in Gallia quoque, Synodalibus confixam decretis. postrema, eademque lethali plaga confecit. Postremo sciendum est, longe antequam Monothelitæ prodiissent, prælusisse huic hæresi Beronem quemdam, qui Divinitatem in Christo sic abjectam & exinanitam fuisse dixit, ut *ταύτην* esset *τῇ ἀνθρωπότητι*: hoc est *unius & ejusdem operationis* cum humana natura. Contra quem Hippolytus Portuensis Episcopus disputavit, cujus fragmenta quædam extant ab Anastasio Apocrifario contra Monothelitas excerpta, quæ in Collectaneis Anastasii Bibliothecarii leguntur.

CAPUT II.

1. De Monothelitarum dogmate . 2. Ex illius sectæ principibus petitur : velut ex Theodoro Pharanita . 3. Ex Cyro Phasidis, post Alexandria Præsule: Sergio item, & Pyrrho . 4. Et Macario Antiocheno . 5. Primum illius hæresis firmamentum, quod voluntates & actiones multiplicari censebant pro hypostaseon numero . 6. Alterum, quod voluntates plures inesse non putabant in uno, & eodem, nisi contrarias . 7. Tertium ex quibusdam Patrum testimoniis arcessebant ; velut ex Gregorio Nysseno , ex quo concludebant , humanitatem esse divinitatis instrumentum . 8. Ideo unam & eandem esse amborum actionem . 9. Deinde ex Dionysio , qui θεᾶς δρᾶν actionem nominavit .

I. **U**T ex Eutychianorum , Severitarum, & , ut univérse loquar , Monophysitarum stirpe , velut propago quædam , Monothelitarum secta pullavit : sic horum dogma illius appendicula est ac soboles hæresis , & ex eodem doctrinæ fonte profluxit . Id tum melius intelligetur , cum cuiusmodi decreta fuerint illorum , accuratius expositum erit : quod hoc capite faciendum duximus . Ac mihi inquirenda potissimum , & eruenda videtur ex illorum scriptis , qui principes habitus sunt factionis illius , ac pro talibus notati synoda.

nodalibus decretis: e quibus præcipui sunt Theodorus Episcopus Pharanites, Cyrus Alexandrinus, Sergius, & Pyrrhus Constantinopolitani Patriarchæ. Theodori pericopæ quædam lectæ sunt in sexta Synodo, Actione 13. quæ Latinæ itidem auditæ sunt in Lateranenſi Synodo sub Martino I. Ex quibus apparet illum exillimaſſe, unam tantummodo in Christo fuiſſe voluntatem, ſive principium humanarum actionum; cujus organum, & inſtrumentum fuit anima rationalis & corpus, corporiſque facultates. Ut enim artificis, & inſtrumenti una, & ſingularis eſt operatio, non reiſſa ſolum, ſed etiam τῷ λόγῳ, & θεωρίᾳ: quia in inſtrumento non ineit principium αἰδικόν, quod *formale* vocant, actionis. Sic actionum Christi unicum, ac proprium, & *vitale*, ut ſic loquar, principium penes ſolam Divinitatem fuit; ut Theodori locus ille demonſtrat ex epittola ad Sergium Arſenoitam. *Omnia, inquit, quæ ſcribuntur de Domino Christo, ſive de Deo, ſeu animæ, ſive corporis, ſive utriusque, animæ, dico, & corporis ſint, ſingulariter, ac indiviſe agebantur incipientes quidem, &, ut ſic dicam, de fonte ſapientiæ Verbo, & bonitatis, vel virtutis, mediante intellectuâli anima, & corpore procedentes, & propterea una operatio totius; ſicuti de uno, eodemque Salvatore noſtro hæc omnia exiſtunt, atque dicta ſunt.*

II. Mox in eadem epittola ſubjicit Pharanites Theodorus; unam omnino eamque divi-

vi-

vinam operationem in Christo fuisse, voluntatemque divinam. Tum ita scribit: *Omnia, quæ salutiferæ dispensationis sunt sive divina, sive humana, deque Salvatore nostro Christo dicuntur, initium quidem a Divinitate, utpote permissum, & exordium accipiebant; ministrante autem intellectuali, & rationali anima, ministrabantur a corpore, tam miracula videlicet, ac divinæ potestatis opera, quam humanæ infirmitatis propria; velut sunt cibi ac potus appetitio, labor, tristitia. De quibus ita postremo colligit: Oportet igitur ita sapere, & dicere nos, omnia quæ in Incarnatione Salvatoris Christi dicuntur esse, unam scire operationem esse; hujus autem opificem, & creatorem Deum Verbum, organum vero, humanitatem consistere. Ergo quæque velut de Deo, aut humane de ipso dicuntur, omnia una est operatio Verbi Divinitatis. De voluntate quoque disserte asserit ibidem, unam hanc esse, eamque divinam.*

Quidquid igitur humana in Christo natura vel egit, vel perpessa est hominis proprium veluti sunt nutritus, somnus, fatigatio, tristitia, anxietas, corporis dolor, vulnere, plagarumque sensus, & alia ejusdemmodi, unam ejusdem Christi operationem fuisse, Theodorus Pharanites agebat, eamque divinam: quemadmodum & unam divinam voluntatem istorum omnium, ut in superioribus sententiis, & aliis, quas omittimus, docuit,

III. Cyrus ex Lazicæ Metropolitano Alexan.

xandrinus factus Antistes , in anathematismo septimo ex novem illis , quos Alexandria ad conciliandos hæreticos edidit , ut capite antecedente dixi ; postquam professus est naturas in Christo duas perfectas , & distinctas ; & in duabus unum & eundem : ait *hunc Christum unum , & filium , tam illa , quæ Deo conveniunt , quam humana , operari unica operatione theandrica* ; hoc est , ut ad verbum solent vertere , *Dei virili , secundum S. Dionysium* . Huic Cyri opinioni subscripsit Sergius Constantinopolitanus in epistola , quam ad illum misit ; in qua Patres antiquos unam asseverasse dicit operationem ; nec duas ab ullo positas meminisse : tametsi solita *κρύψα* , ac tergiversatione usus , rem in ancipiti relinquere visus est .

Pyrrhus item Sergii successor in Disputatione , quam cum Maximo Monacho in Africa suscepit , aperte eandem tuetur hæresim , *unam esse voluntatem affirmans Divinitatis , humanitatisque Christi* : ita ut unica voluntate tum ante susceptam carnem mundum ex nihilo procreare voluerit , & jam homo factus , cibum , ac somnum appetierit , ceteraque conditionis humanæ propria . Hæc & alia id genus objiciente Maximo Pyrrhus agnoscit initio Disputationis .

IV. Extat Macarii Antiocheni acerrimi , & obstinatissimi Monothelitæ verbosa Fidei professio inter Acta Synodi sextæ : in qua post alia Catholicæ consentanea Fidei de naturis

turis duabus in Christo, & una persona; de ejuldem operatione pergit ita dicere: *Non illum divina secundum Deum: nec humana secundum hominem egisse. verum Deum hominem factum, novam quamdam Deivirilem operationem, eamdemque totam vivificam ostendere. Quippe unum, & eundem fuisse divino- rum, & humanorum operum effectorem: adeo ut & carnis propria fuerit passio; quæ tamen a Divinitate sejuncta non esset; quamvis passionem non sit experta Divinitas: & Dei propria fuerit operatio; quamvis per humanam suam naturam, hoc est totam nostram massam, illam expleverit unica, & sola voluntate Divina: cum in eo neutiquam voluntas extiterit alia, vel obsistens, & contraria Divinæ ipsius, & potenti illi voluntati. Impossibile est enim in uno, eodemque Christo Deo nostro duas simul, & eodem tempore contrarias, aut etiam similes voluntates subsistere.*

V. Ex Macarii verbis, ac ceteris, quæ deinceps pertexit: tum ex aliis ejusdem antesignanis hæresis, atque etiam Catholicis doctoribus, qui contra illam scripserunt, perspicuum est, quibus firmamentis, ac verissimilibus argumentis usi sint Monothelitæ ad tam stolidi dogmatis faciendam fidem. Neque enim sine omni ratione sic insansisse videntur: nec venenis suis dissimulandis fucum nullum, speciemve quæsisse. Duo omnino reperio commenti illius præsidia: quorum unum ratione; alterum auctoritate constat. Ratione usi

usi sunt præcipue duplici . Primum ita disputabant : *Αἰτίαι* , nec non voluntates , hypostasim sequi , non naturam : hoc est *ὑποστατικά* esse *θελήματα* , non *φυσικά* : adeoque multiplicari pro numero hypostasicon , non autem naturarum . Cum igitur in Christo , immo Christus ipse , sit unus volens ; necessario putabant sequi , unam ipsius esse voluntatem , sive *volitionem* . Utrum vero de actione ipsa volendi potius , quam de naturali ejus principio , & facultate , in illa controversia sermo fuerit utrinque contendentibus : quemadmodum & universæ de *ἐνέργειαις* magis , quam de *ἐνεργητικαῖς δυνάμει* : de hoc postea erit accuratius differendum . Hac argumentatione Pyrrhus in primis Maximum aggreditur in Africa Collatione : hac reliqui omnes causam suam fulcire conati sunt ; fieri posse negantes , ut multiplicatis voluntatibus , non multiplicarentur etiam volentes . Quod refellit Maximus non illis solum , sed etiam in aliis Opusculis : nec non Joannes Damascenus , & plerique alii .

VI. Alterum argumentum illorum ejusmodi fuit : non posse voluntates duas in una & eadem inesse persona , nisi contrarias . Ita Pyrrhus in eadem Collatione , *impossibile est* , inquit , *in una persona duas inesse voluntates absque contrarietate* . Atque hæc frequentissime ab hæreticis illis usurpata ratio est ; qua & minime male cogitantibus interdum Catholicis illuserunt ; tamquam actiones ac volunta-

tes

tes duas non absolute negarent in Christo ; a quo tum communem illorum sensum , tum Scripturam , & orthodoxæ Fidei regulam abhorrere noverant : sed eatenus solum , ut contrarias , & confligentes invicem detraharent . In quo idem illorum fucus & malitia fuit , atque olim fuerat Arianorum : qui cum Filium *ἁμούσιον* , id est *consubstantialem* , prædicari ab Catholicis ægre ferrent , falsa illius interpretatione vocis , invidiam eis faceres conabantur , asserentes divisibilem sequi inde Patris esse naturam : eo quod defectio quædam substantiæ , ac profluvium voce ista significetur . Quod ut necesse non erat , & mentiebatur qui sic *τὸ ἁμούσιον* explicat Arius : sic Monothelitæ strenue nugati sunt , dum voluntatibus , & actionibus duabus , quas Catholici in Christo statuebant , adjungere , quam iidem isti detestabantur , pugnam illarum , & discordiam : quasi non possent duæ in una persona voluntates totidem esse naturarum , nisi essent invicem contrariæ . Cujus rei argumentum maxime de Christo capere solebant ; in quo si duæ voluntates fuerunt , eadem pugnassee invicem intelliguntur , quando imminente necem , ac supplicium perpeti una recusabat , quod esse tolerandum altera decreverat . Ita Sergius in epistola ad Honorium ; & alii , uti dixi , coryphæi hæresis istius : nec non Macarius Antiochenus , & Stephanus ejus discipulus in sexta Synodo causati sunt , se idcirco voluntates duas in Christo profiteri non posse ,
quod

quod nulla fuerit in illo dissensio, *neque carnalis voluntas, nec humana aliqua cogitatio*. Vide & Pauli Constantinopolitani Episcopi locum, ex ejus ad Theodorum Papam epistola, in Actione 13. Synodi ejusdem. Prorsus impuri isti, similiter ut Ariani, ab mortalis facie corruptelæ vindicari posse vocabula ista non putabant, quibus Catholici dogmatis professio continebatur.

VII. Jam quod auctoribus se antiquis Patribus ita sentire dicebant (quod alterum est illius hæresis firmamentum) hunc in modum adituebant; cujus ex Sergii epistola ad Honorium, &, qui ejus verba transcripsit, Marcarii Antiocheni Confessione, specimen hic dabimus. *Hanc esse divinorum mentem ac sententiam Patrum affirmant isti, sic asserentium, numquam intelligente anima præditam Domini carnem, seorsim, ac proprio impulsu, contra nutum uniti ipsi secundum hypostasim Dei Verbi naturalem peregisse motionem: sed quando, qualem, quantamque Deus ipse Verbum volebat. Et ut aperte dicam; quemadmodum corpus nostrum ab intelligente, ac rationali nostra anima regitur, gubernatur, & ordinatur: sic in Christo Domino, tota humana coagmentatio ab ejusdem Verbi Divinitate semper, & in omnibus acta & impulsiva divinitus movebatur. Quod ex Gregorii Nysseni verbis probare nititur: qui Christi perpeffiones per humanum corpus operatam esse Divinitatem ait: adeo ut Dei ipsius actio sit,*
pas-

passio vero, carnis. Ita Sergius, & Macarius.

VIII. Cum igitur *homo ille* sive potius *humanitas* Christi, a Divino Verbo ageretur, & ejus impressione, impulsuque moveretur in omnibus, fontem ac principium actionis, non in inferiore natura, sed in motrice hujus, & gubernatrice sola contineri putabant: actionem porro ipsam ab hac manantem, & profusam, sic in illa recipi, ac per ipsam refundi, & administrari; quemadmodum per instrumentum transit, non ab eo oritur, causæ principalis effectio. Atque uti corpus nostrum instrumentum est animæ nostræ; nec per se agit; sed agitur, & movetur, ac vitalem impulsum ab illa, tamquam origine, ac principio accipit: cum sit ex se, ac suapte vi mortuum, & inanimum; sic illi hominem in Christo prorsus ἀδίητον, & ἀνεύρητον, hoc est *carentem actione, ac voluntate omni* constituebant, rationali præsertim, & intelligentis propria: cujus stirps, & vitalis, ut sic loquar, facultas, & potentia in Divinitate inerat, a qua deinceps in humanitatem, sive εἰς τὸ ἀνθρώπινον σύγκριμα, manabat & profluebat, citra principalem vim & facultatem causæ agentis efficientia: non secus ac *ferramentum quid agat nescit: curationem vero, quæ per illud exercetur, novit medicus*, ait Chrysostomus.

Testantur hoc idem Theodori Pharanitæ ex Synodo sexta supra a nobis allata verba;
in

in quibus unam ait actionem totius esse Christi, quæ ab Verbi Divini sapientia, & bonitate, ac virtute profecta, per mediam intelligentem animam, corpusque procedat.

IX. Alterum testimonium, idemque celeberrimum, & in quo fundum hæresis insci-
tæ, ac velut arcem propugnandæ illius Monothelitæ statuebant, ex Dionysii epistola quarta petitur: ubi Christum ait, *non humano modo propria hominis egisse: sed cum vir esset factus Deus, novam quamdam Deivirilem operationem vivendi genere instituisse.* Ea Dionysii vox perperam ab imperitis, & contentiosis hominibus excepta in eorum perniciem, ac firmamentum cessit nefandissimi erroris. Itaque deinceps nemo ex illo grege, rationem reddidit fidei suæ, quin *διακριτικῶς* illam *ἐνέργειαν* occineret, ac tellem citaret, & auctorem Dionysium. Ita Macarius Antiochenus, hereticus in Actione secunda Synodi sextæ: Ita Cyrus Alexandr. eodem infectus errore, in Anathematismo septimo. Ita Pyrrhus in Disputatione cum Maximo: ac ceteri omnes eadem insania perciti: qui *διαυγρικῶς ἐνέργειαν* illam sic a Dionysio nominatam interpretati sunt, quod ab sola Divinitate, una & simplex actio producta, per humanam naturam, quasi per instrumentum, ac vehiculum, foras erumperet. De quo Dionysii loco postmodum uberior a nobis instruetur oratio, cum adversus Monothelitas disputabitur, ubi & de aliis Sancto.

ſtorum , atque orthodoxorum Patrum locis agemus , quibus abuſi illi ſunt ad hæreſim ſuam adſtruendam .

Præter hæc vero etiam alia teſtimonia corraſerunt ex ſuppoſitiis libris : velut ex eo , quem Mennas Conſtantinopolitanus ad Vigili-um ſcripſiſſe ferebatur : quem pro confic- & pseudopigrapho Synodus ſexta damnavit , & proſcripſit : cum quidem multum illo uſi ſint hæretici iſti . Tum ex germanis alioqui Sanctorum Patrum monimentis ſententi- as aliquot excerptæ : ſed nec integras ; nec ex fide , aut ad auctorum ſenſum explicatas ; ut in ſexta Synodo palam oſenſum eſt : quod quidem ſuo loco declarabitur .



CAPUT III.

*Quodnam Monothelitarum dogma fuerit . 1. Unam in Christo voluntatem constituentes variis modis interpretati sunt . 2. Ab quibus hæreticis propagati sunt. Inter alios a Nestorio ortum accepisse dicuntur : quod valde mirum sit . 3. Præcipue autem ab Apollinaristis , & Monophysitis . 4. De Ecthesei Heraclii , & Typo Constantis ; in quibus veteres constitutum ajunt , unam voluntatem , & unam actionem inesse Christo . 5. Sed aliter habere videntur . Nam Ecthesi nec unam , nec duas operationes dici patitur : voluntatem tamen unam callide profitetur Typus neque operationes , neque voluntates duas , unamve . 6. Excituntur arcana illius hæresis : 7. Ex quibus colligitur , unam operationem minus audacter , quam voluntatem unam ab illis prædicatam fuisse . 8. Cujus ratio deinceps exponitur , 9. Ex *ἰρρηκίας* proprietate , 10. Et voluntatis . 11. De Honorio Romano Pontifice ; 12. Qui ab hæresis illius suspicione purgatur .*

I. **Q**UÏ adversus Monothelitarum hæresim ab antiquis edita Patribus monumenta legerit , multiplicem & absonam fabulæ ejusdem ab illis explicandæ rationem fuisse comperiet , quam hic paucis , quoniam ita necesse videtur , exponendam censui .

In

In primis illa, quam superiori capite tradidi, communis, & usitata maxime ponenda est; quæ unam, & simplicem in Christo voluntatem, & actionem constituit. Hanc Macarius Antiochenus in sexta Synodo profitetur; dum *negat se duas voluntates, aut actiones duas asserere in Incarnatione Christi Domini: sed unam voluntatem, & theandricam actionem*. Quam etiam divinam esse dumtaxat, idem postea confirmat: ita ut humana nulla voluntas, neque operatio fuerit in Christo. Macarii verba paullo ante descripsimus.

Postea Catholicorum disputationibus fracti, & convicti, ne Monophysitarum hæresi, tot Synodicis sententiis oppressæ, ac prostratæ affines esse viderentur, atque unam in Christo naturam asserere, *duas fassi sunt operationes ob diversitatem naturarum, sed duas unam propter unionem*, ut in Anastasii Collectaneis testatur Maximus Martyr. Atque hoc Pyrrhus in Disputatione cum eodem Maximo declarat hunc in modum. *Quemadmodum ex duabus naturis unum quiddam dicimus esse compositum, ita potest a nobis usurpari ex duabus voluntatibus naturalibus una quædam composita: ut & duas asserentes voluntates, propter naturalem in Christo differentiam naturarum: & unam constituentes, propter summam unionem, de meris vocabulis conflicari inter se desinant*.

Rursus iidem hæretici, nefarii dogmatis

invidiam non ferentes , eo-confugerunt , ut nec unam voluntatem in Christo , nec duas nominandas putarent ; quod neutrum in Scriptura , neque in Synodis , aut Sanctorum Patrum monumentis diserte significaretur. Quod sub ipsum maxime primordium nascentis illius sectæ fecerunt . Ita Sergius Constantinopolitanus , qui unus fuit ex conditoribus istius hæresis , Cyro Alexandrino suavit , ut deinceps nec unam , nec duas voluntates exprimi pateretur : quod ad Honorium Papam ipse scripsit . Idem continebat decretum Heraclii , sive potius Sergii , quæ appellata est *Ekthesis* ; nec non Constantis , qui nepos fuit Heraclii , Typus , ut supra memini , & postea fusius explicabitur . Denique Sergii unius inconstantem , ac versatilem in hæretico suo profitendo dogmate levitatem , erudite prosequitur , & exagitat Maximus Martyr in Collat. cum Pyrrho ; quam varietatem hic brevitatis causa explicare omitimus .

II. Nunc quos revera auctores habuerint amentia suæ stolidi Monothelitæ , & quorum ex hæresibus venena collegerint erroris non magis impii , quam inconsulti , paucis exequemur . Hoc vero difficile non est , si quis multiplices illas factiones hæreticas percurrat , quæ Incarnationis sinceram rationem inventis conturbaverunt suis . Ac plerique tum in Synodo sexta Oecumenica , tum in Lateranensi sub Martino Primo habita me-
mo-

morantur . Sunt autem isti , Manes , Arius , Apollinaris , Eutyches , Severus , Theodosius , cum Monophysitarum reliqua secta : & quod incredibile videatur , etiam Nestorius . Nam priores illos , qui aut nullam aliam , veram quidem , ac solide extantem naturam , præter divinam , Christo tribuebant : aut humanam non ex toto , sed potiore sui parte mutilatam , & intellectu ac ratione carentem : aut hanc in divinam abiorptam fuisse dicebant , & in unam coaluisse naturam : hos , inquam , omnes unicam voluntatem , & actionem in Christo constituisse , non valde mirari subit : hoc enim ex illis opinionibus tam clare sequitur , ut majori declaratione non indigeat . De Nestorio , singulare prorsus est , quod ipsum tamen illius ex verbis ostendit Agatho Romanus Pontifex , in Epistola Synodica , quam ad Constantinum Pogonatum misit , quæ in sexta Synodo recitata est .

Ea verba sunt hujusmodi , ex libro secundo , quem inscripserat *præclaræ initiationis . Inconfusas custodimus naturas , non secundum substantiam , sed voluntatis tantum arbitrio copulatas , propter quod earum unam voluntatem , & operationem , & dominationem statuimus dignitatis æqualitate ostensas .*

Hinc Abbates , & Monachi Orientales in libello , quem Synodo Lateranensi sub Martino primo Romæ habitæ contra Monothelitas obtulerunt , asserunt illos cum Severo , & Apollinari , ac Nestorio , & Theodoro ,

nempe Mopsuesteno, consentire.

Maximus vero Monachus, idemque Martyr, in Disputatione cum Pyrrho, Nestorium scribit duas personas Christo, & unam operationem asingere, nimirum *σχετικὸν*, hoc est *solius habitus*, & *affectus*; qualem *ἰνῶσις*, id est *unionem* naturarum illarum, immo personarum, esse credebatur.

III. Quocirca Monothelitarum error confectarium quoddam fuit, & appendicula hæresis Eutychianæ, sive Apollinaristarum, & unius omnino naturæ defensorum: tametsi duas aperte, ac diserte naturas in Christo profitebantur, ut ex omnibus antesignanorum illius sectæ formulis, ac confessionibus Fidei, aliisque scriptis intelligitur, quæ in Sexta Synodo citata, & antecedenti a nobis capite commemorata sunt. Vide inter alia Marcarii Antiocheni *ἰνδικοῖς* in Actione octava Synodi illius.

Quamquam Martinus Papa in Lateranensi Synodo, recitatis Theodori Pharanitæ principis illius hæresis verbis, eundem accusat, adeoque sectam universam, tamquam veram, ac solidam carnem, molemq; corporis Incarnationi detraxerint; sola ejus relicta specie, vel, ut Martinus loquitur, phantasmate. Verba Pharanitæ, quæ Græce in sexta Synodo recitata sunt, sic habent: „ Nam
» anima nostra non tantam a natura vim ha-
» bet, ut nativas corporis proprietates ab
» hoc, vel a seipsa possit expellere: nec
» adeo

„ adeo in potestate corpus suum rationalis
 „ obtinet anima, ut quæ illi insita sunt, &
 „ naturalia, velut molem, fluxionem, &
 „ colorem, pervincere possit, atque iis
 „ ipsum aliquando liberare. Quæ omnia in
 „ suscepta natura Salvatoris nostri Jesu Chri-
 „ sti narrantur, & facta sunt in divino, ac
 „ vivifico corpore. Nam illa citra molem,
 „ & ut ita loquar, incorporaliter absque di-
 „ reptione processit e vulva, & sepulchro,
 „ ac per fores; nec non tamquam supra so-
 „ lum, ita supra mare pedibus ambulabat. „
 Quibus ex Theodori verbis Martinus Papa,
 illum asserit veram negasse carnis, hominis-
 que substantiam in Christo. *Nam si absque*
tumore, & incorporaliter ex utero processit,
& super dorsum maris deambulavit, hoc
ipsum quod deambulabat, & procedebat, er-
go phantasma erat: ac Patrum deinceps au-
 thoritate hæreticum illum refellit. Verum
 etsi clam, & in sinu Monothelitæ errorem
 istum alerent, ac foverent, non tamen pa-
 lam præferebant. Et fieri potest ut Theo-
 dorus ille, cum molem, ac cetera corpori
 insita Christum ademisse sibi asserit, non pro-
 prietates ipsas, sed usum, effectumque pro-
 prietatum intellexerit: hoc est, ut philoso-
 phorum scholæ loquuntur, *actum secundum,*
 non *primum*, quo sensu non tam damnanda
 vox illa foret.

IV. Ut hanc de Monothelitarum hæresî
 disputationem finiam, duo adhuc explican-

da restant; unum, de ambobus ediſtis totidem Imperatorum, quæ in illius ſectæ gratiam ſcripta ſunt, Ectheſi, ac Typo: alterum, de Honorio Papa, cujus nomini conſtata eſt invidia propter ejuſdem erroris ſuſpicionem. Horum prius idcirco propriam, & diligentem animadverſionem requirit, quod duæ illæ formulæ adeo perplexis, & obſcuris verbis, ſententiisſque conceptæ ſunt, ut quid ſtatuant, & quatenus invicem diſſent, aut congruant non ſit facile diſcernere, ſed nec ſatis ea conſtare videntur, quæ veterum aliqui de illis memoriæ prodiderunt. Ectheſim ab Heraclio promulgatam unam in Chriſto voluntatem, & operationem decreviſſe, Martinus primus docuit in Allocutione ad Patres Synodi Lateranenſis habita, his verbis: „ Et Cyrus quidem ante hos decem & „ octo annos, unam operationem in Chriſto „ in eadem Alexandriæ urbe definiens Di. „ vinitatis ejus, & humanitatis, ad ſimilitu- „ dinem Acephalorum hæreticorum ordinan- „ do capitula numero novem in ambone præ- „ dicans, cum anathemate qui ſic non ſape- „ ret, impie promulgavit. Sergius autem „ per Epiſtolam propriam ad denominatum „ Cyrum ſcriptam, eandem ſimiliter unam „ operationem ſuſcipiens, cum eo irratio- „ nabili præſumptione auſus eſt confirmare. „ Et non ſolum hoc, ſed etiam poſt aliquot „ annos ejuſdem Cyri novæ adinventionis, „ hoc eſt per nuper duodecimam indiſtio-
„ nem

„ nem elapsam , hæreticam & ipse conscri-
 „ bens Ecthesim fidei, sub nomine tunc im-
 „ perantis Heraclii , unam in eadem Salva-
 „ toris nostri , secundum impium Apollina-
 „ rem , voluntatem , & operationem insti-
 „ tuit , ex hoc quod dicit imprudenter , se-
 „ qui operationem voluntatem .

Maximus vero Martyr , initio Collationis
 cum Pyrrho habitæ , *unam in Christo volun-
 tatem per Ecthesim promulgatam esse scribit .*
 Idem porro , in altera Collatione , quam
 Constantinopoli cum principibus habuit , di-
 cit ea , quæ Cyrus in novem capitulis Ale-
 xandriæ proposuerat , *per ecthesim damnata,*
& quæ dogmatizaverunt per ecthesim , per
typum irrita statuisse , ac deposuisse semetipsos
toties . Sed Ecthesis verba hic adscribere ,
 ac perpendere satius est , quibus dogma suum
 exponit .

V. Extat Heraclii Ecthesis in Secretario
 quarto Synodi Lateranensis sub Martino I.
 celebratæ . Typus quoque in eodem Secre-
 tario legitur . In neutro vero edicto decerni-
 tur , unam Christi operationem esse : Immo
 ita potius præcipitur , ne quis vel unam , vel
 duas profiteatur . Ecthesis , post longam &
 Catholicam explanationem Trinitatis & In-
 carnationis : „ nullo modo concedit alicui ex
 „ omnibus unam , vel duas dicere , sive do-
 „ cere operationes in divina Domini Incar-
 „ natione ; sed magis , sicut sanctæ , &
 „ universales tradiderunt Synodi , unum ,

„ eundemque Filium unigenitum Domi-
 „ num nostrum Jesum Christum verum,
 „ Deum confiteri operari divina, & huma-
 „ na. „ Addit subinde rationem, ob quam nec
 „ unam, nec duas dici patiatur operationes: „
 „ eo quod unius quidem operationis vox,
 „ licet ab aliquibus Patribus dicta est, tamen
 „ turbat, & extraneat quorundam aures,
 „ arbitrantium in interitum eandem prola-
 „ tam esse duarum naturarum, quæ in una
 „ subsistentia unitæ sunt in Christo Deo no-
 „ stro. Similiter autem & duarum opera-
 „ tionum vocem multos scandalizare, utpo-
 „ te a nemine dictam Sanctorum, & præci-
 „ puorum Patrum: sed & sequi in eo, ut
 „ duas confiteamur voluntates, contrarie ad
 „ invicem venientes, Deo quidem Verbo
 „ „ volente saluberrimam passionem explere,
 „ „ Incarnationem autem in eo factam obviam
 „ euntem ipsius voluntati, & oppugnantem,
 „ & exinde duo contraria volentes introdu-
 „ ci: quod impium est, & extraneum,
 „ Christianici dogmatis: „ Postquam autem
 „ de *ἰσoperύα*, id est *operatione*, statuit sic, ut
 „ neutri parti præjudicare, sed utraque sup-
 „ pressa, paci & concordie cavere videretur;
 „ mox de voluntate manifeste virus hæreticum
 „ expromit; unam in Christo confitens. Unde
 „ Sanctos Patres, inquit, in omnibus, & in
 „ hoc sequentes, unam voluntatem Domini no-
 „ stri Jesu Christi verissimi Dei confitemur.

At vero Typus absolute vetat tam volun-
 ta-

tatem, quam operationem unam, aut duas nominari; ut *qui sunt Catholica, & Apostolica Ecclesiæ non habeant licentiam invicem a presenti, de una voluntate, aut una operatione, aut duarum voluntatum, aut duarum operationum qualemcumque proferre altercationem, aut contentionem, aut rixam.*

Igitur Ecthesis hoc habet proprium, ut operationem dici unam, duasve prohibeat: voluntatem vero unam aperte confiteatur. Quod sane jure mirandum videtur. Nam & voluntas ipsa quoque est *ἰρίπυα*, id est *operatio*; quare eadem utriusque ratio est. Quidnam igitur est causæ, cur voluntatem potius unam, quam operationem profiteri Ecthesis permiserit? Antequam respondeam, nonnulla de usu vocum illarum observanda sunt, quem apud sectæ illius principes animadvertimus.

VI. Monothelitarum hæresis prima velut eruptio facta est, uti supra docui, anno Heraclii 20. ex Athanasii Jacobitarum antistitis callida sciscitatione, qua illud de Imperatore quæsitum, utrum una Christi operatio profitenda esset, an duæ. Theophanes, Cedrenus, Miscella, alique passim Annales Græci, non minus de voluntatum, quam de actionum numero interrogatum esse produnt Heraclium ab Athanasio, & ab illo Cyrum Lazicæ Metropolitanum, ab utroque vero Sergium Constantinopolitanum. Verum ex Cyri, & Sergii Epistolis constat, de *opera-*

tione sola nominatim factam esse mentionem. Cyrus Heraclii interrogatione perculsus, ut ipse refert, cum expedire non posset, una esset an duæ in Christo *ἐνέργειαι*, ac duas esse contenderet ex Leonis Papæ verbis, ostensas sibi ab Heraclio ait litteras Sergii, quibus percontanti sibi, unam esse tantummodo *ἐνέργειαν* responderat. Hac de causa scribere se ad illum Cyrus dicit Epistolam, eam, quæ recitata est in sexta Synodo. Atqui solius *ἐνέργειας* ibi meminit Cyrus, non *voluntatis*. Apparet ergo de *voluntatibus* supplevisse Græcos historicos, quia revera consequens erat ex *operationum* numero, *voluntatum numerus*. Quin & Cyrus ipse, postquam Alexandrinus Patriarcha factus, est, in anathematismo suo septimo, unam *Θεοῦ ἐνέργειαν ἐνέργειαν*, id est *Dei virilem operationem*, fatendam edixit, non *voluntatem*.

VII. Sergius vero in Epistola, qua priori a Cyro ad se missæ, antequam Alexandrinum thronum obtineret, respondit, quæsitum ab eo de sola *ἐνέργεια* significat, non de voluntate. Ideo tamen subinde ex suppositio Mennæ Constantinopolitani Patriarchæ libello ad Vigilium Papam, verba quædam citat, quibus asseritur *una Christi voluntas, & una vivifica operatio*.

Et in Epistola ad Honorium Papam, in qua causæ totius statum, & orientis hæresis illius ac controversiæ seriem refert, de duabus operationibus interrogatum se ab Cyro, nec non ab

ab Sophronio, scribit: ac se utique suasisse ut ab unius, aut duarum operationum appellatione desisterent: quod prior, etsi ab quibusdam Patribus usurpata legitur, novitatis habet offensionem, tamquam ad naturarum duarum negationem pertineat: posterior vero, duarum operationum, præterquam quod a nullo veterum memorata est, consequens hoc parit, ut *duæ voluntates invicem contraria ponantur, ex quo volentes duo, & quidem contraria colliguntur, quod est impium: cum impossibile sit, in uno eodemque subiecto duas simul voluntates subsistere.* Ex quibus Sergii verbis liquet, aliter ab eo statutum esse de operatione, quam de voluntate, nec de ambarum unitate, aut numero, ac discrimine par & idem illius fuisse iudicium. Siquidem voluntates dici duas nullo modo patitur: operationes vero duas non prorsus condemnat: sed pacis, & concordiae gratia, & ut Græci loquuntur, κατ' οἰκονομίαν, taceri, ac suppressi iubet, non minus, quam operationem unicam; cuius utique professionem non per sese damnandam arbitratus est.

At Theodorus Pharanites, quem novæ istius hæresis auctorem Martinus Papa primus nominat, ut & Stephanus Dorensis, non solum ἐνέργειαν unam, verum etiam voluntatem unam asserit: ut ex illius verbis cognoscitur, quæ supra descripsimus. Quod ipsum & Paulus Constantinopolitanus Patriarcha fecit in Epistola ad Theodorum Papam: nec non

Macarius Antiochenus in sexta damnatus Synodo; & Pyrrhus, quorum dicta superius reddidimus.

VIII. Ex omnibus illis evidens est, Monothelitarum principes, & auctores defugisse nonnumquam apertam confessionem unius operationis in Christo; voluntatis autem unius præ se tulisse: tamen si utrumque ex illorum assertione, ac doctrinæ principiis erat consequens. Hujus tergiversationis manifesta sunt in superioribus argumenta: præsertim in Heraclii Ecthesi. Nec dubitandum est, quin mysterii aliquid, & arcani consilii in hac re fuerit, cujus non contemnenda sit inquisitio.

Hoc ut palam faciamus, quod quidem affectos non esse confidimus, utriusque vocabuli, ἐνέργειας, & θελήματος, considerata notio est, & usus in communi sermone. Nec nova, vel longa explicatione est opus, ut quod ad ἐνέργειαν spectat hic expendamus. Satis enim erit, ne ab instituta brevitate recedamus, innuere, ἐνέργειαν appellari, naturalem, & necessariam τῆς ὕσεως, id est substantiæ motionem, quæ naturam comitatur, ex eaque statim proficiscitur. Scitum enim illud est Græcorum maxime Theologorum, consensu; velut Maximi, Joannis Damasceni, ac ceterorum, qui Monothelitarum hæresin impugnaverunt; Naturam esse nullam, aut substantiam, quæ sit ἀνενέργητος.

Itaque naturæ omnis sua est attributa propria, & ὡσιωδης operatio, quæ eam sequitur.

Sic

Sic prima viventis actio, & motio, vita est ipsa; quæ vegetabilis animæ functiones continet: sensu præditorum princeps operatio, interioris est sensus agitatio perpetua: intelligentium *ἐνέργεια* rationis est continuus usus: Quæ hic uberius enucleanda non sunt. Hæc est *φυσικὴ ἐνέργεια*, quæ scilicet naturæ unicuique convenit, & ei necessario adjungitur. Quamquam aliæ quoque sunt *ἐνέργειαι*, minime necessariae, quæ ex naturalibus, principiis, & facultatibus, non tamen naturaliter, hoc est determinate, & necessario, ac continenter oriuntur: cujusmodi sunt liberæ hominum, ac ratione præditorum actiones. Sed *ἐνέργεια* vocabulo frequentius prioris generis operatio subjicitur apud Græcos Theologos, præsertim cum de Christi actione disputatur.

IX. Jam *voluntatis* nomen in his controversiis, quando actionem potius, quam potentiam agendi significat, quod interdum evenit contra, atque in *ἐνέργεια* fieri proxime dictum est, non naturalem, sed liberam arbitrii nostri motionem indicat. Nam licet actiones voluntatis, sive *voluntates*, aliæ sint naturales, & necessariae; aliæ contingentes, & liberæ: tamen sæpius *voluntatis* nomen, & ab hoc deflexum *voluntarii*, cum absolute, ac simpliciter usurpantur, pro libera sumuntur. Sic Sanctus Augustinus ad Psalmum CXXXI, de Davide in potestate Saulem habente loquens: *Habebat illum in potestate,*
in-

inquit, & non necessitate, sed voluntate *pepercerat*: ac passim tam apud profanos, quam apud sacros Scriptores *voluntarii* vox non aliud quam liberum sonat, hoc est quod deliberatione, & electione fit.

Græci Theologi *voluntatem* bifariam dividunt, hoc est actionem ipsam volendi, quam *θέλημα* vocant. Aliud *θέλημα* dicunt esse *φυσικόν*, aliud *γνωμικόν*. Est autem *γνωμη* Latinis *sententia*, hoc est iudicium, quod *πραῖτικον* nominant, quod ex consultatione oritur: quando post deliberationem, & anticipitem de optando alterutro cogitationem, ad unum aliquod adhærescimus, idque anteponendum esse decernimus alteri; quo ex iudicio sequitur electio. Ita Joannes Damascenus; cuius verba describere brevitatis gratia omittimus.

Maximus Martyr in Disputatione cum Pyrrho, *γνώμην* definit *voluntatem quodammodo affectam, quæ cum habitudine quadam bonum vel verum, vel putatum amplectitur*: tum varias illius vocis significationes numerat, ad viginti octo. Porro in Christo negat fuisse *γνώμην*, eo quod ibi tantum sit, ubi boni aut mali dubia primo, tum libera est electio, cuiusmodi in Christo non fuit, quod & Joanni Damasceno videtur.

Jam vero Monothelitæ *θέλημα φυσικόν*, id est *voluntatem naturalem* dici nullo modo ferebant, eique Pyrrhus acerrime refragatur in Disputatione cum Maximo; ne si naturalis esset,

esset, esset item necessaria. Proinde θέλημα in Christo nonnisi γνωμικόν admittebant - quod & ὑποστατικόν, id est *personale* esse dicebant. Ex quo consequens fit unam tantummodo voluntatem in illo extitisse, quia si duæ forent, necesse sit eas mutuo sibi esse contrarias: adeoque alteram bonam, alteram, malam, quoniam hæc est τῆς γνώμης conditio.

X. Hinc apparet cur iidem hæretici ἐνέργειαν unam plerumque diffidenter, ac timide professi sint, nimirum ne naturas duas inficiari viderentur; eo quod ἐνέργεια est φυσική; atque ideo pro naturarum numero multiplicatur: θέλημα vero unicum esse, apertius, & constantius docuerint, rati plausibilis hoc ipso dogma suum fore: cum qui illud audirent, nihil eos putarent aliud velle, quam unam, id est consentientem, & concordem fuisse naturæ utriusque voluntatem; nec humanam ab divina discrepasse. Hinc etiam duarum voluntatum assertores Catholicos traducere solebant, tamquam pugnæ illius voluntatum in Christo, ac dissidii defensores. Deinde quia τὸ γνωμικὸν θέλημα, hypostasis proprium est (quippe velle simpliciter naturæ proprietas est; hoc autem vel illo modo velle, personæ est, uti Maximus docet) cum una sit hypostasis in Christo, consequens hoc esse videbant unicam esse voluntatem. Hoc vero plenius exponi solet in Scholis, cum de Christi voluntate ac libertate disputatur.

XI. Su-

XI. Superest ut de Honorio Romano Pontifice dicamus, qui inter Monothelitarum, principes in sexta Synodo notatus, & damnatus legitur. Non ero longior in illius causa disceptanda; quod eam plerique Catholici, & eruditi viri accurate susceperint, ac præsertim Baronius in Annalibus, alique plures, qui in ullam illius nomini suspensionem hæresis strenue depulerunt. Itaque pauca de hoc argumento libabimus. Cum Sergius Constantinopolitanus Antistes, uti supra memini, de dissidio recens exorto Cyrum inter & Sophronium, super operatione Christi, retulisset ad Honorium Papam, atque significasset, duabus in Christo positis operationibus, voluntates quoque poni duas, contrarias invicem, & repugnantes: se vero concordie gratia censuisse, nec unam, nec duas actiones nominandas; sed unum dumtaxat operantem: Honorius ad ea rescribens, Judicium illius, ac sententiam laudavit; & ita faciendum omnino decrevit. Unam porro voluntatem in Christo confessus est, & eam dicti sui rationem attulit; *quod a Divinitate natura nostra est assumpta, non culpa: nimirum natura ejusmodi, qualis ante peccatum condita est, non quæ post transgressionem depravata est.* Quocirca Honorius duas voluntates haud absolute Christo denegavit: sed tantummodo contrarias; cujusmodi in nobis ex corrupto naturæ statu reperiuntur. Etenim hunc de duabus voluntatibus sermonem ad Sergii, cujus Epistolæ
reipon-

responderebat, mentem accommodavit. At iste non simpliciter duas voluntates esse colligebat ex eo, quod Christo duæ tribuuntur operationes: sed duas contrarias. Ita enim Catholicorum sententiam invidiose solebant exponere Monothelitæ: quasi non aliter divinæ voluntati Christi humana possit adjungi, quam ut hæc ipsa carnalis, peccatrixque sit. Quemadmodum Macarius Antiochenus obitinatissimus hæresis illius defensor demonstrat qui humana caruisse voluntate Christum hoc argumento probat, quia carnalibus voluntatibus, & cogitationibus humanis caruit; (peccato scilicet infectis, & ab recta ratione dissidentibus.) Hoc modo Catholici complures Sancti & eruditi viri, qui per illud tempus floruerunt, Honorium excusant: ut Maximus Martyr in Disputatione cum Pyrrho: & Joannes IV. qui paullo post mortem Honorii, Romanam Sedem tenuit, in Epistola, quam in ejus defensionem scripsit ad Constantinum Imperatorem Heraclii filium, qui eodem, quo Heraclius mortuus est anno.

XII. Hic vero Monothelitarum fraus est animadvertenda, qui ambiguo sensu voluntates illas, quas duas negabant in Christo fuisse, sumptulerunt. Etenim fuit hæc illorum mens, ut in Christo nonnisi divinam inesse; humanam deesse voluntatem docerent. Quod hac ratione sunt probare conati; Si enim duæ voluntates essent, eas inter se contrarias fore dicebant: idque hominum exemplo monstrabant, in quibus innata est, & domestica pugna,

gna, quam agnoscit in se, deploratque Paulus Apostolus ad Romanos scribens, capite, septimo. Hanc autem non alia de causa fieri in nobis asseriebant, nisi quod diversæ sunt voluntates, carnales videlicet, ac spiritales: eo quod *caro concupiscit adversus spiritum, & spiritus adversus carnem*. Quo ex fonte peccati labes, & corruptela nascitur. Cum igitur constare hoc inter Christianos intelligerent, Christum Dominum non modo non peccasse, sed ne peccare quidem potuisse, ut peccati aditus omnes obstruerent, tam operationum, quam voluntatum diversitatem auferre se dicebant, ne repugnantiam inducerent. Ita Sergius in Epistola ad Honorium Papam argumentatur; ubi duas se negare ait operationes, quod *ex iis consequens sit duas agnoscere voluntates inter se contrarias: tamquam Deo Verbo volente salutarem impleri passionem: humana vero, qua in ipso inerat, natura illius obistente, ac repugnante voluntati, indidemque contraria volentes induci duos; quod est impium. Non enim fieri potest in uno & eodem subiecto duas simul, & circa idem voluntates subsistere*. Verum hæreticus iste subdole controversiæ statum alio transtulit, & voluntates illas duas, quarum invidiosam repugnantiam ad dogma suum probandum accommodavit, non ejusdem cum iis generis constituit, quas in suo dogmate præferebat. Quippe duæ voluntates illæ, quas detrahare Christo volebat, humana sunt & divina; ex quibus hanc solam relin-

relinquebat; quas autem in exemplum attulit tam hominibus innatas, vereque inter se pugnantes, quam in Christo non reipsa, sed in speciem dumtaxat contrarias, eæ non humana & divina, sed humanæ sunt ambæ, nimirum superioris animæ partis, & inferioris: quarum hæc carnis, illa spiritus appellari solet. Etenim duæ istæ vere inter se conflictant in nobis, & quidem acerrime, ut *non quæ volumus illa faciamus*. In Christo vero non erant contrariæ: ut probatura Theologis, cum agunt de duplici voluntate Christi.

XIII. Quamobrem mirum videri nemini debet, si Honorius fraudis illius, & hæreticæ calliditatis ignarus, ad illa, quæ in Epistola sua, & quæstione posuerat Sergius, simplici ac bona fide responderit; & eo sensu duas in Christo negaverit inesse voluntates, quo ab Sophronio, aliisque Catholicis asseverari, falso & calumniose ille narrabat. Itaque totus in hoc incumbit Honorius, ut ab Christo vitiatam, & Adami labe corruptam minime assumptam esse naturam approbet, sed incorruptam, & integram; quæ vacua sit concupiscentiæ morbis, & motibus spiritui, ac rationi contrariis, quæ sunt discordes illæ, & certantes contra se invicem voluntates. Vide Honorii Epistolam priorem ad Sergium.

Hujusmodi fuisse mentem Honorii egregie demonstrat Joannes IV. in Epistola ad Constantinum Imperatorem; ubi hæc inter alia scribit. *Et idcirco, inquit, unam voluntatem,*

tem, secundum primam formationem *Adæ* naturalem humanitatis suæ Dominus noster *Iesus Christus* habere dignatus est, non duas contrarias; quemadmodum nunc nos habere dignoscimur, qui de peccato sumus *Adæ* geniti, &c. Quapropter & nos, qui per prævaricationem, & peccatum illius nascimur, duas contrarias habere voluntates dignoscimur: duas autem dico, mentis & carnis invicem reluctantes. Tum paullo post: Ergo unus & solus est sine peccato mediator Dei, & hominum homo *Christus Iesus*, qui in mortuis liber conceptus, & natus est in dispensatione, itaque sanctæ carnis suæ duas nunquam habuit contrarias voluntates, nec repugnavit voluntati mentis ejus voluntas carnis ipsius, &c. Unde scientes quod nullum in eo, cum nasceretur, & conversaretur, esset omino peccatum; decenter dicimus, & veraciter confitemur, unam voluntatem in sanctæ ipsius dispensationis humanitate, & non duas contrarias mentis & carnis prædicamus; secundum quod quidam hæretici velut in puro homine delirare noscuntur. Secundum hunc igitur modum jam dictus decessor noster prænominato *Sergio Patriarchæ* percontanti scripsisse dignoscitur, quia in Salvatore nostro duæ voluntates contrariæ, id est in membris ipsius penitus non consistunt, quoniam nihil vitii traxit ex prævaricatione primi hominis.

XIV. Idem fere *Maximus Martyr* de *Honorio* testatur in *Epistola ad Marinum* quæ est in *Anastasio Collect.* pag. 26., idque *Joan-*

Joannis Abbatis auctoritate confirmat, qui jussu Honorii Papæ Epistolam illam Latine dictaverat: quod uberius exponit in Disputatione cum Pyrrho. Quare, uti tam Maximus utrobique declarat, quam Joannes IV. de sola voluntate humanæ naturæ locutus est Honorius, cum eam in Christo fuisse singularem asseruit; quod ad quæstionem præcise responderet, & ibi, ubi morbus erat, remedium adhibendum putaret. De divina vero voluntate tacuit; quia nulla de ea controversia restabat, quæ in Chalcedonensi Concilio perempta penitus fuerat, ubi constituta est naturæ duplicis, integræ, & sine ulla confusione manentis professio, cujusmodi distinctas operationes, & voluntates necessario consequentes habet.

Jam vero quæ ad purgandum Honorium pertinent, quatenus in sexta, & septima Synodo, aliisque peritricus, ac pro hæretico damnatus videtur, accuratissime disputavit Baronius in Annalibus, ac certas exposuit rationes, propter quas inter proscriptos illis in Synodis hæreticos nomen Honorii resederit. Quare verbum de iis non amplius addam; ne supervacaneam perfecta jam in re operam ostentare videar.

DISSERTATIO

ADVERSUS HÆRESIM MONOTHELITARUM .

I. **M**onothelitarum error Scripturæ Sacræ testimoniis in primis refellitur, maxime ex illis Christi verbis, Matthæi 26. *Pater, si possibile est, transeat a me Calix iste: Verumtamen non sicut ego volo, sed sicut tu vis.* Et Lucæ 22. *Pater, si possibile est, transeat a me Calix iste: Verumtamen non mea voluntas, sed tua fiat.* Et Joannis 6. *Descendi de Cælo, non ut faciam voluntatem meam, sed voluntatem ejus qui misit me, ut perficiam opus ejus.* Multis aliis Scripturæ Sacræ locis urget Monothelitas S. Maximus in Disputatione cum Pyrrho. *In Evangeliiis, inquit, dictum est de Domino, quod & postera die voluit Iesus intrare in Galilæam.* Perspicuum est quia quatenus non aderat illic, voluit intrare. Non aderat autem humanitate, Divinitate enim nusquam abest. Igitur quatenus homo, & non quatenus Deus voluit intrare poteratque quatenus homo velle. Et in alio loco rursus: *Volo ut ubi ego sum, & ipsi sint.* Si Christus quatenus Deus, est supra ubi: igitur quatenus homo, vult ut ubi est, sint etiam ipsi. Atque ita idem quatenus homo potestate voluntatis præditus erat. Et alibi dici-

dicitur: *Ambulabat Iesus in Galilæa; non enim volebat in Judæa ambulare, quia querebant eum Judæi interficere.* Si ambulatio natura erat carnis, & non Divinitatis secundum hypostasim ei unitæ: igitur quatenus homo ambulans in Galilæa, nolebat ambulare in Judæa; & poterat velle, quatenus homo. Item in alio loco Discipuli dicunt: *Ubi vis paremus tibi comedere Pascha.* Si ejus Pascha est eorum qui sunt sub Lege; fuit autem Dominus, quatenus homo, non quatenus Deus, sub Lege: igitur quatenus homo, volens comedit Pascha. Alibi dicitur: *Circa quartam vigiliam noctis venit ad eos ambulans supra mare & voluit præterire eos.* Si quis hoc de eo, quatenus Deus erat, dictum esse exponat, cogetur is dicere, interceptam esse Divinitatem terminis corporeis, supra (inquam) & infra, post dextro & sinistro. Sin vero hæc dicta esse de eo, quatenus homo erat, dixerit; Igitur poterat velle quatenus homo. Præterea Divinus Apostolus in Epistola ad Hebræos de Christo ait: *Factus obediens usque ad mortem, mortem autem Crucis.* Volens igitur obedivit, an non volens? Si quidem non volens; tyrannis merito, & non obedientia dicetur. Sin vero volens; obediens autem, non quatenus Deus, sed quatenus homo fuit. Igitur quatenus homo poterat velle. Item David in Christi persona ait: *Sacrificium & oblationem noluisti, corpus autem perfecisti mihi In*
capi-

capite Libri scriptum est de me, ut faciam voluntatem tuam; Deus meus, volui. Quod autem Pater dicatur Deus Christi, quatenus Christus homo est, & non quatenus Deus; sicut & Pater dicitur ejus quatenus Deus, & non quatenus homo, nec adversarios abitor dubitare. Si igitur quatenus homo est, & non quatenus Deus, ejus Deus est Pater: igitur etiam quatenus homo, & non quatenus Deus voluit voluntatem Patris & suam facere. Voluntas enim Patris, ipsius est cum & ipse substantialiter sit Deus. Quod si ita est, non solum, quatenus Deus, & ejusdem cum Patre substantiæ, poterat velle, sed etiam quatenus homo, & ejusdem nobiscum substantiæ.

Item Moyses Deum introducît dicentem in creatione hominis: *Faciamus hominem ad Imaginem nostram, & ad similitudinem.* Si igitur homo est imago divini naturæ: natura autem divina liberæ potestatis est; igitur & imago, siquidem similitudinem archetypi servat, natura est liberæ potestatis. Quod si ita est; factum est autem, quod erat natura archetypum, etiam natura imago: Igitur idem secundum ambas suas naturas poterat natura velle. Demonstratum enim prius est voluntatem esse potestatem naturæ liberam. Est autem sciendum, dici liberam potestatem æquivoce, sicut & naturam. Aliter enim accipitur in Deo, in Angelis, in hominibus. In Deo quidem supersubstantialiter. In An-
gelis

gelis vero tamquam concurrente aggressionem cum habitu, & omnino interpositionem temporis non admittente: in hominibus autem, tamquam habitu prius tempore ipsa aggressione cogitato. Si enim Adam volens obedivit: & volens spectavit, & cum voluisset, comedit; igitur voluntas est in nobis, quæ primum afficitur. Quod si voluntas in nobis primum patitur, hanc autem Verbum, cum caro factum est (ut isti sentiunt) non assumpsit. Non ergo positus sum ego extra peccatum, quod si extra peccatum non sum positus, non sum consecutus salutem; siquidem quod non est assumptum, non est curatum.

Quæ hæcenus dicta sunt, diserte probant humanam in Christo voluntatem. Quod autem & divinam habuerit, demonstrat S. Maximus ex his ipsius verbis: *Jerusalem, Jerusalem quæ occidis Prophetas! Quoties volui congregare filios tuos? &c.* perspicuum enim est, quod non quatenus homo hoc dixit, siquidem recenter factus fuerat homo; sed quatenus Deus, qui varios modos sapientis providentiæ suæ circa hominem demonstravit, quibus voluit naturam ab errore externorum abducere, & sibi aggregare, ipsa autem noluit. Rursus ait: *Sicut Pater suscitavit mortuos & vivificat, sic & Filius, quos vult, vivificat.* Sicut adverbium est comparisonis: comparationes autem sunt in his quæ sunt ejusdem substantiæ. Non potest igitur dici hoc de Christo secundum humanitatem. Igitur

docuit nos Salvator , quod sicut Pater Deus existens , voluntate mortuis tribuit vitam : sic etiam ipse , quippe cum ejusdem substantiæ sit , & ejusdem voluntatis , quibus vult , vitam præbet .

II. Refellitur Monothelitarum error testimoniis SS. Patrum ; scilicet S. Dionysii lib. 4. De Divinis Nominibus , cap. 2. „ Discreta „ est autem , ait , benignissima circa nos „ Dei operatio , per hoc quod secundum nos „ ex nobis , integre & vere substantialiter „ plasmari voluit Verbum , & operatus est & „ passus quanta humana ejus operationi congruunt præcipua . In his namque Pater & „ Spiritus nulla ratione communicavit &c. „ Hoc testimonium protulit Agatho Papa in sua Synodica .

III. S. Basilii lib. 4. adversus *Eunomium* , ubi hoc principium statuit : *Eorum qua diversa sunt substantia , non potest esse similis operatio* . Ex quo sequitur duas Christi esse operationes , sicut duas naturas . Et in lib. *Contradictionum adversus Appollinarem* laudato in VI. Synodo : „ Qualem (inquit) voluntatem asserit verborum scriptor , quam non „ vult Dominus fieri , dicens ad Patrem , „ Non mea voluntas , sed tua fiat ? Putasne „ intelligit in qualem delapsus est sermo ejus „ controversiam ? Appropinquat passio ; & „ tunc hujusmodi facta est oratio . Qui deprecatur , homo est , an Deus ? si Deum „ esse qui deprecatur , existimat , parem ei

„ cum hominibus inspicit impotentiam. Quo-
 „ modo igitur Deus, qui nullum habet indi-
 „ tum bonum, sed supernum invocat adju-
 „ torium? Dehinc quando reprehendebat
 „ Divinitas ptopriam voluntatem, bonum
 „ fuit, an malum quod volebat? Et siquidem
 „ bonum, quomodo non ad effectum perdu-
 „ citur quod volebat? Si autem malum, quæ
 „ est Divinitati ad malum familiaritas? *Et in-*
 „ *fra:* Quia igitur alia est humana voluntas,
 „ alia divina, loquitur quidem & quasi ex
 „ homine, quod infirmitati naturæ congruit
 „ qui nostras passiones assumpsit: adjungit
 „ autem secundam vocem, sublimem & Deo
 „ decibilem voluntatem præter humanam
 „ firmari pro hominum salute volens. Qui
 „ enim dixit: Non mea, humanam hoc fer-
 „ mone significavit: addens vero, Tua,
 „ ostendit conjunctionem suæ Deitatis ad Pa-
 „ trem cujus nulla voluntatis est differentia
 „ propter communitatem ad Patrem. Nam
 „ Patris dicens voluntatem, etiam Filii de-
 „ monstravit.

IV. Refellitur idem error ex S. Joanne
 Chrysostomo, Homilia LXVII. in S. Joannem.
 Qui locus in Synodo VI. laudatus est:
 ubi ad illa Christi verba, *Nunc anima mea*
turbata est, adnotat hunc in se carnis affectum
 suscepisse Christum, ut mortem timeret, ne
 dicerent homines non magnum illum facere,
 qui ad mortem perferendam ceteros hortaretur,
 cum ipse extra illius sensum esset. Qua-

re ipsum angorem illum & anxietatem revera pertulisse. „ Hæc autem assumptæ naturæ
 „ sunt (inquit) non Divinitatis. Idcirco dicitur:
 „ Nunc anima mea turbata est: (quandoquidem nisi ita se res habeat, quomodo
 „ consequens est quod dicitur, Pater, salva
 „ me ex hora hac?) Et ita turbata est, ut &
 „ liberari inde postulet, siquidem effugere
 „ posset. Hæ sunt humanæ naturæ imbecillitates.
 „ Et paullo post: Quod multum humanæ affectionis
 „ indicat, naturam mori detrectantem, ac præsentis vitæ retinentem.
 „ Quare ostendebant, non se ab humanis esse affectionibus immunem. Ut enim
 „ esurire crimini non vertitur, neque dormire:
 „ ita neque præsentem appetere vitam. At vero Christus corpus habuit, uti
 „ purum ab omni labe peccati, sic a naturalibus necessitatibus
 „ nequaquam alienum; alioquin corpus non esset.

V. Expugnatur idem error ex *Sancto Cyrillo* Libro XXXII. *Theauri*: qui locus in VI. Synodo laudatus est, in quo Christum esse Deum, & æqualem Patri ac consubstantialem esse probat, ex operandi consortio. „ Non enim (inquit) unam utique esse dabimus operationem Dei & opificii: ne aut creaturam ad divinam provehamus substantiam: aut divinæ naturæ præstantiam in eum, qui rebus factis convenit. redigamus locum. „ Nam quibus operatio & virtus citra ullum discrimen est una, iis speciei quoque consistere

„ stare necesse est unitatem .

Et libro *ad Theodosium* , ubi Verbum animam cum carne assumpsisse dixit : „ Per am-
 „ bo (inquit) præclaræ Incarnationis gere-
 „ batur Myſterium . Uſus eſt autem carne
 „ propria velut instrumento , ad exequenda
 „ carnis opera , & naturales infirmitates , &
 „ ab omni reprehensione remotas : anima
 „ vero propria ad humanas , & minime vitu-
 „ perandas affectiones ſubeundas . Nam &
 „ eſuriſſe dicitur , & ex longinquis itineri-
 „ bus laſſatus fuiſſe ; pavorem etiam ac me-
 „ tum , triſtitiam , & angorem , ac mortem ,
 „ in cruce ſuſtinuiſſe . „ Hic etiam locus in
 VI. Synodo laudatus eſt .

VI. Eundem refellit errorem *Ephraemius*
 Antiochenus Patriarcha, in libro Apologetico
 pro Synodo Chalcedonenſi , ubi propugnat
S. Leonem recte utramque formam in Chriſto
uno eodemque Filio : ſed differentem amborum
operationem ſtatuiſſe . Ibidem docet Chriſtum
 ambulantiem ſupra mare, proprietatem huma-
 næ ſervaviſſe naturæ . *Siquidem* , inquit , *vel*
ipſa ſpecies operationis perſuadere tibi poteſt ,
uti carnem in propria manſiſſe natura fateare .
Nam pedibus ſambulare , ſi non ſola ſpecie &
adumbratione fiebat , maniſeſtum eſt pedum
operationem fuiſſe naturæ noſtræ propriam . Ita
operationis genus ipſum carnem intra priſtinos
modos ſervatam eſſe demonſtrat ; & ingreſſum
hujusmodi corporeum & ſenſibilem omnes aſſe-
rint . Hic locus prolatus eſt in VI. Synodo .

Ibidem laudatur insigne testimonium *Anastasi Antiocheni*, in *Apologetico* pro *Epistola S. Leonis*: Si, inquit, illa per quæ Deum agnosci oportebat ipsum, divinitus operabatur; ex quibus autem necesse erat hominem eundem videri, humanitas efficiebat; altera prorsus est divinæ naturæ, altera humanæ operatio. Ibidem laudatum est testimonium *Joannis Scythopolitani Episcopi*, ex libro 8. contra *Severi blasphemias*, ubi in Christo duas operationes necessario distinguendas esse probat, quia Deus Verbum Divinitate sua creaturas omnes complectitur, eisque providentia sua consulit: quæ divinæ naturæ operatio est, anima vero Christi Deo Verbo secundum hypostasim unita non est intelligentiæ & cognitionis expers. Novit enim se unitam esse Deo; se creatis omnibus esse superiorem; se in utero *Beatæ Virginis* cum carne assumptam a Verbo, &c. Igitur, inquit, unius & ejusdem Domini nostri *Jesu Christi* duas operationes videmus, Deitatis ejus, & humanitatis inseparabiliter & incommutabiliter.

VII. *S. Maximus Martyr* *Monothelitarum* hæresim evertit cum in *Dialogo cum Pyrrho*, tum in capitibus quinquaginta: in *Traçtatu contra eos qui dicunt oportere dicere unam Christi operationem secundum exuperantiam*, quia dicunt divinam operationem, tamquam efficaciorē superare humanam. Item in *Epistola ad Nicandrum*, de duabus operationibus in Christo: In *Epistola ad Præpositos & Monachos Sici-*

Siciliæ, & in Gnomis demonstrativis 'duarum
in Christo voluntatum. Quo in Opusculo ma-
xime ex duplici natura duplicem Christi vo-
luntatem demonstrat. „ Si quibus (inquit)
„ Verbum unitatem habet cum carne , his a
„ Patre separatur; & quibus unitatem habet
„ cum Patre , his a carne disjungitur : est
„ autem una voluntas cum carne opinionem
„ istorum : igitur voluntate a Patre separabi-
„ tur. *Item* : Si quibus unitum est Verbum
„ cum Patre & Spiritu Sancto , his a carne
„ differt, est autem communi sententia Chri-
„ stianorum unitum voluntate cum Patre &
„ Spiritu Sancto : igitur voluntate carnis a
„ Patre & Spiritu Sancto differt. *Præterea* :
„ Hanc unam voluntatem necesse est istos di-
„ cere , vel naturalem , vel hypostaticam
„ esse . Si naturalem dicant , *consequens est*
„ eos dicere unam naturam Verbi & carnis :
„ sin autem hypostaticam , cogentur propter
„ tres hypostases , tres voluntates dicere .
„ 3. Si voluntas divinæ naturæ Verbi est crea-
„ trix omnium quæ facta sunt ; hæc autem
„ (*secundum ipsorum opinionem*) est voluntas
„ carnis ; plane creatrix est omnium quæ fa-
„ cta sunt , caro Verbi : atque ita sublata est
„ gloria Christianorum , esse scilicet creatam
„ carnem . Quomodo enim creatura est , quæ
„ ex nihilo creat , & quæ præcipuam divinæ
„ naturæ proprietatem habet ? 4. Si quia
„ una est voluntas Patris , & Filii , & Spiri-
„ tus Sancti , una etiam eorum natura esse a

„ Sanctis Patribus demonstrata est , una au-
 „ tem voluntas est Verbi & carnis eorum opi-
 „ nione , erit etiam una Verbi & carnis na-
 „ tura . Quod si una voluntas Verbi & carnis
 „ unam naturam non inducit , ac concludit :
 „ Nec in Patre , & Filio , & Spiritu Sancto ,
 „ una voluntas unam naturam inducet, & con-
 „ cludent : & inanis est Fides nostra , & ina-
 „ nis est prædicatio Patrum .

VIII. Refellit eundem errorem S. *Joannes Damascenus* , Oratione *De duabus Christi voluntatibus* , quam Latine vertit Doctissimus P. *Combesius* in Auctario Bibliothecæ Patrum . „ Si quidem (inquit) non assumpsit
 „ humanam voluntatem Christus , qua volun-
 „ tate factus est Patri obediens ? Si non as-
 „ sumpsit humanam voluntatem , qua volun-
 „ tate factus est sub lege ? Si non assumpsit
 „ humanam voluntatem , qua voluntate im-
 „ plevit omnem justitiam ? Si non assumpsit
 „ humanam voluntatem , non attulit ei reme-
 „ dium quod primum in morbum inciderat .
 „ Quod enim non assumptum fuit , non est
 „ curatum (ut ait Gregorius Theologus .)
 „ Quid enim offenderat, nisi voluntas ? Quod
 „ ergo offenderat , quod peccaverat , id de-
 „ mum amplius curatione egebat . Quod si
 „ neges id ab eo assumptum quod peccave-
 „ rat ; fateare necesse est , nec peccat ricem
 „ quidem ac ægram naturam eum assumpsis-
 „ se : Quod si non assumpsit , nec humanam
 „ assumpsit naturam: ipsa quippe est quæ pec-

„ caverat . Si non assumpsit humanam volun-
 „ tatem , quomodo antequam cognoscat bo-
 „ num ac malum , non acquiescet malitiæ ut
 „ eligat bonum ? Non enim divina voluntas
 „ velut suasionem vel non acquiescit , vel ac-
 „ quiescit , aut eligit . Itaque non acquiescit ,
 „ aut paret malitiæ , libere , ut homo , pa-
 „ rens ac obtemperans voluntati paternæ .

Ibidem probat *S. Joannes Damasc.* voluntatem esse naturæ , non personæ ; atque ita duas esse in Christo voluntates , sicut duæ naturæ sunt . Præmittit bifariam sumi voluntatem ; primo pro vi qua volumus , ac pro re quæ a natura voluntati subiecta est . Secundo pro modo usus voluntatis , ac pro eo quod sic volumus , quodque pro nostro arbitrato ac libidine voluntati subijcitur . Subsumit autem , falsum esse quod vis voluntatis , seu velle simpliciter , ad personam pertineat : quod ita probat . Omnis homo vim habet voluntatis , & ut absolute velit . Quæ autem in singulis quibusque sub eadem constitutis specie perspicuntur , ad naturam spectant , non ad personam ac hypostasim . Non autem homines idipsum , aut eadem voluntate ratione , quamobrem vis quidem voluntatis ac velle simpliciter ad naturam pertinet : velle autem hoc aliquid , ac sic velle , diversum est in unaquaque persona , ac velut accidens hypostaticum . Testem laudat *S. Joannem Chrysost.* Homila XIV. in Epistolam ad Hebræos dicentem : *Voluntas quidem incatum quiddam est , ac a Deo : talis autem*

voluntas nostra, ac nostri iudicii est.

Præterea. Si quidem Voluntatis ipsa facultas ad personam pertinet; sicut Filius diversa est persona a Patre, ita etiam diversa erit ab eo voluntatis.

Item. „ Quæ naturæ sunt, non egent doctrina. Nullus enim docetur esurire, sitire, dormire, respirare: sic neque quis docetur velle, sed sic tali modo velle, id est bene aut male, ac hoc aliquid docetur velle. Non enim divina lex velle docet, quippe cum hoc nobis a natura sit datum a Deo: sed docet bene velle, ac hoc aliquid velle. Ergo velle quidem ad naturam pertinet; hoc autem, aut sic velle, ad hypostasim, ac diversum est, præterquam in Sancta Trinitate.

Denique. „ Facti sumus ad Dei imaginem, quia intellectus ac arbitrii libera facultate præditi. Si quidem ergo Christus non mentem ac liberam voluntatem, neque quod est ad imaginem assumpsit.

Duas vero esse in Christo operationes rursus ita probat S. Joannes Damasc. „ Actio naturalis est cujusque substantiæ tam virtus, quam motio. Quid est ergo quamobrem Christus naturæ humanæ actionem non habet, cum præsertim sublata naturali cujusque actione, naturæ interitus consequatur? Si ergo non fuit in eo naturæ humanæ naturalis actio, ne natura quidem humana in eo fuit. Quorum enim naturæ diversæ sunt

„ CO-

„ eorum etiam tam voluntates , quam actio-
 „ nes differunt .

Ex Patribus quoque Latinis Monothelita-
 rum error confutatur , scilicet ex *S. Hilario*
 lib. 9. De Trinitate , quem locum *Agatho*
 Pontifex Maximus in sua Synodica laudavit .
 „ Natus igitur (inquit) unigenitus Deus ex
 „ Virgine homo , secundum plenitudinem
 „ temporum in semetipso provecturus in
 „ Deum hominem , hunc per omnia Evan-
 „ gelici Sermonis modum tenuit , ut se Fi-
 „ lium Dei credi doceret , & hominis Filium
 „ prædicari admoneret ; locutus & gerens ho-
 „ mo universa quæ Dei sunt : loquens dein-
 „ de & gerens Deus universa quæ hominis
 „ sunt : ita tamen ut in ipso illo utriusque ge-
 „ neris sermone numquam nisi cum significa-
 „ tione & hominis locutus sit , & Dei ; uno
 „ tamen Deo Patre semper ostenso , & se in
 „ natura unius Dei per nativitatis veritatem
 „ professio , & tamen se Deo Patri & Filii ho-
 „ nore , & hominis conditione subdente :
 „ cum & nativitas omnis se referat ad aucto-
 „ rem , & caro se universa secundum Deum
 „ profiteatur infirmam . Hinc itaque fallendi
 „ simplices atque ignorantes Hæreticis occa-
 „ sio est , ut quæ ab eo secundum hominem
 „ dicta sunt , dicta esse secundum naturæ di-
 „ vinæ infirmitatem mentiantur : Et quia ,
 „ unus atque idem est loquens omnia , quæ
 „ loquitur , de semetipso omnia eum locutum
 „ esse , contendant Nostri igitur causa hæc

„ omnia Jesus Christus manens , & corporis
 „ nostri homo natus , secundum consuetudi-
 „ nem naturæ nostræ locutus est : non tamen
 „ omittens naturæ suæ esse quod Deus est .
 „ nam tametsi in partu , ac passione , ac mor-
 „ te naturæ nostræ rem peregerit , res tamen
 „ ipsas omnes virtute naturæ suæ gessit ; dum
 „ sibi ipsi origo nascendi est , dum pati vult ,
 „ quod eum pati non licet ; dum moritur , qui
 „ vivit . Et tamen cum hæc Deus per homi-
 „ nem agit ex se natus , & per se passus , &
 „ ex se mortuus , non & hominem se non egit ,
 „ dum & natus , & passus , & mortuus est .

S. etiam *Ambrosii* testimonio , *lib. 2. De Fi-
 de ad Gratianum cap. 3.* eadem hæresis refel-
 litur : quod quidem ab *Agathone* Pontifice
 Maximo in Epistola Synodica laudatum est : „
 „ Suscipit ergo (inquit) voluntatem meam ,
 „ suscipit tristitiam meam , confidenter tristi-
 „ tiam nomino , quia Crucem prædico . Mea
 „ est voluntas , quam suam dixit ; quia ut ho-
 „ mo suscepit tristitiam meam , ut homo lo-
 „ cutus , & ideo ait : Non sicut ego volo ,
 „ sed sicut tu vis . Mea est tristitia , quam meo
 „ suscepit affectu .

Et *Cap. 4.* „ Æqualis in Dei forma , minor
 „ in susceptione carnis & hominis passione .
 „ Nam quomodo eadem posset minor esse
 „ æqualisque natura ? Quomodo autem , si
 „ minor est , eadem similiter facit , quæ Pa-
 „ ter facit ? Nam quemadmodum eadem ope-

„ ratio diversæ esset potestatis ? Numquid sic
 „ potest minor , quemadmodum major ope-
 „ rari ? Aut una operatio potest esse : ubi di-
 „ versa substantia est ?

Et in Cap. S. Lucæ 22. „ Suam (inquit)
 „ ad hominem retulit ; Patris ad Divinitatem.
 „ Voluntas enim hominis naturalis ; voluntas
 „ Divinitatis æternæ .

Refellitur eadem hæresis ex S. *Augustino* ,
 lib. 3. contra *Maximum* , cap. 20. qui locus
 ab Agathone laudatus est . „ Ubi autem dixit
 „ Filius Patri : Verum non quod ego volo ,
 „ sed quod tu vis : Quid te adjuvat quod tua
 „ verba subjungis , & dicis : Ostendit vere
 „ suam voluntatem subjectam suo Genitori :
 „ Quasi nos negemus hominis voluntatem
 „ voluntati Dei esse debere subjectam . Nam
 „ ex natura hominis hoc dixisse Dominum ,
 „ cito videt , qui locum ipsum Evangelii
 „ paullo attentius intuetur . Ibi enim dixit :
 „ Tristis est anima mea , usque ad mortem .
 „ Numquid ex natura unici Verbi posset hoc
 „ dici ? Sed homo , qui putas naturam ge-
 „ mere Spiritus Sancti , cur non etiam natu-
 „ ram Verbi Dei unigeniti tristem dicas esse
 „ potuisse ? Ille tamen ne quid tale dicere-
 „ tur , non ait , Tristis sum ; quamvis etiam
 „ si hoc dixisset , nonnisi ex natura hominis
 „ oportuisset intelligi , sed ait : Tristis est
 „ anima mea ; quam sicut homo utique habe-
 „ bat humanam . Quamquam & in hoc quod
 „ ait : Non quod ego volo , aliud se ostendit

„ voluisse , quam Pater , quod nisi humano
 „ corde non posset; cum infirmitatem nostram
 „ in suum , non divinum , sed humanum
 „ transfigureret affectum . Homine quippe
 „ non assumpto , nullo modo Patri diceret
 „ unicum Verbum : Non quod ego volo .
 „ Numquam enim posset immutabilis illa na-
 „ tura quidquam aliud velle , quam Pater .

Et lib. 5. adversus *Julianum* Pelagianum ,
 quid sit voluntas , his definit verbis : „ Motus
 „ animi quid est nisi motus naturæ ? Animus
 „ enim sine dubitatione natura est ? Proinde
 „ voluntas motus est naturæ , quoniam motus
 „ est animi . *Et ibidem* : Ab illo est voluntas
 „ cujus est voluntas ab Angelo , scilicet vo-
 „ luntas Angeli ; ab homine hominis ; a Deo
 „ Dei ; & si operatur Deus in homine volun-
 „ tatem bonam ; id agit ut oriatur ab illa bo-
 „ na voluntas , cujus est voluntas . . Cur er-
 „ go negas clausis oculis res apertas de natura
 „ hominis exoriri hominis voluntatem ? *Quo*
 „ *ex principio ita ratiocinatur Agatho* . Qui-
 „ bus testimoniis claret unamquamque earum
 „ quas hic spiritualis Pater dimuneravit natu-
 „ ras , propriam naturalem habere & unicui-
 „ que assignari debere voluntatem . Neque
 „ enim poterit Angelica natura divinam ha-
 „ bere voluntatem ; aut humanam : neque
 „ humana natura voluntatem Dei , aut An-
 „ geli . Cum hæc ita veritas habeat , certissime
 „ claret , quod in Domino nostro Jesu Chri-
 „ sto duas , id est , Dei & hominis naturas ,
 „ five

„ five substantias confessi in unam ejus con-
 „ venisse subsistentiam five personam, necesse
 „ est & duas nos naturales in eo fateri volun-
 „ tates, divinam scilicet & humanam, quia
 „ neque Divinitatem ejus, quantum ad na-
 „ turæ rationem pertinet, humanam habuisse
 „ voluntatem dicendum est; neque humani-
 „ tatem ejus divinam habuisse naturaliter vo-
 „ luntatem credendum est.

Refellitur eadem Hæresis ex *S. Leone* in
 Epistola ad *Flavianum*. Cap. 4. „ Sicut Deus
 „ (inquit) non mutatur miseratione, ita ho-
 „ mo non consumitur dignitate. Agit enim
 „ utraque forma cum alterius communione
 „ quod proprium est, Verbo scilicet operan-
 „ te quod Verbi est, & carne exequente quod
 „ carnis est. Unum horum corulcat miracu-
 „ lis, aliud succumbit injuriis, & sicut Ver-
 „ bum ab æqualitate Paternæ gloriæ non re-
 „ cessit, ita caro naturam nostri generis non
 „ reliquit.

Et in Epistola ad Leonem Augustum; *Se-*
cundum quidem formam Dei, inquit, *ipse &*
Pater unum sunt. Secundum autem servi for-
mam, non venit facere voluntatem suam, sed
voluntatem ejus qui misit eum. Ex quibus col-
 ligit *Martinus I.* in Synodo Romana, *S. Leo-*
nem duas Christi voluntates agnovisse, secun-
 dum naturas duas dicendo voluntatem formæ
 servi, quæ est humana ejus voluntas, & di-
 cendo voluntatem ejus qui misit eum, quæ
 secundum naturam divina est.

In eadem Epistola, utriusque naturæ proprias operationes diserte distinguit S. Leo., „ Licet ergo (inquit) in uno Domino Jesu „ Christo, vero Dei atque hominis Filio, „ Verbi & carnis una persona sit, quæ inseparabiliter atque indivise communes habeat actiones; intelligendæ tamen sunt ipsorum operum qualitates, & sinceræ Fidei contemplatione cernendum est, ad quæ provehatur humilitas carnis, & ad quæ inclinetur altitudo Divinitatis. Quid sit quod caro sine Verbo non agit; & quid sit quod Verbum sine carne non efficit. Sine verbi enim potentia, nec conciperet caro, nec pareret; & sine veritate carnis obvoluta infantia non jaceret. Sine Verbi potentia non adorarent Magi puerum, Stella indice declaratum; & sine veritate carnis non juberetur in Ægyptum transferri puer, & ab Herodis persecutione subduci. Sine Verbi potentia non diceret vox missa de Cælo; Hic est Filius meus dilectus, in quo mihi bene complacui, ipsum audite. Et sine veritate carnis non protektaretur Joannes; Ecce Agnus Dei, ecce qui tollit peccatum Mundi. Sine Verbi potentia non fieret redintegratio debilium, & vivificatio mortuorum: & sine veritate carnis nec cibus jejuno, nec somnus esset necessarius fatigato. Postremo sine Verbi potentia non se Dominus Patri profiteretur æqualem, & sine veritate carnis non idem diceret Patrem se esse majorem. Ce-

Ceteros Patres, quorum testimoniis Monothelitarum hæresis evertitur, appellare nolum, ne sim immensus. Quæ enim protuli testimonia, sufficiunt ad demonstrandum Catholicum dogma de duabus Christi voluntatibus & operationibus, non solum ex Scripturis Sacris, sed etiam ex Traditione Ecclesiæ docuisse, & contra Monothelitas definivisse, cum in Synodo Lateranensi, Præsidente *Martino I.* Sanctissimo Pontifice, tum in Synodo *VI. Oecumenica Actione XVIII.* in qua Definitio Fidei edita est, quæ Christianis omnibus confitendum decernit. „ Unum eundemque „ Christum Filium Dei Unigenitum, in duabus naturis, inconfuse, inconvertibiliter, inseparabiliter, indivise cognoscendum, nusquam extincta harum naturarum differentia, propter unionem, salvataque magis proprietate utriusque naturæ & in unam personam & subsistentiam concurrente, non in duas personas partitum, vel divilum, sed unum eundemque unigenitum Filium Deum Verbum Dominum Jesum Christum, juxta quod olim Prophetæ de eo: & ipse nos Dominus Jesus Christus erudit, & Sanctorum Patrum nobis tradidit Symbolum: & duas naturales voluntates in eo, & duas naturales operationes, indivise, inconvertibiliter, inseparabiliter, inconfuse, secundum Sanctorum Patrum doctrinam prædicandas.

In Concilio vero Lateranensi sub *Martino I.*
Con-

Consultatione V. editi fuerant hi contra Monothelitas Anathematismi . „ Si quis secundum

„ Sanctos Patres non confitetur proprie & secundum veritatem , duas unius ejusdemque
 „ Christi Dei nostri operationes cohærenter unitas , divinam & humanam , ab eo , quod
 „ per utramque ejus naturam operator naturaliter idem existit nostræ salutis , condemnatus sit .

„ Si quis secundum scelerosos hæreticos unam Christi Dei nostri voluntatem confitetur , & unam operationem in peremptionem Sanctorum Patrum confessionis , & abnegationem ejusdem Salvatoris nostri Dispensationis , condemnatus sit .

„ Si quis secundum scelerosos hæreticos , in Christo Deo , in unitate substantialiter salvatis , & a SS. Patribus nostris pie prædicatis duabus voluntatibus , & duabus operationibus divina & humana , contra doctrinam Patrum unam voluntatem atque unam operationem confitetur , condemnatus sit .

„ Si quis , secundum scelerosos hæreticos , Deivirilem operationem , quam Græci dicunt *θεοειρηνη* , unam operationem insipienter iuscipit , non autem duplicem esse confitetur secundum Sanctos Patres , hoc est , divinam & humanam , aut ipsam Deivirilis quæ posita est , novam vocabuli designationem , unius esse designativam ; sed non utriusque mirificæ & gloriosæ unitio-
 „ nis

„ nis demonstrativam , condemnatus sit .

Post Synodum VI. Conc. Toletanum XIV. anno 684. Canone 8. idem dogma Catholicum confirmavit . „

Unus igitur (inquit) in

„ utraque natura consistens , & Divinitatis si-

„ gnis effulget , & humanitatis passionibus

„ subjacet . Nec enim alter ex Patre , alter

„ ex Matre est genitus , cum tamen aliter

„ de Padre , aliter de Matre sit natus : ipse

„ tamen in utroque naturarum genere non

„ divisus , sed unus idemque Dei & hominis

„ Filius : ipse vivit moriens , ipse moritur

„ vivens , habens ex Deitatis natura non pos-

„ se mori : habens ex humanitatis substantia

„ & mole posse mori . Ex una immortalis

„ habetur ; ex altera mortalium conditione

„ resolvitur : habens in æterna Divinitatis

„ voluntate quo susceptum hominem sume-

„ ret : habens in suscepti hominis voluntate

„ ut humana voluntas Deo subdita esset . Un-

„ de & ipse dicit ad Patrem : Pater , non

„ mea voluntas , sed tua fiat ; alteram vide-

„ licet ostendens voluntatem : qua susceptus

„ est homo ; alteram hominis , qua obedi-

„ dum est Deo . . . Et ideo secundum harum

„ duarum differentiam naturarum , quarum

„ quoque inseparabilium proprietates prædi-

„ candæ sunt voluntatum & operum .

Obiciebant Monothelitæ S. Dyonisii aucto-

ritatem in Epistola ad Cajum : *Unam esse in*

Christo Deivirilem operationem asserentis :

Respondet Martinus I. in Concilio Latera-

nensi

nensi Monothelitas hunc *S. Dyonisii* locum
 interpolasse. Id esse familiare Hæreticis, ut
 SS. Patrum testimonia violarent, iisque abu-
 terentur. Ipsiſ convenire hæc verba *Jeremia*,
 cap. 16. „ Et post hæc mittam eis multos ve-
 „ natores, & venabuntur eos de omni mon-
 „ te, de omni colle & de cavernis petrarum
 „ quia oculi mei super omnes vias eorum:
 „ *Sunt* enim foramina petrarum (inquit *S.*
 „ Pontifex) ipsæ Sanctorum Patrum de Chri-
 „ ſto mysticæ traditiones. Conantur namque
 „ & in his foraminibus dolose se abscondere
 „ Hæretici, ut putentur sanctissimi, & non
 „ scelerosi parvulis. „ Addit, malas eorum
 artes in præsentiarum manifestatas, siqui-
 dem relecto *S. Dyonisii* testimonio, falsi
 convicti sunt. „ Nam illo asserente *Novam*
 „ *quandam Dei virilem operationem*, *Cyrus*
 „ & *Sergius novam in viam* mutarunt. At
 „ non unam, secundum illos, ostendere
 „ volens operationem *S. Dionysius*, sed du-
 „ plicem duplicis naturæ, compositivo fer-
 „ mone abusus est, duas unius ejusdemque
 „ in unitate operationes ostendens. Et ideo
 „ prudentissime ait: Neque secundum Deum
 „ divina operatus, neque secundum homi-
 „ nem humana: Summam nobis unionem
 „ denuntians sicuti naturarum, ita & ejusdem
 „ naturalium operationum: quoniam summæ
 „ unionis est proprium, per immutationem
 „ sublimiter operari utraque, id est eundem
 „ humane divina & divine humana, Nec
 „ enim

„ enim nuda Deitate divina , neque pura hu-
 „ manitate humana , sed per carnem quidem
 „ intellectualiter animatam , atque unitam
 „ eidem substantialiter , operabatur sublimi-
 „ ter miracula ; & iterum per potestatem
 „ validissima vivificarum ejus passionum
 „ sponte pro nobis experimentum suscipie-
 „ bat , ut & unionem ostendat , & differen-
 „ tiam innotescat. Et unionem quidem , per
 „ alteram ostensionem sive conglomeratio-
 „ nem operationum suarum ; differentiam au-
 „ tem ex conservatione naturalis proprietatis.
 „ Hoc enim erat , secundum quod ait Doctor ,
 „ omnium novitatum supereminens novitas .

Pyrrhus Monothelia , & alii *S. Dionysii* lo-
 cum sincerum & integrum adversus Catho-
 licum dogma proferebant , qui sic habet :
 „ Etenim , ut uno verbo dicamus , ne homo
 „ quidem erat : non quod non esset homo ,
 „ sed quod ex hominibus ultra homines exi-
 „ steret , ac supra hominem revera esset ho-
 „ mo , qui non secundum Deum divina gessit ,
 „ nec humana secundum hominem : Verum
 „ Deo viro facto , novam quamdam Deivi-
 „ rilem nobis operationem expressit in vita .

Respondet *S. Maximus* „ *S. Dionysium*
 „ his verbis unam operationem non signifi-
 „ care , cum novitas qualitas sit : sed novum
 „ & arcanum modum demonstrationis opera-
 „ tionum naturalium Christi , & novam at-
 „ que admirabilem , ac naturæ rerum igno-
 „ tam conversationem inexplicabilem & ar-

„ ca-

„ canam : Si autem unam operationem de-
 „ clarat illa vox , aliam operationem præter
 „ operationem Patris habebit Christus , ut
 „ Deus : Siquidem operatio Patris non est
 „ Theandrica, id est Dei virilis, quæ nimirum
 „ naturam Dei virilem signat , & constituit.
 „ Operatio enim quæ naturalis est , naturam
 „ testatur , & character naturalis ejus est .

Respondet secundo *S. Maximus* in scholiis
 ad Epistolam IV. *S. Dionysii* , Theandricæ
 nomine operationis unum tantum genus ope-
 rationum Christi significari . Triplex namque
 distinguit in eo genus operationum , sicut &
Sophronius Patriarcha Hierosolymitanus , in
Synodica . Siquidem nonnullæ sunt , quas per
 solam naturam divinam operatur , ut est Mun-
 di creatio , & conservatio , & miraculum quo
 puerum Centurionis absens sanavit . Aliæ
 sunt soli humanæ naturæ peculiares, ut edere,
 bibere , flere , pati . Aliæ sunt mixtæ in quibus
 agit utraque natura ; ut cum solo tactu cura-
 bat ægros , vel mare pedibus ambulando cal-
 cabat . In istis enim partim divinum aliquid
 inest , partim humanum . Tertium autem il-
 lud operationum genus voce illa *Dei virilis*
operationis designari *S. Maximus* asserit .

Respondet pariter *S. Joannes Damascenus*
 in Oratione de duabus Christi voluntatibus :
S. Dionysium , cum *Novam quamdam Dei*
virilem operationem , in Christo asseruit , uni-
 cam operationem non significasse , sed mo-
 dum singularem operationum Christi : „ Quæ-

„ cum

„ cumque (inquit) humana voluntate voluit
 „ ac egit, ſalus Mundi fuerunt . Non enim
 „ divino more agebat divina (haud quippe
 „ Dei nudi & ſine carne ut contactu ac ma-
 „ num extensione miracula patraret) nec
 „ more humano agebat humana ; nec enim
 „ ita comparatum eſt , ut puri hominis paſſio-
 „ nes Mundo ſalutem allaturæ ſint . Sed cum
 „ Deus eſſet , ac factus eſſet homo , novam
 „ quamdam ac inauditam actionem Dei ac
 „ hominis edidit : Divinam quidem, ſed quæ
 „ humana operaretur : Humanam, ſed quæ
 „ divina miniſtraret, quæque Divinitatis ſi-
 „ bi conjunctæ ſigna præ ſe ferret . Quemad-
 „ modum enim ignis & ferri diverſa eſt natu-
 „ ra, aliaque & alia munera & actiones : ne-
 „ que enim ignis ſecat, ſed incendit ac illu-
 „ minat ea vi agendi, quam tribuit ei natu-
 „ ra : neque rurfus ferrum ſic a natura com-
 „ paratum eſt, ut urat, aut illuminet, ſed
 „ ipſum ſecat, ac nigrum eſt . Cum autem
 „ ea conjuncta fuerint, conjuncte jam ac in-
 „ diſiſe ſuum munus utrumque exequitur .
 „ Simul enim cum ſectione exiſtit uſtio ;
 „ ignisque ferri adminiculo tum incendit,
 „ tum illuminat . Cum interim non una ſit
 „ naturalis actio, ſed duæ ; una ignis, qua
 „ urit ; altera ferri, qua ſecat : ac utriuſque
 „ effectus proprius eſt ; ignis quidem uſtio,
 „ ferri autem ſectio . Sic in Domino noſtro
 „ Jeſu Chriſto agebat utraque natura cum al-
 „ terius commixtione quod proprium erat :
 „ cum

„ cum interea nec una duæ essent , nec dua-
 „ rum una esset effectio ac officium : sed hu-
 „ manæ ejus naturæ divino esset libere im-
 „ perio ac voluntati obedire , atque servire,
 „ suæque voluntate manum porrigere , &
 „ tangere puellam , obsequendo (inquam)
 „ voluntati divinæ : Deitatis autem contactu
 „ efficacis esset suscitatio puellæ . Quocirca
 „ nec magnus Dionysius Dei & hominis
 „ actionem dixit , sed simpliciter Novam ,
 „ id est , inusitatam . Utraque enim inusita-
 „ ta erat , ac divino - humana . Neque enim
 „ illis verbis numerum expressit , sed modum
 „ inusitatum .

Objiciebat *Pyrrhus* testimonium *S. Athanasii* in libro *de salutari Adventu Christi* , dicentis : „ Ille vir natus est ex muliere , qui
 „ ex prima creatione sibi formam hominis
 „ erexit , & excitavit in ostensione carnis ;
 „ sed sine voluntatibus carnalibus , & sine
 „ humanis cogitationibus , in imagine novi-
 „ tatis : Voluntas enim erat solius Divini-
 „ tatis .

Respondet *S. Maximus* , Testimonium illud ita clarum esse , ut interpretatione non indigeat . Non enim de ratione naturali Christi loquitur *Athanasius* ; sed de modo quo secundum carnem extitit Deus Verbum : cum vellet demonstrare incarnationem fuisse opus divinæ & solius voluntatis , complacente Deo Patre , ac per se operante Filio , ac cooperante Spiritu Sancto ; non autem opus motus

carnalis , & cogitationum humanarum , id est , ordinis & consecutionis nuptialis . Non enim rationem naturæ novavit factus homo , qui erat Deus universorum : quoniam nec fuisset homo , qui non habuisset perfectam & immutabilem in omnibus rationem naturæ : sed modum , id est , conceptum e semine , & ortum per corruptionem . Rationes igitur naturales unitorum non negaverunt divini Ecclesiæ Doctores ; quin potius consentientes cum Evangelistis , & Apostolis , atque Prophetis , Dominum nostrum & Deum Jesum Christum ambabus naturis suis salutem nostram voluisse , & operatum esse dixerunt . Hæc *S. Maximus* .

Cum idem *S. Athanasii* testimonium *Marcarius* objecisset , *Theophanes* Presbyter & Abbas , Actione octava VI. Synodi , respondit : „ Si testimonium quod detruncastis , in „ integro posuissetis , inveniebatur quod car- „ nales voluntates & humanas cogitationes „ culpabiles & voluptuosas accepit S. Pater „ Athanas. quæ ex seminatione diabolica illa- „ tæ sunt humanæ naturæ , sicut idem San- „ ctissimus Pater superius asseruit . Nam & „ ego dico non habuisse Dominum nostrum „ Jesum Christum , verum Deum nostrum ex „ superfatione voluntatem carnalem , aut pec- „ cabiles cogitationes ; absit : Sed naturalem „ voluntatem , quam ipse Deus creans Adam , „ ei indidit .

Objiciebat *Pyrrhus* testimonium *S. Grego-*
D
rii

rii Nazianz. *Oratione 2. de Filio*, dicentis : *Velle enim illius in nulla re erat Deo contrarium, totum deificatum*. Quibus ex verbis colligebat unam esse tantum in Christo voluntatem.

Respondet *S. Maximus*, contrarium colligi ex isto testimonio. Sicut enim inflammatio inflammatum & inflammantem secum infert, & refrigeratio refrigeratum & refrigerantem; intelligentia intelligentem & rem intellectam, quia non potest habitudo sine duobus terminis intelligi, aut dici; sic consequenter deificans & deificatum. Præterea, inquit *S. Maximus*, si voluntatis deificatio est contraria duabus voluntatibus, (sicut isti sentiunt) deificatio etiam naturæ erit contraria duabus naturis: utrobique enim posuit *Gregorius* idem verbum deificationis. Secundo, Voluntas deificata non est voluntas divina. Quod enim natura divinum est, deificari non indiget: quod vero deificatur, non est profecto natura divinum (inquit *Agatho* in sua Synodica.)

Obiciebant Monothelitæ *S. Gregorii Nysseni* testimonium, contra *Eunomium* scribentis: *Ita Divinitatem per corpus quod induit, communem omnium salutem operari, ut propria sit carnis perperessio, Dei vero sit operatio*.

Respondet *S. Maximus*, Passiones carnis, siue affectiones operationum censerì numero, quamvis creatis in rebus passionum vocabulo potius significantur, quia creatæ res omnes

eo ipso patiuntur, quo moventur; quia scilicet alterius moventis impressionem admittunt, & in se recipiunt. Notat itaque *S. Maximus* in Disputatione cum *Pyrrho*; „ Sanctos „ Patres variis nominibus affecisse humanæ „ naturæ motionem, prout ejus diversæ no- „ tiones postulabant. Appellarunt ipsam & „ facultatem, & operationem, & differen- „ tiam, & motionem, & proprietatem, & „ qualitatem, & passionem. Hanc autem „ usurparunt, non quatenus opponitur divi- „ næ; sed quatenus quidem continet ac con- „ servat, & est immutabilis, eam facultatem „ nominarunt: Quatenus vero character est „ & nota propria, quæ in omnibus eadem „ comprehensibilis specie invariabilem quam- „ dam rationem ostendit, energiam voca- „ runt. Ut autem distinguit ac discernit, „ differentiam. Ut indicandi vim habet, „ motionem. Ut constituit, ac soli ipsi, & „ non alteri naturæ inest, proprietatem. Ut „ speciem facit, qualitatem. Ut movetur, „ passionem nuncuparunt. Etenim omnia „ quæ ex Deo sunt, & post Deum, eo ipso „ patiuntur, quo moventur: utpote quæ non „ sunt ipsa motio, ipsaque vis, ac virtus.

Secundo, *SS. Maximus & Joannes De- masc.* ille in Disputatione cum *Pyrrho*, hic lib. 3. De Fide Orthodoxa cap. 15. argumentum quod ex hoc *S. Gregorii Nysseni* loco Monothelitæ conficiebant, in ipsos retorquent. Si enim propterea una Christi operatio esse de-

bet, quod operatio sit solius Divinitatis, passio vero humanitatis; pariter colligendum erit unicam esse in Christo naturam, scilicet divinam, quæ sola est operatrix, cum humana patibilis potius dicenda sit.

Obiciebant Monothelitæ S. Cyrilli testimonium, *Lib. 4: Commentariorum in Joannem*, dicentis: *Christum unam cognatam operationem per ambas ostendisse.*

Respondet S. Maximus in disputatione cum Pyrrho: Non pugnare ullo modo hanc auctoritatem cum duabus operationibus; sed contra, eas defendere. Non enim dixit *Unam naturalem operationem Divinitatis Christi, & humanitatis ejus*: alioqui non dixisset alibi: *Auctoris & operis eandem esse operationem numquam aliquis sanæ mentis concesserit.* Sed potius illud dixit, cum vellet demonstrare unam esse Divinitatis sine carne, & cum carne operationem; sicut si quispiam unam esse ignis operationem cum materia, & sine materia ostendere volens, diceret ignem cum materia, & sine materia urere. „ Sic „ Pater Cyrillus non dixit unam operationem „ duarum naturarum, sed unam operationem „ dixit divinam & paternam, quæ essentialiter in Verbo Deo incarnato inerat; quæ „ non solum jussu suo omnium rerum effectore, miracula incorporaliter faciebat, „ sicut ipse ait (siquidem etiam post incarnationem habebat eandem operationem „ cum Patre incorporee operante) sed tactu „ etiam propriæ carnis hæc ipsa miracula cor- „ pora-

„ poraliter ostendebat. Hoc enim significat,
 „ quod ait; Per ambas; ut vita reddita puel-
 „ læ per Verbum & iustum omnia operantem,
 „ vel aspectus cæco restitutus, vel mandatio
 „ leprosi, vel benedictio panum, cognatio-
 „ nem haberet secundum naturam cum ope-
 „ ratione per tactum corporee consummata,
 „ ut demonstraret carnem quoque esse vivifi-
 „ cam, quia ejus proprie erat; & non alte-
 „ rius, propter summam cum ea unionem.
 „ Per utraque enim hæc: per iustum, inquam,
 „ & tactum, divina operatio in ipsis rebus
 „ apparebat, nequaquam naturalem opera-
 „ tionem carnis naturæ nostræ humanæ, &
 „ patientem lædens, sed contra potius etiam
 „ conservans ad propriam manifestationem.
 „ Sicut & anima tamquam per instrumentum
 „ proprii corporis, & per naturalem opera-
 „ tionem ejus, ea quæ sibi propria sunt, &
 „ suam operationem naturalem profert. Ex-
 „ tensio enim manus, & tactus, & mixtio
 „ luti manu facta, ac fractio panis, & de-
 „ nique id omne quod manu, vel alio mem-
 „ bro fiebat, naturalis operationis humani-
 „ tatis Christi erat, qua tamquam homo ipse
 „ natura Deus operator erat, & divina natu-
 „ raliter operabatur, ut per utraque, (divi-
 „ na scilicet & humana) utraque secundum
 „ naturam probaret, perfectum Deum, &
 „ perfectum hominem, absque solo peccato
 „ se vere esse ostendens. Non igitur ignora-
 „ vit Pater Cyrillus proprietatem præcipuam

„ uniuscujusque naturæ , & eam quæ alias
 „ naturales proprietates comprehendit ; ope-
 „ rationem dico creatricem & vivificatricem
 „ ex anima corpori ejus impartitam , quas
 „ Verbum incarnatum servans in seipso , sin-
 „ ceras , & non confusas demonstravit .

Respondet secundo *S. Maximus in Episto-
 la ad Nicandrum* : Unam & eandem a *S. Cy-
 rillo* vocari actionem duarum naturarum , &
 cognatam , propter arctissimam earum unio-
 nem , qua fit , ut quemadmodum natura ho-
 minis assumpta , sic hujus actio divina sit , &
 Verbi propria . Itaque in idem opus , cujus-
 modi erat mortui ad vitam revocatio , vel vi-
 sus restitutio , ambo concurrebant , ab eadem
 persona , diversis ex pricipiis manantes .
 „ Quamobrem (inquit) unam dico ejus , &
 „ sanctæ carnis , & cognatam per ambo ope-
 „ rationem monstrare , unam quidem unione,
 „ cognatam vero partibus , utpote quæ ejus-
 „ dem fuerit in omnium efficiente imperio
 „ & tactu sanctæ carnis . Per ambo enim
 „ hanc operationem magnifice ostendebat ,
 „ tamquam Deus , monstrans vivificando
 „ per eam , quod ipsa caro facta est per to-
 „ tum vivifica : Sicuti ignis per ferrum urens,
 „ unione sua cum ipso ferro , ferrum reddit
 „ urendi vi præditum , ut deinceps non solius
 „ ignis secundum naturam sit adustio , sed
 „ etiam ipsius ferri , propter unionem : ac
 „ similiter divina Verbi in miraculis opera-
 „ tio , non sit ipsius Verbi tantum propter
 „ na-

„ naturam , sed sanctæ carnis propter unio-
 „ nem cum ipso secundum hypostasim . Eam
 „ enim adhibet sibi cooperariam in divinis ,
 „ ut ait Magister , sicut anima corpus suum
 „ adhibet ad perficienda opera sua .

Quod vero vocabulum *συγγενή* spectat ,
 docet ibidem S. Maximus , illa dici cognata
 a Patribus , tam quæ sunt ejusdem , quam quæ
 diversæ substantiæ , ut cum S. Gregorius Na-
 zianz. in Oratione funebri Cæsarii fratris , de
 anima quæ corpus resumet in Resurrectione ,
 sic loquitur : *Paullo post vero cum cognatam
 carnem receperit . Carnem vocat animæ cogna-
 tam , non propter naturam , sed propter unio-
 nem* (inquit S. Maximus .)

Oratione vero in Sancta Lumina de unige-
 nito Filio loquens : *A cognato* , inquit , *Spi-
 ritu Sancto contestatus* . Ibi cognatum propter
 naturam , non propter unionem dixit . San-
 ctus autem Cyrillus hanc vocem iis etiam ac-
 comodat , quæ substantia & hypostasi distin-
 guuntur . In Commentariis enim in S. Joan-
 nem loquens de curatione quæ fit per Baptis-
 mum , ait ipsam *cognitionem habere cum cor-
 pore & Spiritu . Spiritu quidem sanctificare
 spiritum hominis , aqua vero corpus* .

Obiciebant Monothelitæ : Quemadmodum
 instrumenti , & ejus quod movet , una est
 operatio , sic Divinitatis & humanitatis una
 itidem est operatio .

Respondet S. Maximus , apud Euthimium
 in Panoplia Tit. 18. , Si vos quidem instru-
 „ men-

„ mentum naturale esse dicitis Verbum , ex
„ opinione vestra , carni erit æquale tempo-
„ re ; vel caro erit coæterna Verbo . Quid-
„ quid enim naturali utitur instrumento , ha-
„ bet hoc æquale tempore ; quemadmo-
„ dum corpus anima . Ac jam tempus est
„ ut naturam Divinam inter creaturas nu-
„ meretis ; aut certe corpus esse dicatis
„ increatum . Quod si instrumentum arti-
„ ficiale esse statuitis , inanimum hoc esse
„ vultis , ac separatim consistens , & divi-
„ sum , nec perpetuo motum , sed tunc solum
„ cum operanti id in manus sumere , & ope-
„ rari visum fuerit . Ac demum vel cum in-
„ sano Nestorio idem vos ostenditis sapere ,
„ qui naturas duas in eandem Christi hypo-
„ stasim , unamque personam convenientes
„ divisit ac disjuxit . Vel Apollinaris impii
„ discipulos vos esse prodetis , qui Christi
„ corpus animæ ac mentis expers assererat
„ esse . Naturalis nomine instrumenti , con-
„ junctum omne instrumentum non intellexit
Sanctus Maximus , sed illud tantum quod in
„ naturæ unitatem convenit , sive quod eandem
„ cum alio naturam componit , sicut corpus ho-
„ minis naturam cum anima constituit , & manus
„ naturæ humanæ integritatem cum ceteris par-
„ tibus componit . Hoc autem sensu natura hu-
„ mana Christi naturalis Verbo dici non potest ,
„ sive naturale illius instrumentum . Siquidem
„ non eandem cum eo naturam constituit , ne-
„ que propriam ipsius naturam induit , sed hy-
po-

posita si dumtaxat cum illo copulatur . Negat itaque *Sanctus Maximus* , eodem modo humanam naturam instrumentum esse Verbi , quo corpus animæ , vel securis artificis instrumentum est . Hujusmodi quippe instrumenta nihil ex se & citra principalis causæ motio- nem operantur . At natura hominis sic ad agen- dum adhibita est a Verbo , ut per se aliquid conferret ad opus .

Respondeo secundo , Unam esse instrumen- ti , & ejus a quo movetur , operationem ; si sermo sit de actione quæ instrumento imprimi- tur ex motivo alterius , qua ad idem opus oc- currit : non autem si sermo sit de actione in- strumenti , quæ ex propria ejus forma oritur . Quamvis itaque una esset operatio naturæ hu- manæ ac divinæ , quatenus humana natura ad opera creaturæ captu majora adhibebatur , & movebatur a Verbo , verbi gratia , illumina- tionem cæci , aut mortui suscitationem : quædam tamen operatio propria erat hominis , ex ipsius natura sive forma progrediens , puta tangere , spuerè , loqui , velle etiam & im- perare humana voluntate . Lege *Sanctum Tho- mam* , III. P. Q. XIX. Articulo I.

Objiciebat *Pyrrhus* in Disputatione cum *Sancto Maximo* : Christus unus est : ergo tam- quam unus omnino volebat . Igitur unica est Christi voluntas , non duæ .

Respondet *Sanctus Maximus* , negando con- secutionem : Quia licet Christus sit unus , est tamen natura Deus & homo . Volebat igitur
Chri,

Christus ut Deus & homo . Dupliciter itaque, & non uno modo volebat, licet unus esset . Etenim si nihil aliud est Christus præter naturas suas, ex quibus, & in quibus est : perspicuum est quod convenienter naturis suis Christus, id est, ut unaquæque apta nata erat, & volebat, & operabatur . Erant autem duæ naturæ ejus : duæ igitur voluntates ejus naturales, & quæ cum ipsis numero totidem sunt substantiarum operationes . Sicut enim numerus naturam unius & ejusdem Christi, si pie intelligatur, & dicatur, non dividit Christum, sed differentiam naturarum etiam in unione custodiri demonstrat : sic numerus voluntatum & operationum, quæ secundum substantiam in ejus naturis insunt, non divisionem inducit, sed earum etiam in unione custodiam tantum & incolumitatem declarat .

Instabat *Pyrrhus* . Voluntates secum inferunt volentes : Si igitur duæ sunt voluntates in Christo, unus non erit Christus .

Respondet *Sanctus Maximus*, negando principium, cui ratiocinium istud nititur . Si enim inquit, concedatur inferri cum voluntatibus volentes, reciproca consecutione inferentur cum volentibus voluntates, eritque in Deo una hypostasis, quia una est in eo voluntas : tres vero voluntates, quia tres sunt personæ, ac proinde tres naturæ . Siquidem, secundum definitiones & regulas Patrum, differentia voluntatum differentiam infert naturarum .

Ur-

Urgebat *Pyrrhus*. Si velle naturæ est, cum Patres dixerint, unam esse Dei, & Sanctorum voluntatem; una erit Sanctorum, & Dei natura.

Respondet *Sanctus Maximus*, distinguendam illam propositionem propter homonymiam vocum. Voluntas enim dici solet vis volendi quæ volenti inest, & causa volendi, seu objectum quod est extra volentem. Igitur cum Patres unam Dei & Sanctorum voluntatem esse dixerunt, substantialem Dei voluntatem & effectricem, seu vim volendi in Deo non intellexerunt; quia sic intelligendo, non solum Sanctos ejusdem cum Deo naturæ fecissent, sed etiam sibi ipsis repugnassent, cum diserte scripserint; *Non posse diversas substantias communem habere voluntatem*. Spectarunt igitur rem volitam; atque ita secundum causam, sive (ut quibusdam loqui placeat, per abusum) voluntatem appellaverunt Patres eam rem quam quis vult.

Objiciebat *Pyrrhus*. Si velle naturæ est, a nobis ipsis, & ab aliis natura dissidemus; immo & infinities mutamus naturam: Siquidem voluntatibus a nobis ipsis, & ab aliis dissidemus, & nunc quidem hoc volumus, nunc autem illud nolumus.

Respondet *Sanctus Maximus*, modum quidem volendi, quo ab aliis dissidemus, infinities mutari, non ipsam voluntatis naturam. Non enim est idem velle, inquit, & aliquo modo velle. Sicut non est idem videre, & ali-

aliquo modo videre . Nam velle , sicut & videre , naturæ est , & omnibus , qui ejusdem naturæ sunt , inest . At vero aliquo modo velle , sicut aliquo modo videre ; id est , velle deambulare , & nolle deambulare ; videre ad dexteram , vel ad lævam , vel ad libidinem , vel ad perspicientiam rationum , quæ in rebus insunt , modi sunt utendi voluntate & aspectu ; & hic modus inest utenti tantum , & ab aliis eum distinguit secundum differentiam communiter dictam . Si autem ipsam naturam habemus hoc testantem : igitur velle comedere , & nolle comedere , non tollit illud velle quod naturæ est , sed velle aliquo modo ; id est , eorum quæ volumus est ortus & interitus . Neque enim si ponamus , quæ a Deo facta sunt , quæ sunt ea quæ ipse voluit interire ; cum his etiam voluntas , quæ ante ea cogitatur , & est eorum effectrix secundum substantiam , simul interibit . Hæc S. Maximus .


FINIS.

DISSERTATIO

D E

TERRENO, ET MILLENARIO
CHRISTI REGNO

CONTRA CERINTHUM.





DISSERTATIO,

QUA REFELLITUR ERROR CERINTHI DE TERRENO
ET MILLENARIO CHRISTI REGNO .



IC error refellitur Scripturæ sacræ auctoritate : nam Cerinthus carnis voluptates in millenario Christi regno fruendas asserbat ; Scriptura vero contrarium decernit ipsius Christi voce Matth.22. *In resurrectione , neque nubent , neque nubentur ; sed erunt sicut Angeli Dei .* 2. Regnum Christi futurum æternum, Angelus Virginem adiens nuntiavit: *Regnabit in domo Jacob in æternum , & regni ejus non erit finis .* Ergo mille annis non est circumscribendum cum Cerintho , nec terrenum existimandum . 3. Matth.24. & 25. post enarratam Antichristi persecutionem , statim ultimum describitur judicium , in quo Christus Electos ad æternum regnum invitabit , non ad terrenum : *Venite benedicti Patris mei , possidete paratum vobis regnum a constitutione mundi . . . Et ibunt hi in vitam æternam .*

Idem Ecclesia definiuit in Concilio secun-

do Œcumenico , Constantinopolitano primo ,
quod Symbolo Nicæno addidit , *Cujus regni non
erit finis* ,

Probatur secundo ex Patribus , qui hunc
errorem oppugnarunt . Ex Cajo perantiquo
Scriptore , apud Eusebium lib. 3. Historiæ Ec-
clesiasticæ cap. 22. „ Cerinthus , *inquit* , qui
„ per adumbratas revelationum , tamquam a
„ magno quodam Apostolo conscriptarum spe-
„ cies , absurda portenta , præstigialque quasi
„ per Angelos ipsi ostentatas , nobis falso com-
„ miniscebatur , hæc asseveranter introducit ;
„ post resurrectionem carnis humanæ , regnum
„ Christi terrestre futurum , & apud Hierusa-
„ lem homines in carne cupiditatum & volu-
„ ptatum blanditiis inservituros . Qui cum sa-
„ cro sanctis Dei eloquiis esset infestus , nu-
„ merum mille annorum in nuptiarum festis &
„ celebritate dicebat consumptum iri .

Ex S. Dionysio Alexandrino lib. de Pro-
missionibus : „ Cerinthum quidem , qui Ce-
„ rinthianam hæresim ab ipsius nomine sic di-
„ ctam profeminavit , hoc disciplinæ decre-
„ tum tenuisse constat , regnum Christi terre-
„ stre deinceps futurum . Et quarum rerum cu-
„ piditate ipse ducebatur (quippe qui invita-
„ mentis corporis , & carnis cum primis obse-
„ queretur illecebris) in eisdem beatam vitam
„ fore somniavit , ut in ventris , & earum
„ partium , quæ ad Venerem spectant , exple-
„ tione ; hoc est , non in esculentis solum ,
„ poculentis , & nuptiis , verum etiam in fe-
„ stis ,

CONTRA CERINTHUM .

§

„ stis , sacrificiis , hostiarum cæde , & aliis
 „ denique rebus , quibus ista putaret affluen-
 „ tius posse suppeditari .

In eodem libro Nepotem præsertim quem-
 dam in Ægypto Episcopum Dionysius Alexan-
 drin. refellit , qui Cerinthi errorem instaurare
 visus est : quippe qui *Promissa in sacris Scri-*
pturis sanctis viris factitata , in hoc sæculo ,
sicuti Judæi somniant , præstanda fore docuit ,
hominibusque persuadere laboravit , eos certo
quodam millenario annorum numero in deliciis
corporeis , & voluptate , in terra victuros , ut
 refert Euseb. lib.7. c.19. Porro de Nepotis li-
 bro , quem confutandum aggreditur , ita scri-
 bit Dionys. „ Verum , *inquit* , cum opus scri-
 „ ptum nobis objectum sit , illudque (ut qui-
 „ busdam placet) ad persuadendum valentissi-
 „ mum ; cumque Doctores ejus sectæ Legem
 „ & Prophetas pro nihilo putent , Evangelia
 „ sequi negligant , Apostolorum Epistolas de-
 „ pravent , hujus tamen Operis , quod dixi ,
 „ doctrinam , tamquam magnum aliquod &
 „ abstrusum mysterium complectentem asseve-
 „ rant ; cumque Fratres nostros aliquanto sim-
 „ pliciores , & magis imperitos , de sublimi
 „ & admirando opere gloriosi , vereque divi-
 „ ni Domini nostri adventus , vel nostræ a
 „ mortuis resurrectionis , vel cum Domino
 „ conjunctionis , consociationisque , & ad ejus
 „ immortalem naturam assimilationis , non ali-
 „ quando cogitare sinant , sed illis persuadere
 „ conentur in regno Dei abjecta , & mortalia

„ præmia (qualia ab hominibus in hac vita ex-
 „ pectare solemus) tandem futura : nobis cer-
 „ te necessum arbitror adversus istum Fratrem,
 „ quem dico, Nepotem, perinde ac si præ-
 „ sto adesset, acuta ratione disceptare.

Refellitur tertio idem error ex Eusebio
 lib. 3. Historiæ Eccles. cap. 33. ubi de S. Papiæ
 Commentariis agens, hæc habet : „ Alia præ-
 „ terea idem Auctor, quasi traditione non
 „ scripta, ad se pervenisse commonstrat, quæ
 „ peregrinas quasdam Servatoris parabolas &
 „ novas ejus doctrinas, aliaque nonnulla com-
 „ mentitiis fabulis referta continent. In qui-
 „ bus asserit, regnum Christi post universæ
 „ carnis a mortuis resurrectionem, mille an-
 „ nos, humano & corporeo more, in terra
 „ hac continuatum & stabilitum fore. Quæ
 „ quidem dogmata, credo eum propterea ex-
 „ cepisse, quod Apostolicas interpretationes,
 „ quæ ab illis essent arcanis figuris, & parabolis
 „ suboscure expositæ, male intellexisset.

Refellitur quarto ex S. Hieronymo in Præ-
 fat. lib. 18. Commentariorum in Isaiam. „ Apo-
 „ calypsim Joannis, *inquit*, si juxta litteram
 „ accipimus, judaizandum est; si spirituali-
 „ ter, ut scripta est, disserimus, multorum
 „ Veterum videbimur opinioni contraire; La-
 „ tinorum, Tertulliani, Victorini, Lactan-
 „ tii: Græcorum, ut ceteros omittam, Ire-
 „ næi tantum Lugdunensis Episcopi faciam
 „ mentionem: adversus quem vir eloquentif-
 „ simus Dionysius, Alexandria Pontifex, ele-
 „ gan,

„ gantem scribit librum irridens mille annorum
 „ fabulam , & auream atque gemmatam in
 „ terris Jerusalem , instaurationem Templi ,
 „ hostiarum sanguinem , otium Sabbati , cir-
 „ cumcisionis injuriam , nuptias , partus , libe-
 „ rorum educationem , epularum delicias , &
 „ cunctarum gentium servitutem : rursusque
 „ bella , exercitus , ac triumphos , & supe-
 „ ratorum neces , mortemque centenarii Pec-
 „ catoris ; cui duobus voluminibus respondit
 „ Apollinarius , quem non solum suæ sectæ
 „ homines , sed & nostrorum in hac parte
 „ dumtaxat plurima sequitur multitudo ; ut
 „ præfaga mente jam cernam , quantum in me
 „ rabies concitanda sit . Quibus non invideo ,
 „ si tantum amant terram , ut in regno Christi
 „ terrena desiderent , & post ciborum abun-
 „ dantiam , gulæque ac ventris ingluviem , &
 „ ea quæ sub ventre sunt , quærant .

Quinto S. Epiphanius Hæresi 77. hunc er-
 rorem , ab Apollinari suscitatum , refellit his
 verbis : „ Nam si denuo ut circumcidamur re-
 „ surgimus , cur non circumcisionem antever-
 „ timus ? Sane qui in hac vita idipsum quod
 „ perfectum habetur , cognoverint , & tanto
 „ ante usurpare cœperint , luculentius ad fu-
 „ turam illam perfectionem obtinendam jus na-
 „ tæ sunt . Quorsum igitur ab Apostolo di-
 „ ctum est : Si circumcidamini , Christus nihil
 „ vobis proderit ? Item : Qui in lege iustifi-
 „ camini , a gratia excidistis . Tum illud etiam
 „ Servatoris dictum : In resurrectione enim

„ neque ducunt uxores , neque nubunt ; sed
 „ æquales sunt Angelis . Quod autem scriptum
 „ est : Sedebitis ad mensam Patris mei , co-
 „ medentes & bibentes . Et , cum illud bi-
 „ bam novum vobiscum in regno cælorum ;
 „ ex eo quod additur , novum , & ad mensam
 „ regni , alio sensu accipiendum illud videtur .
 „ Quippe & nos id quod e sacris didicimus ,
 „ potum ac cibum quemdam illic ambrosium
 „ esse defendimus , de quibus scriptum est :
 „ Quæ oculus non vidit , nec auris audiit , ne-
 „ que in cor hominis ascenderunt , quæ præ-
 „ paravit Deus diligentibus se .

„ Sed ita ille statuit ; primum , in toto
 „ illo millenario curriculo , naturalibus nos vo-
 „ luptatibus esse fruituros , labore omni ac
 „ dolore sublato . Quo quidem evoluta tempo-
 „ re , eorum quæ dicta sunt , participes futu-
 „ ros ; quod hæc verba declarant : Quæ nec
 „ oculus vidit , nec auris audivit .

„ Verum hic illorum sermo omnibus Scri-
 „ pturæ sententiis repugnat . Cum enim Lex
 „ neminem perfectum reddiderit , & eandem
 „ tamen Legem post resurrectionem observare
 „ nos jubeant ; cumque sancta illa Lex , quam
 „ per Moysen Dominus nobis edidit , pæda-
 „ gogi nos instar ad Christum perduxerit , cui,
 „ quod longe absolutis illis ac perfectis esset
 „ inferior , datum negotium est , ut nos ad
 „ excellentius illud , ac velut caput , sum-
 „ mumque deduceret : cum post hæc Christus
 „ perfectus ille ac Dominus advenerit , ac de

„ pæ-

„ pædagogi manu alumnum ac tyronem , hoc
„ est collectam è Fidelibus Ecclesiam , velut
„ quamdam virginem acceperit ; adeo ut præ-
„ stantiorum aliorum , nimirum consummatorem
„ Jesum ; Legis , sic tamquam pædagogi ,
„ beneficio cognoverimus : nonne summa ex
„ ingenii inopia ac stultitia profectum est ,
„ quod ab illius dogmatis patronis asseritur ;
„ post collatam illam a Christo perfectionem ,
„ pædagoگو iterum opus esse , ut ad priora
„ illa initia & elementa , doctrinamque , ac
„ manuum impositionem revertamur ? Cum
„ tamen Apostolus diserte non doceat : Quid-
„ quid inveteratum est , ac senio confectum ,
„ proxime ad interitum spectare : quod de
„ Veteri Testamento , ac Lege pronuntiavit .
„ Translato enim (inquit) Sacerdotio , ne-
„ cessario fit & Legis translatio . Quare cum
„ Vetere Testamento translato Novum instau-
„ ratum fuerit ; quis est audacia tanta prædi-
„ tus , qui Vetus ad usum denuo revocare
„ contendat , Novum autem ad vetustatem
„ transferre ; ut & causam nobis præbeat
„ cur excidamus a gratia ; & ab eo fructu ,
„ qui per Christum nobis comparatus est , ver-
„ tere conetur ?

Sexto , refellitur hic error auctoritate
S. Augustini lib. 20. de Civit. Dei , cap. 7. ubi
recensita Millenariorum sententia , & verbis
Apocalypsis , quibus eam propugnabant , hæc
subjungit : „ Quæ opinio esset utcumque tole-
„ rabilis , si aliquæ delitiæ spirituales in illo

„ Sabbato affuturæ Sanctis per Domini præsen-
 „ tiam crederentur . Nam etiam nos hoc opi-
 „ nati fuimus aliquando . Sed cum eos qui
 „ tunc resurrexerint , dicant immoderatissimis
 „ carnalibus epulis vacaturos , in quibus cibus
 „ sit tantus ac potus , ut non solum nullam
 „ modestiam teneant , sed modum quoque
 „ ipsius credulitatis excedant , nullo modo
 „ ista possunt nisi a carnalibus credi . Hi au-
 „ tem qui spiritales sunt , istos ista credentes ,
 „ *Χίλιους* appellant Græco vocabulo ; quod
 „ verbum è verbo exprimentes , nos possumus
 „ Milliariorum nuncupare .

Objicitur in gratiam Cerinthi , ex Apo-
 calypsis 20. ubi regnum Christi millenarium
 cum Sanctis diserte adstrui videtur his verbis :
 „ Et vidi Angelum descendantem de cælo ,
 „ habentem clavem abyssi , & catenam ma-
 „ gnam in manu sua . Et apprehendit draco-
 „ nem , serpentem antiquum , qui est Diabo-
 „ lus & Satanus , & ligavit eum per annos mil-
 „ le ; & misit eum in Abyssum , & clausit ,
 „ & signavit super illum , ut non seducat am-
 „ plius gentes , donec consummentur mille
 „ anni : & post hæc oportet illum solvi modi-
 „ co tempore . Et vidi sedes , & sederunt su-
 „ per eas , & iudicium datum est illis : & ani-
 „ mas decollatorum propter testimonium Jesu ,
 „ & propter Verbum Dei , & qui non adora-
 „ verunt bestiam , neque imaginem ejus , nec
 „ acceperunt characterem ejus in frontibus ,
 „ aut in manibus suis , & vixerunt , donec
 „ con-

„ consummentur mille anni . Hæc est resurre-
„ ctio prima . Beatus & Sanctus , qui habet
„ partem in resurrectione prima : in his secun-
„ da mors non habet potestatem , sed erunt
„ Sacerdotes Dei , & Christi , & regnabunt
„ cum illo mille annis . Et cum consummati fue-
„ rint mille anni , solvetur Satanas de Car-
„ cere suo , & exhibit , & seducet gentes quæ
„ sunt super quatuor angulos terræ Gog & Ma-
„ gog , &c. „ Ex quibus sic colligo . Christi
regnum , in quo Sancti mille annis cum illo re-
gnabunt , & Sacerdotes erunt , immolando vi-
ctimas , & libando sanguinem hostiarum post
resurrectionem , illud ipsum est millenarium
Christi regnum , quod admittit Cerinthus : at-
qui istud adstruitur citatis verbis Apocalypsis :
ergo non est erroris damnanda Cerinthi & Mil-
lenariorum opinio .

Resp. nego min. & interpretor obscurissi-
mum Apocalypsis oraculum , ex doctrina præ-
sertim S. Augustini lib.20. de Civitate Dei ,
cap.7. Mille anni , quibus Sancti cum Chri-
sto regnabunt , tempus designat universum a
morte Christi ad usque Antichristi adventum de-
currens ; seu totam Ecclesiæ per Christum in
terris fundatæ durationem . Millenarius nam-
que numerus solemni Scripturæ phrasi multitu-
dinem maximam atque indefinitam significat ,
ut *Psal.104.* „ Memor fuit in sæculum testa-
„ menti sui , verbi quod mandavit in mille ge-
„ nerationes ; *Et Psal.80.* Mille anni ante ocu-
„ los tuos , tamquam dies hesternæ , quæ præ-

„ teriit . *Et Job. 9.* Si voluerit contendere cum
 „ eo , non poterit ei respondere unum pro mil-
 „ le . *Hinc S. Augustinus loc. cit. ait :* Mille
 „ annos , pro annis omnibus hujus sæculi po-
 „ fuit , ut perfecto numero notaretur ipsa tem-
 „ poris plenitudo .

Itaque Christus ille magni consilii Angelus,
 de cælo descendens diabolum per annos mille
 alligavit , id est toto illo temporis intervallo ,
 quod ab ejus passione ad finem mundi inter-
 cedit : quia nimirum ejus *potestatem ab eis se-*
ducendis ac possidendis , qui fuerant liberandi ,
cohibuit atque frænavit , ut exponit S. August.
Et misit illum in Abissum (inquit S. Joannes)
 id est in corda hominum impiorum , ejiciendo
 ipsum ex gentium electarum finibus , in quibus
 antea per idolatriam regnabat . Missus autem
 illuc dicitur a Christo non quod ibi antea non
 esset , sed *Quia exclusus a credentibus , plus*
cæpit impios possidere : Plus namque possidetur
a diabolo , qui non solum alienatus est a Deo ,
verum etiam gratis odit servientes Deo , inquit
 S. Augustinus . *Et clausit & signavit super eum,*
ut non seducat amplius gentes , (inquit dilectus
 discipulus) id est compressit ejus ferociam ,
 ipsumque cohibuit , ne seduceret amplius gen-
 tes . Ex quibus prædestinata constat Ecclesia ,
 quas antea seductas tenebat , antequam esset Ec-
 clesia , inquit S. Augustinus . *Et clausit & si-*
gnavit (pergit S. Joannes) quia occultum esse
 voluit , qui pertineant ad partem diaboli , &
 qui non pertineant . Hoc quippe in sæculo isto
 pror-

prorsus latet ; quia & qui videtur stare , utrum sit casurus , & qui videtur jacere , utrum sit resurrecturus , incertum est . (ex S. Augustino .)

*Post hac oportet eum solvi modico tempore (inquit S. Joannes) id est completo millenario , seu mundo ad finem vergente , & ultimi judicii die imminente , solvetur Diabolus , ut per Antichristum persecutionem excitet in Ecclesiam , Deo permittente , qualis ab initio non fuit . Modicum autem dicitur tempus , quo solvendus est . , Nam tribus annis , & sex mensibus legitur totis suis , suorumque viribus sæviturus : & tales erunt , cum quibus ei belligerandum est , ut vinci tanto ejus impetu , insidiisque non possint . Si autem numquam solveretur , minus appareret maligna ejus potentia , minus sanctæ civitatis fidelissima patientia probaretur , minus denique perspiceretur , quam magno ejus malo tam bene fuerit usus omnipotens Deus , qui eum nec omnino abstulit a tentatione Sanctorum , quamvis ab eorum interioribus omnibus , ubi in Deum creditur , foras missum ; ut foris secus ejus oppugnatione proficerent ; & in eis , qui sunt ex parte ipsius alligavit , ne quantam posset effundendo & exercendo malitiam , innumerabiles infirmos , ex quibus Ecclesiam multiplicari & impleri oportebat , alios credituros , alios jam credentes , fide pietatis hos deterreret , hos frangeret . Et solvetur in fine , ut quam fortem adversarium Dei civitas superayerit , cum ingenti
„ glo-*

„ gloria sui Redemptoris , Adjutoris , Libe-
 „ ratoris aspiciat „. *Ita S. August. lib.20. de*
Civitate Dei cap.8.

Ait autem S. Joannes , Sanctos , qui judi-
 ciariæ potestatis honore a Christo exornati sunt
 & Mertyrum præcipue animas , qui non adora-
 verunt bestiam , id est Antichristo non cesse-
 runt , aut infidelium , impiorumque populo
 consensere , nec acceperunt inscriptionem be-
 stiæ , *Notam scilicet criminis , in fronte , pro-*
pter professionem ; in manu propter operationem
(ut ait S. Augustinus) regnasse cum Christo
mille annis : id est intra illud temporis interval-
lum , quod judicium ultimum præcedet . Re-
gnant autem cum Christo , non in regno terre-
no , sed spirituali , scilicet in Ecclesia quæ re-
gnum cælorum dicitur . Regnant , inquam ,
cum illo , qui eo modo sunt in regno ejus , ut sint
etiam ipsi regnum ejus .

Quod autem addit S. Joannes, *Ceteri mor-*
tuorum non vixerunt , donec consummentur mille
anni ad reprobos spectat , qui eo tempore , non
 vixerunt in Christo quo vivere debuerunt , de
 morte peccati ad vitam gratiæ transeundo. Hæc
 resurrectio prima est ; id est resurrectio animæ .
 Beatus , qui ejus est participes . In hoc secun-
 da mors ; quæ est æterna damnatio , non habet
 potestatem . Ille autem particeps est primæ re-
 surrectionis , *Qui non solum a morte , quæ in*
peccatis est , reviviscit , verum etiam in eo
quod revixerit , remanebit , inquit S. Augusti-
 nus cap.9. lib.20. de Civitate Dei .

De-

Denique quod addit S. Joannes : *Sed erunt Sacerdotes Dei & Christi* , non significat Sanctos ministeria Sacerdotum legalium obituros , offerendo sacrificia & victimas , secundum legem Mosaicam : sed innuit ipsos fore intimos Dei amicos , divinorum conscios arcanorum , regnique cælestis Principes . Sæpiissime enim in Scriptura sacra nomen Sacerdotis nomen est dignitatis & honoris in aulis Principum , ut cum 2. Reg. 20. dicitur : *Ira autem Jairites , erat Sacerdos David* : id est (ut vertit Paraphrastes Chaldæus) *Princeps David* . Et capit. 8. ejusdem libri dicitur : *Filii autem David Sacerdotes erant* ; id est , ut vertunt LXX. *Aulæ Principes* . Quam versionem juvat locus ex 1. Paral. cap. 17. in Vulgata nostra : *Porro filii David primi ad manum Regis* . Vel Sancti vocantur *Sacerdotes* , quod jure laudis & gratiarum actionis sacrificium Deo & Christo offerant ; vel denique Sacerdotes dicuntur , quia *Membra sunt unius Sacerdotis* . De quibus Apostolus Petrus : *Plebs* , inquit , *sancta , regale Sacerdotium* . Sic exponit S. Augustinus lib. 20. de Civitate Dei , cap. 10. Igitur citatum Apocalypsis oraculum , Cerinthi & Millenariorum errori nullatenus suffragatur .

Instabis . Regnum illud Christi , de quo vaticinatur S. Joannes in Apocalypsi , subsequetur postremum judicium : ergo Sancti regnabunt cum Christo mille annis , post finem mundi .

Resp. nego antec. Illa enim verba *Vidi sedes , & sedentes super eas , & judicium datum est* ,

est, de ultimo iudicio nihil cogit ut intelligantur, *Sed sedes Præpositorum, & ipsi Præpositi intelligendi sunt, per quos Ecclesia nunc gubernatur. Iudicium autem datum, nullum melius accipiendum videtur, quam id dictum est: Quæ ligaveritis in terra, ligata erunt & in calo: & quæ solveritis in terra, soluta erunt & in calo.* Sic exponit S. Augustinus lib.20. de Civitate Dei, cap.9.

Objicitur 2. Ea sententia non est damnanda erroris, quam Patres priorum sæculorum propugnarunt. Atqui Patres priorum sæculorum, sententiam Cerinthi de millenario Christi regno propugnarunt: ergo illa sententia non est erroris infirmulanda.

Prob. minor. In illa enim sententia fuisse S. Papiam constat ex Eusebio l.3. Hist. Eccles. cap.33. & ex S. Hieron. in Catal. Scriptorum Ecclesiasticorum in *Papia*. Huic suffragantur S. Justinus Martyr. in Dialogo cum Tryphone pag.306. S. Irenæus lib.5. adversus Hæreses, cap.32. & seqq. Tertullianus lib. de Spe Fidelium, ut testatur S. Hieronymus in cap.36. Ezechielis, qui Tertulliani liber non extat, & lib.3. adversus Marcionem, cap.24. & S. Victorinus Petabionensis Episcopus, teste S. Hieronymo, & Lactantius Firmianus lib.7. Divinarum Institutionum, cap.24. & 26. & Severus Sulpitius in Dialogo, cui *Gallio* nomen imposuit, ut S. Hieronymus testatur.

Respondeo, istos Patres in hoc erasse, deceptosque fuisse apochryphis Domini Sermone-

ni-

nibus , quos Papias conscripserat , *vir ingenii* quidem *pertenuis* , ut ex ejus libris judicavit Eusebius , sed tamen ob convictum & familiaritatem cum discipulis Apostolorum , & seniore præsertim Joanne , necnon martyrii coronam , venerationem maximam apud Patres prioris ævi promeritus . Verum statim atque innotuit hos Domini Sermones a Papia obtrusos , apocryphos esse , Patres omnes illam millenarii regni Sanctorum cum Christo assertionem exploserunt & confutarunt , ut constat ex S. Dionysio Alexand. Euseb. Hieron. Epiph. August. quibus addendus est S. Basilius Magnus , Epistola 74. ad Occidentales Episcopos , ubi hunc in Apollinario errorem infectatur his verbis :
„ Scripsit & de resurrectione quædam fabulose ,
„ se , immo judaice composita ; in quibus dicit ,
„ nos iterum ad cultum a lege præscriptum reversiones ; ita ut iterum & circumcidamur ,
„ & Sabbatum observemus , & cibis in lege prohibitis abstinemus , sacrificiaque
„ Deo offeramus , & in Templo Jerosolymis adoremus ,
„ atque prorsus ex Christianis Judæi reddamur ; quibus quidnam poterit re-
„ diculum magis , immo alienus ab Evangelico
„ dogmate dici ?

Resp.2. citatos Patres longe aliter millenarium Christi regnum in terris intellexisse , & exposuisse , quam Cerinthum . Illi namque , nec Templi Hierosolymitani instaurationem , nec Circumcisionis , aliorumque legalium illo in regno futuram observantiam dixerunt , vel leviter

ter iusinuarunt . Quod proprium erat Cerinthi commentum , & singularis error . Nec credere par est Patres , qui apprime noverant Christum passum esse , ut nos maledicto Legis eriperet , existimasse iterum venturum , ut nos in ergastulum Legis detruderet : præsertim cum Apocalypsis , quæ ipsis erroris ansam præbuit , Templum in nova Jerusalem instaurandum non doceat : immo nullum in ea futurum Templum diserte asserat . *Et templum* , inquit , *non vidi in ea ; Dominus enim Deus Omnipotens Templum illius est , & Agnus .*

Deinde istud intercedit discriminis inter Cerinthum , & Patres Millenarios , quod Cerinthus in millenario illo Christi regno omne voluptatis corporeæ genus non solum admiserit , sed effusissimam libidinum omnium intemperiem : Patres vero delicias quidem corporeas illi Christi regno tribuerunt , sed moderatas , & quæ Sanctorum populum , Christique amicos decerent . Unde S. Hieronymus discrimen illud animadvertens , illorum Patrum sententiam non est ausus damnare erroris . Scribit namque in 19. Jeremiæ caput : „ Quamquam „ sibi Judæi auream atque gemmatam Jerusalem „ restituendam putent: rursumque victimas, sa- „ crificia , & conjugia Sanctorum , & regnum „ in terris Domini Salvatoris ; quæ licet non „ sequamur , tamen damnare non possumus , „ quia multi Ecclesiasticorum Virorum , & „ Martyres ista dixerunt : ut unusquisque in „ suo sensu abundet , & Domini cuncta iudicio „ reserventur . Et

Et S. *Augustinus* lib. 20. De Civitate Dei, cap. 7. duplicem Millenariorum sententiam fuisse docet : Primam eorum , qui spiritale penitus illud Regnum futurum esse contenderent , quam tolerabilem utcumque dicit sententiam , seque aliquando idem opinatum fuisse fatetur : alteram prorsus ridiculam eorum , qui Regnum illud fœdissimis delitiis diffluens sperarent aliquando constituendum .

Instabis ex Tertulliano libro de *Præscriptionibus Hæreticorum* , cap. 31. *Id esse Dominicum , & verum , quod est prius traditum : id autem extraneum & falsum , quod sit posterius immixtum .* Atqui sententia de millenario in terris Christi regno prius tradita est , siquidem illam Patres priorum sæculorum docuerunt : ergo illa sententia est Dominica , & vera .

Resp. nego minorem . Illud enim traditum censetur : *Quod semper , quod ubique , quod ab omnibus traditum est* , ut ait Vincentius Lirinensis in Commonitorio . Atqui nec semper , nec ubique , nec ab omnibus illa sententia de millenario in terris Christi regno tradita est primis etiam Ecclesiæ sæculis , siquidem S. Justinus martyr in Dialogo cum Tryphone testatur multos huic sententiæ fuisse refregatos , qui christiane pieque sentirent . His verbis Tryphon quæstionem proposuerat Justino : „ Dic „ autem mihi verum , fatemini ne vos denuo „ instauratum locum hunc Jerusalem & populum vestrum congregatum , atque lætitia „ eve-

„ evectum iri , cum Christo simul & Patriar-
 „ chis & Prophetis , & his qui generis nostri
 „ sunt , aut etiam qui ad nos accesserunt , Pro-
 „ felytis , priusquam Christum adventurum
 „ expectatis; an ut videare nos superare in quæ-
 „ stionibus , eo decurris , ut ista non inficie-
 „ re ? *Huic respondit S. Justinus* : Non eo sum
 „ miseriæ redactus , o Trypho , ut alia quam
 „ sentio loquar . Confessus sum tibi & antea ,
 „ me quidem & alios plures eadem mecum
 „ sentientes arbitrari , id , sicut plane scitis ,
 „ futurum : multos vero etiam qui puræ , piæ-
 „ que sunt Christianorum sententiæ , hoc non
 „ agnoscere , tibi significavi .

S. vero Irenæus , qui hanc a Papia præ-
 ceptore suo opinionem acceperat , plurimos
 etiam ipsam oppugnasse testatur , quos hæreti-
 cos & ignaros perperam vocat . Cajus , &
 Dionysius Alexandrinus , eam ceu pestilentis-
 simum errorem confutarunt . Eusebius , Epi-
 phanius , Basilus , Hieronymus , August. aliique
 ipsam explosere . Non habet igitur veræ tradi-
 tionis characteres .

Deinde non omnes pro hoc errore citati
 ipsum eodem modo propugnant . Quidam enim
 mere corporeas , alii spirituales dumtaxat deli-
 cias in millenario illo Christi regno degustandas
 sunt arbitrati ; ut Tertul. qui hac de re ita scri-
 bit lib. 3. adversus Marcionem , c. 24. „ Nam
 „ & consistemus in terra nobis regnum repro-
 „ missum ; sed ante cælum , sed alio statu ,
 „ utpote post resurrectionem in mille annos , in
 „ Ci-

„ Civitate divini operis Jerusalem cælo delata ,
„ quam & Apostolus Matrem nostram sursum
„ designat ; & politeuma nostrum , id est ,
„ municipatum in cælis esse pronuntians , alicui
„ utique cælesti civitati eum deputat . Hanc
„ & Ezechiel novit , & Apostolus Joannes
„ vidit , & qui apud fidem nostram est , novæ
„ Prophetiæ sermo testatur , ut etiam effigiem
„ civitatis ante repræsentationem ejus conspe-
„ ctui futuram prædicarit Hanc dicimus
„ excipiendis resurrectione Sanctis , & refo-
„ vendis omnium bonorum utique spiritualium
„ copia , in compensationem eorum quæ in
„ sæculo vel despeximus , a Deo prospectam .
„ Siquidem , & justum & Deo dignum , illic
„ quoque exultare famulos ejus , ubi sunt &
„ afflicti in nomine ejus .

Objiciuntur verba Christi Matt.26. ubi sic
Apostolos in ultima Cæna sibi assidentes allo-
quitur . *Non bibam amodo de hoc genimine vi-
tis , usque in diem illum , cum illud bibam vo-
biscum novum in regno Patris mei* . In regno
itaque Christi , Sancti deliciis corporeis in cibo
& potu positis perfruentur .

Resp. primo , potum illum vini in regno
Dei metaphorice esse intelligendum , pro spi-
ritualium deliciarum fruitione , sicut & cetera
Scripturæ loca , in quibus de cibo & potu alte-
ra in vita mentio est , mystice sunt exponen-
da , ut illud Regii Vatis : „ Inebriabuntur ab
„ ubertate domus tuæ , & torrente voluptatis
„ potabis eos . *Et illud Christi , Lucæ 22. De-*
„ sice-

„ ſiderio deſideravi hoc Paſcha manducare
 „ vobiſcum , antequam patiar . Dico enim vo-
 „ biſ , quia ex hoc non manducabo illud , do-
 „ nec impleatur in regno Dei . *Et illud* : Ego
 „ diſpono vobiſ ſicut diſpoſuit mihi Pater
 „ meus regnum , ut edatiſ , & bibatiſ ſuper
 „ menſam meam in regno meo . *Ft illud Apo-*
 „ *cal. 19.* Beati qui ad cœnam nuptiarum Agni
 „ vocati ſunt . *Hinc Origenes millenarii Chri-*
 „ *ſti Regni opinionem inde natam docet* , Quod
 „ ſimpliciores quidam neſcientes diſtinguere , ac
 „ ſecernere quæ ſint in Scripturis Diviniſ inte-
 „ riori homini , quæ vero exteriori deputan-
 „ da , vocabulorum ſimilitudinibꝯ decepti ,
 „ ad ineptiã quãdam fabulas & figmenta ina-
 „ nia ſe contulerint ; ut etiam poſt reſurrectio-
 „ nem cibis corporalibꝯ utendum crederent ,
 „ potumque ſumendum non ſolum ex illa Vi-
 „ te vera , & vivente in ſæcula , verum & ex
 „ hiſ vitibꝯ ligni , . Hæc ille in Prologo
 Comment. in Cantica , ſimiliaque habet lib.2.
De Principiis , c.12.

Reſp.2. hæc verba ad illud temporis in-
 tervallum referenda eſſe , quod inter Chriſti re-
 ſurrectionem & triumphalem ejus in cæloſ
 aſcenſum interceſſit , quo cum Apoſtoliſ novo
 modo bibit de genimine vitis , & cum illiſ
 manducavit , ut ſuæ reſurrectioniſ veritatem
 probaret . Sic exponit S. Joannes Chryſoſto-
 mus Hom.83. in Matth. „ Novum autem , *in-*
 „ *quit* , hoc eſt novo modo quodam , immo
 „ inaudito atque mirabili : non enim paſſibile
 „ ha-

„ habens , sed immortale atque incorruptibi-
„ le , alimentoque non indigens surrexit . Qua-
„ re cum opus non erat , post resurrectionem
„ comedit & bibit , cum ejus corpus istis nullo
„ modo amplius indigeat , sed ut certiori ar-
„ gumento resurrectionem firmaret .

Resp. 3. per genimem vitis , Judæorum
fidem mystice significari , qua in regno Patris ,
id est in Ecclesia , Christus erat recreandus .
Ita S. Hieron. interpretatur in Comment. c. 26.
S. Matthæi : „ De Carnalibus , *inquit* , tran-
„ sit ad spiritualia: quod vinea in Ægypto trans-
„ plantata , sit populus Israel , cui per Jere-
„ miam Dominus loquitur ; Ego te plantavi
„ vineam veram , quomodo mutata es in ama-
„ ritudinem , vitis aliena ? Dicit ergo se Do-
„ minus de hac vinea nequaquam esse bibitu-
„ rum , nisi in regno Patris sui . Regnum Pa-
„ tris , fidem puto esse Credentium , Aposto-
„ lo quoque idipsum confirmante : Regnum
„ Dei intra vos est . Ergo cum Judæi recepe-
„ rint regnum Patris ; cum , inquam , credi-
„ derint in Deo Patre , & adduxerit eos Pater
„ ad Filium , tunc de vino eorum bibit Do-
„ minus , & in similitudinem Joseph regnantis
„ in Ægypto , inebriabitur cum fratribus suis .

F I N I S .

